

罪惟录 选辑

查继佐

文硕阁

wenshuoge.com

目录

关于我们	3
弁言	5
自序	6
罪惟录选辑一	7
罪惟录选辑二	50
罪惟录选辑三	82
罪惟录选辑附录	150

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

弁言

弁言

「罪惟录」，是一部明季查继佐撰着的「明史」。「四部丛刊」三编「史部」收有此书，影印自吴兴刘氏嘉业堂藏的手稿本。查氏（海宁人，字伊璜，自号东山钓史）在所作的「自序」（原题「东山自叙」）中，亦一如其另一着作「鲁春秋」（已刊列为「台湾文献丛刊」第一一八种），假托左尹非人氏为撰人；盖查氏曾遭清初南浔庄氏史狱之波累，因隐姓名以自晦。其书名「罪惟」者，亦即以此。但书中凡南明诸王，皆列入「本纪」，并撰有「郑成功」及「台湾」诸传；其惓惓故国之意，虽几罹重辟而不悔。兹选集南明诸纪及列传等篇，汇成这本「选辑」，列为「台湾文献丛刊」之一。书首加「东山自序」，书末编系一「附录」，载全书「卷目」（细目过繁不录）、「编印例言」与三篇跋文，藉以覘原书之梗概。

本书所辑，凡原文有讹误，亦同「鲁春秋」例，尽予订正（惟「鲁春秋」正文中鲁王勳旧林复斋之「林」误订为「沈」，本书仍其原字，并附此以正前失）；所补缺文残字，则加〔〕用示区别。又本书每於人名下注有「有传」或「自有传」等字样；或因原书未见其传，或因原书虽有传、但以越出「选辑」范围（後者以「叛逆列传」为多），故多从缺。（千祥）

自序

自序

左尹字非人，别号东山钓史。祖籍，系〔周灵〕王九年鲁襄公会吴於查之地。□□□□，伯禽苗裔。初，惠王时积功封□□□□於诸侯曰东安公，即今山东□□□□是也。历汉武帝元鼎中西□□□阳伯，何；历隋工部尚书、唐高祖武〔德中〕中书侍郎，仪；历唐僖宗广明中游〔击〕将军、进上柱国、赐紫飞鱼袋，居歙州，师〔诣〕；及乾符中宁州刺史死事，谥「忠烈」，城；又历南唐元宗保大中建州节度使、工部尚书，文徽；後出继南唐宣歙观察使，文徽；历宋初进士，直史馆龙图阁，加刑部郎制选事，进右司郎中，道；迄明洪武中仲元、新□、允中、国用、原善，皆开国经济名臣。而海昌恕，二十一年举人材入都；谙医理，愈帝疽，授太医院使：则尹十一世祖也。自是诗礼显融，为中原望族。尹生东山之麓，距始封七十七世云；具载列史及家乘、外记，不赘。

尹幼专治葩经，长独契尼山，窃取指义。左云者，以出姓自晦，实非「四传」中左氏遗系。按前左氏与宣圣同时，顾袭其名曰丘；亲望见无得而逾之日月，而二其名曰明。既以其言，附「春秋」为千古。後左氏与丘明不同谱，而因名得氏曰左；与曲阜不同里，而按籍而求曰东山。左非，东山亦非；非人，非其人也。乃亦欲以其言，附「春秋」与「传」为千古。所奇左氏距今二千余年，辄预以其姓藏尹之初名、预以其名著尹之今世，略似讎然，不可强也。

此书之作，始於甲申、成於壬子。中二十九年，寒暑晦明、风雨霜雪、舟车寢食、疾痛患难、水溢火焦、泥涂鼠啮，零落破损、整飭补修，手草易数十次、耳采经数千人；口哦而不闻声者几何件，掌示而不任舌者几何端。以较定、哀之微词，倍极辛苦。兼以他注误而连狱、方棊藏而无山。言之无罪者，大率不求文理，而妄指便是南箕事之直书者。其实不登律例，而据云准为铁案，使非知几早同负简，则又「西狩获麟」以前所未尝有此警□也。改书名为「罪惟」，天下之大，或犹有深原其故者。至於初讳为特昭之、初疑为特信之、初误为特正之、初轶为特存之、初彼此厄为特合之、初是非淆为特决之，所为取义在此；马、班以下，或几几商之也。

若夫「罪惟录」得复原题之日，是即左尹得复原姓名之日；静听之天而已！

罪惟录选辑一

罪惟录选辑一

纪

安宗简皇帝

鲁王监国（附）

唐主（附）

桂主（附）

韩主（附）

· 安宗简皇帝

安宗简皇帝，显皇帝孙、福王常洵世子也；名由松。福王初封怀庆，迁河南。崇祯十四年，贼自成陷河南，王被难；尚书吕维祺、承奉崔升死之。世子以宫眷，裸奔怀庆。及怀庆陷，与母邹太妃及继妃李氏出奔；半道失，单身依潞王卫辉。甲申三月，帝殉社稷，卫辉复不守，世子随潞王南奔。憩尉氏，遇周王故宫人童氏，呼共逆旅，客尉氏者四十日。童氏有娠，誓富贵毋忘。已而胎不举，与奔许州；得遇母太妃而李氏竟失。寻被劫，世子弃许复南奔；太妃、童氏再失。

夏四月，与潞、崇二王及周世孙共栖淮上。盖南都至是始得凶问，兵部尚书史可法、工部尚书高弘图、都御史张慎言、京畿道御史祁彪佳集诸臣中府，会议册立。国子祭酒姜曰广后至，曰：『今社稷为重矣』。彪佳、可法曰：『中兴之辟，非守文继体可办』。时潞王慈易有声，曰广移书凤阳巡抚马士英，略见立贤大意。而士英已先同南奔诸镇谒世子舟中，私诩翼戴；遂与诸镇黄得功、高杰等驰檄，谓福藩亲贵莫与京。於是魏国公徐弘基合诸臣笺迎世子浦口；既至，众议犹未决。吏部主事李沾曰：『有异议者，死殉之』！诚意伯刘孔昭、太监韩赞周力赞沾议。

五月之四日，福世子即监国位。谒享殿，行祭告礼；问懿文皇太子寝园，谒奉先殿。语及先帝，为泣下。以内守备府为行宫，百官行四拜礼；谦让再三，并述「未堪多难」之意。可法首进战守大计，请素服郊次，发师讨贼，示天下报雠大义；诸臣各上中兴大政数事。监国唯唯。

以姜曰广、高弘图、史可法、王铎皆原官，晋东阁大学士；而马士英以大学士兼兵

部尚书，都御史总督如故。张慎言为吏部尚书，吕大器、解学龙左右侍郎，周堪赓户部尚书，徐有范、张有誉左右侍郎。以张国维协理戎政尚书，贺世寿为刑部左侍郎，何应瑞工部左侍郎，刘士祯通政使，王廷梅应天府尹，郭维经为府丞。改李沾太常寺少卿，韩赞周为司礼太监。补科臣陈泰来等十一人（泰来及左懋第、李清、罗万象、姜应甲、张元始、辜朝荐、马嘉植、沈胤培、锺斗、熊开元），补吏部诸司华允诚等五人（允诚及倪嘉庆、叶廷秀、王重等），补兵部诸司李向中等四人（向中及吴奇伟、吴国龙、杨文荐），余各陞赏有差。起刘宗周原官左都御史，徐石麒以右佥都御史管左副都事，祁彪佳以右佥都御史安抚苏松。郑鸿逵为右都督佥事，镇守镇江等处；都督佥事黄蜚改镇九江口。

是月之望，阁臣士英不通群议，辄上尊号，监国即真。铸国宝，金代之。以明年为弘光元年，大赦。先是，金声以原官御史起用，疏请监国即军中设大行皇帝位，旦夕哀恸哭临；迨事定，而後即位。安抚彪佳与诚意孔昭复争之，不得。刘宗周在道，疏辞新衔；亦请暂称「行在」，决策亲征，驻师中都，以图进取。报闻。

改内官监卢九德为司礼监秉笔，提督京营；而忻城伯赵之龙总督京营戎政。晋宁南伯左良玉为侯；良玉受诏，不拜。以顾锡畴为礼部尚书，黄道周为吏部右侍郎兼翰林学士，高倬工部右侍郎，罗大任国子监祭酒，侯峒曾左通政使，郑瑄大理寺卿。以田仰巡抚淮扬，晋兵部右侍郎。楚抚何腾蛟，以兵部左侍郎总督川、湖、黔、郧。腾蛟感星纬之变，奏举朝臣工和衷体国，以回天意；且请练兵湖南北，以压宁南桀骜。从之。

诏潞王暂居杭州。

上熹宗张皇后尊谥及大行皇帝庙谥「思宗烈皇帝」。忻城之龙以「思」非美号，请改。尊福王恭皇帝、太妃邹氏皇太后。

礼部尚书锡畴荐吏部司官林胤昌、科臣瞿式耜并总镇陈洪范可北使。

释高墙罪宗七十五案、凡三百四十一人。

六月，建恭皇帝专庙。

设四镇将於江北；加封黄得功为靖南侯，封高杰兴平伯、刘泽清东平伯、刘良佐广昌伯填之。每兵三万，岁每本色米二十万石、折色银四十万两；分汛後，各属兵马钱粮悉听取用。凡恢一城，即为所辖。

起废科臣章正宸、熊汝霖、姜埰等，台臣徐殿臣、李之春等，九卿毕茂康等，共四十六员。起原任武德道雷演祚为按察使。立保举之法以通铨政，填危疆为守令。是

时诸贤响应，野无留隐，拭目太平。

贼献忠自长沙浮桥济师，陷夔州，连陷涪州。巡抚陈士奇捷忠州，再捷梁山，扼守重庆；力竭，城陷。瑞王阖宫被难，士奇及守道陈繻死之。贼以断手徇州县，疾陷成都。蜀王被难，新旧抚臣龙文光、徐可求咸死之。献忠僭尊号，伪称「大西」，改元「大顺」。时郡县殉难者：成都知府王行俭、南溪知县王硕辅、灌县知县左重、梓潼知县洪维翰、巴县知县王锡、资阳知县贺霍存、兴文教谕刘希文等。而总兵赵光远时已降贼，阁部士英误有所闻，犹请降敕奖之。

河南推官陈潜夫保周王南渡，巡道刘淦以贼逼，移驻项城。潜夫保杞，招土寇娄道一合平西将军刘洪起擒伪官安中外等五人；上捷，擢御史，即按河南。真定知府丘茂华复收所属城邑，间请疾援，不报。漕抚路振飞驻淮，与御史王燮集兵，走伪顺制将军董学礼於宿迁，百姓哄起杀之；复擒杀伪官吕弼周、王富、胡来贺、朱自成、李魁春及癸未进士武愬等以闻；并请亲征，愿为前驱。玺书褒慰。於是德州诸生谢陛以乡兵从原任辽抚黎玉田、御史卢世■〈彡 隹〉、贡士马元录追杀伪防御阎杰等一十八人，济宁都司李允和杀伪官刘濬、尹宗衡、张间行、傅龙等九人，驰捷南都；亦并褒答。主事监军凌駟南至临清，部乡健诡迎伪防御王皇极杀之，乘胜追斩伪官数人。报捷，且云：『南师宜守临清，权宜北好；合兵西伐，实作东防。臣足一动，临清以上便非我有。望兵如岁，万勿失时』。不省。时李贼初败，欲弃关中，下禹门。诏分汛，宁陵以东至归德，属总兵王之刚；以西至兰阳，属许定国；祥符以西至泛水，属刘洪起；河洛，属李际遇：颇有斩获。副将刘洪、郭从宽擒鄢陵伪官王度及许州伪巡捕王清，之刚斩伪都司虞世杰，洪起擒汝宁伪官祝永苞及上蔡伪令韦世遇，定国擒陈州伪官惠在一；各加级有差。会御史陈潜夫艰去，以凌駟代巡按河南，驻沈丘；北师悬兵科给事中招駟，駟不受。

以徐汧为少詹兼侍读学士。汧遗教当事：『贼不讨、仇不复，不书即位；「春秋」之义也。恐有为口实者矣』！且曰：『不能收君子之用，无以服小人之心』。

吏部尚书张慎言议：『北京南归诸臣，或系胁从，并宜酌用』。诚意伯孔昭私以拥戴功未录，譁於朝。御史王孙蕃讦孔昭干预。阁臣弘图、曰广以为文武各有职掌，宸陛几如讼庭，请罢；诏两解之。

传谕参将王之刚迎圣母於河南郭家寨常守义家。

秋七月，北师传檄至济宁，令官吏出迎。镇臣高杰议守河北以保江南，勿正视瓜、仪、浦、采为金陵门户。建阳知县蒋棻三请勤王，报闻。

时大兴工役，起沉木江中数千以为神。置「天财库」内廷，不关户部稽察。

北使副将唐起龙招抚江南，以摄政王书致可法，责以「故君未葬，新君不得即位」。可法引光武、昭烈、晋元、宋高故事以答；且曰：『鞠躬致命，所以为报也』。

晋勳臣徐弘基以下各官衔、级廕、禄赐有差。给事中罗万象首请严禁滥授，於是御史李模、刑部侍郎贺世寿等次第言之；报闻。

诚意伯孔昭奏：『封疆失事官，罪与逆案等』。御史陈良弼劾词臣项煜在逃混进。

兴平伯杰越汛以兵入妻子扬州，百姓虑其残，闭关噪杰，立杀乡绅郑元勳之袒杰者。靖南侯得功以兵格之；监军郎中万元吉驰温旨调和。

戎政张国维疏恢剿大略，并请罢输纳例；从之。詹事管绍宁奏请奉迎先帝梓宫及皇太子诸王万福、慰谕西北文武诸臣并劳苦总兵吴三桂；吏科马嘉植亦疏及之。礼部尚书顾锡畴随请肃清宫禁、慰安九庙、谒问陵寝、速图进取，并请正文震孟之谥「文忠」、礼部尚书罗喻义之谥「文介」、少詹姚希孟之谥「文毅」，夺大学士温体仁之谥「文忠」。未几，以祭海摄事入闽。

加河北总兵卜从善官二级，以左懋第为太仆寺卿。

应天府丞郭维经疏请明功罪、飭是非；报可。给事中熊汝霖上言：『山东诸郡未宜遽弃，北币之举万不容稽』。同官陈子龙复申及之。

论定策功，加可法少保、太子太保，进武英殿；廕一子锦衣卫僉事，世袭。而士英太子太保，廕袭如可法。余皆进爵有差。

浔督袁继咸表请亲征，且密言宁南骄蹇；荐在籍杨廷麟、叶廷秀、吴牲等。起用钱谦益、夏允彝、文德翼、严锡命；加继咸兵部尚书兼右僉都御史，总督江右应、皖等处。

特旨存问大学士礼部尚书傅冠，改叶廷秀为御史。

八月，议大婚。右僉都御史彪佳言：『妙选须圣母迎至之後』；因言『诸臣不宜踰格升迁』。时阁部士英内持权，铨补渐奉中旨，不由廷推，颇尚搜密；彪佳又言弊政，诏狱、缉事、廷杖三事不可任。

兴平伯杰兵出开、归，呼饷不应。

阁部可法上疏，以为名器滥觞，工役繁费；而大仇在目，一兵未加，恐偏安亦未易几也。不报。以杰获盗功，加可法太傅。

晋谢升上柱国少卿、太子太保兼礼部尚书。

诏祭告凤、泗两陵，以可法摄行。还，奏贤奸莫辨、威断不灵、滥恩施、开告密数事，语痛切；不报。

阁部士英称阮大铖知兵，奉内旨起兵部右侍郎。阁臣高弘图请遵例下九卿会议；且曰：『必会议，於大铖更光明』。士英曰：『臣非受其贿，何所不光明』？因为大铖奏辩，并讦高、姜为欺国。弘图、曰广并乞休，不许。府丞维经曰：『「逆案」成於先帝之手，今「实录」将修，安得抹杀』！给事中罗万象曰：『大铖未必知兵；恐「燕子笺」、「春灯谜」，即枕上之阴符、袖中之黄石也』。御史詹兆恒曰：『大铖一起，上伤在天之灵、下短忠良之气，关系不小』。时万元吉转太仆少卿，与怀远侯常延龄、御史陈良弼、王孙蕃、左光先、兵部郎中尹民兴等次第疏争；而吏部侍郎吕大器并攻御史越其杰、都御史田仰、杨文骢等为马党。曰广至三疏求去，词益迫切；并不报。大铖入对，上四策、三要、十四隙称旨，升江防兵部尚书。於是光禄寺卿许誉卿、左通政使侯峒曾、吏部主事华允诚合词求去，不许。吏科熊汝霖、通政使刘士桢复力争之，不报。曰广曰：『墨敕斜封再见矣；所可恨者，阴持会推之柄、阳避中旨之名』。明指士英。士英嗾四镇毒诋曰广；复令建安镇国中尉朱统■〈金类〉奏曰广初有异心。科臣袁彭年驳以非例，宜付刑部；不问。科臣熊汝霖、通政使士桢复争之，不听。士英因大言：『陛下四讎不报，曰广其一也』。发神庙时「挺击」一案以激上怒；出曰广初册立时原书示同官，曰：『策陛下，非其意也』。於是诚意伯孔昭唾曰广於朝房。同官可法遂请出督师扬州。大学士陈方策等数百人诣阙上书，谓不当外处可法，不听；加可法太子太师以行。而曰广求去益迫；会皇太后且至京，加太子太保，许致仕去。太常卿李沾因自陈定策时争执状，并论吕大器之心可疑。吏部尚书张慎言甫受事三日，及大器并罢位去。

时科臣章正宸疏争中旨，阁臣弘图票拟不合，发改再三；弘图曰：『臣死不敢将顺』。乞归，从之。

擢李沾左都御史，晋抚宁侯朱国弼为保国公，改授朱统■〈金类〉为行人司，起张捷吏部尚书，杨维垣为通政使。迁刘士桢兵部右侍郎。群臣交章论劾。科臣熊汝霖至以捷为国贼，士英颇不恤人言。江督继咸疏留曰广不得，随以六事规切上躬；不省。草莽臣刘宗周直讦阁臣士英，以为不兴问罪之师、止营定策之赏；哀诏不下，「逆案」复张。又曰：『中朝之党事方兴，何暇图河北之贼』；并及京营不宜以太监卢九德主之。士英复宗周不臣，令镇臣泽清等合纠之；宗周谢病去。士英复疑彪佳与宗周共事，会大铖素衔御史左光先之兄光斗，因坐光先降诛叛贼许都一案以为激变；彪佳争之，谓：『一月定乱，功最』。忤大铖，遂嗾御史张孙振并劾彪佳，坐以登极时曾有二议；彪佳亦病去。

太后至自河南，谕所司括万金备赏；科部请节省，不听。封太后弟邹存义为大兴伯

、福邸千户常应俊为襄卫伯。应俊系革工，初从上避难，负上雪中数十里，称扈驾功。擢青浦知县陈■〈火庶〉中书舍人及王鏊、王无党锦衣卫世指挥使。科臣陈子龙疏请「慎名器」，极言内降之非；不报。礼部尚书顾锡畴争之，不得；因论张有誉不由廷推非制、请罢厂卫、禁中官之私买女口并劾张孙振不可用，触时忌。以葬父假归，卧不起。

加徐石麒吏部尚书。会内侍私有所嘱，石麒执祖制不行。士英又曲庇御史黄耳鼎，石麒争之；耳鼎遂追持前陈新甲主款一案，反劫石麒。石麒曰：『新甲坐陷亲藩七，恭皇帝非其一乎』？称病去。

诏选内员宫女，闾巷骚然。言官李维樾、陈子龙合疏谏，不听。

以中允卫胤文兼兵科给事中，监兴平军；以蓟辽总督王永吉经略山东、河北，总督河南劝农。

太仆寺卿监军万元吉疏请群臣洗濯肺腑，共图实着；并恳追恤阵亡将士、白旧督赵光忬之冤、建文年号宜复、景皇帝庙号宜崇、逊国诸臣谥廕宜补、崇祯末殉国诸臣宜恤，并请追补开国勳臣傅友德、冯胜两谥。上可之。因追上建文「惠宗让皇帝」、景泰「代宗景皇帝」，赐甲申殉难文臣二十二人、勳臣二人、戚臣一人葬赠廕祠谥有差，庙额「旌忠」；赐生员殉国许琰从祀。

杨廷麟补翰林原官；旋与吏部夏允彝、华允诚等以党事起，并解组归。

当事忌淮抚路振飞威干，坐贪功靡饷，夺任去。

府丞郭维经再请洗刷刻薄偏私恩怨故智，一以办贼、复讎为事；不省。时内廷官寺五十三人日夜秘戏，上乐而忘之；朝政一惟士英裁决。

宗贡原任安县知县朱议漣疏邸报遗失数事，宜察；如面叱本兵张縉彦、廷推南都职方郎中万元吉等件。

湖广巡按御史黄澍入朝，面诤士英权恣；士英赂福邸旧阉田成、张执中等为解免。士英随疏逆魏案中，大半是正人君子之流。科臣袁彭年争之，且极言缉事之害；忤旨，谪浙江按察使照磨。

赦原任大学士吴甡戍所，许陛见。诚意伯孔昭廷劾之。

御史李模上言：『皇上既不以得位为利，诸臣安得以定策为功！惟刻刻自认为先帝之罪臣，方着着实效目今之胜着』。且曰：『经国有体，勿以大僚而过繁；拜下宜

严，勿以泰交而稍越；繁纓可惜，勿以近侍而稍宽』。

九月，封福建总兵官郑芝龙为南安伯。

诏童子就试督学先上金，郡县有额。溧阳知县李思谟不奉令，坐削职去。

出内使苏、杭，穷采姝丽，以备三宫之选。

司业兼礼部尚书管绍宁请告去。召降贼锦衣卫都督刘侨补原官。

镇臣泽清大治宅第，逍遥淮上。

科臣汝霖请以前任凤督朱大典奉命北使，镇将黄得功堪与共事；不报。寻条明从逆罪案，请恤布衣杨文琼；且直指中书，谓『厂卫之设，飞章告密，内外交通，神器互借，「兵饷战守」四字改为「异同恩怨」四字，不亡何待』！语戆激。罚俸一年。

兵部侍郎士桢请塞幸窦，荐在籍编修刘同升可用；留中。

御史詹起恒疏论『朝事纷纷，营其缓者、小者、私者；至是蔑视宰辅、诋辱塚臣，大为失体』。语极痛至。同官周元泰亦云；兼请料理楚、蜀上游。报闻。

以何应瑞为太常少卿；起陈子壮为礼部尚书，管詹事府事；升徐汧、吴伟业为少詹事，钱谦益为礼部尚书。御史陈良弼廷劾谦益不可用；戎政张国维奏：『今日自申讨逆贼之外，别无执掌；何暇以有限精神，分於恩怨。前车可监，能不寒心』！

升解学龙刑部尚书。定逆案，除在北京何应徵等二十二人三年後定夺外，所坐六等：一等应磔，宋〔企〕郊等十一人；二等应斩长系秋决，光时亨等四人；三等应绞拟赎，陈名夏等七人；四等应戍拟赎，王孙蕙等十五人；五等应徒拟赎，沈元龙等十人；六等应杖拟赎，潘同春等八人；存疑另拟，翁元益等二十八人。保国公国弼等合纠刑官六失；御史张孙振复言『北来诸臣，乃贼弃之而来，非弃贼而来也』。学龙坐夺职；以高倬代之。

吏部侍郎黄道周撰经筵讲章，论四镇必不为用；且曰：『此日所可言者，寡矣』。

奉命摄祭禹陵。

原任都御史方震孺、李光泰、给事中李维樾、知府陈亨各请捐饷募兵入卫。

开纳事例；时有『扫尽江南钱，填塞马家口』之谣。黄金价贵，京师号曰马金；金值白金十五。

冬十月，修兴宁宫、建慈禧殿；国用乏，佃练湖、税洋船瓜仪、■〈封上于下〉洲升课，甚至椎酤升一文。

奉化布衣方翼明抗疏论朝事，逮刑部究拟。诸生何光显疏请立诛马士英、刘孔昭；忤旨，付西市，籍其家。

进士吴易草「中兴四议」，大要谓『忠臣义士报君死国，须及其锋用之。两淮者，江表之藩篱；荆襄者，上游之门户：急宜留意。诸镇之兵积骄而惰，须更张之』。书成，叹曰：『马金用事时，此何为』？遂不果上。

庙门灾。户科吴适上言：『日讲宜行，午朝宜举』；不省。

升左懋第右佥都御史，巡抚应、安等七府。加御史陈荅监军，主召募。懋第惊闻母变，自请同镇臣北使，便负母骸骨归。

科臣章正宸疏曰：『进取不锐，则守御必不坚；急宜联络诸路，分渡河、淮，使两京血脉通，而後塞井陉、绝孟津、据武关，以攻陇右：此大计也』。报闻。

长庚见东方，芒角飞烁；中有刀剑、旗帜、车马影，大小长短倏忽变。凤阳祖陵叠灾。地一日三震，有声如吼。

十一月，诏以定海都督水师陈洪范加太子太傅，副使北讲；加懋第兵部右侍郎，经理河北、联络关东军务为正使。以兵部职方司郎中加太仆卿马绍愉、兵部司务陈用极等同行。奉国书通问，致金币；奠安梓宫，察探陵寝；封宁远总兵吴三桂为蓟国公世袭，赉银米。懋第墨衰不释，至北境上必拘馆伴奉迎之礼；讲事不成，被繫。洪范以私款得遣还；懋第誓死，百劝不降，与陈用极等五人同难（事在「使节传」）。

镇将高杰屯徐州，约淮南镇将刘泽清合力进击；泽清不应。杰诱杀敌间程继孔，诏加太子太傅。北帅寓书杰，招降；杰报书肃王，誓无二。

十二月，有僧大悲冒称定王，语颠乱；付西市。

杨维垣遽转副都御史，马、阮因缘作奸，众正咸引去。维垣遂与吏部尚书捷勇翻三案，请重颁「三朝要典」、追恤三案被罪诸臣。於是吴孔嘉、袁弘勳等复请「要典」之中，参列当日奏疏，以存其实；仍追论焚「要典」诸臣之罪及得罪孝宁太后先

庄妃者。士英皆为主行。江督袁继咸疏争之；有旨：『皇祖考、皇考无妄之诬，岂可不雪！事在青史，非宿憾』。宁南良玉亦上言：『「要典」治乱所关，勿听邪惑，致兴大狱』。报闻。

陈洪范南还，请恤使北劳臣；兵科戴英谓『北好未成，正使不返』；劾止之。

加左良玉太子太傅、世袭指挥使，开藩武昌；子梦庚都督佥事，挂平贼将军印。

士英嗾楚宗朱盛浓讦御史黄澍毁制辱宗、婪贿激变；逮不至。浓得为池州推官。

吏部尚书捷黜陟颠倒，惟阮大铖手。给事中吴适不避权要，屡驳参之。同官袁彭年疏请更置要地督抚；不听。

升维垣左都御史、兵部尚书；大铖驻江防，遥制朝政。蔡奕琛以吏部左侍郎入阁办事。尚书捷请复温体仁原谥「文忠」，而文震孟不宜一例。京师谣曰：『马、阮、张、杨，国事乖张』。保国公朱纯臣屈贼，为贼所杀；捷请以张辅例封王，阁臣士英与票拟。捷复请恤初附外戚郑氏诸臣；有旨：『刘廷元等九人各谥廕、祭葬，徐养先等六人各赠官、祭葬，王绍徽等各复原官』。

大禁复社文字，收书贾蔡益所罪之。时党事益盛，可法上书争之；不省。

阁部士英奏杨御蕃五载战功，着进左都督；马进忠、王允成并加太子太保。以剪除群贼功，加士英太保、王铎少傅。

除夕，上在兴宁宫，意忽不乐。太监韩赞周曰：『新宫姑安之』。上曰：『非以是；黎园殊少佳者』。赞周泣曰：『奴惟令节或思皇考、或伤先帝，顾及此耶』？

弘光元年（隆武元年）乙酉春正月朔，日有食之。朝贺毕，士英特请吏部尚书张捷及太监卢九德救命（以人言迟至是）。

八之日，流星入紫微。

江督继咸表贺元旦，因言三案不宜追论、新参蔡中书不宜府怨滋多；闯贼既败，江南不能无事，请急假督抚以权，俾善用左。不听。求去，不许。

科臣吴适上维新五事：信诏旨、核人才、储边才、伸国法、明言责；不省。

补彭期生湖西兵备道。晋郭维经兵部尚书。维经与士英不协，遇事饬之；士英矫旨，令降级视事。宫詹余煌在籍，驰书讽大臣，颇触时忌。起陈函辉监军河南，寻改

督城金圖、北固間。

戎政張國維請告去。楊廷樞以薦，授翰林院編修兼兵科給事中。學士徐汧病歸。

駐彰德總兵許定國計殺興平伯高杰。杰部蕩寇將軍王之剛攻定國，定國以城北降。詔恤杰襲廕、祭葬，以其故部李本身為左都督、加太子太保，提督本鎮赴歸德。加監軍衛胤文兵部尚書，與巡撫王永吉料理三鎮。

汀州帘子洞賊王豬婆受撫勤王，半道散去。

殿功成，輔臣以下叙廕有差。

二月，賜兵部尚書阮大鍼蟒玉。大鍼薦士英子錫為總兵，主護衛。士英同鄉楊文驄子鼎，驟膺節鉞。京師謠曰：『楊、馬成群，不得太平』。

叛將定國反攻河南，破鄆城，巡按御史凌駟移鎮歸德。歸德總兵李际遇邀蕩寇之剛北降，之剛不可，與興平伯李仲興南遁。歸德被圍急，知府董庭、知縣吳靳忠開門降，監軍道吳汝琦、知縣蔡鳳不屈死之。北師逼降駟，駟伺間與兄子潤生咸自殺。萊州被圍，原任工部侍郎宋玟與諸父勳部應亨畫策城守；城破，咸死之。北師至夏鎮，別從濟寧南下。可法移鎮泗州，檄諸師北御，不應。

詔下王妃童氏獄，擬妖婦。

逮偽皇太子於金華之觀音寺，雜視不識；中外諸臣咸誤為真，上書爭之。會給事中李清請修先帝實錄及改謚號，并上先太子、二王謚；詔定皇太子謚「獻愍」、永王曰「悼」、定王曰「哀」，改先帝謚號「毅宗烈皇帝」。士英冀以絕太子之疑，疑益甚。

升瞿式耜都御史，巡撫廣西。各鎮合詞薦起朱大典兵部尚書，協理戎政。御史張孫振劾在告禮部尚書顧錫疇，致仕去。

自二月以來，日月色過赤踰常時。

原任中允李明睿泛海南歸。

三月朔，移偽太子入宮，尋下中城獄。會審，系王之明假冒是實。有旨：『王之明勿驟加刑，俟正告天下，然後盡法』。尋諭拷究穆虎主使附逆。

時有男子詹自值便服直入武英殿，南面御幄中，語顛亂不可錄。踰日，風顛白應元

者亦闯入殿，卫士诃不能止，语更不恭。并付西市。

设坛望祭先帝忌日，尚书大铖後至，路哭曰：『致先帝三月十九日者，东林诸公也；愿阴殛之』！

侍郎何楷、督抚袁继咸、巡抚何腾蛟以王之明回读为「明之王」，咸涕泣疏争。而宁南侯良玉内畏闯逼，适原任御史黄澍被逮急，力劝良玉以兵东下，借太子为兵端，挟文武二十七人合疏，名「清君侧」，数士英八大罪；邀继咸、腾蛟军中。腾蛟夜起投水，乘不死，脱去；而继咸密上书自白，请勿疏北御。左兵掠九江，夜火照城中。士英惧，矫旨靖南得功率诸镇郑鸿逵、黄蜚等数十郡协捣上流。左部方国安私以四千人归朝廷，反攻良玉。良玉病，颇悔；呕血死。子梦庚不发丧，伪为太子檄下军中，激众怒。

时江北诸臣单，北师临河，士英欲以失机坐尚书郭维经；都人数千叩阍乞免，革职去。改王永吉总河，督师淮、安、凤、庐，驻徐州；巡抚钱继登驻扬州，参政马鸣霆驻江阴，副使□司奇驻京口，都御史杨文驄专监镇军。

决从逆光时亨、周鍾、武愷於市。先是，兵部尚书解学龙被劾，逆案未定；镇远侯常延龄乞急褫逆党，遂先定龙日兹、项煜、陈名夏与时亨、鍾五人等罪案。时鍾兄礼部员外鑣为鍾解免，诏鑣与雷演祚共勒自尽。

史可法自劾师久无功。

琉球国遣使入贡，且请袭封，给事中陈燕翼、行人韩元勳往。

夏四月，北师益急，永吉檄督师可法及监军卫胤文协守。可法疾呼，诸师不应；入都，欲面陈机密，士英沮之。咫尺不得见天子，可法衔涕还泗州。北师逼，退保扬州。

士英请更铸各衙门印，去「南京」二字。

十九日，上召对便殿。大理寺卿姚思孝、尚宝司丞李之春、给事中吴希哲合词，宜先防淮、扬，次及凤、庐。上谕士英：『左兵似不曾反叛，应专心北堵』。士英大声曰：『此皆良玉死党之言，士英不能与共朝廷也』！是时上流一再捷，论功，加黄得功靖国公、郑鸿逵靖鹵伯，世袭；加朱大典、阮大铖太子太保，张杰、马得功、郑彩、黄蜚皆锦衣千百户，世袭。其刘孔昭、黄斌卿、方国安、赵民性、卜从善、杜弘域、张鹏翼、杨振宗等，咸升赏有差。

梦庚既败，挟江督继咸北降；继咸不屈，死之。

太监田成等次第上淑女，都下得七十人，最元氏、程氏；杭五人，内王氏者中选；又周书办自献女一人。诏次日入元辉殿，上亲览焉。

二十三日，北师渡河如无人。百姓王诏奏镇兵南避抄掠状，不问。以杨文骢巡抚苏、松五府。北师由天长、六合南下，广昌伯良佐以其众北降，东平伯泽清屯淮南观望。北师攻扬州，城中兵仅三千人；可法三疏乞援，报闻。北豫王复以书招可法，可法不启；曰：『国朝无降宰相』。城破，死之。时同难者，为监军道吴尔埏、督饷僉事黄铨、兵部员外何刚、主事施凤仪、知府任民育、管粮通判吴道隆及侨寓原任兵部侍郎张伯鲸、兵部尚书卫胤文（又礼贤馆诸赞画，不悉姓名）、总兵马应奎、副总兵乙邦才、参将李预等二十七人。镇臣泽清闻扬州破，欲浮海入浙；适风坏巨舰百余，遂北降。而所属张鹏翼、李士璉、张国柱等诸队入海，依巡抚田仰崇明。御史梁云构请召黄得功、刘泽清入卫，不果。

五月朔，尚书捷报至，百官称贺。时群集清议堂，率不语；大率纳款北师者也。越五日，北师从天宁洲渡江，金陵震；士英计无所出。初十日，召优伶入大内，上与太监韩赞周、屈尚忠、田成等杂坐酣饮。二鼓，上侍太后，携一妃，内官皆跨马轻装，潜从聚宝门出，百官无知者；独士英以方国安兵数千从。历茅山，茅山乡民恨士英入骨，哄起劫之。上仓卒走芜湖得功军，失太后所在。国安护士英弃上竟南下，趋杭州。忻城伯戎政赵之龙出示安民，曰：『此土已上寿北朝矣』。太后间关七日，始得诣杭。时潞王暂居杭州，士英以太后谕，奉潞王监国。得功第一见上，惊曰：『陛下失所重矣！即奈何』！上登镇南将军翁之琪舟。方议南迁，而广昌良佐及靖国前锋马得功时已北归，勒靖国勿南向，得功不从，自刭。於是步将田雄掖上去；琪扳不及，投水死。礼部尚书钱谦益与忻城伯之龙咸奉表出百里，郊迎北师。

金陵既夜失帝，有好事者呼闾巷七、八十人，裹王之明出狱，纳武英殿，高坐嵩呼，行五拜三叩头礼，传示举义报讎。先是，阁臣铎以他事坐逮狱；之明至是出之，并召高梦箕於狱，与铎并为大学士。旋抄马、阮私第已尽，次及杨维垣、陈盟之家。北师入，前诸好事尽散匿，王之明敞罔被执，不终。兵部尚书维垣自尽，妾朱、孔咸投缳从之。吏部尚书张捷、刑部尚书高倬、工部尚书何应瑞，亦皆投缳尽。户部郎中刘成治、兵科给事中刘廷弼，并自裁。中书舍人龚廷祥，投武定桥水死。同官朱■〈火庶〉，亦水死；■〈火庶〉子乡荐伯俞，自尽。礼部主事黄端伯高卧不□□见折入谒豫王，以巡抚招之，不受；就刑。〔户〕部主事吴嘉胤一奉差至丹阳；闻变，自经宋杨忠襄墓道。钦天监挈壶博士陈于阶，亦自经。原任御史陈潜夫出狱，走浙。诚意伯孔昭〔走〕入海。国子生吴可箕，系死鸡鸣〔山关壮〕繆祠。〔苏州诸生顾〕所受，投泮水死。冯小璫与百川桥〔乞儿〕，投秦淮河死。□□□豫王驻天坛，田雄以所执至，王宴之，〔坐〕王之明之下。□责，〔上〕不能答一语。且曰：『大兵尚在扬州，□□□□抑□义教□乎』？意归罪阁部士英。上汗出浹背，从北去。□□□宗监国赧皇帝之传。

论曰：东林诸公徒然□，数百口争之，至放废摧跌，破坏不悔。夺诸郑氏之手，而卒从郑氏再传失之；然则郑氏诚欲贵其所出，诚不贵其所出也。处堂之娱，□短儿子最奇此数。袒郑者，又身其事。——见原书「纪」卷之十八

（附）皇太子慈烺

献愍皇太子慈烺，毅宗长子也；母周皇后。崇祯元年，册立为皇太子。次子慈照早世，追封怀王，谥「隐」；葬西山。三子慈焕、四子慈灿，俱田贵妃生；慈焕封永王、慈灿封定王。

甲申三月，李贼东犯；凡请太子监国南都者，为李邦华、李国祯、项煜、李明睿、史可法、姜曰广等，皆不果。贼围京师急，十九日，帝朱书谕内阁：『传成国公朱纯臣提督内外诸军事，夹辅东宫』。内臣持谕至阁，阁无人，置案返；上不知也。及殉社稷，犹以阁臣得朱谕；书襟，遂有『百官俱赴东宫行在』之语。先是，别有旨：『太子、二王送周、田二戚臣家』。及城破，太子仓卒诣周奎叩门，不得入；复走襄城伯李国祯家，家无人。踰垣，为卖浆姬所觉；间闻奎，奎惧，不识。内臣得太子以献贼，自成留之西宫，封为宋王；太子不为屈。初，伪丞相牛金星方入朝，有衲衣僧遮告曰：『愿上急事』。金星停辔问之，僧曰：『明江山已入李家，即未见太子处分』。金星以非所宜言，怒命左右提之。僧笑曰：『和尚只一头，值甚；若辈头许万，将奈何』！逐之数武，忽不见。已，自成以太子付旗鼓王体中管押，其永、定二王令将军刘宗敏收之；许太子便服一谒东华门大行帝后前。体中号白相公，河南洧川人也；奉贼令，拷责故相魏藻德等赎金乞，间语太子及故事。太子曰：『已矣！苦先帝不然我；果以史可法为督师，唐通、孙甲为将，宁至是』！因为体中草箚，题杜诗「秋兴」之一『闻道长安……』云云；後署「故明皇太子慈烺书」。及贼东御吴三桂，三桂父吴襄及太子、二王俱在军中；败还，过通州西门，有父老涕泣进果及履於太子、二王者。已而体中挟太子随贼奔潼关，此箚裂两板矣。

自成死辰州之罗公山，体中北归，箚犹在。十一月，体中献太子以付礼部，传故明官监等往杂认。皇亲周奎、太监贾应庚不认，百姓哄殴之，随有认者、保者□民十数人俱坐死，收太子刑部狱中。太子曰：『谢先生尚在乎』？谢升至，手书「天」字示太子，无所答。俄，狱官进酒，太子以狱官亦曾逮事先帝，为细述本末，欷歔绝。时部臣钱凤览手疏力争，以为真太子，保险有证：在部五日，悲欢言动绝无粉饰。朝论以太子必不真，着锦衣卫重处；而凤览亦坐诛。後数月，谢升出朝，忽发狂口，称明太子令。锦衣卫疾拿谢升去，升即日死。

福王立南都，随又有伪定王事，以痢疾放言弃市。未几，序班高梦箕奏『故太子在浙』，诏旧内官李继周即金华观音寺奉太子。抵南都，权住兴善寺；复命司礼监马朝进同东宫伴读丘志忠等视之，不识。於是辅臣马士英密请追谥先太子及永、定二

王，以绝众望，太子谥「献愍」、永王谥「悼」、定王谥「哀」；有诏：不许通私谒。三月一日，移太子入宫。越两日，太子与高成、穆虎俱赴中城狱。左都御史杨维垣言驸马都尉王昺侄孙王之明，状貌酷类先太子。奉旨：会审大明门外。兵科戴英覆奏王之明假冒是实：『先帝尝携太子中左门亲鞫吴昌时，东宫立何处而不能答；问以嘉定伯姓名，亦不能答』。遂有内官密疏云：『初，东宫足胛异於常形，每胛则双；莫之能诬』。随令卢太监密语马士英细阅之；士英疏曰：『其言虽似，胛则犹人』。且云『既为东宫，幸脱虎口，不即诣官，却走绍兴；一疑。东宫原质凝重，此人机辩百出；二疑。公主现养周奎家，而云已死；三疑』云云。『且左懋第在北，贻书蔡奕琛，云先有假太子事；是太子不死於寇，即死於北朝矣』。奉诏复审；於是三法司定招：『王之明系高阳人，驸马王昺孙。家破南奔，欲投宁南军中。遇高梦箕家人穆虎，教以诈冒东宫，非出己意』。次日，高梦箕疏云：『奸谋已露』而御史陈以瑞、都察院掌院李沾并疏诈冒。上曰：『王之明勿骤加刑，俟正告天下，然後尽法』。时有诗流传东南，不知何人所作；诗曰：『百神护跸贼中来，会见前星闭复开。海上扶苏原未死，狱中病已又奚猜？安危定是关宗社，忠义何曾到鼎台！烈烈大行何处遇，普天空向棘園哀』！於是各镇怀疑，广昌伯刘良佐、宁南侯左良玉各有疏争之。工部郎何楷疏称东宫甚明；靖南侯黄得功亦疏：『且勿加刑，再待详审』。江防督抚袁继咸日夜悲愤，且云『各镇武夫，尚怀忠义，以为先帝一脉，纷纭角奏；我等读圣贤书、识君臣之义，岂可依违苟且，与马、阮诸臣同负罪於先帝』？会有王妃童氏以间关自陈，诏狱死；人心益愤。於是左良玉挟文武二十七人合疏起兵，以太子、皇后为名，号清君侧；诏撤黄得功等师以御上流，北兵遂下。五月辛卯，帝奔芜湖不返。次日，百姓集七、八千人诣狱，裹出伪太子入西华门，坐武英殿，取戏具翼善冠顶之，群胪呼万岁。之明自殿中传示，略曰：『先皇帝奇祸，凡有血气，裂眦痛心。泣予小子，奔投南都，实欲哭陈大义；不意臣奸蔽障，桎梏幽狱。今福邸闻声远遁，其如高皇帝陵寝何！赖父老民人抱持出狱，拥入皇宫；予身负重冤，岂忍遽自尊□。□此布告在京勳旧文武先生暨士庶人等，念此痛怀，克勤会议；予当拱听，共抒皇猷。勿以前不识予，稍生嫌芥』。甲午，释王铎、高梦箕於狱，咸以为大学士。梦箕出狱，即逃。马士英居第，百姓立焚劫尽；亦随尽阮大铖、杨维垣、陈盟诸家。乙未，留都门开，北豫王问太子何在？忻城之龙以之明对。须臾，之明至；王离席迎坐己右。及福邸被执，王令坐伪太子下；云『先帝自有子如此，辄自立，又刑苦之，竟不即讨贼，何意』？福邸不能答。北凯，伪太子不知所终。

论曰：余读科臣李清「伪太子纪事」有云：『伪太子与高梦箕家人穆虎，中途狎，谬云「我王子。」久之，见江南无不怀思故太子者，遂易语皇太子以媒利。及奉诏杂认，讲官中允刘正宗、司业李景濂先言「故太子眉长於目，此非真」。西宫袁妃云：「太子有虎牙，足下有痣」。不果。问讲读何所？误以「端敬」为「文华」；问讲读先後？误以先读为先讲；问写仿何字？误以「孝经」为诗句；问写字几行、讲读问难几次？讲案何物？俱不能对。虽正宗、景濂，彼亦不识也。继又问亲鞫吴昌时事及嘉定伯姓名，皆不能答。阁臣王铎大言是假。又发总宪李沾，始跪乞怜，

自供王昺从孙之明，非太子；手蹟付沾。据奏，时召对群臣，上泪下，不成语；若曰：『果故太子，即以为皇太子；苦不真』！为歔歔。嗟呼！岂天故生一伪以疑真导乱哉！而所为王之明者，又倒读为明之王，似有意讳之者；疑却使人易信。且适有童妃被鞫一事，则信者故外之而使为疑，真伪淆惑。中外遂以上不念骨肉，烽火最急，人情益解散。嗟呼！虽人事，亦天道因之矣。

——见原书「列传」卷之三

（附）童妃

童妃者，福王长子由松之嫡妃也；时未称世子妃。先是，崇祯甲申福府被贼所躏及，王常洵惨死，世子由松、由松弟由柏失所，眷属星散，各不相顾。世子携「福宝」奔淮上，巡抚马士英及各镇拥南都立之。已，镇臣刘良佐与巡抚越其杰、巡按陈潜夫奉皇后童氏入南都，有诏不许廷谒，指为妖妇，诏狱。潜夫坐不敬，亦并见收；镇臣等免议。

余曾晤潜夫云：『童氏自叙世子由松嫡妃，情实凿凿。一时舆从尊称，妃亦宴受，无惭恧；遂以南归』。余时心疑甚。上既勿顾，即赐见可、见而闲置之亦可，何至斥为妖妇？妖妇者，挟媚术惑世之称，与道遇宫人不合；即误进一宫人，可无罪，两绍狱胡为？且童草奏缕缕，锦衣冯可宗讯得之，皆宫中事，非民间所能与闻者；抢呼掷地，呜咽甚，曰：『愿得望见至尊，一言而死』。匪最关切，情不至此。而上得奏，不一省视，直抵之地；又胡为也？或云：『上初称元后李已故，方穷采苏、杭佳丽，不复念旧』。果尔，托他故废之。古不谊之主，亦往往有然；必不使一睇山龙，何也？至壬子在禾，晤南中钱秉鐙，言童氏实世子由松嫡妃；竟以世子得南面隆重而弃故人为大饮恨。其实世子由松出亡，弟由柏获遗宝，遂自称世子幸立，童氏路逐，不知；即初拥载诸文武，故不知也。诏童氏就讯，邹太后知之、阁部马士英知之，诸在廷故不知也。李氏或即由柏元配，恐路泄之，遂云李氏道失；即不失亦竟失也。嗟乎！果常洵在，实得罪光庙，不当立；而况世子由松、而况伪世子由柏篡兄而矫以立也。当时诸大镇皆以帝忘其故后，实本良佐不诬；而适凑伪太子王之明事，遂谓两大失德。江上解体，以至於亡。岂知国宝真而护宝者假，事有不可测如此；安得福府「玉牒」所载一证之！按秉鐙得之故内侍，然则故老亦多言之矣。

或云大悲和尚即是由松，当不必然。童氏南都败後，削发为尼，後避迹六安州某庵，犹自称皇后；事觉，讯者示以危语，令讳之。

——见原书「志」卷三十二上「外志」

（附）永悼王慈煥、定哀王慈灿

永悼王慈煥，烈皇帝第三子；定哀王慈烺，烈皇帝第四子：俱田贵妃出（甲申三月变後事，附见「太子慈烺传」）。及贼自成挟二王、太子东御山海败还，二王尚在军中。已携太子西奔，二王不知所终。有靖南藩下汪汉冲者，云尝见定王於涿州，时为东师所得矣。

甲申五月，福王立南都。十二月，水西门民王二报西城兵马司：有僧身称先帝亲王；诏令中军都督蔡忠逮僧都督府治。时戎政忻城伯赵之龙、锦衣掌堂冯可宗与蔡忠同勘，僧冒称定王，以国变出家，法名大悲和尚；且云『皇帝难做，欲淫佚坐致太平乎？吾不为也。潞王贤明，诸大臣宜奖成让德』。复牵引钱、申二大臣，责以此事。诏再会勘，情辞影响。或曰大悲系齐庶宗，上叔父行也。坐痢疾放言，斩首西市。

辛丑六月，陕西渭县执献男子一人，年三十有二；号朱君应，冒称定王。从行四人：董易、张三耀、罗起凤、李应祥，并诣狱簿对不屈膝，自供如前。咸伏法。

论曰：怀封天，无可论；此为真天。若永、定之封坐不真，而以证伪。夫终明之世，有十四伪。一伪让皇：僧杨行祥托杨应能以塞「实录」之讹，遂滋数百年之惑。一伪齐王搏：福阳男子楼璉自称七府小齐王，王冠；邪党名护卫、图煽惑，搏素坐罪，因立决。一伪奸人贺录：以房中术悦崇王，遂伪称乐平王次子，历骚供帐。一伪楚王华奎及宣化王华璧：先，恭主以王妃兄王如言子及言族弟如綽子，称孪生，一王楚、一封宣化；及华樾发之，辅臣沈一贯、沈鲤互为党，起大狱，而事竟不白，楚遂有「以牛易马」之讥。一伪宁濠三郡王：初，眷属咸就执伏法，而复有真郡王名朱学者，潜霍丘，获送高墙。一伪庆藩安化将军轟材：轟材坐逆置燔死後，有大千和尚者被逮，鞫之，实将军轟材，乃知前死者伪。一伪皇太子慈烺：驸马都尉王昺族子王之明，初浪称王子，继以江南俱讴思故太子，遂改称『猷愍』。一受山呼，而自是俞文渊、庄保生、俞子久等咸坐匿伪者而死。又明末有伪神武年号，而无其主。贡生马鸣雷等，乙酉以兵北抗，假称新主，更立南都，驰诏三吴，条恩例十九款，思以鼓众；而於是嘉兴精严寺亦开读新诏，就听者数万人：皆伪也。而随有大悲和尚之情词影响，而随有渭县男子朱君应之对簿不屈：皆冒称定王。已伪皆尽，而尚有伪姓者掉头海外，兴波上下。

——见原书「列传」之四

· 鲁王监国（附）

鲁王，名以海。太祖第十子荒王檀，十传为王。王天姿粹朗，性慈易，能书法，谙歌吟。甲申甫袭封四月，而北师入兗州；王南奔浙〔东〕，驻台州。

乙酉（弘光元年）夏五月，金陵不守。北师破□□，潞□□□□闻。闰六月〔之十

〕有三日，浙东西及江以南缙绅叛，竞舞榭起；自城守〔以〕外，穷乡僻澁各自为屯，不崇朝□□□里。生员郑遵谦□绍兴，自称正统制将军，一呼从之者□□。且杀新〔知〕县彭万里，〔迎故会稽知〕县孙榘〔於野〕；原推官陶达情〔方北〕款加道衔，以其得民复原任。时总兵方国安以兵护阁部马士英南下，原任征倭将军王之仁令子鸣谦权代镇定海，部兵合堵西兴渡。遵谦屯小亶，檄防江诸义乡绅熊汝霖、钱肃乐、来〔集〕之、孙嘉绩、王绍美、〔王亶、杨文〕瓚、□诸生周晋、〔王〕襄、郑〔之〕瀚、张玉铉、董志宁、华夏、□□□、杨克仲、冯京第等，偕马、王二总兵合表迎鲁王於台州。

秋七月，鲁王至自台州，监国绍兴，即分守道□署为监国府。时唐王聿键已於前月称尊八闽，改元隆武；□□不奉唐朔，以明年为监国元年。起故大学土方逢年为首辅。监国拟扈跽故人宋之普预东阁，群臣争之；谓『监国之始，不宜急私恩而怠公义』。之普避位。以故戎政张国维为兵部尚书。拜国安为镇东将军、之仁为武宁将军、遵谦为义兴将军；给敕印，予公饷。镇东国安以私请，仍士英陪阁议；群臣腾沸。诸生〔陆〕宇■〈火鼎〉等草檄逐之，百姓为罢市；事止。时无舍士英者；潜圯庙，国安私饮食之。晋〔汝霖〕、〔嘉〕绩、肃乐俱都察院左右僉都御史；惟肃乐不受，□原员外衔行。余晋爵有差。得铜炮四十二於萧山署中，识「洪武六年」；以为异；铸神炮，封将军以〔领〕之。择吉视师江〔干〕，赏赉有差。或请上尊号，廷议谒孝□□□□。原任都御史朱大典，唐加兵部〔左〕侍郎。

九月，唐诏至（诏有云：『朕未有子，渡金、焦为期，朕当让位皇侄；布衣角巾，萧然物外』），文武诸臣疏请开读。惟尚书国维、都御史汝霖不可；监国以唐平卤侯郑芝龙私表愿效鲁力，益恃，必不开诏。中书舍人谢龙震至手批唐使者刘中藻於廷，而罪会稽知县榘不宜疾上仪注。然江上文武诸臣，咸因中藻私上职名於唐矣。

以左尹为兵部职方主事，监义兴之师。□受香会稽知县。唐加衔江上诸主兵者，遣科部臣分监之，〔不谒〕监国。时镇东师朱桥败绩，退屯长河；从子将军元科每□□获捷，刃接北总督张存仁不及咫，马蹶，□炮过耳不创。进〔封〕国安镇东侯。

时防江之师，自金、衢迤东以迄定海不下二十万，各自为义；不糜公帑，不相统。仍衔朱大典兵部右侍郎，使主事集之将命。大典两受，并表谢。於是国安移屯潭头，尚书国维屯长河，武宁之仁屯西兴，都御史汝霖、嘉绩合屯龙王堂，义兴遵谦屯小亶，总兵张名振屯白碭，员外郎萧乐、都御史冯元扬合屯瓜沥；都御史于颖屯沥海，兵科给事中祁熊佳辅之。太仆少卿兼御史监军陈潜夫亦屯小亶，御史王正中屯临山。兵部职方司员外兼御史监军左尹初屯小亶，移临山。之仁子鸣谦以副总兵屯定海。其间锦衣朱寿宜、将军陈梧、生员倪会寿等不啻数十部，有所期会，联■〈舟宗〉发炮而已。晋国维东阁大学士兼兵部尚书，监江上军。监军左尹等进「西渡夹击武林」之策，疏请总兵名振以其所部西渡；奉谕：拜张名振富平将军，升汝霖兵部尚书，监西渡军。

冬十月，阁部国维请遵汉筑坛故事，拜国安大将军，进封荆国公；赐尚方剑，得便宜行，节制诸军。义师不奉令如故。以余煌兼礼、兵二部尚书；力辞。晋侍郎大典为东阁大学士如唐衔，仍守金华。

十一月，名振还石浦，师不进；左尹露章劾之，卒不至。尹乃刺血草檄乞师诸屯，得七千余人，奉楚将军华堞为盟主。廷臣颇疑华堞得众，监军陈潜夫疏止之。

进封将军王之仁为武宁侯、将军郑遵谦为义兴伯。诸臣进爵太滥，尚书煌、提督四夷词臣王思任先後论奏，报闻。

义兴之师赭山被劫，监军尹以兵救之，获捷；追奔数十里，多斩获。监国为犒师，加尹秩一级。

尚书汝霖疏请给故大盗陈万良总兵衔，使扰崇、桐二城，劳武林左头，不与一兵；万良以其党协副将故盗徐龙达深入，不得志，全师归。给万良平吴将军印。

十二月，镇东师冒入西山，窥武林；北师断长河援兵於江上，西山之师不战溃。汉土精练全陷没，越势大沮。

丙戌（监国元年、隆武二年）春，加嘉绩兵部尚书，晋汝霖东阁大学士。

平吴万良攻德清，副将龙达、诸生蔡孺法死之。

唐以肃卤伯黄斌卿驻舟山，窥吴淞；而大学士兵部尚书张肯堂监其军。

原任都御史田仰与东平镇故部张鹏翼、王朝先、张国柱等以舟师入越。初，东平伯刘泽清分汛淮南；金陵不守，泽清北归，鹏翼等不从。适仰遁迹崇明并南依监国，遂拜仰东阁大学士兼兵部尚书，鹏翼等进爵有差。

晋章正宸、谢三宾咸东阁大学士，陈函煇为礼部左侍郎。

阁部仰、义兴遵谦争饷哄於廷，不问。

三月，武宁之仁大捷西兴渡，进爵宁国公。

唐阁部黄道周监定卤侯郑鸿逵师北进历境上，监国疑唐内郤；命御史柯夏卿、王绍美即讲唐大学士黄鸣俊，固前约，唐、鲁平。拜张鹏翼永丰伯，守衢州。

开纳贡例。

时东林党事益坚，宁、绍互水火力，惟余姚中立。

监国朕居步辇以行，整冠而见朝，循故体例；晨前无所裁决，凭票拟。

夏四月，唐遣御史陆清源饷江上诸师，不闻监国。方、王争饷，清源见杀；唐不问。

五月，监军左尹招东、义健卒千人，副将黄国仕总之。饷艰，军中半饷。义奋西渡，病卒涕泣愿从；自临山先发。逾日，复渡千人。风覆凤凰山，费仗尽没。时御史王正中不谋尹，孤营檀山露；〔内〕援疾至，尹恐檀山败，气夺，疾驰岭援之。大捷，正中全师归。因尽捣北守江诸汛，纵火焚五十里尽。

会北师渡桐江，诸军以饷缺心不固，沿江守铺数百里一刻自烬，喙走不能制。监国奔台州，憩富平将军张名振石浦，文武诸臣水陆争东逸。总兵张国柱乘败劫监国宫眷，北降；元妃张氏见害。有遗孤，浙西好事者申毅潜敛同志，曲衣食之；不知所终。

六月朔，北师入绍兴。会稽知县受香犹戒守堞，闭门西抗；百姓争裹之出，舍山僻。香得民，周藩□梦天畀真父母，尝榜三字於县署云。时诸臣之殉越者，为吏部尚书余煌；太仆寺少卿兼监军御史陈潜夫，偕妻妾孟氏沉水死。宁国公王之仁舟出定海，为唐舟山黄斌卿所劫；自沉其家属九十三人於海，纵二子鸣谦、宣佐於陆，身诣南都，衣冠请死，大声呼先帝而尽。诸生高朗公服沉浦邨；朗父兵部主事岱感朗义，不食死。乡荐叶汝■〈廿恒〉及妻王氏道促追师，并沉水死。水军都督施汤贤、副将周晋，郑之瀚与诸生陆芳侯、阮日生等先後战歿。诸生严于鱗、平远咸见害。诸生傅中黄、杨守程、程妻甲氏咸自杀。布衣倪舜屏、倪伯明亦自杀。阁部章正宸、御史沈彩、何弘仁及诸生陆孝荃咸易姓名，肥遁不知处。北师迹监国于台州，礼部侍郎陈函煇、御史沈履祥、原任总兵李唐禧咸死之。北师至金华，阁部朱大典闭门拒守；力竭城破，一门赴火死。阁部张国维离汛归东阳，沉水死；子总兵世凤被执，及难。永丰伯张鹏翼与通城王盛徵协堵衢州，力竭寡援，城破被执，咸不屈死。江山知县方召冠带，为位北拜，偕其妻沉水死。温州永嘉诸生邹维则、张实孚、瑞安诸生叶尚高咸死之；实孚有健儿从死（诸在「抗运」、「致命」传详之）。於是浙西及江以南诸乡较之起应鲁者，咸先後散（文武士民嗜义赴鼎镬不惧，指不胜屈，亦载诸传悉）。乡荐葛定远、诸生查书继以鲁事败，失心病瞶，语率不恭；家键以死。荆国公方国安北款，已易志迹露，见疑於浦城；国安妻语不恭，不食死。故南都阁部马士英因国安偕款，坐漏辟伏诛。兵部尚书阮大铖北归，跃马自诩可用；堕崖死。

秋七月，北师覆福京。平鹵侯郑芝龙归款，子国姓成功断洛阳桥北拒。

九月，唐主行在延平不终。故唐永胜伯郑彩以兵迎监国於台州，保鹭门。

冬十月，桂王由烺监国於肇庆。十一月，唐王聿■〈金粤〉据广州自立，改元绍武。北师猝至，聿■〈金粤〉及难。桂监国即真，以明年为永历元年。

丁亥（监国二年、永历元年）春，监国踣鹭门。

北师悬闽广王招永胜彩，使奉监国归命；彩不从。平卤芝龙亦手书其子及彩，皆不应。

晋封富平将军张名振为定西伯。

始闻唐王讞确，为发丧缟素二十七日。

夏四月，北苏松总镇吴胜兆回向，约入定西名振海师共起。先一日，会文武议防海；即席杀同知杨之易、推官方重朗，号众以待。而名振炮震潜蛟，舟覆失约；胜兆遂为中军詹世勳所缚，就法。连兵科给事中陈子龙、主事钱旃、乡荐张宽、诸生夏之旭、侯岐曾、徐尔穀等四十三人及难。

秋七月，钵僧王祁与郧阳王常湖起兵破建宁府，守之；并下寿宁、政和二县。桂主驰封祁郧国公。建宁道顾南泾走海。

监国起兵鹭门，晋永胜伯郑彩为建国公、义兴伯郑遵谦为侯；授钱肃乐兵部尚书。

九月，建国彩围福州严，城中饥，至杀老幼以食；连破所属长乐、连江、闽清、永福等县。北将汤隆、艾元凯潜出城降，褒封伯爵以劝。

冬十月，建国彩协故唐兵科给事中刘中藻合攻福宁州。监国下谕，守将涂登华以城降；封登华振威伯。晋中藻兵部尚书，不受；中藻连破福安、罗源、宁德、诏安诸县。

原任知县林逵起兵保福清，授监察御史；阵歿，以逵弟勉代领其军。

召全城头乡原任岭西道吴鍾峦为通政使。以刘沂春为副都御史，疾辞；不许，走。

敕印山东布衣蔡奶憨等鼓诸义杨威、孙凤亭、丁化林、杨王休、王俊等攻围东昌、青兗、登莱、高唐、东平及青城、长山、淄川等处；縶原任侍郎孙之獬，负剑游示四关而斩之。

十二月，诸生华夏等密说舟山肃鹵斌卿以舟师至宁波城下，夏为开城内应。机先露，同诸生董献宸并连御史杨文瓚、瓚兄诸生克仲、冯京第、王家勤、杜应侯及文瓚妻张氏、嫂朱氏咸死之。

戊子（监国三年、永历二年），监国辟鹭门。

春正月，北总镇金声桓回向於南昌；寻总镇李成栋回向於广东。桂主封声桓豫国公、成栋惠国公，驰授敕印。

以钱肃乐为东阁大学士、吏部尚书，沈宸荃为兵部尚书。

时建国彩专；与大学士熊汝霖久约婚，偶以争鱼小衅，令其子梦龙诱杀之，熊家口十八人尽。阁部肃乐请罢朝谕祭，监国畏彩，不果行。

布衣周瑞以乡健攻闽安镇，大捷；夺关直入。监国封瑞闽安伯。义兴侯遵谦扈驾，自三沙入闽安。晋遵谦兴国公。

遵谦奉命督福清义旅，与建国彩争饷；彩杀遵谦及其金姬。义兴余较复起浙东，监国咸遥授敕印；出没林麓北扰者数年。进士方维新以唐都御史，初角起诸暨，移屯开化，犹雄常、玉两山之间。王翊以县吏起，兵势独雄，律严；监国授兵部尚书兼都御史。徐鸣珂以学倖领义事，颇震荡；授将军，晋伯爵。诸生谢龙震，初以振义，授中书舍人；时复蹈厉不歇。诸无所就，临刃不屈。於是於潜原任知县俞文渊奉所为定王者，号召山泽；事败，被难家九人。副将杨崑以桂空敕招摇远近，事败及难者七十二人。水陆呼吸以踪迹见疑及难者，四十二人。

晋马思理东阁大学士。

福州乡绅周之夔鼓其同义，先後谋开门速兵入；事泄，咸死之。

三月，原任礼部尚书朱继祚以仙游破城义旅王士玉等攻兴化，北分宪彭遇凯开门入之。继祚来朝；仍遇凯分守道，守兴化。

豫国声桓标将郭天才初奉北檄援福州；至是，闻声桓回向，密献款。封天才忠诚伯；令反攻福州，悬侯爵以待。

夏四月，北部院陈锦以满师困建宁；力竭城破，郕国公王祁与郕阳王常湖咸死之。

五月，大学士吏部尚书钱肃乐卒於琅琦。病剧，闻连江不守，以头触床几碎，一号绝。监国撤朝三日，赐祭九坛；赠太子大保，谥「忠介」。建宁属县皆不守。

秋七月，兵部尚书刘中藻连破寿宁及浙之庆元、泰顺等县。

冬十二月，兴化府及长乐、寿宁诸县复不守，兵巡道彭遇凯、原任礼部尚书朱继祚死之。

尚书中藻复寿宁。

原任中书舍人何兆龙以乡较起温州、布衣俞书素起天台，咸给敕印称将军，事不就。

己丑（监国四年、永历三年）春正月，监国由鹭门诣沙埕；议蹕福宁州，不果。

南昌败，豫国公金声桓、大学士姜曰广等死之。

二月，晋兵部尚书刘中藻东阁大学士，赐蟒玉。

惠国成栋以兵应声桓攻赣州，後期败，走信丰，溺水死。兵部尚书揭重熙野走，被执死。

夏四月，福安被围急，副将连琪引兵援之，阵歿。北师以琪首徇，城中不动。

闽乡绅林梦龙兵起桐山，陈死。

时国姓成功保障、泉海上诸岛，奉桂朔专，不赞鲁一矢；亦二其从子建国彩，兵不逾洛阳桥一步。

阁部中藻保福宁州。北师攻围历四十余日，以书招中藻，义绝之；力竭城破，中藻自鸩死。子思诚，投井死。诸下县皆不守。建国彩与中藻疑，益孤；弃监国，还三沙自保。

秋七月，定西伯名振扈监国驻台之临门。词臣张煌言协定西舟师北扰，不利返。

八月，监国诣舟山（舟山，唐曰滌洲、宋曰昌国县。西距蛟门二百二十里、东距普陀四十里；长一百三十里、阔七十里。户田九万亩、涂田三万亩），肃鹵伯黄斌卿不即纳。舟山前镇王朝先及荡胡伯阮进欲兵之，监国不可。拟晋肃鹵为侯。朝先令其甲士尹明托密报冒入，时斌卿方伏地听谕，辄奋刃陷斌卿背及胁。监国即参将原署为府。晋定西名振为侯，总督军马。进系名振故部，晋侯；专治水师，截关拒守。晋故唐都御史张肯堂东阁大学士，加太子太保。沈宸荃以兵部尚书、刘沂春以都御史，皆东阁大学士。以吴鍾峦为礼部尚书、李向中为兵部尚书，咸加宫保。朱永

佑为□部侍郎、李长祥为兵部侍郎、徐孚远为国子祭酒；陈九徵为太常少卿，王衡、杨玘为钦天监丞。仍涂登华振威伯，加少保。晋周崔芝为平彝侯，周瑞为闽安侯。进侄骏挂义英将军，定西标杨晋爵、叶有成、方简咸与挂印。余文武加秩有差。

冬十一月，遣太常卿任甲、御史余图南往日本通好。颁监国五年历於廷臣，从戊申原定大统历。行朝贺礼，岁如制。

庚寅（监国五年、永历四年）春正月，大学士刘沂春病归。庶吉士张煌言入扈舟山超拜兵部左侍郎。晋李长祥东阁大学士兼兵部尚书。同官沈宸荃为长祥所嫉，挂冠隐舟山之僻。

夏六月，荡胡侯进、平彝侯周崔芝合攻闽安侯周瑞，尽有其舟师。瑞溃围出，依国姓海岛。平西朝先傲，定西名振以他事袭杀朝先；阳托正剽刃斌卿之罪。朝先部吕廷诏、张济间内归。

冬十一月，权宜给俸扈从诸臣之不能朝夕者，约二十余人；不遍及。

辛卯（监国六年、永历五年）春二月，荡胡进扶公义，以兵攻建国公郑彩於三沙，败之。彩单走东粤外洋，至己亥暴卒。

振威伯涂登华以梅山内归。

夏四月，荡胡进为内镇马进宝所间，且内归；马盛具以待。进从子义英骏不能止，以告定西名振。名振为位南田，遥拜舟山；涕泣曰：『荡胡去，主上安归？愿自杀』！进感激，为绝款议。

六月，侍郎煌言治兵鹿颈头。

秋七月，旱饥；乞粟於日本，为航粟数千斛济舟山。

八月，内师三路攻舟山，定西名振、侍郎煌言以兵分应南北洋，皆捷。而荡胡进当定海一面，先锋江天保迎击，压沉内舟十有三，斩溺无算；所俘尽断其右臂，纵还。监国祭蛟门疾还，御舟不登陆；欲携世子入舟，名振不可：『此以寒守者之心，是速尽也』！监国诺。已而荡胡进战螺头洋，掷火自焚，师蔑；内师执进胁降，不应。时监军主事丘元吉、金允彦等督三亲标守城，则内师攻舟山不遗力，被炮死者亦夥，困十昼夜；南北二洋胜师次十八门，观门不敢进。内师投书劝降，阁部肯堂等为不启，辄焚之。是月之晦日，监军允彦潜叛北归，而元吉继之；守者犹执允彦子细醢之，以传示四门。是夜，星陨如雨。明午，城破。锦衣李向荣及总兵马泰等、副将单登云等各大言不屈，挺刃率民兵巷战，尽死之。定西名振扈蹕远洋。监国

继妃张氏赴井死，宫眷十三人从死；一内监自扼死并傍以殉。世子北去。文武诸臣殉舟山者，大学士张肯堂自杀，家属二十三人从死；名振兄都督名扬等家属五十余人自焚。都督焦文玉力战，负重创自刎；妻张氏随自尽。兵部尚书吴鍾峦诣学宫自杀。吏部尚书李向中、吏部左侍郎朱永佑咸被执，不屈死。监军御史梁隆吉手刃全家，遂自刭。副使高世昌触石死。兵科给事中董志宁自缢文庙死。河南道御史朱养时及吏部主事杨鼎臣、户部主事林之瑛、兵部郎中李国祯、主事刘午阳、礼部主事董玄、李开国、学录曾应选俱死之。中书舍人顾玠、江中泛、陈所学、顾行（皆舟山人）阖户自焚死。起义逋海林伯起等与诸生顾明楫等咸赴学宫自缢死。大学士沈宸荃潜泛海归，舟至大洋忽大风作，覆死。故汝霖、嘉绩、永佑家属及松江倡义沈犹龙逋逃子甲，并得回籍。

侍郎煌言、定西名振扈监国於三沙，国姓成功朝见，行四拜礼，称主上；自称罪臣。时从臣寡，居监国於金門，供亿唯谨。遇节，上启称贺；年余不懈。

壬辰（监国七年、永历六年），监国躋金門。

国姓成功以兵攻漳、泉，尽有其下邑。使人刺杀内总督陈锦。

桂主自安龙驰授国姓招讨大将军敕印，不通鲁监国；成功避嫌，节数渐减。各勳旧王忠孝、郭贞一、卢若腾、沈荃期、徐孚远、纪石青、林复斋等间从内地密输，缓急军需。

定西名振矢公义，乞师厦门，得助兵二万。尚书煌言、义英骏、诚意伯刘孔昭等合师直溯金塘，获叛者金允彥磔之，以祭诸舟山死事者；随题诗金山寺而返。

癸巳（监国八年、永历七年），监国躋金門。

内戒漳、泉。国姓招讨托言内镇臣马进宝、道臣黄澍实启衅，仇在不共；必内处不共，乃罢兵。内立逮二臣责信。招讨复作书遗其父芝龙，要漳、泉、兴、福四府；书中称子、不称臣，称朝廷无「陛下」字样，语多不恭。复令平南伯陈辉、庆都伯王秀奇、忠孝伯洪旭等协鲁师北出；闽师风覆三之二，鲁师全。

冬十二月，全师复进崇明，大捷平洋沙；师复振。

甲午（监国九年、永历八年），监国躋金門。

春正月，全师复入京口；失一副将阮甲，四日返。招讨复遣戎政司马陈六御及将军程应蕃等协抵平洋沙，攻崇明，不克；平原将军姚志卓愤自刭。还触吴淞关，掠内战舰二百七十号。名振以沙船九十号泛登莱及高丽，乃还。

夏四月，闽、浙地震。

五月，宁波内镇将张洪德外款，封定宁伯。

秋八月，协攻舟山。内先锋陈虎战歿，督镇巴成功以城降；闽戎政六御与鲁义英守之。

招讨再答父芝龙谕，勒割福建一省及沿海一带州县；不得请，统兵攻漳、泉急。久之，退保海澄。

冬十二月，台州内镇将马信外款，纵所劫巡道张、知府刘内归。

定西侯张名振病卒。监国震悼，辍朝；赐祭。

乙未（监国十年、永历九年）监国跽金门。

夏四月，招讨标将黄梧以海澄内降。国姓脱，梧得封海澄公永镇。

秋九月，招讨全师屯厦门，改称思明州（思明不及三十里逼）。外四屯：兵部张煌言驻临门、将军陈文达驻玉环山、阮春雷驻楚山，遥为呼吸；而牛头门亦有劲旅。

丙申（监国十一年、永历十年），监国跽金门。

春，桂主自安龙驰敕封招讨成功延平王，一切军国便宜行。成功谦，仍以前招讨下诸文武，不用王印。或曰桂以成功不行王印，疑王以「二字」不称，改「一字」，更进封潮王敕之，成功益谢无功，不受；而所部皆称藩前云。

二月之三日，舟山城哭五日，声若风筝而咽，逼听之不得；群遥伺之，复作。如是达昼夜。鸡犬夜登屋而号。居守咸以为不祥。戎政司马六御不得众，寡和辑容纳之才，且以闽遣；而其下共事义英阮骏等故鲁将，不甚矢寤寐。

夏六月，舟山南关民间偶发石碑一道，系国初汤东甌所建；其乡人曰：『此碑出，恐有变革』。

秋八月，内大治师，取舟山。初，战不利。已而义英骏海艖胶浅，猝应敌，战不利，将军刘永锡（孔昭子）跳水死。戎政六御、定宁洪德合以兵援之，被创，并自刎死。将军杨晋爵截横水洋中，孤军当坚，持两日不懈；军饥、火药尽，晋爵负重创不肯屈，自刎。九月，大常陈九徵被执不屈，见杀。义英将军骏但以十三■〈舟宗〉遁壶江、崑之间；崎诸义集，咸乘此解去；而外款者尽见收。舟山堕，其民内徙

。

丁酉（监国十二年、永历十一年），监国跽金门。

时内设海禁严，沿边居民，自江南历闽、浙达东粤，内徙四十里；略比古清野之法。诸泊例税尽捐，片板不得下洋，漏一粟上刑。凡所迁，许寄食於邑之姻族。遵令稍迟者，纵火焚其居；业海鱼虾者，过限一步亦死。其田亩缺课，摊补通邑；勿减。盐课有定额，自内场不迁外，亦令诸商合补之。海上诸屯，果以饷不足，率内附。

桂主仍敕鲁王监国，迁澎湖岛。晋张煌言东阁大学士兼兵部尚书。

夏五月，延平成功遣将军马龙等以降将入间骚东粤，大残瓠汀背，聊应军需；攻城，守力不得入。计执澄海知县祖之麟以去，称制授兵部尚书；之麟不受，愿内归，延平不即许。

秋八月，原澄海知县祖之麟间脱，内归。

戊戌（监国十三年、永历十二年），监国跽金门。

延平以舟师掠招宝山。兵部煌言计合延平共事，差有可为，姑绝监国起居以泯嫌隙。

己亥（监国十四年、永历十三年），监国跽金门。

夏五月，阁部煌言合延平，自请为先锋，不统於郑；悉舟师从大江突京口，为坛严家沙，禡告太祖高皇帝、毅宗烈皇帝，一军皆帛，哭声震百里。其为令，专与满师决；遇录旗摇手不应。大胜镇江之七里港。巡抚朱部安庆师战瓜渚，全军败没；朱被执，纵之。漕抚亢以淮安师下，半道溃；亢沉水死。煌言开府芜湖，镇江下百姓掷帽与堞齐。传缴千里，上印者三十有七；辄与明制，仍其官。西至荆襄、南及南赣，烽信所及，揭竿复起。内楚师顺流东援，芜湖扼之；沉其四舰，众溃去。海师列十二营於白土山，困金陵之观音门；候陆师并力，不即至，历五旬师老。

秋七月，满师明将军自楚还，夜突城出，海师甘辉营被劫；战桃湾，不利；复大战石灰山，败绩，失万人。将军辉与副将余日新被执就讯，责辉劝降国姓成功；辉傲曰：『国姓父不能夺国姓，乃仗辉？且辉亦安肯降国姓也』！怒斥同讯日新：『丈夫得死所，濡忍何为』！就法不屈。

海师全退，煌言绝援，阻深入；粮竭，舍舟登陆，转战千里，万人残耗尽。为伪贾

服，间走临门；密上状监国。

冬，延平师大扰闽之嵩门，内师不利。

庚子（监国十五年、永历十四年），监国躋金門。

时各较饥，率北款，蒙宠被过於诸旗。遂有伪造敕印，曾未一经涛，辄自称方命者。

辛丑（监国十六年、永历十五年）春，监国躋金門。

桂主依缅甸不终。久之信确，金門扈躋者拟监国即真，以延明运；时不知定武之保房山也。微致阁部煌言，煌言三上笺：『幸无以虚名为的，养晦待时；且海滨孤子，无所为汉官威仪者矣』。

壬寅（监国十七年），监国躋金門。

国姓成功以所部曹文龙、马信谋营取台湾（系贺兰国入贡待命之处），阁部煌言驰笺止之。时止郑旅可以北逆，郑即安，敌忾不力；是欲危置郑以图安，而郑急不拔。於是台湾下，延平留长子经守思明，令总统五军周全斌、忠贞伯洪旭、督饷郑泰合赞思明。

夏五月，延平王招讨大将军国姓成功（原名森）薨於东宁。先是，入台湾，改称东都、再称明京，以俟桂主巡狩。久之，缅甸变确，乃改为东宁。於东宁隔江筑承天城，以安宦东宁者之家（或曰东宁，故亦为安海云）。延平初以疑外其世子经，遗命立不必长；经自厦门奔丧，国中尊之，主东宁。仍用桂朔，〔行〕群臣称嗣藩令谕。改设六部，官名必改，不敢拟制。

秋九月之十有七日，鲁王监国病薨於金門。继妃陈氏有遗腹子，周支长杨王术桂保护於东宁。嗣藩改称长杨王为宁靖王。

癸卯（定武十七年），韩主保房山。初，桂改元，讳不奉朔。郝永忠者，奉主与李来亨等并激抗於郟西乱山之中，如永历之年，攻不出数县。至是，来亨败，房山亦破，主不终。

甲辰（永历十八年），桂年在东宁。久之，和兰国急报仇，以子内朝，请兵合攻东宁，不得；并力厦门，败。於是金門、临门、牛头门、鹭门、楚山、玉环山诸岛师皆解多北款者。

秋七月，阁部煌言被执。煌言既失临门，潜范澳。迹及，素袍朱履就道，吟咏不辍。既至武林，抗言不屈。进酥茶，摇手：『煌言从不知此味』。出就卫，绝饮食；卫士哀号，复进如常。在道诸咏，有『日月双悬于氏墓，乾坤半壁岳王祠』之句；复有「放言」及「李陵、子房论」，以大义为归。九月之七日，就刑；所并执监纪罗伦（字子木）、勇士叶云、门者冠玉并二持槊咸尽。妻董氏、子祺，旋及难。绝命诗曰：『我年适五九，乃遇九月七；大厦已不支，成仁万事毕』。

已东宁两奉内招，复持前要挟语以塞；不恭甚。

论曰：天。

——见原书「纪」卷之十九

（附）鲁荒王檀（王颐坦）

鲁荒王檀，母郭宁妃；高皇帝第十子。生两月，而封国兖州。王文弱，好诗歌，颇饵金石，病眇。其妃为汤信国女；尝建一苑城外，与妃出宿。上召入宫，髡之；赐妃自尽。王薨，上册之如秦，谥曰「荒」。子靖王肇焯嗣。宣德初，为长史郑昭请老；上以王贤，许之。

五传端王观■〈火定〉，幼狎其典膳信等，淫戏无度。为复屋曲房於东园，挟娼乐之；裸男女杂浴，■〈火定〉临水纵观。左右有忤，立毙之；或为炮烙之刑。信等咄啐杀人，有抉眼、截舌死者。世宗念王幼，革其禄三之二；逮信等诛之。子颐坦，自宝庆王进封。父端王病，尝药请代；丧葬遵礼，衰絰三年。捐田湖，资贫民。诏嘉之。

按靖王六子，其支乐陵王有三子，当荷、当洵质纯，而当漆敏；师滕滋以告王，王属心漆。荷、洵恨滋，杖杀滋；坐，并废为庶人。又东阿王阳鏢，孝友能诗，善楷书。而庄王阳铸者，十子。其支再传，当瓿王健楸，老亡子；上言：『宗室所以滋蕃，由其诈以妾媵子为嫡子。臣今六十无息胤，所受府第屯厂，请以身後尽归鲁府，待给新封，省民财万一；乞着为令』。报可。又庄王一传归善王当沍。正德中，流贼攻兖，当沍借护卫兵器，率家众乘城，射却之。朝廷降敕褒谕，遂以武健闻。当沍数与袁质、赵严等角射，而材庄王较尉智，属长史魁求之王；魁不应，而劝王别绳智，谪为乐工。当沍怒，欲缚辱魁；魁匿庄王所，乘醉言当沍且反，从王子以闻王。吏部主事梁穀者，东平人；微时凶戾，昵诸恶少年。既贵，厌苦之；而或有从东平来，云袁质、赵严等佐当沍，夺王较尉智不得，治兵反。谷心动，告变於辅臣杨一清，而以所怒恶少年为从。时内廷权贵欲邀封拜如寘璠故事，益重言之；密闻武宗，大发兵伺变。魁又奏庄王不先发，无以塞内廷权贵意。王心惧，亦奏当沍反。於是遣司礼太监祥、大理寺少卿纯、锦衣卫指挥端，重兵布置德州、大名、淮

、徐间；京师汹汹，旬日震动，以为事不万全，一决难制。及排破当汭宫，当汭方醉卧，无所见；得弓矢，故御寇所借护卫物也。当汭愕，不知所为，与质、岩等俯就缚。及讯得实，御史翰林奏穀报怨邀功，魁譖子、惑父，并宜置法。内廷犹以翰臣纵叛，下锦衣狱，降为州判官。御史启充等再讯，极论穀鼓煽流言，启小人生事喜功之心，致大臣轻信寡谋之失，死不足尽法；不报。时当汭罪无所坐，不得已，但云乖违祖训，降为庶人，幽高墙；览等及宗属戍肃州，魁亦妄诬坐斩。中官护当汭之高墙，当汭犹未知所坐，中官曰：『之凤阳谒陵耳』。比至，曰：『此何地』？曰：『高墙』。乃大恸曰：『冤哉』！触墙死。辅国将军当潰，为钜野王後；慷慨有志节。嘉靖中，请停郡王县君恤典，以苏民困。又辞己与子岁禄，佐县官疏通运河，请以己父子禄赈封内饥民；劝上法祖宗，重国本，裁不急，息土木，词甚剴切。下敕褒之。又镇国中尉观燠，亦钜野王後。父奉国将军健根，既以贤孝称；观燠被服儒雅，好著述，执母丧哀毁，周恤处士万甲，三十年不懈。弟观■〈韦美〉，亦以诗画名。又钜野中尉颐塚，安丘将颐■〈佳康〉，皆倜傥有逸才，声诗俊拔。

崇祯九年，东师深入，鲁王甲捐金募士，力以御。十五年，王遣左相俞起蛟与前给事范淑泰合捣流贼。乙酉，王薨；世子以海立四日，东师入，南奔监国绍兴（附纪）。

论曰：鲁王檀文弱，国於诗礼之遗，传世循谨。如嗣王颐坦及东阿、当瓯二王，咸孝友属文，能推让。至将军当潰之辞禄、健根父子兄弟醇谊宏文，慷慨不一而足。独归善王当汭一案，久沉不白。夫世无醉卧无所见，愕不知所为，辄坐以不轨者。即取程祖训，汭非私治弓矢，借护卫物以缮城，正属诸支匡王大义；且此时流氛不靖，事已未便奉还，情也。而竟欲比之眞璠之弄兵，非其解矣！监永道闻庆捷，辄居发纵之能，诸监陆、马、谷、魏与义儿江彬等急欲得一似反者一试，以豪镇国公之秉钺，即何必汭果存其实哉！误认高墙以为谒陵，嗟无此反侧子也。最後以海走监国，系东南者数年。其初册名时，亦已明识其水滨之不复矣。

——见原书「列传」之四

（附）诗歌逸

任光复，初名应复；绍兴人。扈舟山，历省员，至太常卿。舟山败，脱归。诸义死，咸有诗纪事。挽在制尚书李向中者曰：『惊烽何处逐飞埃，星陨秋空咽暮雷。九伐尚賚司马志，长波肯为故人回？自来剩好黄冠发，此去寒留碧血灰（李死烈於永佑，临刑有句：『血比茱弘碧，还期涅死灰』；故云）。慷慨从容同一致，浪淘千古重徘徊』。挽马霞丹有曰：『式微莫慰孤臣老，又是崖门祇自怜。六载波涛空羽檄，半生金石绝韦编。雪交有句谁吴隐？云渡飞书重鲁连。就义从容追烈烈，何争嫫氏补崩天』！光复又有柱联二语：『假笑啼中真面目，新歌舞处旧衣冠』。又哭

孙嘉绩有句。嘉绩字硕肤，绍兴人；以进士历官。护鲁跽，拜大学士。卒海外。光复共飘泊最久。诗曰：『顿将金粟托燃灰，千古兴亡事可哀；七载江干丞相垒，几宵帐底故人杯。亭亭玉柱孤难倚，历历星躔唤不回。风雨鹃啼寒食尽，荒坟无泪滴莓苔』。

——见原书「志」卷之三十二（中）

· 唐主（附）

唐主名聿键，闽人私谥「思文」；为太祖第二十三子定王桱九世孙也。原封南阳。性恺击坦易，好读书，能文；乐推诚与人。以父早背，失爱於祖端王；两叔谋夺嫡，未得请名。及祖端王薨，守道陈奇瑜、知府王三善始为疏请，乃得嗣立。崇祯九年，南阳饥；王奏请发赈，诏从之。寻有宗藩仪节之议，王乃杖二郡王於廷。以流贼横逼，复上书请得奉特敕收诸砦义勇，以靖祸乱；不报。十年，贼益炽，遂治兵擅离封国；廷议以为非制，附谋叛例，发南京高墙；而更立王嗣唐。王在禁，益博洽今古，走笔数千言。如是八年，所着书盈丈。十四年，李贼闯南阳，唐王遇害。甲申国变，王出高墙。乙酉五月，南都复破；王抱书南走，遇户部郎中苏观生於嘉禾，观生说以大计，图恢复。会将军郑鸿逵师溃镇江，以所部护王入闽。於是巡抚都御史张肯堂、巡按御史吴春枝及故辅蒋德璟、礼部尚书黄道周、南安伯郑芝龙率诸臣请王监国福州。

乙酉（隆武元年）夏闰六月之七日，王行监国礼。将军鸿逵随请急正位号，以压人心、杜後起；遂於是月之二十有七日，上尊号，改元隆武。郊，大风拔木飞，瓦还半道；尚宝司马蹶，玺堕地折一角。改福州为天兴府，称行在；寻称福京。首下登极、分封、亲征三诏，皆出亲裁；语痛切，远近捧读，无不挟泪。以王妃曾氏为皇后，不设妃嫔。

以原任大学士何吾驺为首辅，蒋德璟、黄道周、路振飞及苏观生皆大学士，张肯堂为吏部尚书，李长倩户部尚书，曹学佺礼部尚书，吴春枝兵部尚书，周应期刑部尚书，郑瑄工部尚书，马思理为通政使，余进爵有差。开储贤馆，以观生专主宾客。寻以傅冠仍原官大学士礼部尚书，而黄景昉、何楷、陈洪谧、林欲楫、曾樱、郭维经、叶廷桂等先後入阁办事；其远不至，如王应熊、杨廷麟等，署名阁员任事。

凡批答，从展前可否，上手定之。而封疆恢剿，尽委郑氏。封郑芝龙平鹵侯、鸿逵定鹵侯、彩永胜伯、广英为锦衣都督。已欲拜芝龙监国，鸿逵与彩不从，乃已。遂以芝龙子森为养子，如太祖、太宗时例，赐姓朱，改名成功。筑坛拜定鹵鸿逵为大将军，授上方剑。适大雨，主履泞，鸿逵下坛两蹶；论者以为不祥。

设兰台馆，命礼部尚书曹学佺为总裁，监修两朝实录。追谥福主安宗简皇帝。置萃

士之科，比庶吉士。

时湖广巡抚都御史何腾蛟以南都不守，人心回惑；布檄出师，保长沙。七月，遂以五难入告。王封腾蛟定兴伯，以兵部尚书兼东阁大学士。李贼自成既走死，弟李过同其党高必正以数万众受都御史堵胤锡之招；主手改李过为李赤心，晋胤锡兵部侍郎。腾蛟力请亲征，不果。

以吴炳为布政使。诏编修刘以修为主考，首开乡试。留寓福京者亦与，得二百四十人，榜首为胡姓者。主以为有嫌，谕覆试；得一百六人，主亲定解首叶瓚，而胡姓者居第三云。

封介弟聿■〈金粤〉为唐王，主唐祀；国南宁，未赴。

先是，鲁王以海避难台州，於是年七月从起义诸臣之请，监国绍兴；当浙边。都御史朱大典为唐守金华，拒方国安南逸之师，不得入。

会靖江王甲擅弄兵，系巡抚都御史瞿式耜，以总兵杨国威为先锋，遣官李贞入闽争立，主杀贞；两广总制丁魁楚及巡抚瞿、中军焦琏、参将陈邦辅等讨平之，更立靖江王亨歆。封魁楚平粤伯，并及同事邦辅为思恩伯，晋式耜兵部侍郎兼原官。

时兵额定二十万，自仙霞岭而外，宜守者一百七十处。

秋九月，早朝，定鹵侯郑鸿逵倨立阁臣苏观生上，同官黄道周争之；鸿逵奋掌道周，主为下殿和解。

令兵科给事中刘中藻奉诏下鲁，鲁文武咸以势当敌，不宜内自貳；且鲁未有大号，而唐叔父尊，叔父未有子，可以监国为後，合立以御北师，开诏便。而鲁尚书张国维、都御史熊汝霖及国舅张国俊、中书舍人谢龙震数人，又以鲁、唐皆高皇帝初分封，支等而鲁长；闽僻安，遽自大，未尝以一矢相助，乘危而欲下之，不可以为名；且唐何忍撤蔽以自露於敌，吾宁独瘁而听天之所予？不开诏便。适唐平鹵芝龙行密表於鲁，愿释唐而私驱驰鲁；廷臣曰：『彼二唐，即何不可为，勿信』！而监国惟国俊言，击案曰：『有如言开诏者，与众弃之』！遂令御史王绍美、沈彩往与唐使平。江上文武，则大率露表遥称臣天兴矣。都督陈谦在衢州，挟两国以自重；於鲁称闽封伯爵、於闽称鲁封侯爵，左右观望。唐主召谦下狱。御史钱邦芑密奏谦与郑氏素心腹，不诛必有变；内出片纸，斩之。晋朱大典东阁大学士兼兵部尚书，鲁江上文武加爵有差。

冬十月，邵武知府吴爌炜、推官朱健以小警辍移家口出城，坐倡逃；建阳知县施■〈火虞〉为奸胥所构，坐贪酷：咸弃市。

十二月，鲁师大败於杭之西山。主欲躬履行间，延臣请出关者章百道；芝龙中异，苦以缺饷为辞。龙溪知县谢太宗以贪被讦，罚赎银八千两助饷。

丙戌（隆武二年）春正月，遣肃鹵伯黄斌卿以舟师伺间吴淞，联络登、莱沿海诸郡；驻舟山。而都御史张肯堂奉命总督三吴，亦赴斌卿观变。

兵科刘中藻忤郑氏去位，主始知芝龙不可恃而不能制。

夏四月，遣御史陆清源赍饷三万两往犒浙师，私散江上；猝为方营所劫，清源见杀。乃复遣科部诸臣出监浙师，不以闻鲁监国；因尽取鲁温、台之粟，以官填郡邑，鲁不能争。

户部尚书大学士何楷以度支迟待为鸿逵所唾，楷辞官。主令鸿逵诣门谢，鸿逵不肯。他日楷出，鸿逵伺人於隘，猝击伤其左耳，楷无所诉。百方搜括，主事张夬至请开元寺铜钟熔为钱以救急用。户部尚书李长倩忧饷死。

阁臣德璟病去。时闽京尚讲门户，阁臣道周素与芝龙不合，每事抵牾；於是诸臣交章芝龙逗遛以附道周，而道周论事固执、无机变，不能善芝龙。同官观生力劝主出师赣州，以信天下；科臣金堡请仿汉高帝故事，自称使者，单骑走赣杨、万军，并敕诸路并进。观生托省陵至赣，料理行在；上不果行。加礼部尚书陈子壮大学士兼兵部尚书，俾得招徕援赣。兵科给事中张家玉监永胜伯彩之师，出杉关；甫解抚围，辄入关自保。主不得已，跽延平。以兵部尚书吴春枝为留守，辞不受。主屡敕芝龙诣延平议事，必不至。阁臣道周以儒服履戎，督鸿逵出婺源；师不进，道周乃以二十余骑前导。被执，吟诗数百首，见戮。鸿逵弃师去，不知所终。时赣州请缓急，观生还驻南安，檄赵、胡二镇吉安败绩之师令援赣，无至者，徒以声慰赣州。随令总兵黄志忠治战舰三百余号，游击罗明受为先锋，顺流且下；北师牵缆纵焚之，明受大败。

五月，鲁事坏，监国蹈海。

六月，主长子生，貌满月、兔唇；大加封赏，为恩泽伯者数人。群臣表贺，有「日月为明、止戈为武」等语；主为嘉叹。延平推官钱秉镫有诗忧之；曰：『自从东越唇亡後，早使忧天泣小臣』！

时金华失守，阁部朱大典死之。芝龙托海寇至离镇，尽撤诸要害守兵。北师直跨仙霞如无人；下浦城，给事黄大鹏、御史郑为虹死之。

秋八月朔，主在延平。仙霞岭搜得群臣北通书札一百七十封，即行在谕群臣，悉焚之；不问。

九月，延平烽紧，道臣王自和自缢死。主决计幸赣，犹载书十车以行。二十四日，抵顺昌。闻延平失守，仓皇骑而奔；从行者惟阁部何吾驺、朱继祚、黄鸣俊等数人，已而吾驺亦间去。北师至顺昌，获龙扛搜之，得马士英、阮大铖、方国安父子及方逢年前连名请驾出关疏，谓已降後事。士英、国安咸见杀延平城下，家眷百口尽赐北军。大铖先北款，从征；蹶岭，肠断气绝。主至汀州黄田，留蹕一日，距延平二百里；为北师李成栋所及，曾后自经，通政使马思理伪死脱。北师挟主至福州之橙塘，不终。福州破，阁部傅冠走匿民间；被执，与同官蒋德璟俱请兵入城之刻，并见杀。兵部侍郎吴炳方出督兵，被迹；缢死野寺中。指挥胡上琛、参将朱家臣，咸自杀。芝龙北归，其子成功分兵逆拒保海；永胜伯彩亦遁。主长於文辞，而严武不足。恭己俭约，宫中不设监寺；布袍蔬食，一老宫婢侍晨夕。大小政事，率亲为之。凡所遣发，每呼廷臣入内榻，便衣冠促语，尔我如家人；或曾后手调羹赐之。惜为积势所牵，不能离郑用武；而廷臣以攻讦为长，主但降气解纷而已。

冬十月，赣州破，阁部杨廷麟、兵部尚书总督万元吉、郭维经、岭北道光禄少卿彭期生、御史姚奇胤、户部员外于斯昌、兵部主事黎遂球、王其■〈穴上弘下〉、吏部主事龚芬、兵科给事中万发祥、职方主事周瑚、同知程必进、王明汲、通判胡紘、鍾良则、知县庄以莅、乡荐袁从谔、贡士王其隆、总兵刘天驷、卢观象、副将汪起龙、月中桂等咸死之；积屍沟渠皆满。

时监军道梁于涘伪降，欲更起；事觉，见杀。北师至漳州，兵道金丽泽从容就戮。兵部主事胡奇伟间脱，欲以兵再起；被执，与同官周定初见杀。礼部尚书曹学佺逃鼓山，度为僧；与贡士齐巽复起，呼无应者。学佺自尽，巽见杀。

东海士民私谥唐主「思文皇帝」。时主弟唐王聿■〈金粵〉与十三王浮海至广州，桂王由棖已监国肇庆矣。初，思文主有诏下桂，内云：『天下，王之天下』；原其序也。先是，平粤魁楚与阁部观生知汀信急，并释赣；观生因与魁楚郤，独走东粤。而魁楚至肇庆，适遇永明王避兵，遂合诸臣，奉为监国。而观生遂拟尊唐聿■〈金粵〉以抗桂，布政使顾元镜称三宜立，以亲而贤，又以貌降准；於是合原任侍郎王应华、吏部郎中关捷先等启王。十一月之朔，王行监国礼。使主事陈邦彦奉笈观桂肇庆，未返；五之日，遽称尊号，改元绍武。军国事专任观生；元镜、捷先以推立功，拜东阁大学士兼兵部侍郎。擢主事简知遇为兵部戎政尚书，王应华以右佥都御史晋东阁大学士。以杨明经巡抚潮州，御闽；陈际泰巡抚南雄，御赣。令总兵林察督所抚石、徐、郑、冯四姓水师争三水（三水，肇庆之韃），败绩；杀桂巡抚林桂鼎及监军道夏四敷、桂总兵龙伦，魁楚等乃以桂监国奔梧州。唐王封观生建明伯、总兵林察辅明伯。王■〈金粵〉冲厚无所裁，观生洁清、寡远略，覃恩无数，滥及不率；而号令不出四门，诸豪健闭围傲未服。北镇李成栋、佟养甲自闽下潮、惠，率开门降；随用两府符印，伪邮广州，报北师未至，以缓其备。观生顾信之。

十二月望，王方视学、阅射，群臣朝服，候行礼。礼未备，俄报北师至；观生曰：

『潮方奉启颇安；此妄言，为敌间，惑众』。斩之。三报，杀三人。则成栋以十七骑汉装，斩东门入；或告观生，犹以花山义砦就抚来也。须臾，满师继至塞巷；王急变服，从後庭逾垣出走，匿大学士王应华邸中。嗣恐迹至，复间走洛城里，为逻者所得。时宿卫可万人，变起仓卒不及传；西市民，犹或执槊摧北骑数人。大学士元镜独先缴印，露顶；谕居民，称『逆藩授首，百姓安枕』云云。北两广修以元镜媚曾为先容，颇优礼元镜，元镜愿以左藩印，下诸属督降，效惓惓勤；修益信用，许元镜当保大用。元锦辄署门，大书「内阁顾」；修曰：『本朝无是衔；且擅用衔，犹不忘明乎』！遂轻元镜，终不荐用。是日殉难，为大学士苏观生、太仆卿霍子衡一家九人、国子监司业梁朝锺、行人司行人梁万爵、爵弟万采、举人陈嘉会、中书舍人邝露、生员冯协扬等。次日，剃发令下；抗北令百余人，皆见杀付法。妇女以贞自裁者，不可数。十八日，凡诸王之附居广州者，皆就戮於演武场。王■〈金粤〉独拘卫东察院，北师使人馈酒食；王■曰：『吾如引一勺水，何以见先帝地下』！竟不食。遂逼令自裁，引帛尽。

论曰：天！

——见原书「纪」卷之二十

（附）唐定王桢

唐定王桢，高皇帝第二十三子，母李贤妃；国南阳。桢敏而易；子靖王琮炆嗣，综核有矩矱。入朝，五日三召见。妃高氏，未册而王薨；妃自经死，追封靖王妃。弟宪王琮烜嗣；临薨，善诲诸子，为诗永诀。传庄王芝址，以孝闻；亦被服儒行。子成王弥錡，以颍川王进封。錡肆力经史，屏几书训言。诸宗有饰裘马、买名姝者，憎之若浼；日与文士觴咏。士大夫道南阳，无不求见王錡。弘治中奏：『朝廷待亲藩生爵、歿谥，亲亲至矣。间有恶未败闻，没获美谥；请令勘实，用寓彰瘝』。上嘉尚；遍布诸王。及武宗出游，王作忧国诗八章以志感。无嗣，爱敬王宇温贤，立为嗣。嘉靖中，温以贤孝旌。久之，助太庙工，献黄金六十斤、白金六百斤；赐玉带，益岁禄二百石。

按宪王六子：其支三城王芝塽，通经着书，精书画，好礼有名。弘、正间，而新城王芝坦坐炮烙刑人，除封。又承休王芝垠，恃母焦爱；焦，靖王继妃、庄王继母也。垠召乐妇入宫戏笑，王址启母，不问；遂伺垠出宫，诘之，垠不逊，冒王、答王之侍从。母焦怒王，持铁槌槌王门；址闭不敢出。妃弟璟遂与垠诬王址殴骂继母，意不轨；王址亦奏垠淫乱事。王址坐革爵，寻复之。垠子弥鋹有贤声，葬之日，牵绋者号者数千人。又荡阴王芝■〈土瓦〉，倜傥好文，不问家事；贫而好施。

庄王五子，其支文成王弥钊，颖哲俭素，善诗赋书隶；盛亭榭以延宾客。辅国将军宇浹，新野王後。五岁丧明，从师氏画掌，识文字；耳授书，日记数千言。久之，

博通群籍；後又精太乙、六壬、遁甲诸数学。嘉靖中，陈便宜数十事，着「名猷录」、「辩疑碑」各一卷。文成王以摩天王目之。子宙松，力举千斤；好剑术，慕古节侠。孙硕■〈火动〉，与■〈火动〉子宠封；并以文词，号南阳父子。

桎六传端王；薨，孙聿键当立。以两叔欲夺嫡，久之，始得请嗣王。崇祯九年，南阳饥，贼自成残唐邸；张妃及湘安王流离入楚。已而王奏：『国有母，烹其女食之者，其变不小』！诏为发赈。潜治兵具，拟御贼；坐非制，禁高墙。国变出，南都不守，奔福州，群臣拥立，尊称。明年，福州败，弟聿■〈金粤〉奔广州自立，不终（其事在唐「附纪」）。

论曰：南阳世德，靖、宪、庄、敬四王文行卓越；而成王弥锦慕道通经，请核宗谥、作忧国诗，其学更文。支王芝垵、芝■〈土瓦〉、弥鋹、弥钳、钳後三传，皆学古，乐善好施，负贤声，或涉节侠；诸至性不可及。至於新野将军宇浹幼便失明，从师画掌，通群书，一代儒者无过其博该；着书上便宜，称古今具眼哉。贼残南阳屡矣，稍稍起义剿堵事，必引祖制而以为擅离国守锢之，使不得开口言贼；毋怪乎诸藩之望贼尘而震也。倘流氛之日，以太子抚军，而使贫宗得奋臂，咸就行伍；且以出身，可自致通侯。数百年郁抑，一旦腾擢，必有大异寻常者。而以体例拘，无敢议及此；是为贼尽灭子弟军，彼历代之以同姓建伟业者，岂皆不足数欤！

——见原书「列传」卷之四

· 桂主（附）

桂主名由棖，神宗显皇帝之孙也。神宗五子光宗嗣立，次福王常洵封怀庆，移河南。子由松立南京，是为安宗简皇帝。次瑞、惠、桂三王，同日出封；桂国於楚之衡州。癸未，贼张献忠陷武昌，连破长沙、岳州，取路入蜀；时桂、惠二王并避难梧州。隆武中，桂王薨於梧；王长子袭封桂王，不禄。三子安仁王由■〈木爰〉、四子由棖；棖封永明王。永明有弟二，未封，陷贼死。时王府系故两广公署，相传有巨蛇为祟。永明出，蛇当座不惧，跨蛇而出；而安仁震，遂薨。

丙戌（隆武二年、韩定武元年）秋，闽败，两广总制丁魁楚、巡按御史王化澄、升任广州知府严起恒、都指挥使马吉翔等檄广西巡抚瞿式耜、湖广巡抚督师定兴伯何腾蛟，率诸臣表请永明王诣肇庆，於十月之十日行监国礼。闻广州苏观生等猝奉唐王聿■〈金粤〉为盟主，建号绍武，遂於十一月之十有八日，群臣上尊号，以明年丁亥为永历元年；则韩王本铉抗郢山中，建号定武元年矣。王尊嫡母张氏、生母王氏并皇太后，册封王妃王氏为皇后。主谦仁浑大，丰姿冲逸。首晋督师腾蛟为定兴侯，大学士广西巡抚瞿式耜兼吏、兵二部尚书。以平粤伯魁楚为大学士，日值办事；诸臣进爵有差。使给事中彭耀通情於广州；唐杀耀，而遣兵部尚书汤来贺致书肇庆，且曰：『让为上，和次之，战最下矣』。王不报。因唐使陈邦彦袖敕观生，都

御史林佳鼎、监军道夏四敷、总兵龙伦轻与广州战，大败三水；佳鼎等尽歿。

先是，流贼献忠为北师所殄，其部四将军孙可望、李定国、刘文秀、艾能奇等走陷重庆，平蜀侯曾英死之；入贵州。时土司沙定洲与妻万氏叛据云南，可望释贵州，名援黔国天波楚雄之围，袭有云南，众未帖；以洱海道杨畏知力赞扶明，颇思内款。

会广州为北师所袭；十二月，王释肇庆走粤西。北师总镇李成栋追至峡江，适巡抚式耜练兵峡江，壁垒坚，王得保桂林。

是岁，郧西王常湖以王祁为国师，破建宁，全国震动；主驰封祈郧国公。未几，败。

丁亥（永历元年、韩定武二年），北师益进。二月之望，主奔全州；令式耜与参将焦琏留守桂林。时平乐、阳朔诸处皆望风北降，桂林兵单，城且破；琏独巷战获捷，城完。进封式耜临桂伯，焦琏为新兴侯。

总兵刘承胤驻武冈州，迎蹕；主自全州移蹕，改武冈为奉天府。周老者布衣道进膳，主甘之。旋拜吴炳大学士，办事东阁。承胤挟权骄蹇，政事傍落。时北师已下楚，督师腾蛟战败，来武冈；露章劾承胤不敬，力请移蹕，不果。久之，北师至，承胤且劫驾北降；皇太后密诏腾蛟以师护驾力，主出走。承胤竟叛，导北师蹶驾。武冈陷，尽屠腾蛟家属；主下诏褒慰。兵部侍郎傅作霖、吏部郎中侯伟死之。都御史米寿图、吏部尚书李若星为乱兵所杀。适斗门将军陈甲起扼北师半道，主得离武冈。泰和伯郭承昊与其婿阁部周鼎翰间北归，辄脱迹隐去。北师以承胤伪诺，逮武昌杀之。驾从靖州憩南宁，依征蛮将军思恩侯陈邦辅。邦辅提兵，袭有高、雷、廉三郡，进封庆国公；复督十三镇合攻肇庆，时北副将军罗成耀守肇庆严，邦辅退还。王亲李国珍系罗定州监生，起破罗定及东安、西宁三县。

邦辅复骄蹇抗制，主单，危北师旦夕下。会东粤原任右佥都御史张家玉合原任阁部陈子壮、给事中陈邦彦等共举义师；家玉善用兵，下东莞。北师盛兵复东莞，监军道张恂、知县张珣、生员尹端庵死之。再破博罗，不守；复攻增城，颇捷。战败，家玉沉水死；师参谋林沅并见杀。子壮取高明，力竭城破，被执不屈，死之；同事御史麦而炫、朱实莲咸见杀。邦彦以兵击败北师於禺珠，连破三水、高明，大战胥江、新会，复下清远；力竭被执，与生员马应房等咸见杀。举人杜璜与同事生员四十人复起高安，陈死。

吴六奇者，丙戌勉北归；至是复攻潮，北师总兵许甲陈死，遂固守通判府。永宁王妃与世子甲避镇平，诸生赖其肖挟以起兵；败北师，杀文总兵，攻破闽之漳州府及永定、平和二县。

北师总镇成栋方下东安，奉檄还守广州；主得逡巡逸去。

可望自称平东王，擅制自大。同党三将军各自王，而刘廷秀、艾能奇唯平东令。独李定国自以安西王征缅甸及小西天，服之；率自进止。

戊子（永历二年、韩定武三年）春三月，主在南宁。

北总镇金声桓回向於南昌，自称辅明将军；与养子王得仁等起杀北御史董志学等，传檄称永历二年。以原任大学士姜曰广为盟主，号召诸旅。主驰封声桓豫国公、太师、行军大司马，授尚方剑，便宜行事；得仁为建武侯，挂征卤将军印。以关东耿惇为布政使，檄定南康、建昌、饶州、瑞州、九江五郡。

二月，总督何腾蛟率卫国公胡一清、永国公曹志建及将军赵应选等复兴安、围全州，八战皆捷；乘胜破东安、困永州，与将军马进忠扼守常德。寻常德复陷，退入土司。

夏四月，腾蛟檄总制都御史堵胤锡合力规复常德，守之。

豫国声桓亲率师徇临江、袁州、吉安三郡。原任兵部职方揭重熙复起临川，应声桓；擢兵部侍郎。

五月，主奔浔州。

秋七月，将军马进忠与北师战麻河，大捷，残溺敌七千余人；以功封鄂国公，驻常德。而督师腾蛟屯衡州，为声援。

豫国声桓围赣州久不下，乃密诏广州北镇成栋，使反兵助攻赣。

八月，成栋劫北督佟养甲，大书「永历二年」；主封成栋惠国公，养甲襄平伯、兵部尚书兼工部事。於是陈友龙回向於靖州、郝尚久回向於潮州，成栋乃合表迎驾；主以是月至肇庆。罗成耀降，封宝丰伯。原洱海道杨畏知，以伪平东王孙可望内款来朝。以严起恒为东阁大学士，友龙、尚久为将军。追赠张家玉增城侯，谥「文烈」；陈子壮忠烈侯，谥「文忠」。

时贼自成遗部李赤心等，总制胤锡受降；驻施州卫。

冬十月，命惠国公成栋提兵北逾岭，合诸师协攻赣。时声桓还救南昌，释赣围二日矣；成栋战败，走信丰死。中权杜永和奉命总其军。兵部侍郎张调鼎、监军道姚生文等为乱兵所杀。封成栋养子元胤为南阳伯，扈驾肇庆；而永和督守广州。

追论纳降功，加堵胤锡大学士、兵部尚书。胤锡颇与鄂国公进忠隙；降将李赤心等残，索饷急；胤锡悉檄至常德，计自壮。进忠虑其扎己，走湖南避之；胤锡以赤心亦走湖南。腾蛟危内变，遂有「湖北千里一空」之疏。主谕进忠出攻长沙、赤心疾援声桓江西，为两解。

北镇车任回向，於潮州残，擅杀巡道李光垣、知府凌犀渠、海阳知县岳桂。

己丑（永历三年、韩定武四年），主在肇庆。

春正月，将军尚久奉命徇福建，猝劫任杀之，百姓皆喜。

赤心兵至湘潭，进忠未至；总督腾蛟单身走湘潭。督行北师朱勇系腾蛟故所属，伪降；邀观营盘，猝执腾蛟，力劝北归。腾蛟不屈，绝食呕血死。宣威伯杨甲死之。於是诸师警，进忠师不进；而卫国公胡一清、开国公赵印选弃永州，退保全州；永国公曹志建退保岭峡关；宣国公焦璉与部将刘起蛟并退保平乐。主赠腾蛟中湘王，谥「文忠」。

是月，豫国声桓为满师谭泰所困，粮竭城破；巷战不胜，投水死。泰屠南昌；大学士姜曰广及城守刘一鹏、汤执中等咸死之。诸郡县尽不守。先是，起兵应声桓者，原任尚书吉安刘士桢、其子肇临、稚升、肇颐先後死；原任侍郎南昌余应桂父子被执，不屈死；原任都御史南昌刘斯■〈王来〉与子元监，不奉剃发之令死；生员吴汉章尝读声桓中兴檄不啻口、丹铅之，并坐死。忠诚伯郭天才还自福州，适南昌败，走宁州山中自保，与翰林侍读傅鼎铨、兵部侍郎揭重熙每出没伺变；久之，咸被执死。

是年冬，北师平南王尚可喜、靖南王耿仲明共援东粤，而定南王孔有德援广西；尚、耿兵次南、韶，总兵宝丰成耀弃城走，伏诛。诸城不固，廷议出师三水逆之；不果。会衡州复失守，赤心兵竟从桂阳出封川，至梧州。胤锡栖镇峡，又与永国公志建不合；志建杀其标卒数百人，胤锡走封川，入朝肇庆。阁部瞿式耜遥请以胤锡代腾蛟督师，诸将意不与；胤锡沮潯州，病卒。以朱天麟为东阁大学士办事。

庚寅（永历四年、韩定武五年）春正月，逃粤故帅李士璉北降，为岭东道；诱杀徽王支兴化、滋阳、永丰、铜陵、阳信、仁风等王尽。主以广州被兵，释肇庆西奔；令南阳伯元胤留守。

二月，驾至梧州。以王化澄为东阁大学士，文安之同入办事。

北师两王攻广州不遗力，杜永和督守勤；副将张月总陆兵、吴文敏统水师，背城出战，多捷。

冬十一月之二日，粮竭，广州破，总兵杨有光战水死。范承恩被执，与吴六奇等北降。未几，肇庆亦败，元胤见执於钦州，不屈；语不恭，见杀。永和走保琼州，亦北降。独将军王兴初助战新会，不利，退屯文村；傲北令者十余年，乃败。

是月之五日，桂林亦不守。先是，北师定南王孔有德兵出广西，令大将马蛟麟别路入，先破平乐；总兵朱旻如拒战，不克，杀妻子自刭。有德亲提大兵抵桂林；留守瞿式耜初与开国公印选、卫国公一清等共事，适二镇移屯柳州，式耜单甚，不可守。翰林院侍读兼兵部侍郎张同敞单身入城，护式耜。及城破，被执；咸赋诗从容死。靖江王亨歆与世子并见戮。

驾释梧州，历浔州。庆国邦辅叛，半道间去，且劫主为功於北师。主猝以宫眷先去，於是皇嫂安仁王妃及百官眷属咸被劫，货囊尽。主踉跄中，适交趾境上人出躡邦辅，主得从容保南宁。浔州破，知府曾大应死之。

时伪平东王可望破贵筑，北攻遵义，忠国公王祥战败自刎死；可望复据贵州。武康伯胡执恭奉命屯泗城洲，西御；逼可望，愕，擅作册命封可望为秦王，始以「秦」封内请。廷臣不可。已封可望平辽王，定国等皆封公爵；可望不受，并勒定国等不得受爵。

辛卯（永历五年、韩定武六年）春，主在南宁。以郭之奇、吴贞毓入东阁办事。

可望兵出富州，遣贺九义、张明志护驾南宁；且胁改「秦」封，上书不称臣、不奉年号，署「平东王」字样，以合师北拒为名。阁臣严起恒、督师侍郎杨鼎和、科臣刘尧珍等力持不可。时在廷尚有朋党，都御史袁彭年、礼部侍郎刘湘客、吏科给事中丁时魁、工科给事中金堡、兵科给事中蒙养正等专好弹射，不通关节；举朝惮之，目为五虎。五臣益不欲王可望，请逮执恭，坐以擅制之罪。执恭阻泗城，不至；九义使盗杀鼎和於崑仑关。主益震，廷臣归罪五虎。主以彭年掌案久，反正有功，免议；堡与魁遣戍，余俱徙。而可望所遣九义骄纵，居数月，忽称秦王令旨，清君侧十三人；意实衔沮封故事也。主曰：『朕实未知之』。遂驰册宝，真以可望为秦王。未几，九义擅使人伺阁臣起恒，击之堕水死。同官郭之奇逃，坐刘尧珍、吴霖、张载述皆弃市；金堡以先遣戍，获免：俱惟九义。主念善用秦王，议自畏知；以为东阁办事。畏知抗疏，劾九义贼杀大臣之罪；可望密使人袭执畏知至黔，畏知大骂，见杀。

时北师定南有德破柳州，两镇印选、一清弃城走，合保南宁。北师乘胜攻南宁急，主释去；被蹶，距三十里而近。忽烈风起，摧林木、房屋，人不能正立；追者疑不进。庆国邦辅遂杀焦琰，北降。

可望使郑国权迁主於贵州土司安隆所，改为安龙府；以范应旭知府事，钱粮兵马悉

秦王主之。岁致银八千两、米百石，上用；随行文武俸赏，尽向秦府开销。安龙无险，主居此，一再凤凰见。久之，可望亦一至安龙，拥二百甲士从；主传谕：『可望来意，朕已悉知。今日晡矣，须明日』。可望入，竟局促中乱，不知所云，成礼而出。叹曰：『吾见此公，未免气尽』。尝请国宝至其府；王曰：『姑与之』。令中书捧出，可望猝索观；中书曰：『为斋设戒坛以後观宝』。可望色变，曰：『如是指』？中书惧，退自缢死。明日，可望遽观宝；忽雷震屋角，如欲临其首者。可望惊，使人护宝还。

壬辰（永历六年、韩定武七年）春正月，主在安龙。

原任参将杨崑，先是间走南宁，奉空敕，潜号召三吴、两浙之间；至是，事败。原任徽宁道杨卓然、原任尚宝司卿耿章光、原任岭北道万曰吉、教谕蒋思宸、莱州生员满巽元等，咸以与名死。

二月，李定国师出靖州，与鄂国马进忠等至湖南，连破靖、沅、武冈诸州。战北师黄沙，颇捷，杀北将李养性等；壁大榕江。可望疏请封定国为西宁王、刘文秀为南安王；定国以出可望意，独不受。与定南王有德复战严关，定南将李虾头发矢，会定国军中炮发，两毙。有德势大，促，返保桂林。

秋七月之二日，定国围桂林。有德亲登城观垒，怯定国据近险，举止失措。定国用象战，崩其门；有德杀其妻，举火自焚死。定国俘其子庭训以归；获叛将陈邦辅父子，割其皮为寝具。於是平乐、南、柳等处，传檄定。北将线国安、全节等皆警去，梧围亦解。

八月，定国兵入楚，至湘潭。南安王文秀以可望命，协都督白文选复四川，战北师平西王吴三桂於保宁，大败；可望奏夺文秀公爵，令以功赎。定国复衡州，可望复辰州；定国矫不奉可望东西。

冬十一月，北师敬谨王以兵援楚。过洞庭，守将冯双鲤怯，避入可望军。定国战衡州，败绩，走竹山；敬谨追之，定国军返射，洞敬谨喉，北师溃。军中得敬谨遗盔，始知之。

癸巳（永历七年、韩定武八年）春，北定南王姑振明与女四贞鼓其余众，力御定国；定国释衡州，退武岗、保永州。文秀攻常德不利，还守云南。时桂林闻定国退去，布政使蒋先达、按察使徐定国与镇将徐天佑等咸弃城走。久之，北师不至，先达、定国等复入守之。已而北师线国安兵次城下，桂林复不守。可望以定国失事，召之；定国不赴。可望还贵州，残宗室几尽。

甲午（永历八年、韩定武九年），主在安龙；大窘，走密诏拟定国为晋王，速迎驾

。文安侯马吉翔发其事，擅执阁臣吴贞毓等及太监张福祿、全为国共十八人，俱坐死。定国方锐师，间道疾驰东粤，直指肇庆；袭清远，北师坚壁以老之。定国完师退，再援平乐，退保南隘；复攻桂林，不利。

乙未（永历九年、韩定武十年）春，主在安龙。开科取士，得刘■〈𠂔〉、钱秉鐙等八人（杨在、李来、罗龙甲、姚子庄、金弘猷、杨致和）。

定国以双鲤为先锋，疾下高、雷、廉三府；攻肇庆，不下。困新会、顺德数月，援兵至，败归；并弃南宁，即安龙护驾。

三月，驾指滇南。刘文秀时为可望守滇，倡诸臣迎驾，尽收可望护卫。封定国为晋王、文秀为蜀王；艾能奇子承业为镇国将军，管延安王事；白文选为巩国公、王尚礼为保国公、王自奇为□国公、贺九义为保康侯；马吉翔以文安侯入阁办事。随遣使召可望，不至；送其妻子归黔。

可望叛，兵次交水；文选不战内款，封文选巩昌王。可望大败，北归。定国守贵州，北拒。

丁酉（永历十一年、韩定武十二年），主在云南。北师五万临贵州，空其城以归。主因可望所建府第於城之五华山，高睨昆明池；池黄龙蜿蜒来朝者三□，主拱手谢。城有圃，称上林；异鸟毕集。命保康侯贺九义、漳平伯周金汤东守南宁，谨户牖。

驰封郑成功延平王，晋张煌言兵部尚书、东阁大学士；更晋延平为潮王，不受。

冬十一月，九义以兵破横州，还守南宁。

戊戌（永历十二年、韩定武十三年），主在云南。

可望构孔世子庭训为乱；事不就，北降。表犹称「明主」，若曰『欲连大国报仇』云云；得封为义王。满较出，协平西王吴三桂营云南，遂阴通於可望所亲为内间，纳北师。

定国与冯双鲤扼守盘江沙、白文选守七星关，咸败绩。十二月，奉桂主走永昌。

己亥（永历十三年、韩定武十四年）春正月之二日，北师入云南；主出走，六日乃已。

二月，主即腾越；定国先护宫眷出三宣，依缅甸。缅甸者，明在服宣慰使司也。宣

慰使名莽猛白，窘主甚，杀其扈从尽；主不能堪。

庚子（永历十四年、韩定武十五年），主在緬。时北平西三桂镇云南。

冬十月，三桂合满师进次剩村；驰谕緬，责不得留主。緬甸用事锡贞，怀异心。

辛丑（永历十五年、韩定武十六年），主在緬。定国从土司，疏请幸其营，数至；令部将祁通武以兵逆驾。

阁部马吉翔重迁、緬惧兵，潜共北谋；诡云有义兵在界，且迎主。主轻出，被劫之滇；北爱将军下二旗（镶白、正蓝）奉命卫主。三桂尚留緬，疏捷不加「伪」字。二旗惊主仪表非常，密期为变，拟矫爱命，伺击三桂，行挟主大云南。时同旗陈甲者露之，二月之二十有七日，持法□□，□□□，□暗□□，夜□作，□顶有白气，一股冉冉半空徐堕於城之东□子，万□见。於是二旗咸伏法。□□□□，诸扈从宗室无一存者；惟吉王甲自缢以殉。

晋王定国卒於徼外，定国子嗣兴、文秀子震，咸北归。久之，桂宫主长，婚於章京乙；其母后送女，见乙礼节莽乱，引佩刀猝触女死，旋自刳。而於是桂之年，禅於东宁。

论曰：天！

——见原书「纪」卷之二十一

（附）诗歌逸

豁堂和尚，已受法杖，锡寄西湖之净慈寺。不专言禅，与觉浪同参合谛；以是儒者多就教。寻以松江鄯质生被诬连及；盖庭质时有云：「善知识」，北人误听为「鄯质生」也。余弟遗为出豁堂君山一律见示，诗曰：『廿年怅望一登临，风卷尘霾浦纍深。万里江声来浩叹，九秋木叶动悲吟。横开海口吞天地，崛起峰头睨古今。何幸相逢焚爨後，苍江犹饱岁寒阴』。卒以无实，豁堂脱，质生亦免。

申人毅，监国中，以贡例擢兵部主事。申、酉之後，落笔不轻示人，闭室而哦。尝作「逋忠诗」，潜示钱武山；有曰：『风波填关门，萧屑动秋宇；万里孤臣迹，搢笏呼明主。罗浮丛榛莽，鸢鸢敛华宇。纵横九还灵，安能起瘠倮！梦梦空呼号，皇天反赫怒。百骸拚一毁，斥遣徒噢咻。千仞点苍岩，难为鳌足拄；赭被仰云霄，藁带待煦煦。颓阳翳重霾，空教泪如雨！哽咽辛与酸，湖烟冷门户。幽泉妇谁吊，离索儿谁抚？转辗楚甸间，夷羊幸潜土。鸣铙振方城，灏气弭毒虎。苍轮一运旋，吾业岂终腐』！此篇总为滇，逋臣指澹归金堡。时堡子周臣晤武山座，周臣为言母死

；故次及之。

——见原书「志」卷之三十二

· 韩主（附）

韩主本鉉，系太祖第十九子宪王松之後；世封平凉。崇祯十六年，李贼自成陷陕，王被执；间脱。适献贼陷楚，其部将郝永忠者梟悍，军以望永忠摇旗辄奋，遂以郝摇旗着名；敌遇之震。及献贼死，摇旗内款；独奉韩王为主。

自闽事坏，韩便称尊，改元定武。尝移书桂主，叙长幼不称臣。北抗，保隕西乱山之中；驻房山，自为号令。时李来亨据兴山、归州等处，刘二虎掳巫山等处，王壹与其弟行二者据施州卫，声势遥相倚。及孙可望归款安龙，驰秦王令旨，招永忠；永忠答柬，称「侍生某」，有曰：『老侄年来举动，何以至是』？以其傲多不恭於桂〔主〕，为鸣鼓之词也。可望不敢还让。初，李闯下一只虎李过及闯戚高必正举众南逸，先款韩王；王不能有，乃就桂林兵部尚书堵胤锡稽首受命。

壬寅（定武十六年），北师总督李国英以关中劲旅当房山，而鼓其全力困来亨；房山得完。

癸卯（定武十七年），来亨被困，弃七连，保谭家寨。永忠与二虎合力，从来亨北御；大战四昼夜，北协湖广之师大挫。已而巫山不能守，先败；房山旋败。韩主不终。

论曰：亦天！

——见原书「附纪」卷之二十二

罪惟录选辑二

罪惟录选辑二

传（一）

诸王列传

抗运诸臣列传

· 诸王列传 ·

潞王翊鏐

· 潞王翊鏐

潞王翊鏐，穆宗第三子；与神宗同母。隆庆元年，册封，国卫辉。一再传王由□，性慈易，有贤声。甲申国变，诸大臣议称尊南都。会凤阳巡抚马士英等以福王入，序当立；前议不果。

乙酉五月，南都复不守，太后奔杭；潞已避难先至，太后允诸臣笺请，以潞王监国。方三日，发遣治兵。北师疾至，总兵陈洪范久舣舟城下，乃入劝王，决计郊迎。百姓畏见兵革，皆曰：『王爱我，而以我北款也』。时诸生沈乘倡议，尽迁四关外居民入城，俾宿兵北御，此守犹可以几裂地。百姓以非王子爱本意，竞前，裂其屍，一刻尽。适楚宣谕将军华堞在杭，衰麻入谒王，说以恢复之计；有曰：『国祚悯訕，至於此极。抚膺北睇，何以为生！以大王之贤，远近所共闻。天下绝智殊力，方将凭附起；周之孙子，能无睠然！宋人半壁，亦尝有年；况闽、粤、滇、蜀延袤万里，犹吾故履。失今不为，时事一去，万世不复朱矣。他日求尺寸地为死所，岂可得哉』！王不省，颇以不扰民、全城为义。华堞又曰：『理有大小、务有缓急，今日之事，不宜以杀人为讳；屠子任盗贼，稍补万一，犹为之。持踵而泣，妇人之所为慈哉』！王曰：『子休矣！余不胜事，即亦非百姓之心』。华堞作色曰：『忠义虽性成，在乎鼓舞之。我谢弗力，彼何望而不跂向他氏』。王卒懦弱，托糗馈不给，必务为知几。华堞乃呜咽顿足曰：『王不观古事，有诸王以其国奉人而得长世者哉』！王终不听；角巾便服，乘小舆，仆仆料饷刍，率诸在事诸官员，合表跪谒。於是总兵官方国安、郑鸿逵二旅壁城下久，国安与北仗不胜，渡江；鸿逵竟走仙霞。独钱塘知县顾咸建得民，奉王命陪讲。讲成，咸建痛愤求死，辄走归。逮至，就法（自有传）。

六月，三吴突起舞戈，不能蹴武林一武；而王北去，竟不返。

论曰：明末以潞易福，或不奖士英，张诸逆魏之党；顾柔易无远谋，其不能用四镇以有成，一也。如楚华堞之言详矣；而必以「安民」二字文其悖、驰慈誉，是求为匹夫者耳。福望懿文太子园而泣，得伪太子而怆然动於心，犹存至性；潞并无念祖之诚，为匹夫尚缺是，故为匹夫而不可得。

——见原书「列传」之四

· 抗运诸臣列传 ·

史可法（任民育、吴尔埏、何刚、施凤仪、黄铉、吴道隆、卫胤文及卢涇林等六人、武职乙邦才、刘肇基、龚尧臣及马应奎等十二人、周志畏）

杨廷麟、万元吉（卢观象、月中桂、王其■〈穴上弘下〉、王其隆、龚棻、万发祥、庄以莅、鍾良则、袁从谔、刘孟錡、杨文荐、於斯昌、刘天驷、汪起龙、程必进、子矩）

陈子壮（麦而炫、朱实莲）、陈邦彦（杨景华、杨可观）

张家玉（林洵、张恂、张珣、韩如琰、黄者肱、陈于赤、尹端庵、梁法良、赵省一、卢定国）

瞿式耜（张同敞）

何腾蛟（妻徐氏、妾王氏、杨宣威、堵胤锡）

姜曰广（子二）

王祁

李定国（刘文秀、白文选）

李来亨（郝摇旗、刘二虎）

张煌言

郑成功（鸿逵、彩、甘辉）

· 史可法（任民育、吴尔埏、何刚、施凤仪、黄铉、吴道隆、卫胤文及卢涇林等六人、武职乙邦才、刘肇基、龚尧臣及马应奎等十二人、周志畏）

史可法，字宪之，号道邻；北京锦衣卫籍，河南祥符人。性廉直，勇於义。崇祯戊辰进士，出理西安；以户部主事晋郎中，出参议江西，备兵安、池。援桐庐献寇力，特擢佥都御史，巡抚安、庐四府；安、庐之有巡抚，自可法始也。捷数上，迁七省漕运户部侍郎兼副都御史，巡抚淮、扬。开屯政，招流亡，缮城郭。访贤豪，谄以军政；虽侧微，有佐一得，辄延礼之为上客。郡县不职者畏其弹劾，亦束修为谊。

崇祯壬午，东师深入，可法御之庙湾河口，预埋火器待之。敌严可法素望，解去。

癸未，升南京兵部尚书。时献贼躏楚，势东下；可法为江南保障，岿然不摇。朝议且移北兵部，简讨汪伟曰：『有可法而江、淮奠安，姑留此重寄』。可法随与正詹姜曰广疏请皇太子监国南都，以固国本、巩祖陵；留中。闻贼逼，移檄勤王；有云：『譬以同舟之谊，但凡在千八百国，畴非王臣？揆诸恤纬之心，决不至二十四城遂无男子』！兵未集而凶问至，以首触柱，血流至踵。文武大吏皆感，痛哭失声。可法誓浦口，欲走死燕都；议者谓释江南半壁非计，遂止。

时潞、福两藩俱在淮，潞有贤名，可法与诸臣意属之。而阮大铖者，故魏党，欲大福以图报复；入凤督马士英幕，为主其事。士英以福藩亲贵，不可夺；飞檄大帅黄得功、刘良佐及高杰、刘泽清等与共翼戴。遂私谒王舟中，而致书魏国弘基，亦使人约可法浦口；自是南中无敢异议者，合词迎王入监国。可法首进战守大计，谓当素服郊次，发师讨罪，示天下报仇大义；王唯唯无所决。进可法内阁大学士兼兵部尚书，加汎保兼太子太保，进武英殿；荫一子锦衣卫佥事，世袭。可法请设四镇，分汎以北抵；诏封黄得功靖南侯、高杰兴平伯、刘泽清东平伯、刘良佐广昌伯。复侯左良玉於楚，与得功各得荫一子锦衣千户世。其四镇之辖淮、扬者，十一州县隶之，经理山东一带招讨事；辖徐、泗者，十四州县隶之，经理河南、北一带招讨事；辖凤、寿者，九州县隶之，经理河南陈、归一带招讨事；辖滁、和者，一州十县隶之，经理各辖援剿事。设督师，驻扬州，适中调遣；各设监军一员，一切军民皆听分统，州县有司皆听节制。每镇额兵三万人，岁供本色米二十万、折色银四十万；所收中原城池，即归统摄。又请侍卫带刀入直及锦衣、銮仪诸司所隶军役当多事之日，俱宜入伍操防；至锦衣镇抚司官可不必备，以杜告密，节繁费。於是士英以大铖密议，内持权；可法不得行其意，自请督镇扬州。士民譁，夜榜於衢，有云：『明明一李纲，而逐之在外；明明一秦桧，而留之在内』。时太学生陈方策、诸生卢涇才等数百人上疏，言可法不宜出；不听。遂加可法太子太师以行。幕中设二十一社资谋议；以江北危疆、人情计脱，复请行徵辟之法，以通铨政。

时廷荐原督臣吴甡可大用，士英嗾诚意伯刘孔昭弹之。可法叹曰：『党事起矣』！奉诏祭告泗、凤两陵，因上疏曰：『陛下深宫广厦，当思西北诸陵魂魄之未安；玉食大庖，当思西北诸陵春秋之未展。即听夕焦劳，勤思远略不办。而滥恩施、开告密，贤奸无辨，威断不灵；老成激而投簪、豪杰因之裹足，祖宗怨痾，天命潜移。

东南一隅，不知其伊於何底也』！报闻。

时北兵已走李贼迤西，可法请立遣北使致爵三桂，以酬其勳；且使山东、河北知中国有君，南向系属。朝议久不断。会高、黄不安分镇，争驻扬州，而良佐与杰军肆掠；诏可法曲谕之。三镇皆惟命，杰独梗；可法卒以至诚感之，掠城下而去。北师使可法弟庶常可程以书招可法，不应。寻摄政王复遗书可法，责以「故君未葬，新君不得即位」；可法答书有曰：『乃辱明诲，引以「春秋」大义；此为当时列国世子立说耳。若夫天下共主身殉社稷、青宫王子惨变非常，必有维系人心，号召忠义。莽移汉祚，光武中兴；丕废山阳，昭烈践祚；怀、愍亡国，晋元嗣基；徽、钦蒙尘，宋高缙统：是皆国仇未剪之日，亟正位号；「纲目」未尝斥为自立。本朝传世十六，正统相承；自治冠带之族，继绝存亡。贵国在昔夙膺封号，载在盟府；宁不闻乎？今痛心本朝之难，驱除乱逆；可谓大义深着於「春秋」矣！昔契丹和宋，止岁输以金缯；回纥助唐，亦不私其土地。况大国笃念世好，兵以义动，万代瞻仰。若乃乘我蒙难，窥此幅员，为德不卒；是以义始而以利终，为贼人所窃笑也。贵国岂其然哉！「传」曰：「竭股肱之力，继之以忠贞」。某处今日，鞠躬致命克尽臣节，所以为报也。惟大国监察』！

时高杰颇欲规取开、归，责饷可法；连呼不应。逡巡国事日非，复上疏曰：『三月以来，陵庙荒芜、山河鼎沸；大仇在目，一兵未加。尽河以北，悉染腥羶；河上之防，百未料理。此日即卑宫菲室，尝胆卧薪，尚恐无救於事；以臣睹庙堂之作用、百执事之精神，殊有未尽然者。皇上初见臣等，言及先帝，则泪下沾襟；曾几何时，而忘前事！庶民之家，父兄被杀，尚思穴胸断脰得而甘心；顾朝廷之上，乃不践匹夫之义乎？国家遭此大变，诸臣但有罪可诛、无功可录；今恩外加恩，纷纷未已。名器滥觞，於斯为极！至兵行讨贼，最苦无粮；而凡不急之工役、可已之繁费、朝夕之宴衍、左右之献谏，并未谢绝。嗟乎！贼一日不灭，北师一日不归。即有宫室，岂能宴处；即有锦衣、玉食，岂能安享之哉』？上不省。寻以高杰徐州获盗功，加可法太傅。

而士英独排众议，以大铖为兵部侍郎。群臣交章论劾，不报；姜曰广、高弘图、徐石麒、刘宗周等相继逐去。可法上言：『欲用大铖者以才，争大铖者以「逆案」也。大铖即可用，何必罪争者；不可用，当采听群议。何至以一人坏天下大计乎』？上不省。自大铖用事，悉引其党布於朝；凡可法所奏请，辄格之。

元年（乙酉），和事不成，朝廷尚修故党，且起大狱；可法复争之。以为『唐、宋门户之祸，与国终始；今孰有大於戕我君父、覆我邦家者！不此之仇而修睚眦之隙，真不知类矣。和不成，惟有战；战非诸将之事而谁事也？阃外视庙堂、庙堂视皇上；今日庙堂之人情，大可见矣』！上益不省。

北师分二道南下，可法请以得功、良佐子师驻颍、亳，而高杰进守归、徐；疏入，

不省。时杰所遣荡寇将军王之纲与许定国争睢阳，不决；定国以计杀杰。之刚攻定国，入其城；定国北归。

可法荐卫胤文以兵部右侍郎，经略开、归。胤文者，前劾可法，欲急屏去之者也。可法用人无成心如此。随复荐杰故将李本身为都督，将杰军。士英使人喉三镇劾可法；以为杰不容诛，不宜复存此镇。寻北信急，姑以本身为都督，如可法所请。

可法移镇泗州，合诸军北御。而宁南侯左良玉以伪太子为名，发兵攻士英；士英矫诏，责可法入援。可法即合诸镇兵倍道抵浦口，促陞见，言太子处分；士英又惧可法用事，不许陞见。而令大亲诣得功军，勒得功御上流。时北师下亳州向邳，徐、泗告急；可法诣京，求密陈军机。有旨：『奏凯後入见』。可法叹曰：『奏凯谈何容易，面君不知何日矣』！痛哭而返。兼程抵汛，而徐、泗已不守矣；退保扬州。屡疏防江急；不应。

北师经天长、六合，广昌良佐以其众降；而东平泽清屯淮南观望。可法与中军胡茂祜专为城守计，以控大江，标兵仅三千人；驰檄请援，不报。乃调兵部员外郎何刚水师於白杨河，亦调总兵李栖凤入援；而船只、火器，多为刘泽清所攫去。四月十七日，北师抵扬州西门；使人谕可法降。可法誓死不夺，发马兵数百，与北师对仗；鹵三人，斩首十六。北师故匿其精锐，索话；可法令故降彝从副将出陈答之。返云：『所见不过许定国故标而已』。城中欢然，谓敌易办也。可法复血书寸纸，请急救勿缓；不报。乃与知府任民育及何刚、刘肇基、乙邦才、楼挺、庄子固等昼夜乘城，誓以死守。北师豫王知可法与士英二，使李遇春奉王檄至，曰：『公忠义闻华夏，而不能见信於朝廷，死无益也；盍遨游二帝以成名乎』？可法不答。乃复以书至，可法不启视，辄焚之；毅曰：『天朝无降宰相，有与城尽耳』！辄为书辞其母与妻，付侄参将史得威；复题公署，而致豫王札一。盖相拒九昼夜；二十五日，城西北溃，守者争破门走。可法营西门，闻城破，拔刀自刳，为陶旗鼓及参将许谨、庄子固等所持。道遇主事施凤仪，并奔钞关，以筏渡河。北师入，尽屠旧城。可法仅以二百余骑逸宝城寺，离城数里；北师迹之急，还；决战不胜，一时败没（或曰可法被执，赴新城南门楼不屈死）。而南都尚以可法不死；会可法所常坐青驴悲鸣野走，邵伯人得之，始知督师与扬俱亡。

可法年四十二，无子；妻欲为置妾，可法曰：『尔何时乃及此，霍去病所不敢也』！侄得威奉遗命，为可法子；乃具衣冠招魂，葬於梅花岭左侧。可法忠孝性成，清介莫及；常言『封疆之臣，死封疆耳』。甫渡江，衣重裘，辄用印记。其诸遗笔付得威，皆署四月十九日。与北师豫王者曰：『败军之将，不可言勇；负国之臣，不可言忠。失守封疆，实有余恨；将以骸骨归鍾山之侧，求太祖高皇帝监□□心』。上母太夫人者曰：『儿在宦途一十八年，诸苦备尝；不能有益朝廷，致旷违於定省，不忠、不孝，何以立天地之间。今以死殉城，不足赎罪；望大人委之大数，勿复过悲』！与夫人者曰：『可法死矣！前与夫人有约，当於泉下相候也』。其书扬州

公署有云：『可法受先帝厚恩，不能复大仇；受今上厚恩，不能保疆土；受慈母厚恩，不能备孝养。遭时不偶，有志未伸；一死以报朝廷，固其分也』。可法自奉俭，与下卒同衣食，轻赏赉，以忠义相激；一军呼为「胜爷」，嫌其姓也。折节下贤，而奇谋不任。

时同殉扬州者，知府任民育，字时泽；济宁人。由甲子举人，守济宁有功，可法荐知扬州。驱妻子置一室中，纵火焚之；乃吉服持印坐堂上，被执，不屈死。监军道吴尔坝，字介子；崇德人，癸未进士。投缳大东门，不死；掷水，又不死。兵部员外何刚，字恂人，上海人；庚午乡荐。以赞书出镇白杨河引还，运饷徐、泰间。方谒可法，可法令出城；刚曰：『为国家死则死之，为知己死则死之』！城破，投缳不死；与尔坝咸被残死。主事施凤仪，分守便义门，亦见害。而副将乙邦才、刘肇基，咸被执不屈，大骂而死。黄铉，字九□，□泽人。□□乡荐，为督饷僉事；与管饷通判吴道隆，□□□□□□。□□鲸，字绳海，寄籍江都；佐城守，见害。其□□□□□□□屈死。侍郎卫胤文，缢死。卢涇林，字渭生；长□□归□□尔德，崑山人；张涵，嘉定人；胡如甡、如瑾、胡临、并桐城人：皆礼贤馆士；城破，死之。而周志畏者，江都人。後剃发南门之福圆庵，欲以僧起；事觉，见杀。时武职同难者，又有总兵马应奎、丘云龙、马守卿、副将李豫、参将李隆、徐纯仁、冯国用、陈光玉、陶国祚、游击李大忠、孙开忠，都司以下姚怀龙等十六、七人。

久之，三吴舞兵，咸以可法尚存，每借其名为势；而北师报捷无为州有云：『获伪督史可法、伪藩黄得功二人』。

论曰：设定策非贵阳，而以潞之潞，即不办中兴，然而道邻居中用事，宁南无君侧之问、靖南无上流之御，尚或偷息河上。即否，螂臂南中。世有将相不和，而成功阃外者乎？或曰：可法既立四镇，当以黄靖南自予，身为各镇援剿；亦或自行其意，鞭策诸傲。不然，权轻而但清约可盟鬼神，何济也！不周倾，天柱折；二百七十八年之运始之金陵、终之金陵，一人关绝续之大哉！相传可法入参将张弘家，裨将马应奎从死；则万无不识「印袭」之理。即非城楼，死乱兵矣。或曰：介子初不获自洁，当在回向之例。

——见原书「列传」卷之九（上）

· 杨廷麟、万元吉（卢观象、月中桂、王其■〈穴上弘下〉、王其窿、龚棻、万发祥、庄以莅、鍾良则、袁从谔、刘孟鋤、杨文荐、於斯昌、刘天驷、汪起龙、程必进、子矩）

杨廷麟，字伯祥，号机部；江西清江人。己巳选贡，出督学蔡懋德之门。庚午，隽南雍。明年，会试第二人，为庶吉士。廷麟博学，好奇字；自负，勇声气。丁丑，分闈所得士，尽軼才。尝慨持符壁原上者，庸懦不力；每奋槊欲起，遂自请监军。

戊寅，改兵部职方司主事，督师卢象昇军前赞画；象昇战死畿南，罢去。壬午，起原官；□□□。弘光初，再起原官。廷麟曰：『吾便尽收河南、北，□□□□□□□缝士英一盼，益病不起。

乙酉，南都复败，故帅金声桓北降，遂以其师破南昌，抚、建、广诸郡皆破。乡诸生就问公何处？廷麟曰：『义不辱；匿影匡庐，如晋处士潜已矣』。生曰：『彭泽小臣，公以大臣为五柳计乎』？廷麟感起，振义旅来会彭期生太和，合诸师战北师螺子山；一捷，唐主进廷麟大学士兼兵部尚书为督师，与大司马郭维经协守吉安。已而粮竭城破，廷麟走□□□□师，一战复之，逡巡者数月；而外援不至，鼠雀□□□□。□月，吉安再破，廷麟复联络阎王总及张安各□□□□□来赣，与赣抚万元吉、兵垣杨文荐等戮力城□。□□□□山九牛之间，与北兵决战，屡捷；有诏旌异，改郡名为忠诚府。而文荐端守西门，当北冲，尤多奇捷。久之，会赣州者十余壁，约可四万余人。北师飞帆乘水涨，拂十八滩而上，列营城东北阻山，距城二里许，日每三、四鸣角，张云梯渡水逼城；城亦鸣炮应之，杀伤故相当。敌尝潜舟龟尾角伺城，城中夜缒五百人挟束薪纵燔之；敌不利，退去。又往往熬万人敌掷城下，火发桶裂，铁菱飞若火鸦；敌睨陴者震跌，负伤走。最後，夜选死士千人，负九龙枪，乱流而渡；猝发枪，火延帐房，敌惊颠□□□□□呼噪震天地。北师登舟，拔营走三十里。□□□□□□□□。久之，北师益至廷麟方檄南安水师巨舰数百号入援，半道为北师所截。时广营、滇营二部之援赣者故称最强，广兵跣足跳山谷如飞，滇兵甲械犀利，标枪连弩，洞胸穿札；北师乘胜掩之，两营尽溃去，赣势阻。九月，北师已蹙西门月城，廷麟等立督死士缒格，复退去。时南康亦失守，赣势益孤。各师以粮竭，借端稍稍引去。城中仅郭维经、汪起龙、汪国泰、金玉振、徐日新、王志忠等部，部不能千人；而别部谢之良数千人，次雩都观望。粤西援兵喻岭，不即至。廷麟左右支吾，心力瘁尽。嗣闻延平失守，驾出奔；辅臣苏观生初以祭陵憩赣，托迎驾去。或伪封上书观生：『公弃虔乎』？苏不得已，驻南安，邀胡、赵二将以吉安败绩之师援赣。时西广总制丁魁楚闻唐事败，疾走肇庆，拥立桂王监国。观生与魁楚初以争饷郤，不预；别走广东。或邀廷麟亦去，廷麟曰：『赣州，两粤门户；廷麟死此矣』。已而汀信阻绝，人心皇皇。廷麟曰：『灵武不终，天哉』！十月之三日午夜，天雨如火，乱堕营中。北师由小南门逾城入，城中仓卒巷战；总兵刘天骊犹触杀数十人，郭维经急促水师睨炮，连遣四十八门，皆裂。黎明，北师尽入城，城中士民格斗死无算，诸池井积屍几满。廷麟以事不可为，投藕池死；北师争□□肘股以为功。二妾率群婢，亦投井死（时诸同难，为万元吉；而郭维经、彭期生、黎遂球别有传）。

万元吉，字吉人，号慎余；江西南昌人，登天启乙丑进士。年十九，司理潮州，台抨去。补归德，忧去；起永州，陞大理寺评事。元吉性英利疏广，不当时宜，而好讥议；初宦用是不达。时流寇毒中原，元吉乃以南兵部职方从阁部嗣昌军前赞画，驱驰楚、豫，备辛苦。身止随一仆，偃侧戎莽，不通家书者七、八年。转本司郎中，出知扬州。

弘光中，陞太仆寺少卿。时镇将高杰骄蹇，与黄得功郤。元吉受命和解，出监军；往来滁、扬。随请追恤前阵亡将猛如虎、刘士杰、郭关、猛先捷等，并讼蓟辽旧督赵光忬之冤，以鼓敢战之气。时扬、淮、六合一带所在兵民互格，遂上便宜，以为『镇兵素少纪律，民竞自卫，益复鸱张。一城之隔，民以兵为贼、兵以民为叛，内自携二；猝有敌至，何所用之！请令居民尽移城内，间出城外，有无贸迁；各将领派兵宿驻，严禁毁伤，勿得强御』。移书告勉靖南有功，期以首倡协恭，共奖王室；仍请褒扬有功，示劝诸镇。会廷议上诸尊谥，元吉复疏建文君年号宜复、景皇帝庙号宜崇、靖难死事诸臣谥荫宜补；又请录崇祯末北京各省直城陷殉节诸臣，采辑成书，酌与荫谥、庙祀，且颁行学宫，广示激劝。诏可之。於是追恨往事之失，欲尽力惩毖，以急救封疆疏及宽、严、任、议四事，语颇痛切；上不复省。

及南都陷，镇将金声桓随以江西北降。元吉野走，声桓以书招之；元吉作书绝使者，有曰：『夫人相知，贵相知心；台台与某周旋兵火扰攘之中，尚不知某硜硜小节，胶固难通乎？从古良臣、忠臣，但听人自取其一。台台自为良臣，某得为忠臣，其揆则一。幸而见容，则为陶靖节，惟台台之赐；不幸而见逼，则为谢叠山，亦惟台台之赐！湖水洋洋，胥涛、屈波，安往而不得行吾志也。伏望合台俯垂鄙分，严戢部伍，抚绥宗氓；凡绅士行藏，听其自便。令此一方人，皆谓不佞於台台有口舌功，即纫云霄高谊。昔不佞与史相公书札往复，尝谓事不济，则继之以死；今史不食前言，幽冥之中，安忍负此良友也』。声桓得书，亦不复强。

乙酉，唐王主八闽。明年，元吉以虔抚督师，壁皂口。北师猝至，时阁部苏观生守赣，止发新威营二百人出援皂口，未战先溃。时风鹤甚，百姓争夺门去。元吉不得已，乃退入赣，固关门；至砍其二妾以殉，人心稍定。四月，阁部杨廷麟乃以兵入赣合守，赣之得完者六月。唐主加元吉兵部尚书；元吉兵律持重，颇与廷麟不协。北降孙之獬为北师招抚，射榜城中劝降；元吉火之，不省视。十月城陷，元吉自持槊战於小南门，不利；走出建春门，乘间投水死。时中书舍人康范生，字小范，安福人；见执至省。寻得脱，尝论守虔三公：杨机部节义文章，羽仪当世；而见事稍迟，听言不广。郭六修公虚平恕，集思广益；而遴才太滥，驭将太宽。万吉人志急身先，清苦绝伦；而自用颇专，与人或忤。时以为至论。後之獬颇不任用，归山东，为乡校蔡乃愍所杀。

而一时同难者：卢观象与参将月中桂同投水死。王其■〈穴上弘下〉，号赤有，安福人；以选贡，官兵部主事。守东门，初被炮伤额；见执，口不恭甚，死。弟贡生王其隆。从死。龚棻，号建木，新建人；官吏部主事。与其隆同督水师入赣，堕马卧病；卒拥出涌金门，投水死。万发祥，号瑞门，清江人；癸未进士，官翰林兼兵科给事中。守小南门，仓卒中为乱兵所害。庄以莅，赣州人；为监纪知县。事急，与其弟诸生甲，咸自尽。锺良则，字穀城，瑞金人；以监纪通判守望江楼，亦自杀。而死於火者：为袁从谔，号昌言，湖广郴州人；乙卯乡荐。督楚师来赣，守西门。中书舍人刘孟鐫，号和倪，安福人；丁卯乡荐。守建春门。其时被执，逮至南昌

者四人：为都御史杨文荐、兵部员外於斯昌、总兵刘天驷、副将汪起龙。文荐，号又如，湖广京山人；癸未进士。屡捷西门，城陷，方投水被执。斯昌，湖广黄冈人；乙卯乡荐。与天驷、起龙三人俱就刑。独文荐得释，入山愤郁死。而故首试廷麟督学蔡懋德，已先死贼难甲申。又同知程必进，字以序；以松阳贡，训导赣州，题授府职。城危，子矩请去之；毅曰：『得与封疆死，幸也』！挥矩自脱；矩曰：『大人以身报国，儿不从，何之』？城陷，父子俱死。必进精「易」理，著有「河图衍义」。

论曰：果从金堡之计，如汉王之诈称使者驰入杨、万壁，夺其军；是以离郑则可，而以任杨、万固未可知也。杨、万诸公不办将略，岂数秃笔专心求死而能奠定中原者！虽然，固虔以待蹕，为天南第一义。果「忠诚」奉共主，广、滇二师自力。守垞既专，诸援亦凑，尉佗、刘鋹之业可幸苟安。夫大势已去，而凭片纸使人数千里之外，咸骈首就毙，万无幸之道也。或迟迟至戊子，遥应金豫国，则李惠国犹能赞一臂，展草行之能；而惜也不能待，徒使「忠诚」二字寿千古！噫！非人之为矣。相传廷麟有子，为彭士望赎养。

——见原书「列传」卷之九（下）

· 陈子壮（麦而炫、朱实莲）、陈邦彦（杨景华、杨可观）

陈子壮，字集生，号秋涛；广东南海人也。曾祖大司空绍儒；祖弘乘，知善化县；父熙昌，万历丙午贤书第一。乙卯，子壮弱冠，荐於乡。明年丙辰，熙昌成进士，令平湖；子壮读书署中，淹该。己未，赐进士第三人及第；授编修。辛酉，奉命祀南海；时父熙昌为名谏议矣。天启甲子，出典试两浙。魏璫用事，所在营生祠；索子壮题柱、且匾其堂，正色拒之。会熙昌极数忠贤罪，触廷怒，被黜；因并坐子壮试录拟程诽谤不敬，同日去朝。逆奄败，起熙昌都谏；而子壮旋以宫谕居忧。又五年，晋少宗伯；入为讲官，多裨益，上尝称「先生」不名。疏唐世子聿键下高墙。丙子，有宗才换授之议；子壮力争之，以为事有未必然者三、有不可行者五，语激切。上怒，且廷杖；时刘太后亦知子壮名，为垂涕道帝，且诸臣连疏申救，配赎而还。构云淙书院以自娱。

弘光改元，以礼部尚书兼詹事府，敦促向用。甫抵金陵，而南事复坏。丙戌，唐王立福州，以大学士兼大司马，督兵援赣。兵及大庾岭，而延平失驾。子壮方潜迹九江。明年丁亥，北督师佟养甲索子壮出见。既脱去，谋举兵建旗；治战舰，众数千人。时同事者不一部，而陈邦彦一师最坚，尝与犄角窥广州。邦彦密与其门人杨景华、杨可观之已北降者约为内应，须七月之七日并起。子壮先之，事泄，内应败，景华等见杀；子壮退保高明。北师急攻高明，困旬日，城破；子壮被执，怒发张目不一屈。临刑，呼高皇帝不绝口；磔且尽，犹闻其气云云。时白日忽黯无色，北师中亦颇为叹息。年五十有二。悬首当衢，中夜有光四射。桂主永历中，晋东阁大学

士，贈忠烈侯，謚「文忠」；加贈其父熙昌如子官，蔭二子。長子上庸，勞行伍，先兩月卒；次子上圖，錦衣都督同知。子壯美須髯，通仁籍且三十年；立朝之日少。嘗論史至文信國：『盡忠於宋，是矣。顧延息燕獄三載，致王炎午有生祭文；終就柴市，不亦晚乎』！所著有「南宮集」、「練要堂近游稿」行世。

時與子壯共義者：麥而炫，字章闇，高明人；崇禎辛未進士，官御史。朱實蓮，字子洁，南海人；天啓辛酉賢書，亦官御史。共守高明，城破被執，皆見殺。

陳邦彥，字會斌；廣東順德人。唐主即位入閩，以賢書任兵部主事，監粵西狼兵援贛。督師蘇觀生不進，虔危；語觀生曰：『閣下以大兵扼惠、潮，分一軍助我截大庾，可固全粵』。觀生復不能用。

閩敗，唐介弟聿■〈金粵〉自立廣州，改元紹武；而桂主已監國肇慶。邦彥奉節往觀桂，語『監國以序無過王者，與唐平非名；而戰，主客不敵。不如急正大位，以厲人心』。改兵科給事中。方還報，而北兵果從惠、潮掩廣州不備，執聿■〈金粵〉；觀生自縊死。桂主奔西粵，北鎮李成棟以兵追之，且及；而邦彥與陳子壯、張家玉等各師俱起，北督師佟養甲捷呼成棟還御邦彥等。主踉蹌梧州，得保無恙。

北師襲邦彥於龍山，妻何氏、子和尹、虞尹，被執見殺。邦彥不挫，與陳子壯合攻廣州；間露退，設伏擊敗北師於禺珠。破水高明，大戰胥江、新會；已北降清遠指揮白崇燾復反，迎邦彥。成棟提師二萬困之，力竭城破，邦彥被執；欲降之不屈，見殺。臨刑，有歌；歌曰：『天造洵多難，臣也江之汭；書生漫談兵，時哉不我與！我後兮何之？我躬兮獨苦！崖山多忠義，後先炤千古』。贈兵部尚書，謚「忠愍」。子恭尹，存。

初應邦彥為間者：楊景華，故廣州衛指揮僉事。楊可觀，故東營指揮；隆武中，擢柳慶副將軍。事泄，被執；酷刑責其同謀，可觀曰：『丈夫砍頭耳，豈以緩死殺天下英雄』！終不吐。時搜得衣縫桂字數百人，皆見殺。而恭尹稱半僧，微去；嘗挂單法相余弟僧听月處，听月飯之。

論曰：秋濤非可以金、姜例之也；必索出見，何意？防之深矣。秋濤，其懷豫讓之志也。夫觀其論文信國不早決，且撓逆魏張時，不懼；而當此大故，其所自信，寧再計決也！會斌以間露，不得與秋濤并驅馳，以至隨歌而盡；止留半僧，志亦亮矣。明季東粵三人，秋濤、芷園、會斌。會斌才鋒不如芷園。而沉毅過之；秋濤，二者之間。

——見原書「列傳」之九（下）

· 張家玉（林沄、張恂、張珣、韓如琰、黃者肱、陳于赤、尹端庵、梁法良、趙省

一、卢定国)

张家玉，字玄子，别号芷园；唐殿中监九皋之後，世家东莞万家租。家玉生五、六岁，性崖异，酷爱诸葛武侯。从其师林洵登黄旗峰，众足废；家玉曰：『吾不绝顶不休』。为文矩先正，其气从大家也。丙子，举於乡。癸未，改会试八月，出周凤翔之门；选庶吉士。

甲申国变，凤翔且殉难，遗书家玉云：『玄子尔雅温文，貌若妇人；然中怀刚毅，大节不移。玄子勉之』！会为贼所执，欲降之，不屈；作陈情书投贼，有曰：『前明朝翰林院庶吉士、今请宾张家玉，谨百拜：伏惟不没人之忠者，所以有忠臣；不没人之孝者，所以有孝子。如家玉者，宜比例古宾臣，旌别其门曰「有明张先生之庐」；不然，临以刀锯、设以鼎俎，家玉者从容而乐蹈之矣』。复移书伪丞相牛金星曰：『忠臣义士，於明为多；劝义奖忠，於「顺」为烈。明孝着，而人知有父也；明忠着，而人知有君也。至若家玉，殷人从周，愿学孔子；而必系之明者，盖不特君王之高义，实欲遂我君王之大不宁也。如其不允所请，刀锯鼎俎，谅非负气守节者所隐忍而规避也。生之、死之，惟命』。贼怒，繫七日夜，勺饮不入口。会东师兵入，家玉间归。

弘光元年，家玉赴召留都。洒洒江上，必雪国耻；手发一炮以誓，声裂天地。未至，南都复陷。与同里苏观生扈唐主即位八闽，擢翰林院侍讲，兼启居注；改兵科给事中，监永胜伯郑彩军，出江右。进营许湾，设高皇帝像於军中盟；而战则佯走以来敌，敌至伏发反击，大败之，抚围以解。复与知县李翔誓守新城，负重创；而敌卒不闯杉关一步。上手书劳之曰：『朕以子子汝，汝以父父我』。晋都察院右金都御史，练兵潮、惠。家玉单身入镇平贼巢，谕以大义。复驰谕程乡贼王元吉，元吉降；归农者数万，就伍者数千。

八月，闽事坏；桂主监国端州，而思文主介弟唐王入广州称尊。十二月，北兵入广州。明年丁亥，剃发令下；家玉与其师林洵独奋起，通书南海陈子壮，约共义。而顺德陈邦彦亦起。同年张元琳为北师游说，造庐以请；家玉朗诵「正气歌」三阕以谢之。新抚院修复以书至，家玉援笔题其後；有云：『孔门高弟、太祖孤臣如玉其人者，安可以不贤之招招之乎』？

三月，举兵复东莞；称制，以原任儒学训导张珣为东莞知县、原任湖广监军道张恂督守。而诸生尹端庵，统乡兵严备万家租。家玉身整舟师於到滘，拟走省会；而北兵疾至，万家租先败，尹端庵自沉於江。东莞旋失，张恂见杀。恂，家玉诸父行也。家玉战到滘不利，败走虎门；祖母陈、母黎、妻彭，俱烈死。家玉作流言称神助，以动其乡；於是各保复并竖义旗以应。北兵复大至，家玉盛设旗帜，伪为坚，空壁去；而伺敌惰击之，获大胜，尽夺敌舟，兵势复振。出没海口，常泊铁冈；夜潜即敌要害，或发炮、或题诗、或立帜，以劳敌守，北人惊以为神。走龙门十五岭，

岭故有义团万人，推家玉大将军，列龙、虎、犀、象、豹五营；一鼓下博罗，守之。敌至，五营更番出御。复伪为神，至夜城上有红光数丈云，众益奋，四出逐北；敌计沮。久之，敌咽水灌城，卒饥不可守；弃博罗，全师归龙门。於是又变五营为二十五营，直窥增城。增城近省，援最疾；家玉距城十里而军，断小木投孔道，以滞敌马。复悬巨木高崖，以小兵诱战。敌驰入，马当木足折；及崖，悬木多覆，大败去。由是乘胜薄城，前营搏胜，夺敌旗返；中军误以为敌至，阵乱。敌以骁骑径贯中军，家玉跳，溺水卒；盖戊子十月之十日也。师洊被执，亦及难。

久之，北镇李成栋反兵迎驾，驻端州；兵科给事中李贞为具其事，主为挥涕，罢朝七日；赠少保太子太师、武英殿大学士、吏部尚书，追封增城侯，赐祭葬，谥「文烈」。家玉无子，荫一弟家珍锦衣卫僉事。有「名山集」传世，诸草未刻。年三十有三。

论曰：文列初读中秘书，忽日午，庭中寸楮从空下；视之，得「四彝馆」三字，深怪之。是夜，梦猎狐狸，得残雀，掩仗而归。云中似有人授书，曰：『且秘之』！既觉忆之，若以为文信公云。文烈性好劳苦，能数日不食、日步百里不舍。喜结客，虽野健不能恭，为好座进食。同塾陈万几贻书劝知几；答曰：『摧玉一毛，即都九五尊不乐也』。同义为韩如琰、黄者肱、陈于赤、梁法良、赵省一、卢定国等，皆因玉而死。所乘马黄馵■〈走秀〉跳跟，能於风沙惨淡时作悲鸣以怒玉。

——见原书「列传」之九（下）

· 瞿式耜（张同敞）

瞿式耜，号稼轩；南直常熟人。万历丙辰进士；历官乙酉，任广西巡抚都御史。北兵下楚，式耜守粤西勤。

丙戌，桂主即真肇庆；时督师何腾蛟被劫死，式耜请以阁部堵胤锡代之；不果。驾为北师所迫，式耜保峡江；退敌，护蹕桂林。已而峡江败，主释桂林去；式耜与参将焦琏留守。城破，巷战得全；因令诸镇合守。晋式耜吏、兵二部尚书，拜大学士，加太保；比开国勳，封临桂伯；仍守桂林。时将悍兵骄，粮饷不继；式耜处百难，尽瘁堵守。

庚寅秋，北师入境，呼吁无从；主憩梧州，无宁处。党事犹盛，式耜与袁彭年等颇合，吏部尚书吴贞毓等遂与抵牾。方重处五虎，而式耜益孤；所请，率漠置之。

已而诏撤开国公赵胤先扈驾，而严关诸将尽已扫去。於是人心大震，各思苟脱；在城卫国公胡一清、宁远伯王永祚、绥宁伯蒲缨、武陵侯杨国栋、宁武伯马养麟，俱托故出走。式耜大声呼之，恟曰：『朝廷以高爵隆诸公、百姓出膏血豢诸公，乃作

如此下场耶』？诸不顾。城中仅瘁卒数百人，鞬四关待死。督师兵部侍郎张同敞单身自江东，与式耜共事；式耜与诀曰：『吾分与城俱；子无留守责，可速去』！同敞故为式耜门下士，曰：『敞不能独死先生，必不去』。式耜署中僮仆且逃尽，止一荷槊从；与同敞三人耳。

庚寅十一月之六日，北师至；城开，繫靖江王亨默父子别室。须臾，数骑邀式耜；式耜曰：『无庸；吾等坐待久矣』。遂与同敞偕诣定南王府，平立不拜；延颈请速死。定南温词：『吾在湖南，已知有留守公不怕死；吾杀怕死者』。式耜大言曰：『吾两人不死兵未至之日，正须烦斧钺；知吾南阳尚有人』。定南令分卫之以闻。因与同敞遥倡和吟咏，以明厥志。作遗表谢罪，有曰：『今平乐、阳朔等处尽不守，取梧旦晚间事。嗟吾君至此极乎！即寸磔臣躬，何足谢罪。臣心痛如割，血与泪俱；为具述初五以後十日情形，仰渎圣听。惟愿皇上勿生短见，暂宽圣虑，保护宸躬；以全万姓之生，以留一线之绪。至於臣等，惟有坚求一死，以报皇上之隆恩、以尽臣子之职分。天地鬼神，实监临之』！诗题，有「漫赋」八章，有「初六日纪事」二章，有「示别山」七章、和「别山」二章，有「自艾」、「问天」各一章，有「自警」四章；无何，式耜有仆周麟被获，押至所禁室，随奉令到中山搜取家眷，旋复收去，感而有述一章；二十有六夜，梦一室如其家中馭娒馆，先公命设榻而卧，方敷卧具，几旁一窑瓶触而坠下，式耜以手承之，竟不堕地，完好无恙，觉而纪之一章；忆圣蹕一章；得新历（盖明历闰十二月，新闰明年辛卯之二月），式耜阅而感之一章；有「放言」二章；久之，同事诸臣次第就招，感而有述一章；距失守刚一月一章；自入囚中，频梦其师钱谦益为周旋缁绁倍於平时（盖未知南都迎谒之实也），诗以志感一章；妻某以闰十一月之九日为生忌，杨硕父为之礼忏山中，式耜为位，以饭一瓯、菜一碟、酒半盃哭之二章；十七日临难，赋绝命词一章。是日，震雷暴雨，山川崩裂；桂之人号哀载道。先是，给事中金堡苍梧之狱，式耜具疏者七，得戍清浪；养痾招提，皈命三宝，更名性因。既感式耜义，和「漫赋」之诗八章，而跋式耜与同敞合稿。因上书定南，请得以衣冠棺殓两公，并恳恤式耜幼子；王许之，遂命性因领屍藁葬。

式耜之孙昌文，初相随入粤，授翰林院检讨；路阻，不及奔难。已而被繫得脱，庐於墓侧。从杨硕父得其祖遗表及临难诗四十首，合同敞遗稿刻之，题曰「浩气吟」。至其五年中奏疏诗文百卷及所携旧者述数十卷，烽火中十存二、三。录其「漫赋」一首：『年逾六十复何求，多难频经浑不愁；劫运千年弹指到，纲常万古一身留。欲坚道力凭魔力，何事俘囚学楚囚！了却人间生死业，黄冠莫拟故乡游』！「自警」一首：『若论成人事，临危止一端。圣贤原节取，世路已惊看。死岂求名地，吾当立命观。乾坤留此夕，魂魄也教安』。「忆圣蹕」一首：『銮舆播越五秋风，风雨漂摇半避烽；万乘总无千骑拥，三江应有百灵从。卜年未许更周历，辟国宁教尽汉封！待死孤臣难赴阙，瞻天遥祝护苍龙』。「和别山」一首：『志节无同异，形骸岂合离；余生今已久，诀死亦何悲！正气遥相接，忠魂刻共随。诗篇留血泪，千载有人知』。「赠别山」一首：『成人看福分，惟子最予钦。矢节经营久，临危

志气沉。骨坚神亦助，识老崇难侵。造化真由我，须教後视今』。其「临难」一首，有『三百年来恩泽久，头丝犹带满天香』之句（而同敝事，在「张居正传」）。

论曰：时相与共守，皆中湘故将，难使；而又苦饥。桂蹕未安，呼吁何处；乃又以党事相内哄哉！在廷诸臣，全在制虎，意无临桂；即临桂亦何从子房虎啸哉！「群而不党」，尼山早示以中兴要义而不察也，临桂但有死耳；而难别山之与俱。李梦阳祠练金川，匾曰「浩然」；临桂合别山遗刻，题曰「浩气」。其皆「正气歌」所氤氲者与！

——见原书「列传」卷之九（下）

· 何腾蛟（妻徐氏、妾王氏、杨宣威、堵胤锡）

何腾蛟，字云从；贵州五开卫人，浙江山阴籍也。万历辛酉乡荐；崇祯初，知南阳。贼每躏其境，腾蛟训练乡健，为二十四营御贼；多有斩获，威惠大着。九年，从巡抚陈必谦败贼於安皋，斩级四百；论功，晋一级。移大兴，入为武库主事。僉事怀隆，治兵淮徐，斩贼首王道善、程继孔等；巡抚史可法大器之。腾蛟善推步，每言晋、燕分当有变。十七年，擢右僉都御史，巡抚湖广。迄三月，而前言大验。

福王立南都，密奏请以傅上瑞为长沙道、章旷为监军道，各练兵一万於湖南、北以自强，隐压左徼。辅臣士英以籍里且庇其家，无不报可。加兵部右侍郎，总督川、湖、黔、郧。上言：『枢星者，职司主宰。迺来紫薇垣中光芒若隐若见，占云臣工不和，帝有危疑不安之意。天市垣居临艮位，乃金陵分野；其明微弱，主天子忧疑不决。伏乞陛下酌宽猛之宜、妙鼓舞之术，举朝大小臣工和衷体国，以挽回天意』。

。

乙酉，宁南良玉素衔士英，又畏闯贼之逼，御史黄澍得罪士英被逮急，益劝良玉借伪太子为名，部兵东下，清君侧；以腾蛟行。腾蛟不可，解印授家丁，无为贼所得；而身往谕良玉。良玉强持之登舟，次汉阳门，腾蛟夜伺间投水，顺流竹牌门，为渔者扶起；间走长沙观变。楚人闻其不死，传以为神。澍复责腾蛟擅离职守。

已而南都败，唐主起闽中，人心回惑。腾蛟布告出师；略曰：『悲哉！今日成何世界，胥於禽兽矣。兵家五字：战、守、死、走、降；今日战、守不成，走、降非策，则惟有一死。语云：死士一万，横行天下；苦寒此七尺耳。即否，往无不济，复君父之大仇、雪人伦之大耻、昭臣子之大义，此七尺又何曾死！腾蛟不敏，标下死士尚三万，愿为诸公前驱。然後张将军（先璧）出茶、新，郝将军（永忠）、曹将军（□□）出犹、义，合窥章、贡；黄将军（□□）出醴、萍，徇袁、吉；周将军（全汤，漳平伯）出醴、滋，又请号召忠贞十八镇出兴、归，李赤心、高世振联络川蜀，各师从夔峡，并下荆、襄。既无东忧，又张西势；并力合势，胜气在我。而

况刘将军（承胤）以宝师，马将军（进忠）以荆师，王将军以岳师，卢将军以武昌、袁、吉之师（宜彰，佳鼎），董将军（纓）总督标之师，张、向、牛三署将以澧州之师，袁将军以本营之师，王将军（凤昇）、牟凤卫以援剿之师，水陆步骑百道并出，或压其首、或绕其背、或■〈扌 亘〉其胁、或披其肢；又况齐、秦、豫、汉之雄兵，柯、陈、黄、麻之义旅，动以百万。引领南望，将一呼而百应；诸君何二何虞，不一奋戟乎！今与诸君约：从腾蛟言，富贵可久、妻子可保，报仇为忠臣、全体为孝子；不从腾蛟言，富贵朝露、妻子俘卤，为叛臣、为贼子：惟所取！况朝廷之法纪尚在，太祖高皇帝、大行烈皇帝之灵爽赫然；腾蛟秉尚方，不畏强敌，宁畏悍帅？天下义旗回指於公，恐不能为寿於旦夕也！檄到毋惑』。时武昌已陷，腾蛟保长沙七阅月，标兵不过二千。方檄马进忠、王凤昇两将军驻岳，联络乡团数百部；而猝闻金陵之变，士心震沮。伤弓曲木，旦暮扬去；且又粮糗无从，拮据更急：所为五苦是也。并以五难入告；有曰：『长沙恃洞庭为阻，今武昌樯橹一帆可至：则无险之难。金叛南昌，仅存一赣；靖江妄觊，骨肉为仇：则无邻之难。本标道标、新营旧营，精锐实可三万，月计饷本、折六万余；并湖南、北分汛镇防者，月计十余万。而道路回阻，百姓死亡；幅员既蹙，物力有限：则无饷之难。逆号遍及，处处动摇；不肖先声驰鹜，忠义不知为何物！威令不行：则无法之难。阍陞徂远，入对无时；旦夕此心，何从呼吁。仅与督学臣堵胤锡、长沙道臣傅上瑞、监军道臣章旷痛愤咨嗟，誓不能为功臣，当共为忠臣，以报陛下一日之遇：则无告之难』。时闽中初造，地边势隔，所恃腾蛟一念忠槩，楚南半壁系属不去。时贼自成为平西三桂所败，走死楚中；其兄子李过者号一只虎，同其党高必振就堵胤锡之招，唐主改过名赤心。而十八镇多就腾蛟降者，颇傲不任使。主以腾蛟安辑功，大其爵赏，以巩西南；封定兴伯，以兵部尚书兼东阁大学士督师。腾蛟疏请亲征；有云：『皇上以高皇帝神孙，应南阳圣运，遐迩通情，正需此日；事机一失，安能再来！河南为天下之中，荆、襄居上流最要，诚能力破浅谋、独抒神断，大势既张、大椎在握，天下全局指顾间耳。夫饷不鬼输，日靡则馈；兵非神运，善用斯强。不图其全，终隅於一；我之所往，彼亦能来。臣等疾首痛心，诚不能以逆料也』。驾即延平，师终不进。

丙戌，闽败。十月，桂藩推立於肇庆，晋腾蛟定兴侯。明年丁亥，北师下楚，腾蛟战败。时主蹕武冈，腾蛟来归。武臣刘承胤夺主权自制，腾蛟苦请移蹕；疏略曰：『臣等推原祸本，其端不一：大率上下之情不通、文武之气不奋，形势之算不豫、嫌疑之窾不消。今使武冈果有山川之险、兵甲之雄、米粟之富，粗号偏安；然未有处一隅而图四海之大者！析、永已靖，桂林无恙。审楚、粤之要，莫先全、永；俟衡、常报复，仍还汤沐。主上一启行，而嫌疑消、形势豫，文武奋、上下通矣。伏维皇上自择自行，许督师一人扈驾；敢有借显议迎、议留、议送者，惟众共起殛之』！承胤故为腾蛟所荐，忘谊反噬；尚别借以夺众议。腾蛟复特纠之；有曰：『承胤所争者不过蛙蚁小斗，臣与天地抗盛衰之运；承胤所争者不过蜉蝣虚名，臣与世界辨人禽之关』。

未几，武冈破，承胤北降；反偕北师屠腾蛟家属尽。腾蛟继母孙、妻徐在縶，徐间致腾蛟书曰：『母近七旬，妻亦命妇；岂不能如王氏之抉喉而死；实疾望大兵来救。麾下诸大镇，宁尽若承胤负心哉？救与不救，唯信到』。王氏者，腾蛟小妻之曾被鹵节死者也（初黎平破，王自刃；仆不能死，抉喉乃瞑）。腾蛟答书云：『夫为忠臣、妻为节妇，死亦何恨！族属无干妇女，既入网罗，便是劫数。所不忍言者，王陵之母，千古伤心；赵苞之报，寸衷难谢耳』。主下诏褒慰，谓『非卿不能有此难，非卿不能处此难』。腾蛟捧诏涕泣，谢表有云：『臣读「易」云：「内难而能正其志」；臣知所以自处矣。曾记唐李晟家眷百口，陷於贼营；军中有言及家者，晟泣曰：「天子何在，敢言家乎」？郭子仪与仆固怀恩不善，塚墓被伐，上惜之；子仪曰：「臣久在行间，不能禁军士暴掠；今日之报，是其应得」。臣才远不及二臣，而捐躯报国之心，千载而下可以相质』。已而，徐亦自尽。礼部郎中严炜为之请恤，诏许坊葬。

主踉跄历桂林、走南宁，腾蛟收残卒於郴州，复取桂林。戊子，率大将赵印选、胡一清、焦璉、曹志建等复兴安，围全州；八战皆捷。三月，破之；又复东安。乘胜困永州，与马进忠扼守常德。已而力竭，弃城走；从石门、慈利，退入土司。夏，檄总制都御史胤锡合力，复下常德。七月，进忠战麻河，大捷；北师伤七千余人。诏封进忠鄂国公，仍驻常德；而腾蛟屯衡州为声援。

嗣胤锡与进忠隙，胤锡令前所招李赤心十营之在夔州者，并来常德。常德士民畏赤心残，而进忠亦虑其扎己，纵兵民数万，举火焚壁，以其众渡湖南；而胤锡与赤心亦弃城渡湖南，若追者。腾蛟闻之，大惊，湖南岂能容此数十万众且相抵牾者，势必内变；遂有「湖北千里一空」之疏。主在肇庆，谕进忠出攻长沙、赤心出援江西，应声垣。腾蛟恐两难，单身至湘潭督行。

己丑正月，赤心至湘潭，受约且行；而进忠先以宣威伯杨甲一军来就约，全师未至。腾蛟故部徐勇者，时已北归，伪为明服；称叛北南还，乞腾蛟观其营。腾蛟方岸帻、便服坐城，轻身示不疑；而猝为所劫。勇以其旧，劝且降，因馈酒食；腾蛟不受，反义责勇降，大声不恭。饿数日，喷血死。杨宣威不得督师所在，单骑入城者七，冒矢重伤卒。於是进忠不进，而卫国胡一清、开国赵印选弃永州，退守全州；永国曹志建亦退保岭峡关，宣国焦璉部将常起蛟亦退保平乐，赤心之师竟沮，还走梧州。主赠腾蛟中湘王，谥「文忠」。腾蛟子文瑞，系节死王氏所生。後以贤书授词林，从躋；病南宁，卒。

自是衡州复陷，阁部胤锡入朝肇庆，请以广东四府处赤心屯守；朝议赤心初奉援豫之命未报，不许。既留守桂林瞿式耜请以胤锡代腾蛟督师，俾由桂林出楚；桂林将士以初赤心故，恨胤锡入骨。胤锡惧，沮潯州，卒。胤锡字仲轺，号牧游；宜兴人。以丁丑进士，主事南户部；出知长沙，督学湖广。弘光中，擢本省巡抚都御史。乙酉，左师东犯，毅不从；避之湖南。李贼死辰州九公山，奉何腾蛟檄，单身冒入

贼营，招李赤心数万众。唐主以为功，陞兵部侍郎。永历中，拜大学士兼兵部尚书。尝以家口托督师程峒，移驻广东；至封川江口，遇北师李成栋，残之尽。

论曰：中湘当西南半壁，人欲失其心之时，统绪再延，烽火肆逼，声息遐远，顽傲纷耘；乃欲呼寐立敝，人省大义，岂不难之又难！移蹕、出师诸疏，诚无愧汉武侯二表；即机用，亦何必不若也。余尝论武侯只是能读书，中湘「内难正志」之言，亦可谓深於「易」矣。成败利钝，虽皆不可问；而疑叛起肘腋、骨肉试锋刃，乘輿未有即安、关门无从设险，又武侯之所未经者，艰难同而势异也。举动光明，如天高日出，万目皆见；而变起不测，元老不终！徐勇以荆聂之才，试之故人，立摧天柱；呜呼命矣！

——见原书「列传」之九（下）

· 姜曰广（子二）

姜曰广，字居之，号燕及；江西新建人也。祖冕，良令尹。曰广登万历己未进士；以庶常，授编修。清介矫峻，善属文，力持先辈，崇尚端邃；为後学指归。尝语所知：『吾此方匡子。自未第时，迄今未摹一角』。邹忠介以荐李三才为廷论所指，曰广出揭直之。

熹庙中，奉命册封朝鲜使，详阅岛帅毛文龙情形；还称：『文龙以二百人入镇口、据铁山，招降彝、抚归义之民至十余万众；即不谓吮血扼吭可抵成绩，顾不愈於辽阳一陷、越海而南，广宁一溃、望风而遁者哉』？及归，不携朝鲜一物。时魏璫用事，令其甥傅应星及孙抚民纳交，曰广拒不答。时为讲官，故事：先呈讲章阅览，或一就座师监定；曰广独否。因上「君子、小人和同之辨」，直斥时故。都御史杨惟和危失魏意，责易草三，不撓一字；抵最忌，削籍为民。及魏败，起历左中允。己巳，东兵大入，武经略马世龙不战；曰广力言於朝，罢之。庚午，补讲官；於书议中寓讽切：勿任性、勿信左右小人。出典南闱，门多奇拔：杨廷麟、张溥、杨廷枢、陈子龙、徐汧数十人。升南国子祭酒，分丁丑会试，所录如熊开元、丘瑜等，亦才名烈当世。惓惓力行，启迪不衰：江西呼姜夫子云。已而推吏部侍郎，力援郑鄮及黎元宽等，忤首辅乌程温，谢病归里。癸未，复起南京翰林院正詹，掌国子监事，讲学江西社。其时诸卿就教，侍坐不一人；史可法以大司马束脯正詹之门，为创见。

甲申春，督臣孙传庭潼关失守。曰广虑南北绝，事或不幸，同史可法疏请皇太子监国南都，以固国本；且巩祖陵，收东南人心，备缓急。留中。三月，神京陷，曰广檄诸生大集尊经阁，陈数大义，欲自杀从先帝。会可法及工部尚书高弘图、都察院张慎言、京畿道御史祁彪佳、臬臣雷演祚就谕册立，且曰：『乃社稷为重矣』！彪佳倡议中兴之辟，非守文继序所办；曰广深然之。或曰：『潞藩慈易，民心所往』

。方拟敦请，移书凤阳马士英，略见立贤大意；已士英挟高、黄、二刘诸总镇兵权行檄，必尊福藩。可法曰：『尊福藩，序也；合策』。五月朔，福王监国；十五日即真。以高弘图为首辅；曰广以礼部尚书兼东阁大学士，次之。力辞，改礼部左侍郎，入直。可法、士英又次之。於是申拔正类，父老咸扶杖拭目太平。士英忌，以劝驾为私恩，密结勳戚、中贵为死党，嗾诚意伯刘孔昭辱曰广於朝房。而吏部尚书张慎言受事甫三日，辄褫去；曰广争之求罢，不许。时三案尽翻，曰广益求去；疏言：『前见文武交竞，既惭无术调和；近睹「逆案」重翻，又愧不能寝弭。遂使先帝十七年之定力顿付逝波，皇上数日前之明诏竟同反汗』。又言：『翻案之典，出自内侍；斜封墨敕，覆轍昭然。尤可恨者，阴持会推之柄、阳避中旨之名；先帝一误，皇上岂堪再误哉』！语极痛切。士英讽四镇合疏诋曰广。会有建安镇国中尉朱统■〈金类〉候考吏部，奏曰广定策时有异心；士英遂大言：『陛下四仇未报，曰广其一也』；发神庙时挺击东宫一案以激怒上。且曰：『策陛下，非其意也』；出曰广初书袖中示同官。因矫旨排落诸贤；不逾时，正类无存者。可法遂请出督师扬州，而曰广求去益急。会以皇太后至京，加太子太保；许致仕去。谢阙时，曰广遇士英殿门，剧唾之；士英为色沮。

乙酉，南都不守。门人杨廷麟、万元吉等起兵江右，潜书就教。戊子，北降金声桓回向，以桂林命，敦曰广出。曰广欲捷拔九江，扼安庆、窥南都；声桓不听。以兵下建昌、饶州、瑞州、九江及临江、吉安、袁州等处，唯赣州未下；而北师大至，困南昌，声桓败。曰广为乱兵所攫，得肘印；伪曰：『吾铁树宫道士也』。间投井死。其门下士先後死节者，为徐汧、陈子龙、杨廷麟、杨廷枢等；而所荐拔，率忠烈先後死国。

己丑，新建令某诱致曰广二子，俱及於难（或曰其一尚存）。曰广尝作「太史公自叙」一篇，大率追赞朋党之论。

论曰：果有挟天子奔走海内之才、之气、之志，则序立断不可为也。尔时倘能持大义，昌言前挺击故事，以罪夺福序如古昌邑体，度居之、道邻等能之乎？于忠肃而在，或即以桂议参之矣；惜也！远莫致也。及最後居之乃欲扳铁树复起，则诚难！虽然，福主果不为群小所用，以初挺付居之、道邻，使之指佞；定不令马上失天下。

——见原书「列传」卷之九（下）

· 王祁

王祁，字如止，号拱哲；太仓王氏奴也。昵青楼某滥，遂乾没主租无算。後青楼怀钜贄为尼，怜祁，与千金；亦数月豪尽。乙酉，不肯剃发；走闽建宁之净慈庵，披剃为僧，尝寄单大中寺。祁短身，面黧铁，体丰大；缁衣相向，多欹歔动人。僧戒

秘而坚，盖许祁以死者数百跣矣。诡称谮术数，能缩水令乾；便步入海，民间遍插杨枝以迓观世音大士，众惑之。

时郿西王常湖，亦度为僧。丙戌唐事败，王托钵寿宁之鬼足洞。王颀长，读书明机事；性好讖，曰『鬼得足不死矣』。虽荷笠、衣缁单，意气自别。王或言佛事，神其众；洞内外人咸异之，争饭王。明年丁亥春，祁亦僧服募洞，见王；王曰：『僧何山』？祁曰：『行脚耳』。王见祁髯在，曰：『今髯衲皆非僧，有脚能行乎』？祁亦知王非僧，曰：『行脚欲行，杀髯鬼矣』。王曰：『鬼有足，无妨也』！因指洞名为讖。祁笑曰：『请与鬼以足』。夜共寝处，密言所欲。祁别去，遍以王踪迹，微致所善僧跣。久乃露王於洞之内外人，且曰：『王佛祖再生，为主运』。又自言精天文家及奇门、六壬等数学，测无漏；有法呼天兵至。於是众顶礼惟命，得壮士三百人，成习槊，惟左右。

且起，而稍稍为寿宁官将所知，出捕洞。洞故壁起，不可蹶，梯空而上。时洞外人，皆入洞起级保；官兵仰洞，无如何。祁乃夜间穴地洞，侧身出；疾走寿宁。寿宁兵壁洞外，城单；开门，走其县官。时府檄政和兵共援寿宁，祁又间释寿宁，破政和；遂巡复还洞。

会建安令李甲躬诣乡督粮，仆役颇扰；里老率众前罗诉，不与直。众喧，欲入建宁鸣上官；令恐上官见督，猝传语镇将：『乡之人且为乱』。明日，众共诣城，镇将闭门，登城睨弓；众有好事者大呼：『令以我等为贼，贼无赦，与一决之』！遂夺城外所设保甲兵器，咸仰城以防镇兵之开门遂出也。初无窥城意，偶火枪中镇，镇倒；众知不可解，各使人呼其乡。乡无不怨其令，哄起；揖出祁洞中，祁以郿西常湖主兵，而身为国师，用唐隆武年号。王无所裁进止，惟国师祁；祁以王令部众，亦署官属。四月，攻府治，建宁道顾南泾弃妻子，匹马走浦城索援；援未至，而镇部骑者易祁等，开门纵骑出。祁伏卒桥下，火击骑倒，众愕。而先是祁所善僧，各以义微示城斋主：城外或警，则出木器投巷，妨马足。遂有好事共夺门入祁等，而骑兵还；碍木不得展，尽被杀。为是月之七日也。祁令但残官府，余无所犯。迎王洞中居城，於是寿阳、政和复下。时方国安从子元科已卒，其余部散走山砦者，咸就祁。曹大镐者，亦以兵来会，战力；而城绅士愿给饷，守精。北兵攻围数月，辄不利去。

明年戊子，建国公郑彩乘势以鲁监国命，督海师与乡较合攻福州城。垂破，而去之。

是时桂主立肇庆，驰封祁郿国公。初乃分捣浦城，欲断仙霞为固；浦城不即下，北师总督陈谨等重师来援，祁出战不胜，闭门严备。久之，饥；往贷粟海上国姓成功，成功许诺。而闰四月之四日，天雾四塞，守而怠；北师梯木上，迷无从睨炮。祁登城举大炮，炮裂反焚，祁创；猝令一城中尽起火，四十万人无活者。祁乃自投火

中死，而王为乱兵所杀。成功以饷至，无及矣。

论曰：祁叛其主走去，而卒捐躯以报国；无主而有君，本末异，何也？以穷而遁、以穷而起，顾能以诚信感人，卒之咸投火自焚；然则盟於中，非一日之故矣。以其身效於大，不在金粟屑屑也。恨郑永胜欲乘北自为功，而不与呼吸；孤城力竭，各势俱敝。所为事不出一手，缓急不为能；闽仆匿主、武仆谏主，岂若琅琊苍头能为万世不北哉！

——见原书「列传」卷之九（下）

· 李定国（刘文秀、白文选）

李定国，伪西张献忠义子也。长身，有文儒气象；谦忠下士，兵律精。甲申，献忠陷蜀僭号；迄丙戌，拒北师於西充县，大败凤凰山，阵死。献忠义儿十，其一为平东将军孙可望，最梟；定国次之，为安西将军；而抚南将军刘文秀、定北将军艾能奇，又次之：合效献忠不懈。可望势张，常走使三将军。时令其都督白文选、冯双鲤等南陷重庆，遂由遵义陷贵州。会云南土司沙定洲与其妻万氏猝叛据省城，走黔国公天波於雄洱；天波与海道杨畏知合力拒守。可望诡称援师，释贵州，兼程进，解定洲之围。定洲遁守俱草竜，可望据有云南，令定国分攻缅甸及小西天等国。凯归，可望乃自称平东王，铸「兴朝通宝」、建宫殿、设府部各衙门；原御史任僎拥戴力，立授礼、兵二部尚书。三将军以素俦伍，亦率自王不相下。可望尝以事缚定国，挾之演武场，定国更心恨；以所部出捣叛贼沙定洲平之，势稍振。

杨畏知初攻可望败，见掳；说可望翼赞明室，可以讐众。时越、闽连覆，桂藩永明王建号肇庆矣；可望遣畏知等入覲，稍露内款之意。会武康伯胡执恭以桂命屯泗城洲，西防黔；内震，辄便宜招抚，竟矫作册命封可望为秦王。册中有云：『秦王总统天下兵马钱粮，节制诸文武，以监国亲王体统行事。朕尊礼如古仲父，仍铸秦王印以给之』。乃密疏以请。可望迎受，亦颇知非真。故令礼部誊黄，始用永历年号，自称「监国秦王臣」，表谢、修贡；复布告云、贵、楚、粤诸勳贵。畏知意善用可望，毋内自树敌，度情势不能不如前封。廷臣袁彭年、金堡等执不可，督师堵胤锡更苦口，遂改封可望为平辽王，赐名朝宗；定国、文秀等皆公爵。可望耻再命降封，不受；并挟定国等不得受公爵。廷论逮执恭，坐以擅制之罪；执恭沮泗城不至。时定北能奇死，可望并有其军，益张。庚寅冬，可望北陷遵义，复据贵州。督师何腾蛟、瞿式耜、堵胤锡诸兵屡蹶，主奔南宁；可望遣其部贺九义、张明志赴南宁护驾，必胁「秦」封；阁臣严起恒、督臣杨鼎和、科臣刘尧■〈王尔〉、吴森、张载志等抗疏不许。九义使盗杀鼎和，私击起恒水死，并杀尧■〈王尔〉等；主不得已，乃真封可望为秦王。畏知廷论九义擅贼杀大臣，方办事东阁；可望袭执至黔中，杀之。

壬辰，定国以其所部五万人出靖州；可望恐定国挟主而东，使冯双鲤、马进忠名曰共事，实相制。定国涕泣感之，咸愿执鞭从。可望使定国迁主安龙府，钱粮、兵马咸簿主之。定国至湖南，连破靖、沅、武岗诸州；战北师黄沙，尽掩其众。可望心忌之，疏请封定国西宁王、文秀南安王自功；定国以可望请，谢不受。可望阴令双鲤猝击定国，早为定国所觉；可望乃善护定国家口於云南修好。

秋，定国乘胜指粤西，北师定南王孔有德迎战严关；箭洞李鰲死，有德退保会城。城破，王闭宝玉、妻妾焚之，因自刭；遂下广西，获金印一、金册十，掳有德子庭训。时北师平西王三桂已尽收三南郡县，南安王文秀同白文选攻保宁不利，单骑还；可望请夺文秀王爵示罚。

九月，定国取衡州。时号令所及方数千里，不复奉可望约束。可望出沅，取辰州；檄定国北追，不听。复令刘文秀攻常德，不利；文秀归守云南。

冬，北师敬谨王攻衡州，定国败；王追之，中流矢死，兵五千溃。定南既无嗣，王姑护军；师大至，定国单，弃衡州保永，复退保武冈。

癸巳，定国走援广西。可望战北师花街子败，不进；定国势亦沮。桂林守者空城走去，北将綏国安坐有之。可望召定国不至，退守贵州。

时主行在安龙，大困；宗室被残几尽。主与阁臣吴贞毓等暨内监张福祿、全为国密议，驰封定国为晋王，俾疾以师逆驾；文安侯马吉翔故与可望昵，出之南宁祭陵。吉翔微知迎驾事，走报可望；可望忌，令郑国佯缚吉翔就安龙讯，勇索建议首事，主讳之曰：『内诸臣必不敢，或外伪为之』。国擅械系贞毓，以兵入宫，执二监酷拷。贞毓声数可望不臣，身秉衡，走约定国讨逆是实；他何与。於是罗织十八人姓名勒决，科臣张鐸、内监福祿、为国坐凌迟，词臣蒋乾昌等、台臣李颀等、部臣徐极等皆弃市，贞毓以大臣赐自裁；咸慷慨赋诗尽。

定国以桂林不守，觐立功自赎；疾捣东粤，直薄清远，移屯七星岩，颇怀内顾。粮尽而归，力援平乐、复攻桂林，不利；退保南隘。

乙未，定国克潯州。冯双鲤以可望指，且阴图定国；定国曰：『我尔总以效死明，果不失初意，从我入粤东，功不朽；必欲相逼，定国愿自沉以明志』。众感激。双鲤遂以三千人为先锋，东破高、雷、廉三府，败北师郭虎，尽歼其众，虎单身走广州；复领兵守高明。定国分兵三道；一天威营，攻肇庆，不下。一义胡营，破高明；执虎，亲解缚与之盟。虎诺，复叛去。三月，身率大师破杨春。

六月，围顺德；守严，不得入。常一试其所有地，题用「一匡天下」，自负以为仲父复出。善用象战，象十三，俱命名，封以大将军；所向必碎。王兴者，壁文村，

以其众降定国，乃分困顺德水门；而定国自营三门。北平南、靖南二王援师至，不见定国一兵；惊曰：『四方下子矣』！且退，有副将语王：『此退，必尽於江；不如死仗』。果死仗得脱。自是，数月不接一矢；城中饥，垂破者数。十二月，满兵来援，故匿上骑，令步卒突象。象进而骑间出定国阵後，定国败，弃象走还阵。是日，兵初出，象受酒犒，不谢而哭；顾已知不利。北师尽驱诸象入城，一象悲鸣，不肯就食；数日死。两王乃以书招定国，答书凛凛，忠义动人听；有云：『大夫同心相与，共猎中原可也』。

还南宁，遵密敕奔护安龙。马叩府不进，箠之，必不进；三易马，率如是。定国异之；有金中书者告曰：『此真主国门也；人臣不得骑入』。定国憬，遂入行宫。主与后及太子等尚以为可望所遣，令勳卫马见明下阶迎之。定国俯伏谢曰：『臣非从秦王来』。主喜，赐绣墩，坐定国；语次欷歔。定国密誓：必诛可望以效命；背出所镌「尽忠报国」四字示廷臣，咸啧啧忠臣。可望疾令白文选伺安龙，迫驾移黔；合宫恸哭，不行。文选亦为泣下，遂善报可望：『定国无他志』。已定国扶主西奔入滇，文选又奉可望檄促邀驾曲靖，不得；身与俱西。时刘文秀暨都督王尚礼、王自奇、贺九义等咸为可望守云南；文秀私出见定国，微语『吾辈以秦王为董卓；但恐诛卓之後，又有曹瞞』！定国指天为誓，乃合计，倡言迎驾本素王意，宜一力为之。

桂主入云南，定国躬为御輿主；即可望所营宫室居之，尽收其护卫。於是封定国为晋王、文秀为蜀王；艾能奇子承业为镇国将军，管延安王事；文选为巩国公、尚礼为保国公、九义为保康侯。文安侯吉翔入阁办事。钱粮归所司；兵马事悉付定国主之，更定各隘居守。可望以妻子在云南，隐忍未发。主遣文选往黔招之，不至；随令东昌侯张虎送可望妻子赴黔。可望无内顾，遂大言定国、文秀谋反，追文选巩国公敕印，决意攻滇。列侯马宝、马惟兴等为文选曲解，受封云南非其意，不如重用之，必感恩勿二。可望信之，擅封文选为征逆招讨郡王，总统兵马，名清君侧；令双鲤守黔，而亲押阵次交水。文选不战，走归定国；定国请进封文选巩昌王，遣内阁马吉翔视师。丁酉九月，定国、文秀师至三岔，距交水二十里。可望以总统中变，拟还黔；马惟兴语可望：『公自将当定国，而惟兴与宝及汉川侯张胜由寻甸间道袭云南，可得志』。已大战交水，惟兴内应，可望兵溃，遁还黔。

时秦王所部率梟健，定国涕泣语之：『明造颠越，实自吾家。至此犹不悔，天必尽殒之矣』！则可望所遣马宝亦降，众尽贴。独张胜孤军突云南不备，保国尚礼思开门入之；为黔国沐天波所觉，不得发。定国以胜兵还救，掳胜，□□□□□；尚礼饮鸩死。主封冯双鲤庆阳王、马进忠汉阳王，马惟兴、马善、贺九义俱进封公爵；德安侯狄三品、岐山侯王会、荆江伯张光翠以党附可望，降罚有差。

戊戌，刘文秀病卒。夔国公自奇以永昌伯关有才叛，定国率兵诛自奇於永昌。可望微通北师，以兵三千捣武冈；为部将刘甲反攻，歼殆尽。四月，可望遂同陈总兵满

十月，北师从贵阳睨滇，妖人贾自明者有幻术，定国恃以无恐；与双鲤等扼守盘江沙而白文选守七星关，咸败绩。十二月，奉主走永昌。己亥正月之二日，北师入云南。二月，主走腾越。定国先护宫眷出三宣入缅，还督兵扼磨盘山；力战，颇有摧陷。然人心已散，竟不能支；逃入孟艮、茶山各土司中，奉表请蹕者数。阁部吉翔重迁，留缅。

论曰：李晋国归命後，战功较周宁武、尤榆林等胜势十倍；复严关、殒定南、恢粤西、摧敬谨，一再难东粤，无与衡。护安龙、定内难，□□穷、地促，挟空名而偷息天外；较中湘又十倍难矣。□□定国与巩昌□文选以所部屯孟良，疏请主幸其营者数十上，至令部将祁通武以兵逆驾；而主惑阁部马吉翔之言，不果发。至辛亥，□康王以番众窥边，岂犹其遗族乎！抑北平西吴诡此以自重乎？

李来亨，为李闯从子一只虎义子。一只虎归命，改名赤心，封公爵。自中湘王何腾蛟死湘潭，赤心无所效，病卒。其妻高氏能知兵，统其众。来亨奉高命惟谨，自夔州窜郧西乱山。已复皈命滇中，称御前营；颇宠任。适孙可望挟封来款，各以旧寻仇水火；可望攻来亨败之，来亨以数百人复还西山。

辛丑，滇事尽；明年，□□□□□□□□□请以兵徇地之未版者。有命：湖广之□□
□□、陕西之师当郝、四川之师当二虎，而国英总统□□。二月，湖兵先入，以书
招来亨；傲不应。复招施州，二王者答书不恭；有曰：『当日勋阳一举，至今泪滴
九原』。自以其兄先曾战死，托於不反兵革之义。且云：『此日举动，台下独不闻
乎？诚非之德服人，而以力服，心悦则未也。不佞首阳饿夫，甘老此地』云云。国
英兵进，遇来亨於猫儿罐。内兵不利，失副将武君相等二人，兵千人陷没。提督董
学礼复益内师大战，来亨却；掳李营宋总兵，斩千余级，夺马驴二十余匹。来亨沿

途烧其芻粮，退守七连坪老营。营有土城，周二十余里；湖兵深入榆□坡，粮不继，至杀马以食，兵几溃。是时楚应天粮最苦，斗米几费五十金；乡绅被督急，致有自缢而死者。来亨据双龙观以拒，逡巡至明年三月。湖兵逼双龙，双龙插天，路不能正步，咫尺折；乱石突岬，一失足千仞之堕矣。湖兵裹膝跪而行，裹处用铁锥缀其上；靴底亦然。蚁附而登，卒达观处。来亨恃险，意北兵万不能至；至是促，弃七连左营□□阳河，退守谭家寨。□□□□合湖兵驻七连少息，□□□李诸难民，以孤来亨。延至七月，谭毅与谭弘杀其兄谭甲北款，得封毅向化侯、弘慕义侯；来亨迫，愤起，密约郝、刘二股合力出攻。大战四昼夜，各踞山顶。来亨兵先下，湖兵趋之，势压其上；来亨提健卒贯入，反压湖兵之上。上下夹击，湖兵大败，返走当阳。是役也，李总督失文武二百余员、失□民二十余万。已复益兵合击，大捷。巫山县被围，闻败耗，中震；国英督兵死仗，并破房山，擒郝、刘两股报捷，韩王本鉉不终。来亨退守原寨。冬，满师至，来亨移保茅缘山。甲辰正月，满兵仰攻未利，木石悬击，所伤极众。於是掘壑□□，断其出入。八阅月，来亨粮匱，悬二印胸前自缢，而後举火；其妻亦在焚。马■〈加上肉下〉子、党守义出降，二王亦就款。高氏□□侄守义北归，为辰常总兵力保，得免死。

论曰：李篡弑而张割据，李之罪浮於张。张之孽李定国匡勦辛丑以前、李之孽李来亨负固辛丑以後，而义皆不可没。然而来亨之功又浮於定国，何则？戊申历益算三年，谁延之（或曰来亨原名懋亨）？

——见原书「列传」卷之九（下）

· 张煌言

张煌言，字玄箸；浙江鄞县人。笃学，负至性。壬午，举於乡。

乙酉，南都败；五月，武林北款。七月，煌言从诸臣扶义，敦鲁藩监国绍兴；以庶常，权制诰。

丙戌，越败，扈蹕海上。监定西伯张名振师北出，舟覆；登陆七日，间归。己丑，监国保舟山；明年，煌言从内地扈海，超陞兵部右侍郎。护定西名振应松江回向吴胜兆，为飓风覆舟，失期。胜兆事败，煌言偕名振走山寨；无所就，复入舟山。辛卯，治兵鹿颈。八月，舟山败；煌言亦赞监国泛憩三沙；国姓驻监国於金门，善供办。壬辰，煌言以兵部尚书同定西侯名振等舟师突京口，题诗金山寺；不利，去。已复取舟山。桂主憩安龙，遥敕招讨国姓成功延平王；已又仍鲁王监国，煌言东阁大学士。甲午，舟山复败，屡从定西舟师窥吴淞、逼崇明，大风舟覆，为土人所执；以其义，纵之；复入海。时诸洋国姓驻厦门，为思明州。壁大兵，外四屯：监国驻金门、陈文达驻玉环山、阮春雷驻楚山，而煌言驻临门；会兵必至焉。

己亥五月，煌言为延平先驱，大举；突润州，指芜湖。远近感煌言之义，上印者三十七州县。七月，郑师困观音门被劫，师溃。越月，煌言苦深入，犹以万人空腹堵楚援，沉其四舰。久之，单，援绝，中弱，众散；沉舟登陆，尚三千人。转战千里，入霍山界；历崎嶇，益饥；众尽散，从二十骑，卒不满百。累搏，至单骑、从者二人。旋弃骑，改商服，匿民舍；拾遗舄易靴而窄，夜奔七十里，剪趾血殷注，疟作。得胡姓及金、徐二人，故舞戟败脱者也；为导行曲护。盖徒步计程二千余里，为时二十七日；仍驻临门（具载「北征纪略」）。

辛丑，缅甸变耗确，三上书监国，拟诏书一道，微不欲以虚名来射。壬寅，营东宁。煌言以郑远自保，必惮劳，敌忾疏；驰书劝之颇切。且曰：『普天之下，止思明一块乾净土，四海所属望、万代所瞻仰；何异桐江一丝，系汉九鼎！今使守御单弱，红夷内丐，乘虚窥伺，进退失据；生既非智、死亦非忠，亦大可惜矣！至云有明之倚重殿下，以能雪耻报仇也。区区台湾，何预神州、赤县？而暴师半载，使壮士涂肝胆於火轮、宿将摧肢体於沙磧也哉！』其辞招者三：於内南总督郎，则云：『不佞所争者，天经地义；所图者，国恤家仇；所期者，豪杰事功、圣贤学问』。於浙总督赵，则云：『行将迎楚昭於云梦，奉齐襄於莒城』。於某总镇，则云：『两间自有正气，万古自有纲常；忠臣义士，惟独行其是而已。区区此志，百折弥坚；不过确守人伦，即是深明天道』。

已而众以饥散，营茅临门之范澳。甲辰七月之二十有三日，令裨将吴国华出哨海，至陶家尖。会宁波人孙惟法者，为内师向导，伪扮行商结束，藏器仗；伺得之，国华被创投海死。弁子林者，死不言煌言处；一火者言之，为导范澳，则午夜，煌言不知也。猝持之；时一勇士叶云、二持槊及监纪罗伦（字子木）、内者冠玉五人，咸被缚。八月，素袍朱履诣武林，督抚咸高煌言义，礼待之。煌言拱手曰：『昨蒙尺一下及，赋性拘执，不知悔悟』。以手指心：『煌言止有此耳，无他言』。既又曰：『矫内制二十年，亦饶得矣！』西面倨坐，进酥茶，摇手：『煌言从不知此味』。责以满服，不夺。出就舍，绝食；卫者哀号：『愿缓须臾』。复饮食如故，吟咏谈笑如常。九月之七日就刑，五人咸从死。妻董、子祺，收镇江狱且十余年，有僧澹斋募饭之；至是，并见戮。

煌言初被拘，作「放歌」以自遣；曰：『吁嗟乎！沧海扬尘兮日月盲，神州沉陆兮陵谷崩。藐孤军之岌立兮，呼癸呼庚；余悯此子遗兮，遂息机而寝兵。方壶圆峤兮，聊税驾以埋名；岂神龙鱼服兮，罹被豫且之罾！余生则中华兮死则大明，寸丹为重兮七尺为轻。维彼文山兮亦羁縻於燕京，黄冠故乡兮非余心之所馨！欲慷慨自裁兮，既束缚而严刑；学谢公以绝食兮，奈群啄之相并。等鸿毛於一掷兮，何难谈笑而委形；忆唐臣之嚼齿兮，视鼎镬其犹冰。念先人之浅土兮，忠孝无成；繫嗣子之牢笼兮，痛宗祀之云倾。已矣夫！苟琼谢玉兮亦有时而凋零；余之浩气兮化为风霆，余之精魄兮变为日星。尚足留纲常於万祀兮，垂节义於千龄；夫何分孰为国祚兮、孰为家声？歌以言志兮，肯浮慕乎箕子之贞；若以拟夫「正气」兮，或无愧乎先

生』！复系之以诗，有曰：『国亡家破欲何之？西子湖头有我师。日月双悬于氏墓，乾坤半壁岳家祠。惭将赤手分三席，敢向丹心借一枝！他日素车东浙路，怒涛岂必尽鸱夷』。『载帜纵横二十年，岂知闰统在于阗！浙江空系严光鼎，震泽难回范蠡船！生比鸿毛犹负国，死留碧血欲支天。忠贞自是孤臣事，敢望千秋信史传』！又调「蝶恋花」一阕：『无数江山，何人断送？雨瘴烟蛮；故苑莺花、旧家燕子，一样阑珊！此身原是天顽，梦魂到处也间关。白发镜中、青萍匣里，和泪相看』。其经故里者诗曰：『苏卿仗汉节，十九岁华迁；管宁客辽阳，亦阅十九年。还朝千古事，归国一身全。余独生不辰，家国两寒烟。飘零近廿载，仰止愧前贤！岂意避秦人，翻作楚囚怜。蒙头来故里，城郭尚依然。彷彿丁令威，魂归华表巅。有面此面目，难为父老传。愚者悲我拙，智者嗤我顽；或有贤达士，谓此胜锦旋。人生七尺躯，百岁宁久延；所贵寸心丹，可喻金石坚。求仁而得仁，抑又何怨焉』！临难之日，绝命词二；一曰：『何事孤臣竟息机，鲁戈不复挽斜晖；到来晚节凌松柏，此去清风笑蕨薇。双鬓难容五岳住，一帆仍向十洲归。叠山迟死文山早，青史他年任是非』！又作五言绝：『我年适五九，乃遇九月七；大厦已不支，成仁万事毕』。踣笔赴市。煌言虽在军中，手不释卷，多所著述。其「全集」为卜天中所手订；寻颇散佚。所着「子陵论」，宽陵以甚过乎陵者之罪；所着「张良报韩论」，辩良以着托夫良者之非。若曰果如陵而後「得当」二字为可原，必如良而後「报韩」二字为无议（二论载「外志」中）。

论曰：玄箸刻刻以扶鼎为誓，自三沙离监国，十年不通谒，欲公其身於桂以鼓郑「必往」之气，所云释疑平忌是也。自缅甸报变，为上诏书草，而又恐将扶不力；遂欲移跽，通呼吸，养晦自爱。其所望於延平者，岂不孔急哉！迨上书东宁世子，颇及「借枝」之安；此托言同仇，非果梦寐在此。使但即休，初谏止台湾，何谆谆舌敝、继之痛涕为也！事不克，就死而後已；「鞠躬」之义，千古为昭。嗟乎！东宁牖下，岂所以了张临门也哉！罗名或曰纶，木或曰穆；冠玉或曰贯玉。

——见原书「列传」之九（下）

（附）传逸

张煌言息临门之范（澳），□□督张用（奉化人）□□□□□之，卫於中军之室。既史、李两中军介胄拜上九铁，以提督命，免。时有腐儒宋者，谰言『张徒扰边耗饷，其卒为吾等忧，究何所为！何不自觅死？乃烦今日东顾仆仆』。适常镇内使李座闻之，变色语宋：『足下不知大义，莫弄舌！彼食其食、事其事，苟贪生，盍早入款』。宋犹哓哓，李大叱之：『彼欲明白死，万耳目见闻，做一顶天立地汉；岂肯轻付沟渎！若不闻前者海沸星陨，是为谁来？此去伏法西市，刀头尚有余香』。同座李怀怙（名岷源）语李：『明多忠臣，此亦其一』。李曰：『不然，明即多忠臣，未祀得此，为三百年生色。譬奕者终局，关一着；一着不□，虽败气犹壮』。嗟语出旗下，却可为煌言志铭矣。

壬子，杭张仲嘉（名文嘉）以苍水之棺暴石塔西，乃拟改殓；向松场里人曹老买地一角，而怀怙与共事。细检其骨，骨紫绦不枯；入小棺坚致。从死五骸，瓮盛之。遂有投诚海弁，共树大碑於墓前，明书某墓。既葬讫，张、李疑浅露不如以为疑塚，更迁之；於是还券曹，不取其值。曹老焚券，请埋此大碑矿中为世守，比於古人「葬衣冠」之义。僧问石者语张、李，苍水诗有「于、岳三席」之句，愿承卖主之名，向南屏觅地为一席。於是又潜合石门吕用晦（名光轮）、武林沈甸华（名兰先）共觅地於□文□□□□，三月襄事，□□□□□□地中，书「明大司马苍水张公墓」九字，碑不过尺许。左书「茂才子穆罗公」、右书「侍者贯玉、义从三人」；後书石背：「岁次癸丑辰月丁酉午时迁葬於此」：共二十八字，字略小。问石春秋斂祭之。以上共事诸子，咸废制举。问石，甲申年才十余龄耳；不经识字，已受拂，住净雷峰之下。有哭大司马一律云：『素车白马漫相迎，岂是寻常风雨情！龙自逶迤来九曜，人从何处话三生？茕弘血染丹枫叶，蜀帝魂归杜宇声。成败莫论今古事，波涛日夜吼长鲸』。附载怀怙西湖一律：『想到凄凉处，凄凉入暮烟；一湖闲日月，两岸旧山川。野马归疏树，□云栈远天。泉声钟外响，夜色黯残年』。是岁暮薄望作，为附记之。

（附）议论逸

张煌言「始终报韩论」曰：『自古称张良始终为韩，先儒论之详矣。今世仕卤庭者，多借此为口实；以建州固常驱贼，遂以沛公亡秦、子房事汉为拟。噫！何其不犹之甚也。夫子房在韩，未尝通籍也。特以五世相韩，散金结客；於时六国已无余烬矣。博浪一椎，不过抒其愤郁无聊之气；岂谓其必能碎祖龙之车也。藉令偶中，而扶苏尚在，蒙恬辈皆宿将；咸阳之火，固未可觊觎也。迨副车误击，下邳潜游，子房智勇亦几交困。然而鎬池璧返，群雄共起亡秦，子房更出而将兵略地，与沛公遇於留，以兵属焉；韩尚未有王也。迨沛公至薛，与项梁共立楚怀王；子房求得韩诸公子，而曰横阳君成贤，说梁立之，子房遂以梁司徒徇韩地。其从汉入关，怀王命也。夫亡韩者，秦也；亡秦者，楚与汉也。子房仇秦，则欲亡秦；欲亡秦，则必德亡秦者。若是乎德楚，则宜事楚；德汉，则宜事汉。何必韩公子，又何必韩司徒乎！且韩王成，不过诸公子，非真当立者；而子房卒相之，欲偕之国。嗟乎！斯其所以报韩也？且羽留赵王彭城勿遣，而韩司徒不得不徘徊以观其变。观史载汉王归国，子房送南郑辞归，劝以烧截栈道；此时虽为画策，尚未委贄也。未几，楚竟废杀韩王，子房间行归汉。於是不得不以仇秦者仇楚；既仇楚，不得不借汉以灭楚。然子房终不欲用於汉，乃择留以自谢、辟穀以自诡焉！然则楚不留韩王，子房固不为楚用；楚之不杀韩王，子房亦安肯为汉用耶！或曰：子房尝阻汉为立六国後矣；为韩者固如是耶？抑知汉王还定三秦，已无公子成矣；怀王孙信，又齷齪不足辅，使酈生计行，而汉益弱，汉弱而楚终不得灭，韩仇终不可报。子房之为汉，盖有大不得已；於是而间归。至於我朝，则大异於是』云云（下不录）。

又为李陵论。有曰：『世以李陵报苏子卿书，出自史迁之笔，盖欲掩其保举之失。

而所云欲得当以报汉者，卒无有也。余谓不然。余观其「河梁」诸什，未尝不叹风波之失所；而浏漓感慨，无一怼汉之词，是亦岂迁所伪制耶？即就陵当日之事而论之，方陵之出塞也，初非疆场不靖，而亭障不守也；武帝特欲示威於四彝，故穷黠其兵，千里而趋利。陵不过偏裨，提不满五千步卒，深入荒漠，杀伤相当，而又鲜依飞、贰师为之後劲，其势固已危矣。迨矢尽力折而後降，志亦可哀矣！夫陵之罪在不能死耳，与弃师辱国者稍有间，与事仇噬主者更有间矣。而汉连坐之不少贷，则安望陵之能为朱序哉！设令汉武闻陵之败，临轩而叹、侧席而思，为之恤其母、抚其孥；或误传陵已死事，更为招魂以祭、赐典以赠之。陵虽犬豕，当必愧悔自裁矣，敢忘汉恩德哉？夫何功罪不明，陵卒以族；无怪乎论者之谓汉少恩也。倘陵而心怀逆节、气结重诛，或教匈奴以盗边、或调华人以助虐，不特子卿故节难留雪窖，而匈奴控弦十万，直可以长驱中土，岂仅仅烽达甘泉而已哉！然陵於子卿之归国，缠绵反覆，赠之以诗，而曰：「陵之罪，上通於天，其亦可哀也已」！夫陵当汉武时，起偏裨，提孤军、出远塞，战败而降，族属辄蒙显戮；当日士大夫无一言为之辩解，惟司马迁稍稍言之，而亦下蚕室。此足见国宪之有常，而军律之不可追也。假使陵荷节钺之重，会匈奴鸱张、玉门沦陷，汉家扫境内甲兵以托陵，不幸而被围，遂倒戈解甲，屈膝伪庭，则其罪何等也！又使陵受赙恤之殊恩、冒祭贙之异数，而乘潢池弄兵，反戈相向，覆之宗社、毁之衣冠，甚至牵□以芟刈□之子孙黎民，则其罪又居何等也！由此观之，陵之罪不当末减而平反之也哉』云云（下不录）。

——以上见原书「志」卷之三十二（中）

· 郑成功（鸿逵、彩、甘辉）

郑成功，初名森，字大木。唐主赐姓，并赐今名，世呼为国姓云；福建南安石井人也。

祖绍祖，为泉州库吏；生芝龙。甫十岁，随入库，弄石子，偶隔垣飞中太守蔡继善；继善怒，索绍祖。绍祖携儿诣请罪：『儿无知，愿代儿答』！太守一见芝龙，异之；曰：『儿非凡』！并免绍祖答。

天启初，芝龙与其弟芝虎流入海岛颜振泉部中，前驱。振泉死，众无所统，立剑十米中，祷於天：『次拜剑，剑动，辄主之』。则芝龙甫投体地，剑辄跃出；於是共罗拜芝龙曰：『天所授也』！纵横海上，官兵不能制。廷议以故太守继善有恩芝龙父，量移泉州道，以书招之。芝龙果囚服诣道门，而弟芝虎耻为屈，一军譁，并撵芝龙去。

六年春，劫商民，食无赖；红里其首，为郑家军，势渐张。巡抚朱一冯遣都司洪先春率舟师击之，策应把许心素等漂失道；芝龙间走山上，诈为乡兵，出先春後。先

春腹背受敌，身数创，大败；芝龙不追。擄卢游击，不杀；复败总兵俞咨皋於中左所，纵咨皋去。中左门开，百姓哀祈不杀，芝龙严约束，善兵而去之。意无大得罪，便自归也。於是兴泉道邓良知、知府王猷使人招之，许立功自赎。会咨皋逮下狱，以其初抚杨六、杨七，不赴中左之变；於是抚议不果。崇祯元年，禁漳、泉海贩；芝龙纵掠海上，迄浙界。九月，乃就抚於巡抚都御史熊文灿。

明年，击斩其故党李魁奇自効。调粤东合剿海寇，不利还；御寇中左所，复不利。五年，海寇刘香老逼福建之小埕，击走之；官芝龙游击。时香老连犯长乐、海丰，文灿令守道洪云蒸、巡道康承祖、参将夏之木、张一杰招香老於谢道山，被执。八年，芝龙合粤兵共击香老於田尾远洋，香老胁所执洪云蒸前舟，冀止兵；云蒸向芝龙大呼：『我矢死报国，愿亟击勿失』！香老怒，杀云蒸。官兵益集，香老蹙，自焚其舟沉水死；康承祖等脱归。进芝龙参将，海气颇息。十三年，署总兵；行副总兵体统，专管潮、漳二汛。

十六年，以芝龙弟鸿逵为副总兵，镇南赣。甲申国变，福王立南京；鸿逵协力上流，御平南左良玉有功。还屯镇江。北师下，溃归。以唐王入闽，即位；封芝龙平卤侯、鸿逵定卤侯，从子彩为永胜伯，而以封疆事尽委三郑。芝龙日议出师，不果。阁臣黄道周素与芝龙不协，议辄相左；廷臣咸论奏芝龙逗遛，芝龙益阻驾自重。已鸿逵率兵北出，次婺源不进；督师道周被执死之，鸿逵弃师遁。而兵科张家玉亦监永胜彩出杉关，甫解抚州之围，辄入关自保。

时鲁王以海监国绍兴，露抗北兵。芝龙密走表於鲁；曰：『鲁，吾所归也』。鲁以是坚不臣唐自二。及丙戌越败，芝龙尽撤仙霞之守，奉款最先；而其子国姓成功断洛阳桥，阻兵拒父。成功不附鲁，以唐封延平，远从桂朔。鲁监国泛海无所归，永胜彩逆之，驻鹭门。芝龙奉北命，为作书招彩鹭门，令以鲁归，爵闽广王；彩不报。

丁亥，布衣王祁拥郧阳王破建宁；彩乘势使杨赓招王士玉等合兵复兴化府，降福宁守将章云飞。时兵科刘中藻以兵距福宁，转战下数县；彩突福州垂破，去之。鲁进彩建国公，取长乐、连江、闽清、永福诸县；久之复失。戊子，彩与大学士熊汝霖隙，伪邀汝霖饮，沉之海；又以义兴侯郑遵谦尝夺彩数番舶，又擅分其食，杀遵谦。时建宁亦失，而监国不振。己丑七月，定西伯张名振迎监国还台州之临门；彩不从，保三沙。成功自保厦门，改为思明州；持重，兵无所动。辛卯，阮进攻郑彩三沙，败之；彩率数舟走粤，众散。

壬辰，成功以兵攻漳、泉，使客刺杀北师总督陈谨；桂主驰授招讨大将军，嗣晋封延平王。癸巳，诡入书求款，以为衅非外作。内逮镇臣马进宝、道臣黄澍，议罢兵；善待芝龙，以来成功。成功作书遗其父，要漳、泉、兴、福四府；书中称子而不称臣，称朝廷无「陛下」字样，率不恭。甲午，复遣将军陈辉，协鲁富平侯名振合

窥吴淞；舟覆，不利去。成功复与其父书，勒割福建一省及沿海州县，乃罢兵，不得命；统兵攻漳、泉，逼兴、福，全闽震动。

会二王镇东粤，声震；成功阻海澄，崛强出没。已而部将黄梧乘间以海澄北降，得封海澄公，守御坚；成功并以众驻思明，传箭洋舶，各国诸税骈集，养军。时监国驻金門，兵部张煌言驻临門；又玉环山、楚山、牛头门诸处皆宿劲旅相犄角、为应援，东南护援走集者益众。

内海禁严，沿海居民，例内徙四十里，犯无赦；成功众饥。丁酉，遣降将定宁伯张洪德及马龙等骚粤，潮州知县猝弃澄海走；大残鸥汀背而去。执知县祖之麟，授兵部侍郎；已之麟间北归。戊戌，闯招宝山，大掠。

己亥，成功合兵部煌言率舟师大小八千余号、众数十万，突镇江。时张茂之总五军、煌言为前驱；掩崇明，纵守将梁化凤。时江中横铁索，架大炮其上，舟近则的而发之；又■〈?𠂔伐，上中下〉索斗大沉水三，利勾舵。成功之众尽泊严家沙；六月之一日，为坛沙上，以太牢祭告大祖高皇帝，斩衰行礼，一军皆帛。次日，祭告毅宗烈皇帝，举哀，全军陪哭，声震百里。镇江知府某某倚城遥观，亦为雪涕；左右欷歔，不能仰视。促战北关，官兵稍挫；越五日，风为揉断铁索，舟师以为神助，进泊金山。与北师约：但战满兵，不战汉兵；遇汉兵，则曰『吾一家，毋自残』！时镇将管效忠主满兵，海师先藤牌头子八，满兵冲以炮，则卧牌而待之；炮尽纵马，马阻牌，而牌的设镜，马疑镜中人，惊返走，箭及不洞牌。须臾，八头子分为二开；满师疾驰其中，空。将及中军，牌起，前两大头子合；反沮骑归。海师三人互背如一人，三面施刃；满师尽没。管将军负疮单走银山，知府遂率民兵斩辮以城降；掷帽城下，帽与堞齐。操江巡抚都御史朱，以内师自安庆顺流而下，战瓜渚，全军覆；朱被执。漕院亢，领淮兵南援，半道兵溃；亢以势解，自沉死。海师攻江南，营观音门；两岸连■〈舟宗〉不断，前锋已达九江矣。驰檄千里，楚、豫震动。军中不妄淫杀，掠一黍者死；扬州有顽者，乘乱货人於门，辄梟示。此声溺远近，千里馈粮勿後。时兵部煌言至芜湖，关使者上其税课，分稿军中，大其义；扬榷亦使人上课如芜湖，曰：『存以待用』。郡邑上印，先至者三十有七，在道者不胜数。其入谒，皆明衣制，翘冠而宽带也；各授原官，慰去。煌言开府芜湖，慈声辑众。时大将军甘辉列十三营於白土山，困城。内总督郎以浔标分守，键門不战；卫明故绅於佛寺，责饷。适滇、黔满师罗、明二将军兵返，便宜留守。时诸群邑之不即上印者，乡绅衿多诣官勒其献册；野健复挺起，竖旗遥应，不啻数千部。或城守坚，捧海檄者谈笑就刃如飴；百姓率空城逸去，以弱守者。严止之，不得也。海师战桃湾不利，将军辉曰：『水战之不可，移而陆也』。攻具不精，更为具，坐炮下；临具成，而师老矣。会满帅昂邦哈故疑梁化凤之弃崇明，欲夺其兵；化凤激。七月之晦，潜拆故所墮門，同督标中军冯副将白等出不意，夜劫辉营；营乱，仓猝战石灰山，海师败绩，失万人。兵部煌言上流孤，众散，跳；成功复入海。辉与副将余日新被执，责以招降成功；辉傲曰：『国姓父，不能夺国姓；乃仗辉哉？且辉亦安

肯降国姓也！惟速死』。日新辞稍逊，辉大声谩骂：『吾悔与日新俱』！并就戮。

成功去，复大扰闽之嵩门，内师失利；遂以书招总镇张承恩，有曰：『比者，明阿达里师从浙出，病歿过半，不战而退；达素从闽出师，水陆三路同时覆没，歼馘且尽。马既早归，李、高继至，可以为法；马惟善可以为戒』。桂敕进封潮王，不受。

辛丑，缅甸不终。壬寅，乃以曹文龙、马信谋，袭和兰国之台湾，居之。而令子经守厦门（径小名锦舍），总统五军周全斌、忠贞伯洪旭与督饷郑泰合保思明。台湾者，距漳州七程；故和兰进贡泊舟候命处。阔二千里，袤倍之；中亦有苗峒不化，多土目。芝龙素尝令服，时以炮拒守。成功间道入，益垒城堡地。气常春，所产足以为食。山多野马，差小。成功谦，率以招讨行，不敢轻用王印；而标无不藩前者。初改台湾为东都，亦称明京，以候巡狩；寻变确，复改东宁国。

成功令严，目动百万俱下。时闻其子经颇通於乳媪某昵，心恨；驰谕杀媪，则佯报命，媪东流矣。未几，媪举子，伪称经妇得之；东宁文武称贺，成功不疑。久之，或有言媪未死及举子状；成功方病，闻之怒，啗指：『吾不能令吾子，安得走人东西』！叱大将裴进思，疾取子经头。进思奉命前，请死；成功曰：『若何罪』？进思泣曰：『父子天性，某恭命後，万一藩台怒平忆子，某百死莫赎。请彼自诣麾下，面决之』！进思以二千人至厦门，忠贞旭犹牵父命当遵；进思曰：『且迟之』。未几，成功薨。病剧时，谕其弟袭舍：『辅吾少子，主东宁』！成功有子十人；经而外，有聪、明、睿、知、宽、裕、温、柔等号，皆贤。进思从洪旭以经奔丧，抵东宁；守者疑，旭脱胄示之。东宁军皆旭故部，咸走散。经入发丧，而善待其幼弟，无相左。

九月，鲁监国薨於金门。十一月，督饷郑泰有罪，见杀；其子内款。以镇将马得功攻思明，为守较周全斌所败；得功死。和兰走乞内援，合兵攻思明；思明失守，全斌北降，得封承恩伯。忠贞伯旭死之。於是北洋单，总兵陈文达等各以所部内附；而牛头门、金门诸岛之众，皆解。甲辰，阁部张煌言被执於临门之范澳，不屈死。於是东宁之职兵者，为降将郝文通。而经既立，称嗣藩；感进思初谊，特倚重。其澎湖守薛长霖，进思从子也；以义子故，为异姓云。

己酉，内遣兴化知府慕天颜加太常卿，出款东宁。五月，正、副文武二使抵澎湖。澎湖为台湾门户，相距六程；所辖三十六岛。长霖以兵部守之，为内使通款曲殷。慕所要八事，不即开诏，乃使其礼官柯平（系成功之偕父）、兵部叶亨随二使至泉州。初拟开读於演武场，以文事与武备不合，不可；又以不遣官相迎，不至。既开读於文庙，柯、叶首争：『开国东宁，非属地，剃发之制不能从。又以死内地之体未返，故降人未能即还诸；通市可商』。柯、叶先归。致书慕略曰：『盖闻天无私覆、地无私载，凡属生民之主，自宜以天下为心；使跋行喙息，咸润膏泽。顷自迁

界以来，四方流离、万里丘墟，是以不佞不弹远行，开国东宁；庶几寢兵息民，相安无事。今阁下衔命而来，前移诸事，未之详及；仅谆谆迎敕为辞。夫事必前定，而後可以无悔；言必前定，而後可以践诺。大丈夫相信以心，披胸见臆，磊磊落落；固不必游移其辞。今特遣督理行台礼官兼理刑事柯平、监军兵部郎中叶亨面商委曲。不佞恭承先绪，恪守丕基；必不弃前人之烈，以图一时之利。惟是生灵涂炭，惻然在心！倘贵朝果以安民为事，则不佞亦不难降心相从，遵事大之礼。至事定之後，巡逻兵哨自当吊回。若夫沿海地方，属在执事；抚绥防御，非不佞所敢与闻』。书称「永历二十三年」（此稿为军师陈永华所撰。书中所称「前移」，系初建宁道顾□□、字南泾者曾以南宁所请割地输课诸件，内不答；安民为事，指此也）。时东宁以款曲柯、叶未隆，颇变志。十月，慕复奉命以三事责之，切在剃发受封；竟不得达。至澎湖，为长霖所不礼；疾返。

论曰：郑芝龙无子，郑芝龙有子非其子；非其子，非其姓也。地上已无姓，问之水滨。洛阳阻兵，案以「卫辄拒父」之律，当作何解？君父大小，必有说也。相传鲁监国遗腹子，为长杨王术□奉养东宁。夫遗腹，是姓而未以为姓也。□□称「永历二十三年」，而鲁遗乎？

——见原书「列传」卷之九（下）

（附）传逸

郑芝龙，以兵为唐守仙霞一带诸要害。其亲家黄徽胤已北归，密书招之；芝龙欲归功徽胤，因而自媒，遂尽撤诸守。及北师大入，徽胤不在军，不敢轻身遽款；以其众遁海外。有郑瑄者，素与芝龙通谱；入海招之，咬□以誓，拟封平国公，世奇呢哈哈番。卒其子成功拒父，乃但以□□□□。

——见原书「志」卷之三十二（中）

罪惟录选辑三

罪惟录选辑三

传（二）

致命诸臣列传

谏议诸臣列传

清介诸臣列传

文史诸臣列传

武略诸臣列传

播匿诸臣列传

庸误诸臣列传

叛逆列传

列朝诸臣逸传

外藩列传

外国列传

· 致命诸臣列传 ·

朱大典（吴邦璿）

刘宗周（王毓蓐）

祁彪佳（郭符甲）

徐石麒（子尔穀、穀妻孙氏、陆清原、屠象美、鍾鼎臣、孙元阳、王鯤、张翊、常三益、高孟超、子昌齡）

刘中藻（子思诚、汤云章、云章子芬）

郑遵谦（叔之瀚、陆芳侯、阮日生）

熊汝霖、路振飞

张名振（母李氏、兄名甲、名扬、家口五十余人、顾明楫）

黄道周（叶廷秀、赵渊卿、赖敬孺、蔡时培、毛玄水）

· 朱大典（吴邦璿）

朱大典，字延之，号未孩；浙江金华人。万历丙辰进士；知章丘最，擢兵科给事中。

天启初，关外警报日闻，东徼连结、黔蜀继叛，海内骚然；而天子逸游，政在群竖。大典忧之，首论覃恩加内侍荫袭非制；又劾总督张我绩逗挠，贵抚王三善顿兵不救，辽左功罪宜明，山左召乱、平乱之实当核；凡理财、用人、练兵、治盗，章无虑数十上。魏逆时，中立不阿。出为福建副使，协力靖海。备兵天津，崇祯二年东师大入，挽输勿失。四年登、莱之变，擢大典右佥都御史，巡抚登、莱；以胡骑突之，敌却，逡巡海去。捷闻，论功进副都。

明年，加兵部右侍郎总督漕运，巡抚凤阳。贼飘忽□□入境。九年，贼自河南直下，凤阳告急，守备严；与诸师协追贼桐城，斩首千计，杀贼酋混世王、坐山虎等；贼大困，遁入楚。十四年，加敕督剿，专办老回回、猷忠等五贼。贼益破城邑，坐无功，落职为民。许都之变，以家丁佐长吏城守。

甲申，自成开关东下；且部署勤王，而北都陷。已而拜表南都，愿率所部讨贼；起兵部尚书，协理京营戎政。未及之任，南都复败；大典归里，募兵城守金华。金华负岩僻，俗好竞、善战；大典以沈兰为中军，推恩信，备严。乙酉，杭州不守，潞王迎降；总兵方国安以马士英东渡，窜金华。大典恶士英，闭门不纳；国安攻之，不得入。会义兴兵起，北御钱塘；国安移屯东，与义兴协。

大典初受唐命，鲁晋东阁大学士兼兵部尚书；而唐晋大典亦如鲁衔，大典两受之。唐主拟视师驻蹕金华，已不果。是时江上鲁文武，皆因大典受两衔，咸奉表闽中，谓『唐、鲁合，可以为名；方、朱合，而兵无敌矣』！久之，鲁不开唐诏；大典但巩金华。中军沈兰竟以微故见戮；兰临刑，大呼『杀兰，吾见朱公不能终老金华也』！

丙戌，绍兴□，大典尚关门谢使，必全有闽而後举城降。力竭城破，大典纵火自焚；其家人尽，而身跃入火死。

吴邦璿，山阴人；大司马兑孙也。以都督同知，代沈兰为中军。裹身出战，败还；令其妻傅自经死，而身诣城隍庙四拜自刭。——见原书「列传」之十二（下）

· 刘宗周（王毓著）

刘宗周，字启东，号念台；浙江山阴人，登万历辛丑进士。务心性之学，由主敬入。初以行人归养。辛亥，补原官；甲寅，乞假回籍。转礼部主事，疏请修明正学。

天启元年，言官朱钦相、倪思辉、王心一疏论客、魏，被谴。宗周抗疏曰：『古者，公卿士大夫有罪，下廷臣议之；不闻以禁中决也。此中旨者，陛下方以快一时喜怒；而左右窃之，视法家、弼士如仇讎。或降斜封之官、或兴钩党之狱，生杀予夺惟所自出；国家之大命随之矣！』疏入，几致廷杖；阁救获免。以光禄寺丞，历尚宝太仆卿贰；病归。四年，即家起通政使；未赴，而吏部尚书赵南星等一时见逐，宗周疏辞志感。上以其矫情厌世，削职为民；仍追夺诰命。

崇祯改元，复官；起顺天府尹。上疏言：『皇上程效太急，不免见小利而速近功；且毋狃辽事为不足图』。因极言加赋之害。己巳，京师被围；请罢九门税、严保甲之令，人心稍安。既又言：『陛下宜日御便殿，延见群臣相对如家人父子；以票拟归阁臣、以庶政归部院、以献可替否予言官，而一人主持於上。今以不信文臣之故，视武健如骄子，又益以内臣总提、协之命；自古未有宦官典兵而不误国者』。又劾张凤翼、马世龙罪状。三年，以疾在告；复上言除诏狱、蠲新饷。上方忧旱斋居，责其不修实职，徒事敷陈；病免。

八年，召升工部右侍郎。上「时艰」一疏，有曰：『臣惟治术纪尚刑名，政体归之丛脞，天下事有不觉日底於坏者。自厂卫司讥访，而告奸之风炽；自诏狱及士绅，而堂帘之等彝；自人人救过不暇，而欺罔之习转甚；事事仰承独断，而谄佞之风日长；自三尺法不伸於司寇，而犯者众；自诏旨杂治五刑，岁躬断狱以数千计，而好生之德意泯；自刀笔治丝纶，而王言褻；自诛求及琐屑，而政体伤；自参罚在钱粮，而官愈贪、吏愈横、贼愈逋；自敲朴日繁，而民生瘁；自严刑与重斂交困於下，而盗贼蜂起；自总理任，而臣下之功能薄；自监纪遣，而封疆之责任轻；自督、抚无权，而将日懦；自武弁废法，而兵日骄；自将懦兵骄，而朝廷之威令并穷於督、抚；自朝廷勒限尽贼，而行间日杀良报级以幸无罪。总之，求治愈殷，纷更四出；致市井杂流咸得操其讹说，投间抵隙以希进用。凡此者，在皇上不过始於一念之矫枉；而积渐之势，酿为厉阶，遂几於莫可收拾！』因及文震孟、陈子壮不宜遽弃，陈启新不宜骤进。上曰：『宗周素有清名，亦多说论；但不宜如小臣归过朝廷，以为名高』。会马价告匮，辅臣温体仁等请议捐助。宗周以为市心不可自上启之，忤

旨切责；疾归。行次天津，而东师大入。宗周复自交河上疏，归罪体仁；以为『己巳之变，坐误国者，袁崇焕一人。及竞起而修门户之怨，驯至人人解体、事事规卸；文法日繁，欺罔转甚。今日之祸，实己巳以来酿成之也』。且以『张凤翼之溺职中枢也，而与之专征；何以服王洽之死？以丁魁楚等之失事於边也，而与之戴罪；何以服刘策之死？诸镇巡勤王，争先入卫者几何人？而不闻以逗遛蒙诘责；何以报耿如杞之死？而今也，幸以二州、八县生灵结一饱扬之局，则廷臣之累累若若可幸无罪者；又何以谢韩矿、张凤翼、李邦华诸臣？今天下即称乏才，亦何至尽出一、二中官下；而乃者三协有遣，通、津、临、德复有遣，益又重其体统，等之总督；将置总督於何地？总督无权，将置抚按於何地？是益以封疆为尝试也。自古有用小人之君子，而终无党比中官之君子。呜呼！八年之间，谁秉国成，而至於此？臣不能为首揆体仁解矣』！削职为民。

十四年，起家吏部左侍郎。陈圣学三篇，上颇褒纳。明年，升都察院左都御史。上六事：建道揆、贞守法、崇治体、清大奸、惩官邪、饬吏治；并请复首善书院及社学、罢厂卫、会大计，发中书王育、员外孙顺贿赂事，风纪肃然。时行人司副熊开元、礼科给事中姜采面讦首辅延儒，坐下狱；宗周方召对，具言两臣无罪，语激直，谴归。御史金光辰复讼宗周，并得罪；举人祝渊未尝与宗周素，又上书讼之，下狱，讯主使。

甲申国变，倡义勤王，不果。福藩立南都，以原官起用。辞新命，称草莽孤臣；大率以讨贼复仇、决策新征为第一义：以为江左非偏安之业，宜驻师中都，以图进取；且不宜多设督臣，以滋牵制之弊。至於慎爵赏以肃军情、分别定罪以立臣纪，尤为惓惓。又请一切大小铨除，仍暂称「行在」，少存臣子「负罪引愆」之诚。书上，不省。於是，发前事；复具疏曰：『自贼兵入秦逾晋，京师坐困，南中曾不闻一人一骑北进为声援迫坐视君父之危亡而不救：则封疆诸臣之坐诛者一。既而大行之凶闻确矣，敷天痛愤，诸臣宜决一战以贻前愆；而乃争言固圉之策，首图定策之功。安坐地方，不移一步：则封疆诸臣之坐诛者又一。迨新朝既立之後，臣谓第一义必先遣师北伐，哭九庙之灵，奉安梓宫，兼访诸王子的耗，苟效包胥之义。而诸臣计不出此，则举朝谋国不忠之坐诛者又一。而更有难为解者，哀诏何等大典，而濡滞日久，倘稽至明年半载而不计。是先帝终无服於天下也，今日典礼诸臣之坐诛者又一。至罪废诸臣量从昭雪，自应援先帝遗诏及之；即先帝诛璫铁案，而前後诏书蒙混，势必彪虎之类，尽从平反而後已。先皇帝一十七载之忧勤，念念可以对皇天而泣后土；一旦身殉社稷，罹古今未有之惨，而食报於臣工如此之薄！又何怪从逆诸臣累累若若，朝君臣而暮寇讎乎』？

时阁臣马士英怙权招贿，导诱淫佚，漕内失望；宗周乃进「阴阳消长」一疏。略曰：『枢辅马士英借知兵之名，则逆案可以燃灰；宽反正之路，则逃官可以汲引。两家宾客，互相讯、亦互相挟，而其相与汇征而进者，正未有已也。中朝之党论方兴，何暇图河北之贼！尤可虑者，京营一旅，自祖宗以来皆勳臣为政、枢贰佐之，而

不意又有卢九德之命；所称居重驭轻之谓何？总之，中外盗贼，皆从小人气数感召而至；而小人与宦官，又往往为表里』。书奏，士英乃益恨宗周，杜门乞休；反疏宗周不臣之罪，仍讽镇臣刘泽清直纠宗周。於是宗周复上疏，有曰：『士英既坐中书之堂、复筦枢务之重，三月以来，何事不办。而进无恢复之图，退鲜画江之计；日复一日，败局难收。士英将何以报前恩，无负皇上哉』（疏中有「韩如愈非命」一语。如愈，扬州人，辛未进士，历兵垣。泽清尝遣人刺垣中事，如愈发之。甲申奉命督饷，泽清遣麾下杨国柱半道伺杀之）！宗周病归。

南都复败，宗周闻而不食者数日。已欲有所为，独其门人王毓蓍从舆之，余无应者。武林不守，士大夫皆参谒北师，奉书招之；作答以自誓，遂不食。绝命词曰：『迟此数日死，稍存匡济意。决此一日死，了吾平生事。慷慨与从容，何难复何易』！又曰：『子职未修、君恩未报，当死而死，死有余悼』！家人或以参物入汤水，越两句未果。毓蓍乃遗宗周书先引决；宗周後疏蓍十五日，为闰月之八日云。

十一日，诸生郑遵谦兵起。或曰「宗周迟数日」云云，当在此也；重惜之。监国中，赠吏部尚书，加赠太傅，谥「忠端」。隆武中，谥「忠正」。其论学曰：『学为人而已，必证其所以为人』。作纪过格，以相纠考。立小学，日生徒会讲其中。尝与高忠宪往返论辩，忠宪引为畏友。祁彪佳曰：『先生奏疏出，可废古今名谏矣』。

论曰：念台之学，其济於用，不知何如？然其立言，则恳恳切事机。历官四十五年，一鸣辄斥，席不煖东邸；顾语语触帝隐，於大人格心之义，或更有别解。祁虎子曰：『使人主敬且信，干理自大』；所以进念台者更深。帝曰：『宗周不宜如小臣归过朝廷为名高』。然则异出之帝之俯就教，或更有殊合也；而惜其以气行之。虽然，东南道席，力砥江河，後此诸烈，一人奋之！虎子死似禅，念台以儒而易箒者矣；无负所学，其殆学为人、不学为非人者哉！

——见原书「列传」卷之十二（下）

（附）传逸

刘宗周为东林护持力，□持功过，格芝□或不然之。刘有札云：『宗周为疆场起见，痛恨熊贼（廷弼），并嫉君子之左袒。然诸君子之见，故自远；事已如此，不得不固元气。周黄门谓才尚可用，魏黄门又谓熊非门户中人、乃局中人也，得之矣！徐大化论熊，字字实录；诸君子亦举以为笑柄。不知诸君子何故仇李三才而昵熊？总之，从名相起见乎！熊犯举动，近阅楚人公揭，方知有此说话。弟意贯城内外，虽未能蓄数千人奸细；而全楚之锋，公行党变，胜数千奸细羽翼矣。□□□党楚人者，不一而足乎！熊犯杀贼则不足，而走险之鹿，急於自救；弑父与君则有余，真不可不虑也！恨养成其恶者，皆吾党耳』（出驻晴阁吴大雍磐刻本）。论者曰：黄

石斋性好坚执、刘念台理近於肤，总不解「时宜」二字。「时宜」从格物渐致之，认格物不清而以言道，诬道也；於外熊、拒熊，益信之。两贤厄处，不可不辨。

——见原书「志」之三十二（中）

· 祁彪佳（郭符甲）

祁彪佳，字幼文，号世培，一字虎子；得姓於晋大夫祁奚。世居汴，随宋南渡，徙浙东越。入明，居梅里者，六传为司员，名御史；改守池州。再传清，为彪佳曾祖；以进士历官名谏，至方伯。又再传承■〈火美〉，字夷度。以进士历大参，祀名宦五，着书牧津以善初仕；彪佳父也。彪佳在娠，母梦老僧趺化盆中，掬水浴之，肌理如雪；乃举彪佳。

年十七，以童子应试，登万历戊子乡荐。天启壬戌，成进士；授兴化府推官，为治明敏。甲子分闈，得五经颜茂猷及郭符甲等。外艰，讲学庐居；主於有体及用。

崇祯壬申，擢御史；多所建明。先是，黔中功，以一级未明，三年不赏，东省六县陷贼而不报，遂有「赏罚激劝」一疏。且以法令繁密，百职委废，复上书；略曰：『还来六卿九列之长，诘责时闻、引罪日见，急遽周章，救过不暇；即未尽蒙饰以解罪，亦或巧脱卸以洁身。更恐当事诸臣忧於严旨，尽以迎合揣摩，曲保名位；则未得振厉之效，反滋苟且之图：臣所虑於大臣者此也。诸司百执事过误相仍，自武闱数案以来，或至沉隐山林，惊心曹宁；本多畏事，反托名高。夫人才有限，中下半参，总藉朝廷牵縻以爵禄、鼓舞於功名；非此则无术以出彼智力。且臣子精神、才具必稍有余地，而後可以展布；若复迫於功令，必至左右支吾：臣所虑於群臣者此也。皇上深惩情竄，特遣内臣分任；然抚按之事，多令监事会同。则恐同罪同功，反使互蒙互蔽。交结之渐，其防宜早；即如叙功保能，荐及督、抚、藩、臬，事虽为公，迹亦当避。近日京营操练，复遣七人；骤列多员，参分阃令。窃恐行间诸弁，自好者不免因之卸责、不肖者遂至借以营身：臣所虑於内臣者此也』。时疆圉多故，覆军、促国先後见告；上欲讳之，至於禁抄传而奖密揭。彪佳复上书曰：『当此四郊多垒，人切同仇。自抄传禁，而瞋同射覆、隔若面墙；欲借箸而苦时情之未悉、欲请纓而惮遥揣之未真。即枢筦堂司，果足以了天下之事乎？适来盗贼纵横，人喜语乱。自抄传禁，而讹言四起，纷呶百端；贼未来误以为来、兵未败误以为败，流徙缘之载道、草泽亦且生心。鹤唳风声，徒张贼势；狐疑狼顾，自隳军容。甚则封疆任重，欺弊易生。自抄传禁，而专阃之驰奏，俱不得扬言於在廷；言路之纠弹，遂不敢凭臆於局外。败形胜着，总属渺茫；我策贼情，随其粧点。倘有鄙臣猾帅，或掩败以为功、或饰小以为大，谁与逆折其萌芽、直发其隐覆乎』？因及召对一事，以为宜复古更日直宿记言、记动之官，并令科道等官因事纠正，有若古之中书议事、谏官随之之体。不果行。

癸酉，会上修省文华殿；条民隐十四条及带徵、预徵之害。上览之惻然。代巡苏、松等处，凡疏滞狱，活七百七十余，人，注销五百余词；革过胥役一千二百余名，皂役数倍之。以俸益长洲役田一千八百亩，凡节孝共三百七十六人。上考，忤首辅延儒，中旨屡驳。

乙亥，谢病归。适都御史刘宗周赴召，问致君之道？彪佳曰：『使人主敬且信，干理自大；不在一、二事力争』。宗周韪之。筑别墅於寓山，颜其堂曰「四负」以自励。

壬午，服阙，奉命起视首篆，掌计典。时东师深入，所在残创；间关入都，作誓以警贪风。明年癸未，计臣多以道梗不至，典不行；乃请责成九卿、台省，先举大贤、大不肖见其端。三月，召对文华殿；条剿御诸策，称旨。乃举计典，与掌科吴麟徵共事；一时号清肃。故事：台员升转，必由台长掌道牒送。时选司吴昌时以意推用，彪佳连疏争执掌；上颇疑昌时，彪佳因尽发其事。上临轩即讯，付昌时於市。改彪佳南刷卷御史；乞休，不许。

甲申三月，赴南畿。闻变，或劝引病归；彪佳曰：『正须彪佳时矣』。随诸大臣魏国公弘基以下，恸哭奉先殿，告立君复仇之意。时福王序当立，凤阳总督马士英檄至，协议迎王。召对内备府，彪佳独正色谓：『法纪为立国之本，人心为致治之本；急宜颁大赉以固人心，涣大号以明法纪』。侃侃数百言。王唯唯。时议仿宋高宗权称兵马大元帅；彪佳曰：『本朝典故可稽，监国善』。方上监国玺，而忽有「即正大位」之议；彪佳与诚意伯孔昭等争之，不得。王於十五日登极，彪佳言三事於阁臣：『一、先帝谥号宜崇美；一、选妃须圣母迎至之後；一、臣子丁非常之变，不宜逾格陞迁』。因自请以旧衔安抚三吴，疏荐直节熊汝霖等。既以新政刑罚未平，疏弊政三事：曰诏狱、曰缉事、曰廷杖：『洪武中，锦衣以不法凌虐为能；二十年，乃令焚其刑具，以所系囚送刑部审决：是祖制原无诏狱也。後乃以武健或内臣之亲属任其事，深文诬抵，求称上指。有举朝尽知其枉，而法司无肯雪其冤；酷惨等於来周，平反从无徐杜：此诏狱之大弊也。且锦衣卫初名护銮司，端直侍卫等事，未尝有所谓缉事也。自东、西厂设，始有告密之端，行金而买事件。虽勇若孟賁、廉如公绰，一经煅炼，面目已非；匿名指罪，冒籍上书，狱词屡易，买讲百端：此缉事之大弊也。自刑章不归司败，夏楚烦及至尊。本无可杀之罪，反覆必死之刑；血渍玉阶、肉飞金陛，国体云何？此廷杖之大弊也』。

寻以定策勲，陞大理寺丞，转苏松督抚之任。旱魃，彪佳愿殛其二子以祷，吴人为之陨涕。设二笥门之左右，直言箴我投左、利弊投右，为次第兴除。时刘宗周发马士英之奸最烈，士英谓彪佳亦与闻之；噤御史张孙振劾彪佳沮登极，有二心。先是，吴甡尝纠孙振，而彪佳荐之。又太学生顾杲常为文詈阮大铖，而彪佳复入杲礼贤馆，益忤邪党。谢病归。

抵越，不至家，拨舟访山人祝季超於云门山舍。乙酉，预治櫟。五月，南都不守；或曰：『黄冠台、荡间，当不见非』。彪佳曰：『迹偷生，勿为也』！六月，太后诣杭，潞王监国；方拟彪佳为少司马、理戎政，而北师奄至，监国款去。刘宗周欲奉惠王入闽，图兴复；过彪佳商之。风传惠王具表迎降，且止。越蒙聘四臣，彪佳与宗周预焉；并作书拒使者。闰月之四日，闻越绅渡江请命，急归寓山；顾其子曰：『而翁无他失德，唯耽泉石、多营构；亦吾过。昔文信临难，贻书其弟，嘱以文山为寺；吾亦捐此堂栖禅侣，以忏吾过』。晚命具酌，神色愈恬，纵谈古忠烈、艰贞等事。移坐瓶隐，诫左右去。独呼山人季超，手热泉一再进。出望南山，笑曰：『山川人物，皆属幻影；山川不改，人物忽一世矣』！时二鼓，趺坐榻中，瞑目如入定法。良久开目，顾山人曰：『公谓死若何？如此是矣』。徐视山人就卧，复至瓶隐，别父夷度行祠。山人梦警启户声，急起迹之，见梅花阁水中石梯，露帙角数寸，则彪佳跣趺如初入定时矣。遗书曰：『臣子大义，自应一死。十五年前後，皆不失为赵氏忠臣。深心达识者，或不在沟壑自经；若余碌碌小儒，惟知守节而已』。遗诗一章曰：『运会厄阳九，君迁国破碎；我生胡不辰，聘书乃迫至！委贄为人臣，之死谊无二。光复或有时，图功审时势；图功何其难，殉节何其易！我为其易者，聊尽洁身志。含笑入九泉，浩气留天地』。彪佳拙书法，时点画愈工。年四十有四。盖母夫人初趺化之梦，至此验矣。

後数日，浙东兵起，鲁王监国；赠少保兼太子太保、兵部尚书，谥「忠敏」。唐王立闽，为祁、刘两公位而哭之；加彪佳少傅兼太子太傅，改谥「忠毅」，葬亭山之阳。而彪佳所取士郭符甲，号介庵；癸未进士。亦举兵死其乡。

论曰：虎子经济似过念台，知古「陈而不谏」之义矣！其论南都曰：『中兴之辟，非继体守文可办』。或以其不忘故党；然为社稷计，亦正宜以众正之所不党者，公也、非私也。当虎子致命时，只如入定法。嗟「无二」之谊不坚，求死不能得。夫子「朝闻夕死」之语，是为「死」字出相；「未能事人」一语，是为「死」字下注脚。「山川幻影」，莫算是禅家示寂套语！

——见原书「列传」卷之十二（下）

·徐石麒（子尔穀、穀妻孙氏、陆清原、屠象美、鍾鼎臣、孙元阳、王鯤、张翊、常三益、高孟超、子昌龄）

徐石麒，字宝摩，号休公；浙江嘉兴人。幼负逸才，文峻洁，依於理。友有投武闾者，预乞石麒拟作，石麒率应之；果以是隼武榜第一。事闻，诏就御史覆试；连石麒，县购急。有客奇石麒才，愿以身代收，纵石麒亡去。依嘉善布衣徐弦吾，弦吾使其子存仁父事之。则更今名，以青浦诸生登戊午贤书矣；而前客事亦解。

天启壬戌成进士，授工部主事。时御史黄尊素忤璫魏，石麒为曲视其狱。魏闻而恨

之，诬以受博平、新城两侯家赂，夺官归。崇祯初，历南计吏，与尚书郑三俊、都御史范景文咸廉执，南曹一清。

久迁应天府丞。时三俊以刑部尚书献决忤旨，下狱。石麒应诏直言，有云：『狱贵平允，陛下以轻拟之故，深督三俊，将来必有以锻炼钩棘、承望风旨者哉』！三俊得释。历刑部右侍郎。上益务明察，石麒与同官惠世扬多所平反。上诘其故纵，夺世扬官而镌石麒二级。东事棘，晋尚书；痛哭言可忧者三，留中。会给事中姜埰、行人司副熊开元坐讐辅臣宜兴下狱，而都御史刘宗周以论救埰等忤旨，事不测。石麒为讼宗周，有云：『凡雷怒於上，人未有不屏息思过者；父母怒於堂，孝子未有不叩头乞哀者。二臣无端臆逞，至激圣听，正臣子屏息思过、叩首乞哀时也。且宗周之进退屡矣，他人去国，率由人言，而宗周独否；他人起用，事由廷推，宗周亦否。臣常与之并讯大狱、并会大议，见其对明旨必却坐拱立；入於朝，即处暗室，不敢南向：皆前此未有。盖不以面从为敬，以一举趾、一动念不忘君父之为敬也。积数十年愚夫愚妇信之、学士大夫畏之，臣度尽其功用，必能蒸变凡俗、易移顽倍。皇上而欲求变通趋时之臣，举朝不乏；即否，舍宗周无与归矣！皇上视宗周之精力，於往者何如哉？及今用之，犹可收其後效。自今以往，耄矣已矣！朝端之上，欲再见此正襟危度、岩岩冷冷之老人，不可得矣！臣所以回环感结，而不得不窃有请也』。上怒未解。石麒病归，适不与甲申之难。

先是，京师危迫，塘报绝。南尚书史可法方移檄江南，责捐助勤王；石麒以书答之，略曰：『真定失守，督、抚俱亡，虽黄巢逆魄终擒，而洛阳危形已见。汾阳之弘奖唐室、忠定之誓死平江，知非明公莫办此矣。愿念此何时也，辟莽树粟，以慰朝饥；采金铸监，以理晨梳：诟曰非计，虞已後时？当济河焚舟之日，而为沿门持钵之计，窃恐迂回而无补於事也！任天下之事，有经有权；近闻百万艘漕暂顿淮上，则数万行粮可借为用。又嘉定十万漕折，解挽靡从，尚悬县帑；此明公今日传檄，而明日即可致戏下者也。又五府白粮，鳞次待发、未敢徵进；其数万水脚徵在各邑；亦明公可与各抚计议，暂那为饷者也。以国家之物供国家之用，题目甚正，取办又易；愿明公熟计而审行之』！可法不能用。自是，南师迄无一仗及北者。越日，北信益急，石麒意且南狩；复移可法书曰：『留都今日，视畴昔太平之时更重。明公参赞重臣，理难轻动。纠饷选师，托副枢以行；而明公则收拾淮左淮右、江左江右，以待後命。不然，如负重担，脱□两俱脱矣，可不念哉？天下事尚可为，亦惟一、两月内。布置一局面、设立一规模，使人晓然知有必固之形，则人心定而百事可为矣』。事不果。

五月，福王立南都，召拜吏部尚书。或有以私人见托，石麒为愕然；立疏：『国家无阉宦关说铨部之例』。时刘宗周为御史清坚，石麒引同心，务激扬为己任。已辅臣士英曲庇其党御史黄耳鼎，石麟力持之；遂乞归，不许。耳鼎因追讐石麒前坐陈新甲主款之非；石麒曰：『新甲坐陷新藩七，恭皇帝非其一乎』？病去。

乙酉，南都复失守，石麒潜处乡水月庵观变。北师下武林，书招石麒；石麒不起。谢曰：『麒本东海婢鱼、艺园滞蠹，赖遇先朝，僭跻九命，扬历非不深矣；宫灰社屋，亡国老臣何所逃死！乃不即赐斧钺，过采舆论，特遣信使懋责琬琰；顾石麒幼素尪羸、长多肺咳，年当迟暮，益复支离，至今痿痹不起，匪朝伊夕。伏读宣示有曰：「要使新进观摹，必借老成硕德」。麒愚不知钧谕所谓观摹者，将使之如山如狱，为砥砺名节之徒乎？抑使之如脂如韦，为窃禄养交之辈乎？窃谓首阳有伯夷，而成周之俗劝於义；桐江有严陵，而东汉之俗明於道。「传」所谓「顽廉懦立，系汉九鼎」，岂其诬乎！盖所志在此、所风在彼，故观摩远焉。此日果容一皤皤老人卧病泉石之间，未必於风教无小补也。若必欲乐爱鵬以钟鼓、强枋得以就道，则石麒塚中枯骨、就木余魂，相距黄泉不能以咫；何敢以一刻之躯，伤千秋之义乎！使命再至，即有索石麒於枯鱼之肆矣』。

潞王既以杭州徇故总兵陈洪范之间，北降。於是总兵陈梧奉北牒督饷於禾，众绅晋谒贺佐命功；梧微辞，勉兴大义，颇及江东坚守状。时词臣屠象美已手版走谒会城北来主兵者不见录，负渐归；遂假大义，依梧以起事。闰六月，剃发令下，诸生王鯤、张翊等数百人声劝象美主盟；遂伪为监国潞王血诏，开读精严寺。一时奋臂入籍数万余人，杀新令秀水县胡之臣及嘉兴县吴佩；寻所属各击杀其长令为声援，壁城下者数十部，而原御史陆清原部最劲。三吴咸奋，千里揭竿，穷乡、寒谷裹手执刺，竖儿、羸老杂伍拳旗。道路搜奸，稍不识面，辄膏白刃。盖各自以为义，不相为统；气轻才露，总以寻仇为事。一人倡言，此不祥，或为敌间；则竞从此声奔之，万槩俱下，须臾靡烂矣；而公战未习也。既而象美或潜款北师事露，义师群起执之；遂见杀。北师已驻西郊，未即薄城下；梧亲帅义师御之西门外，小捷，气少振。知府鍾鼎臣、同知朱沔前已北降，素得民，众推原任用事；迎故平湖知县庞霖、嘉善知县詹申，复前署。时诸壁以食尽，稍稍引去；梧又不能令其众，众益解。七月之十有五日，复战於西濠，不利；北师遂临城，攻益急，诸绅皆縋城遁。石麒闻之，喟然叹曰：『我今当入城死，宁敢与俗同』！居危城中三日，不与梧军事。时溽暑，军中多梦大雪覆其城；夜闻空中剑戟声，高呼敌至。二十六日，城崩；盖嘉兴一郡为明守四十余日。百姓从东门逃，鼎臣、沔及都司孙元阳皆及难。鼎臣字彝公，广东新会人；甲戌进士。将之任，所知以乱止之；曰：『吾不赴任，赴难也』。时协守西门，归自缢鼓楼之下。门役一及皂快二，从死。沔系宗室换授，亦自尽。元阳以都司从起义，有劳；被执，狱死。

先是，石麒在乡，义师周宗彝乞援，不应；曰：『以吾身严一集小矣，宁死城』。至是城且破，或又劝石麒且从众出，石麒必不可；手弄软带，意萧然也。须臾，城中走空，独三仆与二童子俱。石麒南北拜者四，谒家庙已，引缢尽；仆祖敏、李谨从死。有僧甲，持石麒屍顿木柜中，为书识之。王鯤，字鳞伯。性慷慨，好任事。投井死。张翊，字叔庵。端坐室中，见杀。又医生常三益，字星海。遇北军，口不恭而死。而高孟超者，字公远；及其子昌龄，後皆以抗制不剃发，被难家十一人。独陈梧脱走绍兴，从鲁监国；复将兵掠饷，为乱民所杀。清原後入闽，以唐饷饷鲁

师臣；方营争之，清原被贼死。

石麒无子，感弦吾之义，以其子存仁为子，更名尔穀，字似之。七月，尔穀潜计出父屍更殓；盖已历暑二旬余矣，僵不腐如生，观者叹息。鲁监国追谥「忠襄」，夏允彝为传其事（允彝寻亦殉义。自有传）。丙戌，吴易复起太湖，尔穀常与谋。易有缓急，每亡匿尔穀後妇孙氏之家。及事败，连孙氏。而时有毛和尚者，素与尔穀善；先期纵尔穀，尔穀得脱。丁亥四月，北师大帅吴胜兆反松江；事旋败，吏科陈子龙奴毛太发子龙通胜兆踪迹，北师求子龙急，以为尝一入尔穀座，并逮南都（子龙中道沉水死。自有传）；尔穀被繫，词气慷慨，百姓口号「忠臣出孝子」；弄假成真，以其故为徐吏部养儿也。遗妻孙书有曰：『已知必死，死後卿自决』！妻发书恸绝，引縶数四；每觉，不得绝。夜半潜启户，自沉於河。尔穀闻之，抚掌曰：『吾可以死矣』！因赴讯，不屈。九月十九日，与钱旃、夏完淳、夏发英、张宽等四十三人同尽。前毛和尚者，为曲护尔穀於难；及死，以布囊其屍归，匿尔穀之子生申。石麒族子肇桀，字拙民；负才使气，不肯出城。後石麒一日，亦死於兵。而原吏部主事陶廷烨、给事中李毓新，为不得於众见杀。发英字宝木，或与讽谕宝谟一人。

论曰：宝谟学识醇正，其所以劝道邻，诚审於事几，非阔略者比。乃所以长有樵李，则未之讲也。长有樵李，正未易讲。明知无济，必不先去，以解诸奋之心；此其权用哉！至於城破，死不後时；则早以成仁自誓矣。若幼绳非有必奋之心，合樵李之心也。陆清原合诸奋之心，而惜也死非其地！

——见原书「列传」卷之十二（下）

· 刘中藻（子思诚、汤云章、云章子芬）

刘中藻，字荐叔，号洞山；福建福安人。登崇祯庚辰进士，授行人。甲申之变，中藻无能为，匿去。或误以为从贼；中藻愤，必创为过人，白其心於天下。

乙酉，唐藩立闽中，擢中藻兵科给事中。方召对，语时故，从主前作长短言，竟至日晡；曾后亲为调羹赐之。寻奉诏下鲁监国；未谒王而先遍历诸营，腾闽谕。且曰：『闽中一人负不世之资，身历艰难、练时故，於书籍无所不历览。自奉俭；推诚，勤於政。不设宫婢，皇后侍烛每达旦。三诏皆从御草，字字血诚；请竟读此诏，有不把泪奋袂起者无之！极知鲁功，师臣暴露江上久；而王谦，而王分犹子，而王冲而文。闽之受群臣坚请，乃在七月；鲁尚未监国也。唐以叔父，事先，无两大；则鲁宜有所自处矣』。时鲁诸臣竞奔慕唐贤声，见中藻皆喜；以故中藻至鲁未三、四日，而江上数十万之师咸南向，微受命。因中藻，驰表入闽称贺。中藻乃请谒王；中书谢龙震廷诘中藻，中藻沮。会鲁得郑芝龙私表，遂曰：『叔父能大饷我师，亦协守江上，事定而後议』。明年五月，鲁事败；八月，闽事亦败。中藻走海上，

集诸师出没挺旗帜。监国保鹭门，晋中藻总制、兵部尚书；不受。

丁亥，郢西王常湖兵起，复建宁；监国以永胜伯郑彩兵困围福州。九月，中藻乘势奋复福安、罗源、宁德、政安。明年，复寿宁及浙之庆元、泰顺等县。已寿宁旋失，中藻奇兵复之。己丑，鲁拜中藻东阁大学士兼兵部尚书，坚守福宁。久之，北师反攻，围四十余日。中藻每战多克；守陴敝不起，中藻以忠义激之，犹擐甲向敌。贝勒以书招降，怒斥来使；朱批原书，示以必死。久之，粮竭，至食妇人、食老幼，人心不变。城垂陷，悬高皇帝像，冠服拜辞；危坐小几引醉，自锥其臂，服蛊尽。子思诚，投井死。福宁诸路遂不守。

初，北师中有反戈降鲁者，永胜彩以散诸部，中藻得分数百人；後疑其有间，尽杀之。彩怒，以为杀降二己，将起攻之。御史汤芬以己意私就中藻，劝且平彩；而彩兵已至，中藻疑芬为彩间，并杀之。久之，中藻卒与彩平。芬字芳侯，以癸未进士，知山阳，察去；史阁部可法以为监纪推官。南都失守，父云章，建义不成，见杀。芳走闽，以监察御史依彩。

论曰：洞山天下辩士，顾不能奋麈劝芝龙，一矢岭外。崛强海上，收数名城，往来唐、鲁之间，自处皆正合臣谊。或谓洞山之守福宁，食妇人及老幼，不解；与古睢阳同烈。然睢阳扼南下，而福宁七县滨海不得势，似不必以死争之。而不知洞山之时之心，留尺寸以还明太祖，旦暮之运未去，犹是戊申以来之日；於鲁与唐无与也。与潮俱汐，蛰龙知之。

——见原书「列传」卷之十二（下）

· 郑遵谦（叔之瀚、陆芳侯、阮日生）

郑遵谦，字履公；浙会稽诸生也。父之尹，天启乙丑进士，历山西佥事；家居。

遵谦性佻达，任拳搏，大率为人报仇；纵饮，逐鹰犬，冶游为乐也。常昵一外妇，妇金；为其家所讼。时理刑陈子龙即讯，遵谦愿自别诬服，必脱金；子龙故不脱金，遵谦竟入囹圄，共金。常以身覆金，为代楚。大言金罪不死。即死，遵谦为代死；生也，遵谦与俱生。子龙曰：『吾必异金』。事未结，而子龙已擢给事兵科。

乙酉，北师南下。闰六月，遵谦父之尹与二、三乡老奉北檄，先剃发，朝贝勒杭州。遵谦捧金并出狱，一呼其故同事无赖数百人，欲与北师会猎江上。之尹返，大惊掷杯曰：『此何事，乃欲以田父起』！遵谦不肯见其父。同事诸生周晋、王襄、郑之瀚、张玉铉等以义正之尹；且曰：『事已露，不可以休』。於是共拥遵谦出，而乡绅王绍美、王亶等咸下拜，愿从事。十一日，辄鼓其众入府署。时通判张甲已北降，权知府事，举仗出迎，一战，执杀之；复狙毙北授山阴知县彭万里於清风坊。

迎故会稽知县姚孙桀於野。时推官陈达情亦北降，加衔分守道；遵谦以其素得民，并孙桀原署。集可万人，遵谦自称正统制将军，亦札授其下裨贰分守江要害；大示三语：不渔色、不货、不中私仇。已而总兵王之仁以定海兵至，总兵方国安欲入金华不得，返走至，诸义次第集；共迎鲁王以海於台州，监国绍兴。改遵谦总兵官实受，屯小亶。遵谦悍而伎，欲以属礼俯周晋等；晋等不从，自为一较，西渡海宁，败没。朱之彪者，勇夺万夫，故叛许都上将也；都伏法，之彪遁去。至是，以故部数千人来就遵谦。甲械精好，经战知步伐；遵嫌疑之，为分其部而不闻监国，札与守备銜。之彪怏怏有後言，则缚之彪，行杀之；之彪死友三人，一请伏鎖代之彪，遵谦杀之。再请，再杀之。最後请死者曰：『杀三人，愿迟之彪死一日』。於是禁之彪，左尹请释之。君子曰：一日死三义，义不终。遵谦所部率市人，而号令栗，皆听声张；北师亦禁不即渡钱塘。初，浙西耳震郑公子如三字天语，纷起千百，各为义待之；日讹传郑公子楼櫓海上者至再三。敕印称义兴将军，海昌左尹以职方监其军。割五较属尹，兵精，颇可用，尹思疾间走浙西；而遵谦性激宕，不任秘计，喜自大，鲜抚摩其下，众不甚用命。久之，饥；与阁部田仰争粟殿上，露刃，遵谦身负创。自八月越江一仗，不甚利，乃为固圉计。监国全以恢复任总兵方国安，国安亦或荡摩敌境，多小捷；凡有期会，遵谦炮浪应而已。寻左尹别监海。唐诏下，遵谦随江上诸帅奉表於唐；唐以科臣金堡监其军，以监国不开诏，堡亦走。盖与北师相持者期年；无不以郑公子首事，明有越期年也。

丙戌，晋义兴伯。五月，方师溃桐庐。六月，遵谦以其众裹金姬东入海，奔舟山；威卤侯黄斌卿不纳，间关扈监国三沙。寻承命以义激众，众以其故义，亦起；晋伯为侯。久之，封兴国公。

遵谦一军海上孤，益饥，常宰割建国公郑彩食。彩衔之，使人杀遵谦所爱姬金；支解之，投於海。遵谦怒，思战，力不及。彩使其将杨赓故善遵谦者，间诱遵谦中流，数其罪；遵谦曰：『莫数！遵谦诚有罪：遵谦以书生持戟睨介敌，罪一。迎鲁称监国，长太祖子，西南抗会稽，罪二。崛强钱塘一苇之渡，俾闽、粤得以从容图新鼎，不当坚，罪三。奉浙八属郡为明者三百五十余日，罪四。不能枵腹而战，求一饱於将军，罪五。遵谦有五罪，安得不死』！彩曰：『将军功五，乃与吾贰。东海斗水，不足活将军』。於是进酒为遵谦寿。遵谦一饮尽，再酌祭水；曰：『少不工读书，空手搏起，以身补明运未足，列通侯，死不恨！但不膏敌刃，而为同舟所挤，不刻假；二祖、列宗，地下张目不许』！於是以布裹身首，周复五、六；长啸拱手曰：『秋风阴雨时，观遵谦踏鲸首、横槊海上哉』！屍浮至海坛，数日不去。有识其身裹者，起葬山麓。监国闻之，为泣下，不敢问；辍朝五日，为歌以祭之：『一掷负百千兮宿金姬，投笔钱塘兮涛声悲；日暮烟昏兮鲁师归，壮士东去兮，渺渺不知所之兮与扶桑期』！左右观者，呜咽为失声。赠太保，谥「武闵」。子甲，以父荫授总兵官；旋见执，与大学士方逢年等五十三人同日遇害。盖父之尹先卒，而幼子存。妻封夫人，久为金姬所妒，长斋奉佛自异，故得全。其余部较，或走山出没，扰北师者五、六年，犹仗遵谦又六月十三日之怒云。

郑之瀚，字素予；为遵谦父行。少任侠，常语所知：『昴星太明，不十年，天下大患至矣』！因习骑射。战流贼大梁，先登，斩贼帅一；以是知名。时与遵谦分较越江，深入战歿。又山阴诸生陆芳侯、会稽诸生阮日生，从遵谦战富阳，败没。盖鲁监国之得保越，自乙酉之七月、迄明年之六月，遵谦始之，实楚国公方国安为堵御力。而监军左尹之用越，遵谦实分五军资之。

论曰：世有乡人战於其乡而力者乎？世有以儒生起，能以乡人战力者乎？郑公子醉後目慑人，同坐佯走去尽；横鞭呼，儿为止啼。顾独柔一金，金不食，公子废箸终日也。世有妇人典中军而战力者乎？虽然，公子存鲁监国一年，则荆国存公子一年。越自战国，久失王气。西、戌之间，皂隶编户率为将相材。呜呼！公子不创呼，而皆户牖老也。公子促江上许许年，为明越延匝祀；然则以不死寿江上诸公许许哉！顾不得楚公国安，公子亦夭不长矣。荆国可原，国安妻与金姬何如哉！而惜也厄於同舟之建国彩，与熊阁部汝霖、顾阁部锡畴、严阁部起恒、荆都御史本彻，皆不及饮敌刃而他厄！夫马革裹屍，有其志、亦有其命哉！

——见原书「列传」卷之十二（下）

· 熊汝霖、路振飞

熊汝霖，字雨殷；浙江余姚人也。崇祯辛未进士；授同安县能，擢户科给事中，转兵科。号敢言，朝贵侧目。癸未，以事降补福建按察司简校。国变，家居。汝霖性恺易，多直致；与钩深，辄拂袖去。

弘光中，或荐强项、堪繁剧；补原官，转吏科右给事中。时以国仇未报，日夜腐心；遂有「事事急做、人人责成」一疏。略曰：『北骑南下，山东诸郡，岂可轻弃！诸帅不於此时渡河而北，待其长驱入境，然後小朝廷求活乎？犒北之举，前时用之为辱国，此时用之为酬劳。今北师款亦来、不款亦来，但师直为壮、曲为老；不先自直，一着不到，噬脐何及』！荐原任凤督挂议朱大典可用北行，亦荐旧将黄得功可与共事。请条明从逆罪案，并恤布衣杨文琼。已慨时故颠倒，疏曰：『此日一善未举，百弊俱兴。目前大势，无论恢复不能，即偏安未稳。「兵饷战守」四言，乃改为「异同恩怨」四字。况益以厂卫之设，内外交通，神器互借，飞章告密，墨敕科封；不亡何待』！语皆指斥，甚於痛哭。上怒，罚俸一年。

乙酉，北师下南京，间去。闰六月，郑义兴兵起，汝霖呼其乡之子弟千人应之，屯龙王堂，合防海。时海宁兵亦起，汝霖渡海鼓之；与北师大战於翁家埠，败绩。合表恭迎鲁王於台州，监国绍兴；晋兵部左侍郎，监军渡钱塘。时总兵方国安部劲旅次上流，每与北师对仗，多胜。马士英挟方故，请再相；廷臣咸不可。汝霖大言曰：『弘光中，时尚可为；马不欲与共天下，轻弃长江之险，中原尽去。门户不局，矫诬溺乱，日月沉墨，坏不可救：如昨日事也。此咫尺臣妾故地，乃容马来作沼』

！会请尚方以诛不平。士英乃大惧，且已。

是时浙西无不内起，虽穷浚荒麓，咸磨槊欲试敌。於是暗渡乞师越中者数十辈，愿大将先之；监国乃以阁部张国维督江上，而升汝霖大学士兼兵部尚书，专营西征之师。汝霖因为乞师者请命曰：『彼皆弃父母妻子於不测，汨没至此。且尝百口奋其田中父，纷横耜而待；间有智计，能开敌门。即否，不死浙西之心者，此数十辈也；何惜挂一空名，以慰百万睡梦！且北师方录才，彼可掉三寸舌，都荣也，而不欲，即民望；奈何坐失之』！於是稍有气唾，咸登名衔。或有言故盗陈万良可用，汝霖立致之，辄悬大将军衔；不付一兵，但令以故党夜发。或曰：以陈万良为先锋，大兵翼其後，步步深入，破崇德，合民共捣嘉兴，塞敌咽喉，是所以用万良；不然者，往无利。汝霖不听。万良横行内地十日，果失意归。盖自是奉西征之命者六、七部，皆不果行。

北师跨桐庐上流，江上诸师不战走。监国之台，入海；汝霖扈跸，驻三沙，依建国公郑彩。汝霖军中得子方五岁，与彩女结婚姻，意固监国。彩有书掾陈甲，彩私之，欲请为本兵；汝霖以刀笔不任，力争之。掾衔汝霖，贿彩卒，醉摔汝霖投之海。彩姬有女者号曰：『必生我女翁勿後』！彩乃使人扶起之，而姑佯怒掾以塞。及监国驻闽安镇，彩禁屠牛，熊卒犯之。而闽安侯周瑞素与彩不合，汝霖与书瑞，微刺彩；彩知之未发。己丑正月，汝霖有卒持人鱼；鱼者曰：『吾鱼属建国，问建国』。卒以建国与熊氏儿女家昵，持之急。时建国长子梦龙主鱼，鱼者告主鱼；主鱼方恚，而汝霖驰书彩，且饰前卒屠牛之过。梦龙益愤，为语激其父彩：『彼汝霖踉跄，挟监国无依，大人怜而收之。乃不为德，纵卒犯法，是海上无郑也！龙不忘汝霖』。彩曰：『听汝面诘之』。龙竟以兵出不意，残汝霖；并其家一十八口，无遗。汝霖子琦哥已在彩舟，彩姬抱之泣；谓彩曰：『但释此，念吾女异日』！彩曰：『汝为女，亦念吾异日！必生儿，并死汝』。夺怀中掷水。

先是，汝霖妻故最妒，汝霖尝密置妾维扬生儿，不以归；其家知之，独不闻妒者。汝霖既卒海外，家被籍尽；而维杨儿偕其母归承祀，得不问。

路振飞，字见白，号皓月；北直曲周人。天启乙丑进士；以泾阳知县，擢监察御史。出按闽，平海寇刘香，与有力。崇祯初，再按苏、松。有大猾伏阙讦常熟太仓乡老，奉严旨；振飞疏平之，大忤执政，谪河南按察司。简较，稍历太仆寺丞；奉使庆藩，迁光禄寺卿。

寻召对称旨，以佾都御史，总督漕运，驻淮安。时土贼横徐、泗间，振飞设法擒斩，降散之。甲申春，逆闯势益炽，振飞分遣诸将勒守要害，又令乡里得团结义勇自保。都城陷，福、潞、周、崇四藩皆以避乱南奔，贼诸伪官旌旆纷下，人心恇扰，恃振飞少安。时福藩次当立，南京诸大臣咸谋奉迎；或谓振飞扈驾以入，定策之功，孰出公右者？振飞曰：『我足一动，全准必为贼有。我知固此危疆，以为恢复之

本』。会凤督兵数百舰道淮，沿途劫掠，居民罢市；振飞与御史王燮戎服按剑，兵咸慑听命。贼遣伪官吕弼周至淮，振飞擒斩之；伪制将军董学礼拥兵宿迁，振飞复以兵击走之。捷闻，赐玺书慰劳。振飞疏请上亲征，愿为前驱。马贵阳雅不快振飞，及是益忌其威名；坐贪功、靡饷，勒解任。

振飞寻丁内艰，寓吴中。明年，南京不守，间关赴闽。旧恩，拜太子太保、吏兵两部尚书兼文渊阁大学士；赐少子泽名太平，为兵部主事，奉命徵兵湖南。明年八月，闽事败，振飞居厦门。二年，复窜；寓广之顺德，悲愤而卒。永历中，赐太傅，谥「文贞」。

振飞生平不以诗名，及流寓海上，始作韵语曰「非诗草」。

论曰：乱世争天，必能气夺殿廷。赏罚由手、举眼东西，百万疾走；梦寐所逼，鬼神从之。败即败矣，不败而有幸也。徒有口，不耐事，何益哉！万良忠勇，仗为先锋而以兵从之，亦可稍望夹击之势；徒以虚名赏其野走，明弃之耳。流离潮汐，不忘故人，志则亮矣；而不免於殃鱼！丁亥除夕，梦有道士与二语：『可惜忠臣一片赤，付与东流返故乡』！逾年而二语辄验；不意付东流自建国也。时科臣之廷劾建国者，为三山□希友及熊曰会（曰会字遯木，文灿子；黄人），余俱缩舌，而给諫鄢正畿（德都）、汤洪（明祯）、词林崔相（介人）、陈豹（豹叔）或挂冠去。彩舟随有烈风崩浪之警，营中常夜呼，以为熊崇；久之，彩败走东粤，白日见汝霖於醉花轩，辄喷血死；为己亥初秋事。若路文贞处不能战、不能守之间，隐忍局蹐以明志；见白无所为，见白非无所为者也。与雨殷易地，其用得自由，或尚有可观。

——见原书「列传」卷之十二（下）

· 张名振（母李氏、兄名甲、名扬、家口五十余人、顾明楫）

张名振，字侯服；北京卫籍，山西人。崇祯中，为石浦参将。乙酉，卫鲁监国入绍兴；防江，壁瓜沥，挂富平将军印。初，有浙西夹击之议，名振奉命不赴，还保石浦；监军兵部职方主事左尹上书纠之。绍国不守，监国依石浦。会闽京复败，永胜伯郑彩部舟师保鹭门，迎监国。名振以监国诣彩，曰：『思文一家，好为之』！於是东南明运复焰，各师连恢州、县数十；迄不守。

己丑，名振与诸臣扈蹕舟山。先是，威卤伯黄斌卿师溃江上南遁，与名振有素；以唐命屯舟山北进，其家属留闽。时斌卿部将朱玖者，以私怨欲几上名振；名振托屯练於南田避玖，计与斌卿纳交，许其女为斌卿子妇。既而永胜彩善护斌卿家属归舟山，历南田；名振妻闻斌卿有女贤，又以其女之姑至戚，欲一望见。女不可，曰：『不得父命；且未字，安得走人军中』！张固邀之，强使人牵其舟入，相见极爱重。或误报舟山，谓黄女为富平所劫；斌卿怒。时名振之母老，领其家属久保舟山；

斌卿拘母军中为质。既知张盛意，甚悔之，更大礼母；而名振衔斌卿入骨矣。会平西伯王朝先颇为斌卿所制，有旧吝；又入黄标黄大振之谮，意大不欲有斌卿。因密与荡胡伯阮进深相结；而进原属富平故部。至是冬，监国欲蹕舟山，斌卿逡巡不即纳；名振讽阮进与朝先，反兵毙斌卿於开谕之日。其部下稍稍知谋自名振，名振颇不自安。已朝先亦欲自大，梗谕；庚寅九月，名振复以他故袭杀之，大言曰：『吾为斌卿报仇也』！朝先标吕廷诏、张济叛内归，图报复。

监国即休舟山，名振以定西伯进侯，总统故朝先及进水陆二师。丁亥，以舟师二千六百号应吴淞总镇吴胜兆北反，舟风覆；登陆，剃发如民制，与词臣徐孚远等潜脱。辛卯，内师大举三路出，名振与诸师御南北洋，俱捷；而荡胡侯阮进，战死螺头洋。舟山被困，力竭城破；名振弃家，挟监国泛去。名振家舟山之东门，母李氏；妻马氏贤，抱翁主，扶姑窜入火死，家男妇五十余人从死。兄生员名甲，与马氏从子负图、贡图咸自杀。兄名扬，以屯田都督，被执；不屈死。其幕客顾明楫，字心复，北直人。以诸生，自缢学宫死；题壁，有『愁魂应傍孝陵归』之句。

名振既间关监国，为乞援国姓思明州；国姓责以无功，名振乃露背所刺「尽忠报国」字样，矢不二。成功心动，指腹结姻；助兵二万，行粮备。还撞舟山，不利；直溯金陵，获故叛金允彥磔之，祭诸忠。窥崇明，触京口，题诗金山寺；有『十年横海一孤臣』之句，闻者心恻。时内师守江严，横索江，截海舟数十号；退屯崇明之平洋沙。成功以师不利见督，时长杨王术桂为名振曲解。复令平南伯陈辉、庆都伯王秀奇、忠孝伯洪旭、总兵周全斌等，壬辰复进崇明。兵饥，感名振之义不变；遂有『太师甘枵腹，吾辈竟忘饥』之谣，众益励。十二月，内师踏冰出劲旅劫平洋沙，浴日将军王善长先登；诸将军姚志卓、任麟、王有才、王浚、张贇等战大捷，敌阻冰，无还者。

甲午正月，复入京口战不利；失参将阮姑娘；国姓复令戎政司马陈六御及将军程应蕃等协攻崇明，复不利。水激登、莱等处，抵高丽，乃还。五月，宁波副将张洪德外款，名振以为义子。八月，名振攻舟山镇守巴，中军陈虎战歿，巴以舟山降；名振入，哭祭其母，哀动三军。十二月，台州内镇守张信外款，名振以其残，不受；因降将黑李三纳母为贄，监国令以兵受之，劫巡道张、知府刘至舟山，纵去。

名振病剧；二十八日中夜，有大星陨海，光芒如电，微有声。亥刻，名振起坐击床，连呼崇禎先帝数声而绝。葬舟山；有白鹭千余，盘绕数日不去。而六御代镇舟山。

论曰：定西与人和易而中坚，汨没潮汐者历十寒暑；诚不愧武穆岳氏背上四字。顾每出必覆，为东风不许；此岂人为之哉！至於故疏监国而借力思明，此种苦心，惟张玄箸知之；则又古纯臣之所未及也。肃鹵而在，势能令监国■〈捏，木代扌〉机；即再刃平西，总以安蹕，匪私。或曰：果纵左尹夹击之计，尚幸有为；临流而叹

无渔，嗟已後矣！

——见原书「列传」卷之十二（下）

· 黄道周（叶廷秀、赵渊卿、赖敬孺、蔡时培、毛玄水）

黄道周，字幼玄，号石斋。先世福莆田，徙居漳铜山所。祖世懋、父嘉卿，世业儒。母陈，尝梦金甲胄神人手授儿，乃举道周；道周初字螭若，以是也。甫成童，好学攻苦。年三十，不能为诸生，乃益自负，落落无所可；每有辞世轻举之意。尝舣钓龙江，风覆舟；恍惚有导之者，至一殿，殿额曰「倪黄」。释水，不解所以。时有道使者闻其名，方营构先贤某祠，属为上梁文；道周缝掖进谒，援笔就，燿灿惊座。由是，声籍八闽。有相人唐甲，一见道周曰：『天下大无福，公为宰相矣』！

以万历戊午乡试第七人，天启壬戌成进士；选庶常，历编修。璫祸渐启，拟从同馆文震孟後，连挫魏铎；不果。例：经筵展书官膝行前；道周以道尊，平步进。魏逆连目慑之，不为动。

辽事方亟，宁远中左相继沦没，岛帅毛文龙方自诩镇江之捷，当事入金，倚图恢复；道周独谓不可恃，草疏行上之。其略曰：『今廷臣皆知广宁之不可弃，而常为虚声以幸万一之福；皆知关门之不可孤守、海岛之不可虚恃，而常为守关门、恃海岛以塞一时之议；皆知水西不破，则建州必不靖、水西必复起，而决不敢少抒东顾以了西事、决不敢急了西事以端东顾；皆知兵加则兵懦、饷加则饷愈不至，而决不敢停新饷以作内政、决不敢因旧额以寄军令。五说茫茫，未有定议。故曰食冗之耗小、识冗之耗大，物蠹之祸小、谋蠹之祸大』！以归葬急，不及上，内艰。

道周性强忍，敢言；以贤者自命。澹泊廉静，不事鲜好。初为文譎辩似子，继乃闳肆，矫绝近代。天下咸以为海岳，所至奔走奇杰。

丁卯，烈皇帝嗣位，道周论「易」数，以为今上即位之年，当「师」之上爻；退而谓所私，不敢指，乃比之上爻耳。崇祯己巳，起故官。会文龙见杀於袁崇焕，道周又曰：『关门之祸，更自此始矣』！庚午，出典浙闈，晋右春坊左中允。寻东师果深入，诏逮崇焕，词连旧辅钱龙锡；道周独抗疏救之。坐曲庇，镌三级；龙锡亦竟得减死论。乞休，不许。垂出都，以「易」数上陈；忤旨，褫职归。道浙，浙人筑大涤山书院以待。及庐墓北山，漳守敦入紫阳学堂，大集生徒且老。

无何，复以原官见召，升谕德，掌司经局事。则廷议反覆，至以东林比崔、魏，参罚开复，葛藤不休。道周请罢归，遂指斥时政；疏略曰：『臣观近年诸臣所目营心计，不过勇求报复而已。自庚午春月以来，盛谈封疆，实非为陛下之封疆，不过为「逆案」而翻封疆；使诸芟锄「逆案」者，无端而陷封疆之内。至於封疆之要塞利

害、区画布置，无一言及之。自辛未春月而後，盛言科场，实非为陛下之科场，不过为仇隙而翻科场；使诸素无雠隙者，无端而陷科场之内。至於科场之源流清浊、屈折易难，又无一言及之。凡在宋人看详条例之司，今皆举为匡勦安攘之具。臣观古之圣贤日夕经营，不过外攘、内进二事；今独以此二忧遗陛下，而大臣夷然自托催科比较之末！至以点画波撇、只字单辞，欲斥周、孔之学，废圣贤之道；即缓急何可得半土之用哉！疏入，忤旨罢归。中允倪元璐疏白之，不报。

丙子，以原官起用。因星变，请平大狱，求直言；谓『天下神器，为之有道；簿书刀笔，非所以绳削天下之具也。上急催科，则下急贿赂；上乐楔核，则下乐谗险；上喜告讐，则下喜诬赖。今天下谗险之徒群聚京师，鸟声、兽息白昼相呼，缙绅俯首屏息以伺动定；皆曰是有由来。孤危之臣，重足而立。陛下方求言，而建言者辄斥；方清狱，而下狱者不休。且夫东蠹西沸。此为何时？虽仲山甫处此，未遑舍六月而歌清风；奈何与市井细民，申勃稽之谈、修睚眦之报乎！目下最要者，在安庆励师措饷，务扫英、霍、襄、邓之患；勿以若抚、若剿倖之道谋。最急者，在宁、锦训练六师，预为截仗捣坚之策；勿以若弃、若存，复成瓦注。最便者，在因士气方朝，开兵卫、州县另为选举，但约贼平许以雄职；勿以掣签分地，长其幸心。最善者，在起废籍批鳞强项之臣，使为襄、庐、秦、豫诸道监军，但约贼平授之节钺；勿以别户分畦，销其壮志。又最不可缓者，近应诏直言诸臣、被讐无证之士，请悉以一面解其烦冤。臣观五月朔夕，荧惑与日同在鹑首、参火之分，又以朝夕合火；宜修平大政，稍节威光，使火不为厉。明春荧惑在於大火，徘徊氐、房、心、尾之墟；宜慎火器，逃愆戎务。汉臣盖勦曰：「寇在於外而内陈兵，黠则不武」。陛下洞烛历理、深明天道，樽俎之内，胜算自饶；何必使举朝精神尽敝於兵饷、刑狱之下乎！丁丑，同考会试，历詹事府少詹；多所论奏，不见可行，唯纂修经书称旨。上尝曰：『暑天劳顿，道周能成一篇好文字，才诚可爱』。

时杨嗣昌夺情，以阁部出督师中州；陈新甲冒推宣督，辽抚方一藻谬款，意藉沿边为用。道周知不能，为三疏一日闻。其劾嗣昌者有曰：『臣虽懦孱，然自二十岁躬耕，手足胼胝以养人。迄四十余削籍後，徒步荷担，一、二千里不解扉屨。今虽踰五十，然非有妻奴之奉、婢仆之累，所纂数卷书，已移月可毕。笔札千楮，均为报恩。天下即无人，臣愿解清华以执锁钥，何必使被棘负涂者祓不祥以玷圣化哉！方今荧惑渐次箕、尾，是为燕分；九、十月交，当南斗口。是虽有道仁人所不道，然思患豫防，圣人之所垂戒』。召对平台，语次陈新甲；上曰：『何不言之部推之日』？道周曰：『彼时言官林兰友、何楷已言之矣。今伦理边疆，关系匪细；臣不得不力争』。上怫，心疑道周以不得廷推介意；因称道周傲物非清，援伯夷为圣之清！道周曰：『伯夷忠孝，不止於清；宣圣特仁之矣』。上以道周辩，怫不解。道周顾极诋嗣昌夺情非孝，嗣昌遂援疏荐郑鄮事，连拄道周；盖鄮方不誉於其乡，毒也。道周曰：『臣故言文章意气不如鄮』。上斥为朋比；道周曰：『众恶必察，臣何敢朋比』。上曰：『少正卯言行坚辩，不免孔子之诛；道周亦然』。道周曰：『少正卯欺世盗名，臣无其心矣。臣今日不尽言，臣负陛下；陛下今日杀臣，陛下负臣』。

』。上曰：『汝读书有年，只办得一「佞」字』。叱去。道周谢起，却步复进；大言『「忠佞」二字，臣不敢不辨。在君父之前，独立敢言为佞；岂君父之前，谄谀面谀者为忠乎』？上怒益不解。朝退，复召诸臣还，严谕勿党同伐异。明日，谪道周江西布政使司都事。

道周临行，哀所纂完「洪范」、「月令」、「儒行」、「缙衣」等凡八册，合三十万言；道周从不畜代笔，缮誉俱出五指，即诸疏皆然。适解学龙巡抚江西，甫入境，疏道周忠孝之至；诏以朋比道周，与道周并逮。主事马思理、董养河等相继救道周，皆得罪。道周囊无一钱，守土及绅士争捐贖饬缙骑；道周曰：『行金□假，是欺朝廷；愿如故事，瘁肌骨不恤』。缙骑亦感谢不取，益厚遇道周。既入都，与学龙并杖八十。按以伪学欺世，应大辟；学龙坐夺职。刑部尚书刘泽深力请减戍，不得。部臣叶廷秀者故不与道周交，复冒不测，直道周，疏论痛至；则并逮廷秀杖之，削夺去。太学生涂仲吉袖疏诣通政司，持不得上；遂并劾通政使施邦耀，坐廷杖论戍，邦耀亦落职。时有崑山诸生朱永明持百钱，问仲吉系中；并送部拟罪。道周在狱，手写「孝经」百余本；所着「易正」一书，亦自负桎楚痛垂成。先是，都事被逮时，笑谢诸远将知交：『此书计三千页，道周出狱矣』。

会中州陷，福藩殉之；嗣昌分失律丧地不赦，乃自杀。上内念道周所言非妄，而辅臣周延儒自田间起，阳为不知道周者；曰：『道周博学负大名，此不若陛下自赦之，使天下惊叹圣度汪洋』！有旨：出狱，戍辰阳；则「易象」书成矣。二十图、六十四象，二、三及门外，鲜能通其学者。寻赦还，复为原官；并赦为道周而得罪者。召对，退而复陈；以为今日忧建州甚於忧寇，须宁、锦练大师八、九万为要着。退而私谓其门人：『关门以外，甚可虑也』！

寻谢病去，复庐墓侧；营讲舍蓬莱峡，成「孝经集传」及「坊记表记集传」。亦讲学江东，为诗不肯轻题目；常有处要非东林，虽款曲最恭、求一字为荣，积数十年不可得。闽守令大都出门下；以时就请，或稍馈遗，勿受。乡之人之得罪者，知其一言可得生，又不能以他干；则悲哀道侧，如无意使闻之，道周为寄言令君脱去。盖其尝道周者如此。癸未，山寇创漳、泉之间，居民争入道周庐避难；贼果过庐门不入。副总兵郑芝龙平寇，误连孝廉林、叶二人；道周曰：『芝龙欲自杀二公哉』？入城，不接一客，徒步入狱视孝廉；是日，当事辄驰二人狱。

书法妙人，亦偶为画；多天然。性无所嗜。庐亦陈石数指，不求工世法。论古端务至正；凡以通变为功名，皆所不取。又尝不悦昌黎为人，曰：『韩先生，老乞儿耳』。乡之後辈，惟陈壮行不肯北面道周；曰：『先生谊绝高，然不免矜名』。甲申，闻倪元璐殉难；曰：『吾知所自处矣』！

弘光初，私见诸讲章，有曰『四镇必不为用』。寻徵吏部右侍郎，进礼部尚书；陛见，痛哭曰：『愿陛下毋忘高皇帝陵寝』！出，徒步至孝陵；草跪一号，声动行路

。嗣以无可为，自请祭禹陵；出都，私制缟衣，刺「大明孤臣某」七字於其上；曰：『江南必败，我不知何死！当以此为识』。已南都果败，还漳。

七月，唐藩入闽建号，进武英殿大学士兼兵部尚书。尝陛问：『黄先生博学吾闻之，当有机用以应时艰』！道周密陈芝龙不可恃。芝龙顾素街道周，益不为用。明年，奉命督郑鸿逵之师北进；道周檄其所知，从数百人，与鸿逵趋浙开化。鸿逵不进，道周便帻被褐、手小帜，麾二十骑先。甫入婺源界，憩古庙；北师探者至，遂以二十人去，不以二十人有道周。道周曰：『勿多求，所为黄阁部吾是矣』！鸿逵惧罪，削发弃师遁去。道周与兵部主事赵渊卿、中书舍人及门赖敬孺（字光后）、通判毛玄水、内弟蔡时培四人并逮金陵，北督师洪与同乡，劝道周降，不答；操江巡抚陈谦以薙刀、满帽见遗，不受；仍令宗典史卫旧内。在系所着诗文数卷，留同乡故词林黄文焕及门人吴繁祉家；藏绝命词於衣带。临刑，过西华门，坐不起；曰：『此死与高皇帝近』。江宁同知傅觐光，故为道周门人；以道周遗言，用布蒙其首，与四人并毕命东门之外。江宁典史徐大绶，奉命勘视，私殓之；犒皂隶张七，密藏其屍古庙之夹墙。又潜取道周与四人之首分识，并埋庙之息心亭；诫庙祝守之。庚寅，道周长子子中偕赵之璧来寻父骸，不可得；有故总兵赵漳忽夜梦道周与语：『当索我息心亭下』！觉而异之，迹亭无所见闻，还坐茶寮。适之璧至，隔座寒温，偶及道周，故示不足；曰：『黄先生着腐，此多事』！漳怫然为正色：『足下何人，乃妄议忠臣』？因稍与深语，语所梦。傍一青衣少年侧听之，猝持之璧请间；曰：『家有兄知之矣』！少年前，皂隶张弟也。遂白典史，诡称皂隶有子死，市一椁就夹墙出屍，合息心亭首入椁，另裹四首一囊。贡士吴磬哭之以诗，卒曰『独挟遗孤问采薇』，纪拾骸之实也。

廷秀，字润山；山东濮州人。天启乙丑进士，历吏部文选司主事。性激卓，绝私请。既道周蒙赦，而廷秀故不起。弘光中，荐原官；辄谢去。食贫负气，往往躬伐野树煨炭以为活。或黄冠出走，数月不返。已而合任漆起北抗万余人；事不就，与漆同日见害。

子中，字仁表；与其弟子成，字神表：壬辰死乱兵。又弟子和，字民表；子平，字衡表。衡表生一岁，而道周及难。道周遗着，尚有「黄子骈枝集」、「续离骚」、「大咸经」、「三易洞几」、「榕坛问业」、「懿畜前後编」。

论曰：余尝私作诗四律，有『拟作先生传，何当圣主怜』之句。幸後死，其何敢辞！石斋尝讲学江东，堕崖创右臂；见余前诗，负痛每韵再和投余。有云：『读足下所教，如悬崖千尺，负翼无害也』。晤语，自许今之成人。呼乎！石斋诚不负此三语。绝命词十二字：『防风虽倒，犹留一范，以问孔丘』。盖以阙里为归矣。□□石斋，从河洛之数，得『稼穡未际，同历西周』八字；於「洞几」等书内见之。东崖黄景昉赘一语，以言乎东也。石斋又言丙子赐环，梦文皇垂帷卧，拥被屈指者再，三九〔四〕七云云。按龙江所恍惚见「倪黄」字，生与鸿宝同官，死与同难。家

人尝简得小册，自推丙戌止得六十有二；石斋好数学，乃不诬。

——见原书「列传」卷之十二（下）

（附）诗歌逸

阁部黄道周监军至婺源见执，负械而吟「过言」五律八章；有『已破江湖梦，坐寒日月光；大命扶三矢，时贤惜一毛』之句。时已绝粒七日，作「自悼」、「造怨」各八章；有『云霓人望绝，金石鬼逾香；得正吾何憾？微名世所亲』之句。按「云霓、金石」云云，以死为归、名垂後世也。

发婺源，复进水浆，示同械二中书三章；有云：『火树难开眼，冰城倦养身；支天千古事，失路一时人。碧血题香草，白头退钓纶；更无遗恨处，燥发为君亲』。二章曰：『搏虎仍之野，投豺又出关；席心如可卷，鹤发久当删。怨子不知怨，闲人安得闲！乾坤犹半壁，未忍蹈文山』！盖犹自爱其余生云。

又作「昏晓」七律八章；有『碌碌於今无足录，只愁元老自身轻。身有微名藏不得，道惭善卷死何妨』之句。按「身轻」云云，其有悔一往之未善乎？自署章尾云：『吾梦高皇与二宗，已着「寒骚」注中。记天启甲子初散馆时，梦神宗危坐，甚伟；呼余近前：「汝欲胜人，道在白胜」。今晶章所镌是也。又丙子，余方赐环，梦文皇帝垂帷关壮缪祠，拥被向余屈指者再，云「三九四七」。诚如所云，盖指「易象」中命历也。去岁余奉祠出都，以风逆，泊龙湾。梦高皇厉声：『卿乃舍我去』！余答：『朝廷舍臣，非臣舍朝廷』。今去五月之十日，又半载，欲使後人别「昏晓」耳』。

初发婺源梦得五字：「夷犹吾行兮」；作「彝犹」八章；有『夜行独与旄头近，横死犹当明月傍』之句。作「待命」八章；尾署『待命，犹延颈也』。

自正月二十四日系禁中，二十六日请命听燕中消息；有「归衅」八章，尾署云：『右「归衅」，欲归就衅鼓也』。又「拚得拚不得」共十二章，记者逸其十一；又逸「婺源誓将」六章及「谒朱庙」四章，其为七言绝句也。

「新安元夕」四章，尾署：『十二日，西桥演灯甚盛。念正希已死，余又被执，世事不竟如此；为泪下』。翌日，遂绝粒。

至留都，迄二十九日不死，复进水浆。潦倒余生，不能执笔。「过新岭，吊正希」四章，尾署：『岭上吊正希死，闻有江天一诸贤从之，足为吐气』。又作「触目」二章，时见一士人身缠九锁有感；尾署：『初至白下，见玉梅盛开，旅次索被袜不得，怆然留示诸子』。为「逢时」四章。傅君折得玉梅寄瓶中，听营中弄胡琴，作

「有命」六章。卧禁城，渐闻钟声，遽然惊觉；作「骄马」十二章。又有所寄，作「何人」四章。後夜闻钟，复理前韵，作「噪定」十二章。尾署：『以上三十二章，初至历室，笔懒纸硬，书不能工』。

毛玄水别驾、赵渊卿司马、赖敬孺、蔡时培二中书，相持弥月。正月之二十有九日，分羁他处，怆然有怀，作「败鼓」八章；有『一次相逢一惆怅，前生可是未分身；经书百部无谈处，中夜深深听马啼』之句。尾署：『又过十四日，恐以余为死也；然亦无从省其达否？聊以示意』。作「胜霸」十章，又作「痴想」八章；自署：『痴想者，系旧禁不死，复思从华顶、黄海卒其余业也。六十余生，备尝荼毒；安得翻飞千仞，俯仰独尊！缅想前年不往辰阳，自出潼关，岂复至此！但如此世界，黄华真人何能自保！才一转念，愈益其痴。留禁南方，固自奢於白云、尊於牖下也』。又作「十年」八章、「明光」八章。尾署：『右三十四章，皆示赵渊卿四子；无有寄者，因笔於此』。

二月朔，引磬不殊，起而慨然；作「沟壑」六章，又作「抵暮」四章。傅对庭晤语，辄赠四章；有云：『何人胆骨不寻常，较量荆卿、张子房；年少相从无得力，不分圯上与田光』。作「思在黄海」六章；尾署：『以上三（二？）十首，皆用秃笔挥之。鸿宝已死，觉斯从尘；□□宗余，开颜何用！然而此道水流，何可绝也！防风虽倒，犹留一节，以问尼丘』。又「别辞诸名山」诗缺，竟作正命词以死。为全录之：『垂老谈为仁，了不见精致；缅怀七尺躯，肤发蔽天地。斯民既颠隮，骨肉安足恃！抱头入林莽，亦与狐豕类。况可负日月，而窃鬼火气；管子胶日时，已得礼乐意。弘才不可遇，季□亦奚次！孔门道「成人」，於此无二义。仓皇既可参，生死何足异！颜回委陋巷，正则蹈水济。当此并命时，要一无所系。丝发悬华嵩，眉眼照百世；试问古成人，成就无乃是』？按「孔门」二语，石斋尝向余自许「今之成人」；「礼乐」二字，逡巡未遑。是自写炤也。

拘後诸韵，不免「心绪乱」三字；然能悔犹算近道，请以张司马玄箸见收遗句并观，分数固自在也。黄太稚景昉哭之以诗二首，有『魂无归阙处，肤是杖廷余』；又『墨销存篆蹟，爪削想羸形』之句。颇合。

——见原书「志」卷之三十二（中）

· 谏议诸臣列传 ·

吴适

· 吴适

吴适，字□□；□□人。以崇祯□□进士，历官□□。弘光初，以荐，为给事中。

清执，尽绝情面；正色驳参，举朝侧目。安远侯柳祚昌荐程士达督理京营；适曰：『士达不过积分监生，非属科贡正途。况勳臣非有标营之责，何得备枢戎职掌』！庆远知府郭仪凤请挂剑勤王，因参巡抚方震孺贪墨；适曰：『郡守无勤王之例，挂剑非入援之名。仪凤擅离职守，此必秽迹着闻；虑有参题，先行反噬』！光禄署丞张星疏求考选；适曰：『星以县令降处，又挂察典；安得妄意清华』！保定侯勳卫梁世烈请袭祖爵；适曰：『本勳未悉存没，安得遽行袭封！果有恢复之志，当即破家从军，得实再议』。中书舍人张鍾龄诸给部衔；适曰：『此近於躁进矣』！

元年二月，诏太监李国辅开采浙江云雾山；适谏不听，病归。

论曰：适於弘光中称敢言，何所恃而不病！

——见原书「列传」卷之十三（下）

· 清介诸臣列传 ·

朱天麟

· 朱天麟

朱天麟，字震青；南直崑山人。年十二，其家舍为吴江道士。适有沈老业医，过道士观；无人，独天麟在。医谛视异之，曰：『孺子能饭我』？天麟为执爨宿之。明日，别去。医乃告道士，指天麟：『我必以女妻此十二』。道士曰：『老有女，何不可；必道士十二』？医曰：『此十二者，难得也』。遂以礼聘之归，就举子业。期年，以沈天英入小试，无不第一。天启辛酉，竟隽南雍；改今姓名，为戊辰名魁。

初授饶州司理，有清名。奉命察南昌诸藩，内艰报至，竟不回署；典衣为行李归。服阕，以原官行取，授翰林院编修。

久之，家□□□□□□□□□□何吾驺、同安公郑芝龙□□□叶回□□□□墓□□□哭别，絜家浮海去，抵桂林。己丑，桂林复，以天麟为大学士，随驾入滇。

甲午春，劳瘁而卒，署无一物。

论曰：天麟间关劳瘁，百难俱尝；身且不顾，何有身外！余「知是录」中列在跽死，与钱肃乐、孙嘉绩一等也。即不与金堡等例「播匿」，而受大学士以卒，志清。

——见原书「列传」卷之十五（下）

· 文史诸臣列传 ·

袁宗道（弟宏道、中道、从子彭年）

王思任

· 袁宗道（弟宏道、中道、从子彭年）

袁宗道，字伯修，号玉蟠；湖广公安人。万历丙戌，会试第一；以编修，历右春坊右庶子。性恬冲，不竞名利；为文渊深宏博，粹然出於正。其荒政之议有曰：『救荒之策，无外蠲、赈二义。然善其蠲者有三、善其赈者有六矣。重灾郡邑，存留免徵；而起运未豁，力办益难：则起运之课宜省也。黄封虽下，白纸犹催；藉当宁之旷恩，为润筐之便计：则苛徵之案宜密也。民子遗矣，而大吏犹华轩盛驷，供帐丰腆；使非民膏，何以给之：则官守之自奉宜薄也。此善蠲之三也。内帑易穷，亦不猝办；即以赎醵使给其地，所谓从州邑赈之，胜於朝廷之赈之也。所在好义，分餐待火；听其自为德下私赈之，胜於上之公赈之也。乡之义捐者，百则棹楔旌之、千则爵之；劝使赈之，胜於强使赈之也。去城遐远，就食则艰，督令困聚而招给焉；移食而赈之也，胜於移民而赈也。受金则鬻米者豪，给粟则待炊者後；糜以赈之，胜於金、粟之赈之也。丰歉不均，舟车远近，官为主之，商不居奇；转货而赈之，胜於民之自转而赈之也。此善赈之六也』。两弟：宏道，字中郎；中道，字小修。俱进士，负文名，多所著述；比於眉山之三苏云。

而宏道之子彭年，以崇祯甲戌进士，授淮安府推官。弘光中，行取礼科给事中。时阁部马士英用事，荐起魏璫逆党，且云『强半正人君子之流』；彭年诤曰：『是明为逆党解嘲也』。候考宗室朱统■〈金类〉疏参辅臣姜曰广，彭年驳以违例；谓『中尉具题，必自亲王；若徒候考，亦由通政。此何从直达御前？宜付法曹』。不问。锦衣都督冯可宗奉密命缉事，彭年上言：『厂卫之兴废，世运之治乱因之。先帝时亦勤缉访，然中外无不营自得之官、有不脛而走之贿。逃网之方，即从密网之地；作奸之事，又率自发奸之人』。忤旨，谪浙江按察司照磨。临行，请更置要地督、抚；不听。闽唐败，勉北归；署广东布政使事。时北镇李承栋谋□□应南昌金声垣，奉檄往援；承栋故不发兵，彭年亦故不发饷，以误兵机。遂随承栋入肇庆。永历中，为都御史；与侍郎刘湘客、科臣丁时魁、金堡、蒙养正，咸清执，好讥弹，时号为五虎。廷臣不安，合起请诛五虎；主不得已，四臣皆罪去，而彭年以功大论免。桂败，不知所终。

论曰：三袁以文章夺望，而功名不大彰於时。顾五虎之一，宜从回向例；则姑以故三公安故，稍借之。虽然，给事南都时，诸侃侃：至荒南，犹不夺此种坚异。或曰

：此以得当图报也。

——见原书「列传」卷之十八

· 王思任

王思任，字季重，号遂东。其先，大名莘人；南渡，始居越。思任方娠，其母唐，梦金星斗大入怀。既诞，目光岩电，肌肤若冰雪。五岁就外塾，一过能诵。时从父维新恤刑古狱地，读书夜分，有鬼物绦衣、象简者出；思任不惊，从容叱去之。十余岁，洞「易」义，通性理、「纲目」、「史」、「汉」、「左」、「国」诸书。借籍，补顺天弟子员；为代馆课天马行，文名籍甚。常憩灵福寺，有松龙蟠，梦骑之而天飞；文益进。万历乙未，年二十有一，成进士；赐归娶。

令兴平，贫不能治扉屨，单蹇渡河；至，始知为新令尹也。有异政。乡民争失马，令马自识其主。梁、李二人讼不决，思任梦同年关廷来访，且入汉寿亭祠，壁有「梁小冤」字，悟；曰：『得之矣』。果有是人冤死。调剧富平，艰归；补当涂。大璫邢监矿税滥及，思任长揖放言：『横山距孝陵三百里而近，能无顾地脉』！璫止横山。又曰：『从人将共食中翰某之肉矣』！时中翰某倾监耳，欲矿徽；璫惧，亦止徽。政声最。有良家子，颇窝盗；谬与欢，窝令其子就教。所执贽赃露；质被盗者，庭对决之。分癸卯南闱，得解元王纳谏等知名；仅迁南刑部主事。思任性疏爽，意不殊喜，则诙谐尝巧绝。又以不附东林，物论轻之。降山西按察知事。复补青浦。浦善政，均役为最。竟以漕事，与使者争民命，拂袖归。纵游名山川，无停屨，文益险峻。与王积薪奕孤山，作「奕律」。补山东照磨，不赴；见察，复纵游。改教授松江，升国子助教；以南京工部，榷芜关。

转屯田，江州备兵。初不事事，月余，旌旗壁垒为更观。柯陈遗孽且累万，藏亡遁脱，请多其子衿以文之。流寇逼黄梅，或以隔属可无动；曰：『朝廷封疆，何分彼此』！炮贼首闯天星。纵间恐贼，贼弃井亭去。谍者曰：『柯陈且发难矣』！众惊。思任曰：『子衿不足乱也』！果迎赛，不戒自攻；而前所奖诸生，已竞相诫就帖。贼破潜山，黄梅复恐，思任解归；江州为罢市，哭声裂匡山之谷，林居乞手蹟者趾相错。着作盈篋，题曰「文饭」。

乙酉，北师入武林，文学王毓蓍、潘集、周卜年相继沉水；思任为赞以见意。其跋毓蓍「致命篇」後，署「天翻道者任思王」云；倒其名，志不忘一人也。监国中，授翰林院提督四彝馆太常寺少卿。首陈四正：亟正事、持正气、用正人、听正言；继陈五乱：一官乱、二兵乱、三饷乱、四士乱、五民乱：皆救时急务。而「严敕藩镇」一疏，尤称痛激。七疏乞休，不许。越事败，愤郁成病，遂不食。负榻书「忠孝文章」四字，令颜之中堂；三呼高皇帝而绝。

思任书法从米家、画仿倪迂，缣箒纷逌；时攒额苦求假，则又乐之不疲也。往往以口舌得罪；晚，改号谑庵以自忏。喜阴隲人，至有伪为有子之丧，乞举火者。书「易」示其子：『乾初勿用，故能用九；大衍虚一，故能用万』（有乙千二百四十）。常书同年商周祚山房柱联，有「好色想西施」之句；盖无不谑也。得年七十有二。

论曰：薛谐孟曰：『谑庵悔谑，莫悔於南司空郎时，筑宅青溪，率众童子歌舞；已周一甲子，望之犹花蕊夫人所供挟弹仙也』。即其自嘲，魔母魔男，弥天作戏，何有余人！然拂东林者，必乘是时起；而谑庵所欢齐年，乃孙文介、何桐城谑东林耳，岂薄东林哉！三呼高皇帝，绝粒归冥，犹之一舸逐鸱夷也；谑也。

——见原书「列传」卷之十八

· 武略诸臣列传 ·

左良玉

黄得功（翁之琪）

· 左良玉

左良玉，号崑山；临清人。崇祯五年，奉诏以副总兵将兵援怀庆，走贼太行山。明年，败贼涉县之西。贼望其旌旗，颇震。未几，败绩武安，七千人摧几尽。七年，起援卢氏；军澠池，与总兵陈永福、邓玘共扼宛雒之贼，颇有斩获。八年，给事中常自裕上言：『中原安危所系，乃仅以左良玉一旅塞新澠、陈治邦等数营扼汝州、陈永福孤军堵南阳，贼势日益、兵力日分；贼大小七十二营蜂屯伊、嵩、宛、雒之间，以数千官军东西瞻顾，何所畏而不长驱哉』！

明年，贼一字王及撞天王，合三十七万犯阌乡、灵宝，阔四十里、绎络百里，良玉与总兵宽，持不敢进。已而宽累捷，而良玉无功。

十年，大破贼於舒城、大安，连战三捷。贼犹潜窜大山中，应天巡抚张国维檄良玉入山搜剔；良玉新立功，骄蹇不奉调。逾月，乃出舒城，所拥降兵残，村集为墟。

十一年，与总兵陈洪范大破贼於郢西。总理能文灿既款曹操（汝才），而良玉亦受张献忠之降，插献忠穀城。

明年，大破贼於许州，贼势披靡；稍稍群集固始，保六安马茶山中。良玉令降将国能袭贼内乡，大捷。步兵率淫掠；上闻，敕责之。再破射塌天、老回回、改世王於

镇城，贼乞降。连营数十里，残民二麦，谕不省。良玉遂率副将陈永福、金声桓等捣其不意，斩首一千七百级。乃使国能招之，射塌天果率其众四千人，解甲降内乡城下（射塌天者，李万庆也）；而革里眼走不来。六月，献忠先叛，曹操九营亦并起；良玉追及之於房县，大败，失其符印。事闻，革职，戴罪杀贼。

文灿伏诛，阁部杨嗣昌督师，拜良玉平贼将军。良玉所部多降将，嗣昌欲因以辨贼，故有是命。十二年，贼曹操等九营入蜀。献忠残巴、巫，良玉与川抚邵捷春、监军万元吉会兵夔州击贼，大胜之；曹操九营降其七。过天星语人曰：『作贼非本怀』。良玉以兵蹴之，亦来归；督臣以精锐隶良玉军。

十四年，败献忠於南阳，复败之信阳。良玉久屯襄阳，李贼以四十万由唐县而西；良玉造舰於樊，将避贼入郢。襄人怨其淫掠，纵火焚舰。良玉怒，益掠不悛。

十五年，李自成合群贼复围开封。良玉与虎大成、杨德政、方国安等奉督师丁启濬、杨文岳，咸壁朱仙镇，与贼垒相望。启濬日鼓之，良玉未可；计未定，贼至，良玉先奔，诸师从之。贼渡河，冲蹶四百里；二督联骑奔汝宁，兵降贼数万，丧马驴七千，启濬印剑俱失。良玉还襄。

十六年，胜贼於樊城；降贼众至二十万。寻避贼东下，沿江纵掠。於是流土寇、降将叛兵白贵、小秦王、托塔王、刘公子、混江龙、管泰山等所在蜂拥，并冒左营不戢，南都大振。留守□□盛设，不问为兵、为贼，击斩千人；良玉列状上兵部自白，还屯安庆。诏以荆、襄失守，姑念久劳行间，图功自赎；而所部方国安、陈可立等革职充为事官，杀贼。已而武昌被围急，良玉不进；浔督袁继咸持大义责之，以其部先进。良玉□遣方国安、马士秀等五千人为先锋，而身率大军继进；则武昌已陷贼。疑李自成欲入楚，逸岳州、长沙；良玉复蕲春、□昌等县。寻复武昌，并复袁州、建昌、抚州等处。诏以良玉恢楚功，加少师，廕一子监；而封宁南伯，命世镇武昌。继咸疏，以为宜听督臣调度，天□难制。

十七年，南都立；以阁臣史可法议，进封侯。良玉初接监国书，不拜；命军容何志礼、御史黄澍入贺，观朝廷。澍请召对，大言阁部马士英奸擅；士英怒，遂以他事逮澍。□□□继咸以□□兵部侍郎总督应、皖等处，上□□□□权以制左，不听。会北师平西王三桂西捣贼，自成复□□□□贼。适为伪太子王之明事，遂用黄澍□为檄，□□□□以兵东下，意□远贼。至九江，卧疾；招继咸语太子事，为泣□。子梦庚等□伪为太子密谕，劫诸将；诸将愤起。时继咸劝勿扰九江，而步卒入□□□。□□□，江水为赤。继咸大惊曰：『是乱也』。良玉亦曰：『〔我负〕临候』！□呕血死。梦庚秘不发丧，顺流东亡。阁部马士英□请靖南侯黄得功等御左兵上流，梦庚败。

论曰：宁南令不肃，可□先登；为大将则未也。

——见原书「列传」卷之十九

· 黄得功（翁之琪）

黄得功，号虎山；陕西固原人（或曰辽东开原卫人）。初，为掌鞭，走人清、徐之道。偶御词臣汪渐磐从子入都，辄为之下大盗；渐磐异之，以闻，得补觉华岛把总。积功，崇祯丙子召对；上览其貌，短小矫捷、气夺彪虎，因立授黄花镇都督。久之，总禁旅出河南，救桐城；献贼望见尘起，大惊解去。时刘超据永城作乱，试御史监军王汉奉命援汴捷，以兵攻超，为所杀；得功擒斩超。上功，封靖南伯。寻与刘良佐合，追献贼於潜山，斩首万余级，焚贼一堵墙於林中。

甲申国变，邀总兵陈洪范起山东勤王。□□□□□以定策勳，晋靖南侯，廕一子锦衣千户世袭。诏分镇江北，得功汎庐州。时高杰傲不奉诏，欲保妻子扬州；扬百姓闭关不许。得功时屯仪真，适总兵黄斌卿以兵三千至；斌卿素与靖南通□，欲合靖南军。杰起半道邀截之；得功怒，单骑横撞杰军。杰辟易莫敢近，杰遂与得功隙；时监军万元吉为和解之。已而杰死於河南许定国，得功曰：『寡妇孤儿矣，吾不报』！先是，四镇之立，督师史可法主之。及拥重兵，三镇卒骄蹇不受约；得功曰：『吾等非阁部不至此』。辄先下拜；谩骂：『有不与得功俱者，吾手批之』！於是咸奉师生礼如故事。得功慷慨直致，无仪文。不解文字，凡奏檄使人旁诵之，所欲改窜字样，皆如法。忠义性成，不烦讲解。日饮火酒最多。常用六十斤铁杆，运掉若飞；敌闻风辄胆裂。

时有伪太子收狱会勘，得功心疑真太子，与诸镇各疏争之。宁南侯左良玉遂以太子为名，东犯阡及九江。阁部士英惧，讽兵部侍郎阮大铖躬迎得功，御上流。一再败左兵，进封靖国公，加太子太保，锦衣卫世袭。移屯芜湖，营板子矶；北兵自是卷甲直下，由天长、六合竟逼扬州，无与堵逆。

五月十一日，从天宁洲渡江，疾走舟阳道。福主宵遁芜湖，依得功军。得功曰：『帝已离重，吾军轻，不足左右，奈何哉』！立登征南将军翁之琪舟，议南迁。而得功前营马得功，靖南爱将也；尝以马吾□身，赐己名，故亦称得功云。壁燕子矶广昌伯刘良佐，故与得功从亲；得功方拟奉血诏相邀共事，而良佐疾移屯江口，使人邀马得功夜盟之，令北降。遂里北制而外饰明服，致词得功，邀话中流；得功不疑，葛袍便帽，从百余人小艇赴良佐。良佐出，邀迎甚恭。甫就坐，得功谛视良佐鬓发露，惊拍案；则前营马得功麾其健儿纷前，号曰：『靖国北降良便』！得功叱曰：『即若尽叛去，吾一人乃不能奋报天子哉』！语未毕，流矢贯喉；得功即拔刀自刎死。子黄雷，被执。

镇南翁之琪者，字玄倩；浙江仁和人。祖汝进，万历乙未进士；历官广西参政。之琪敏干，卓犖自命；走人艰难不遗力。折节读书，补诸生。己卯秋闱蹶，投试武场

輒隼。此日汝进方觞客，报至，汝进投觞为不酣；曰：『余游宦无多长，唯督挞弁夫称能。安得清白束子孙，俛为人执鞭』。庚辰，除舟山水师守备。东阳许都反，奉调往剿；事已，升参将，镇金、衢等处。甲申三月国变，之琪部精勇勤王，集旧辖海舟，从水道方至京口。会南都立，嘉其忠能，升总兵官；并御叛师左良玉有功，加太子少师，以左都督挂征南将军印。南都失守，之琪驻芜湖；驾奔黄得功军，以之琪浙人，过之琪舟，议迁浙。未决，时靖南卒；靖南故部失制，鼎沸江上。田雄者捷登之琪舟，冒掖驾去。之琪牵之不得，出舟望哭，自刳以送之；为二十一日辰刻板子矶事也。子骏，年十六，浮洋间关，迹得父屍归葬之。

论曰：偏安之业，败於上流一击。□曰迹宁南，似不甚为社稷虑；其如贵阳以私恐，必借靖南塞怨也。虎山之忠，能一二镇；倘使饱食庖、六，手铁杆当河上，即广昌不骤望尘靡，而东平亦或稍击桨淮上。宁南不激，视靖南为归，半壁势成矣；一举而诸镇俱废，士英之筹国莫论，亦岂所以自筹也哉！此後奋起百难，虽皆视死如归，而多拙於战；又不能如靖南之谦。靖南即不读书，亦可附大将之林矣；咄咄！明季一人。

——见原书「列传」卷之十九

· 播匿诸臣列传 ·

章正宸（董孝瞻）、何弘仁、沈彩（王季木、杨玄锡）

黑子僧

刘永锡（汉人）

王兆熊

· 章正宸（董孝瞻）、何弘仁、沈彩（王季木、杨玄锡）

章正宸，字羽侯，号格庵；浙江会稽人。崇祯辛未进士，由庶吉士历吏科都给事中。言笑巾服，真气可挹。

弘光中，以原官起用，首疏勤学、辨官、肃纲纪、正人心四事。有云：『陛下为先帝复讎，远建鸿业；而肘腋之间，威令阻格。臣恐不逞之徒，相缘而起。天启之季，丧心媚逆，视君父如行路；余孽犹存，薰习弥甚也。请确核附贼姓名，下廷臣公议，分别正罪，如唐肃宗所定之六等、宋李纲所议之三等；振励国威、奖扶士节，全系於此』。又言：『今日江左形势，视宋、晋更为艰难。肩背腹心，三面受敌；悍将骄兵，一无足恃；而当事顾泄泄偷息。两月以来，闻大吏锡鞶矣，不闻献馘；

闻武臣私斗矣，不闻公战；闻老成引遁矣，不闻敌忾；闻诸生卷堂矣，不闻请缨。如此而曰兴朝之气象，臣虽愚，知其未也。今者都门举动、工作仪文，纷纷兴举，识者固已疑之。至於省视山陵、祔奠梓宫、起居青宫二王，何等切要！而迟迟其行；何以昭陛下每饭不忘寝庙之意！又闻北事种种，势摇山东；而当国大臣，仓皇罔措，损威屈体，隳天下忠臣义士之气。臣窃羞之！臣切痛之！伏乞縞素六师，亲蹕淮右；人切同仇，鼓动江北。失今不为，转眼秋高，控弦南指，饮马长淮；而贼又驰突荆、襄，顺流东下。瓦解已成，噬脐何及！不省。转大理寺丞，寻解去。

鲁王监国，起历礼部尚书大学士。北师入城，正宸走父茔，饿十四日不死；遂削发，云游不知所之。

又同县诸生董孝瞻，亦於城破之日，遁迹去。

何弘仁，号书台；浙江会稽人。崇祯甲戌进士；以不营官，官亦不甚达。乙酉，鲁王监国绍兴，弘仁亦与定策，擢御史。□□□□□入越，弘仁伪作书傅衣带，弃岭树下，使人讹传已死。诗曰：『有心扶日月，无计巩江山』云云；复署尾云：『弘仁间关奔行在，闻台又失守，已矣！无复可为。吾非吾身，吾何家为？吾子者，食贫守节可矣。明御史何弘仁』。

沈彩，字素先；浙江会稽人。崇祯癸酉，举顺天贤书。乙酉，鲁王监国绍兴；八月闽诏下，监国不奉诏，闽阁部黄鸣俊将以兵入越。彩系鸣俊门下士，王加彩御史衔，与御史王绍美逆鸣俊於金华；彩议论侃侃，鸣俊为色沮。大略云：『闽、越兢辛苦马上，止以「大明」二字。鲁单露沮江，当冲数月，功莫大焉；非有方、郑诸将军矢石钱塘，仙霞岭下戍卒不卧久矣！鲁为唐扞边，奈何自撤其藩？且情有所不忍；唐、鲁皆高皇帝子，始以兄弟至亲；鲁以闰六月起、唐以七月起，事迟而欲先功多者，窃为天下所诽笑。且唐非有小振作，以厌天下也。土地之非朱氏者无数矣；勤此半浙，置江以北不问，亦何足为哉！即使鲁屈奉命，天下以唐无远略，徒创骨肉；宗室之起为难者，岂少哉！豪杰欲起，正在瞻望。此岂阅墙之时？即事成而听天人之所归，未晚』。於是唐姑使御史陆清原发饷三万两，驰犒江上诸营；而不即鲁厄，彩力居多。

越败，监国驾之台州；彩追不及，伪投八官江而死，匿姓名亡去。

先是，李贼陷陕西。王季木（失其名），府谷人，以进士历蓟辽总督；方家居，贼陷遁去，不知所之。相传杨玄锡，高蹈绍兴之汤湖。玄锡，福建人。

论曰：越中三敢言，刘念台、熊雨殷、章格庵是也；而越中三洁身，则格庵又与书台、素先鼎足。素先讽谕，足比闽之刘中藻，而书台文采颇有余。孔子曰：『殷有三仁』。三子可以追念台、雨殷死越诸公，弗後。曰：去与死一也，而殷之去以殷

存。

——见原书「列传」卷之二十一

· 黑子僧

黑子僧，貌短小，美须髯，年约四十以外。即其音，似燕、冀人。左目角有黑子一。从一头陀駸，駸宁国人。

壬辰八月，半峰者以僧服游庐山，遇之；语相得，与作伴。黑子无所携，止一囊卧具耳。出口经、史，而不稍具铅槧。半峰请其姓名，固不答；但曰『鹫灵，顷自黄山来』。即駸头陀，固不知黑子何自与其真姓名也。半峰以为逋者，遂不问。其自言，亦但以半峰云。相与同至西湖，入法相寺；就所为听月者，居焉。听月虽僧，好交深人，故不必二僧氏籍。三人相对极秘，终不言甚故。黑子谈古事甚详，如悬河；至烈皇帝，便口吃。与半峰卧起，隔一板；或中夜闻涕泣声，问之复不答。尝出吴道子所画孔夫子像，悬中堂；以僧礼拜之。口哦而无诗；偶书字案几，辄以抹去，不令人见。明年九月，半峰欲归葬其父母，别歔歔；语黑子：『此行矣，请悉微示我，或得再晤何处』？则趁口曰：『再晤、再晤而已』。不益一字也。半峰为四韵赠之，黑子辄引半峰笔踵前韵；既成，手掙碎之，曰：『吾不能书，勿令知我手指如是』。半峰别去，与语家粤东；则曰：『吾须看粤东』。又明年，忽辞听月去。嗣遣头陀駸，一寒温听月，不知何之；竟亦不走看半峰也。

半峰者，广东陈忠愍邦彦子；名恭尹，字元孝。忠愍以弄兵及难，故恭尹为野走。余晤半峰，得从录诸幽潜故事（忠愍别有传）。而听月，为余族弟得临济之传者法名。

论曰：吾见杨思仁气体严重，殊非寻常。来湖上数月，卒不出真里氏，已释去。黑子僧抑又深秘矣；胸中有文字，能不令五指漏出。譬之棋傍，不一口赞，如绝不知棋；此何等坚忍。始知报庵王杞人，终是五指惹事。

——见原书「列传」卷之二十一

· 刘永锡（汉人）

刘永锡，字敛于；河南魏县人。少负奇节，凡象纬、兵农之学无不精研；人称洹水夫子。崇祯丙子乡荐，就教长洲。甫渡江，闻京师陷；刺船歌曰：『白日落兮水茫茫，家千里兮来远方。壮士离忧兮，何时归故乡』！音节慷慨，同舟皆泣下。

南都再造，或先容於马贵阳，永锡谢不应。署崇明得民；及解去来吴，号叛者万人

。先是，有济南老人，匿姓名来游吴，自号汉人；居学宫傍，永锡与深交。老人摄衣直入据上坐，不问寒暑也。南都复败，永锡隐东门之外阳城。或重其名，百说之出；永锡偏袒扼腕，疾视曰：『我中原男子，年二十渡漳河、登大伾，跃马振襟，两河豪杰无不知永锡者；奈何庭辱我！再至，我裂尺帛以待矣』。

自是，草衣敝履，以葛巾护其发，日坐土室中。久之，其子临从故里来，道堕马死；永锡曰：『天之报我何厚哉』！作歌曰：『溯彼中流兮，采其苕矣；思君与父兮，遑问他矣。身为饥夫兮，天所命矣；中心殷殷兮，涕之陨矣』！歌罢，辄泪下。永锡长八尺，容貌故甚伟；至是毁形骨立，两颧突，见者哀之。

甲午秋，病剧，犹呼烈皇帝者三，卒。济南汉人徒跣至，拊其背哭曰：『嗟乎！刘公须眉无恙哉』！陈子济生为经纪其丧，葬之。

论曰：钦于欲为汉人而不得；苍凉客死，「采薇」之歌应「采苕」以阉之。汉人果得为汉人矣。济生字皇士，常类刻节义诗章而系之传；於阐幽之功居多。歿後，其门下人且以其遗草渔之，得反坐。

——见原书「列传」卷之二十一

· 王兆熊

王兆熊，建宁人；为浦城学谕。笃行好古，尝读郑所南「心史」，涕泣盈把。甲申闻国变，号不食者数日。其门人潘达为跪进饮食，不死。遂鬻其所藏书，得三十金，给妻孥；诀曰：『若以此归舍，譬兆熊此日死』！衰絰出门，北逾岭。每至城市人烟处，便下拜呼曰：『若祖父衣食何家？天子死社稷，胡不起』！条金陵八事，格不得上。依史阁部扬州；史曰：『公此心无所用矣，奈何』！为对泣。卒缟素不苟葺。史後殉国，兆熊不知所终。

论曰：此潘达为余言之。达字雪生，癸未赘余门，善书。余命书余柱联十字：『何人也作史？吾党未成章』。拟合撰「晋乘」，不果。又云：『长沙郭都贤，以己未进士，历江西巡抚、都御史，甲申後祝发为僧，遗世故』。

——见原书「列传」卷之二十一

· 庸误诸臣列传 ·

熊文灿

· 熊文灿

熊文灿，字□□；贵州泸溪人。客薪水无子，有滇客道得弃儿归之，名文灿。令读书，成进士。

崇祯元年，以都御史巡抚福建；招降弄海泉州郑芝龙，诏与游击衔，立功自赎。已芝龙奉檄，击走同盗刘香老於小埕。朝廷以为功，晋文灿总督两广。时香老连犯长乐、海丰，诡云愿抚，意缓兵；文灿信之，令道臣洪云蒸、康承祖、参将夏之木、张一杰等往谢道山受降。香老辄执之，逆拒；文灿诱过道将。上曰：『贼渠受抚，自当听其输诚；安得登舟降体！督臣节制何在』？令文灿戴罪剿盗。明年，芝龙合粤兵败香老於田尾远洋，香老自杀；降其众千余人。诏以文灿为兵部尚书兼副都御史，总理直隶、山、陕、川、湖军务，督剿流寇。

文灿与枢臣杨嗣昌谋大举兵，请加赋，海内积怨。文灿提边兵，奉限合剿。次襄阳，遣副将龙在田邀击革里眼、射塌天於双沟，大破之；老回回等奔枣阳。逐北，斩首六千余级，夺其牛马骡万头。

十一年，曹操等九营独保险内浙山中，文灿檄总兵左良玉、陈洪范进兵浙川，意主招款。阅月，总督洪承畴等以勤王之师出潼关，声振；曹操惧，率九营从郧阳浅渚乱流而涉，突走均州，叩太和山提督太监李维政乞抚。维政言文灿，文灿止军，上书赦其罪；大赉诸营头目，请官曹操游击将军。曹操固谢，不受；且曰：『不敢靡朝廷一钱，愿耕此自食』。文灿信之，辄许房、竹百姓分居互耕，群贼相保不散。

时献忠亦受款穀城，曹操与潜通。巡抚戴东旻为文灿危之，告文灿：『宜以理臣各镇现在兵马，再令督臣调发秦兵，由兴安驰赴协捣；渠魁授首，胁从自散』。文灿不听，以为挠抚议；嗣昌遂请罪免东旻，以王鳌永代之。已而总兵左良玉遣降将刘国能往招天塌，降其众四千人；文灿署国能为守备。

六月，献忠先反穀城，曹操九营亦起应之；良玉疾蹶，大败於房县。上闻之，大恨；诏文灿革任，仍视事。寻论死西市；而嗣昌以阁部出督师。

文灿子曰会初走依郑氏，潜东泐。

论曰：盗有源，以饥起；盗益扰民无耕地，民尽走盗无耕人。故饥无已时，盗亦无已时。诸流与负固贼□□，误□以为至诚可感，失之甚也！间以兵蹙受抚，必有法尽其魁讯。即否，与以名衔，使东御；阳尊之，实孤之，然後可以竟「抚」之一字。彼曰『不靡朝廷一钱』，虽至愚，亦虞其後矣。文灿之计，幸骄儿弗啼；能必其弗啼哉！与杨镐、王化贞、袁崇焕等，总之志无疵而略不足，却喜任事。时奉命治寇者上疏，不便直书贼「某王」（如浑世王、浑天王之类）；约军中，皆改「王」为「亡」。文灿偶战顺天王获捷，亦直书「顺天亡」；奏去，始悟三字不便，为言官所摘。呜呼！「顺天亡」，讖矣夫！

——见原书「列传」卷之二十五

· 叛逆列传 ·

王嘉胤、高迎祥（诸部贼）

罗汝才

李自成

张献忠、孙可望

· 王嘉胤、高迎祥（诸部贼）

王嘉胤，陕西府谷民也。明季，崇祯受命十七载，与流贼终始，总自陕西。元年，秦、晋大饥，边兵稽饷而譁；辄逃伍，合亡命逮捕。廷议裁边饷急，乘障兵咸噪走下。又驿站省过当，河北游民向藉食驿糒，至是无所赖，逡巡溃兵煽，益挺起。嘉胤倡乱延安，陷府谷；合白水盗王贰等，共五、六千人，保险延庆之黄龙山，恣掠州郡。时群盗望风起。高迎祥，安塞人；与李成龙、王异等狂煽，自称「闯王」为盟主。其各队之有主名者：如神一元及弟一魁等（孙继业、苗顺、王子顺、茹成名、黄友才、霍维端、郝小泉、郝临庵、刘哲、谭雄、苗登雾、刑满川、杨光甫、王光恩、高守达、阎正虎、伍林）；其余以诨号着者：如闯将、八大王、曹操、革里眼、左金王、紫金梁、老回回等（小袁营、一斗粟、顺天王、蝎子块、横天一字王、撞天王、乱世王、浑天王、独行狼、满天星、关索、过天星、翻山鹞、金翅鹏、黄老虎、小红娘、一丈青、龙江水、掠地虎、可天飞、混天飞、浑天猴、不沾泥、滚地狼、一杆枪、八金刚、扫地王、闯塌天、摇天柱、破甲锥、邢红娘、李靖王、鏊金锤、显道神、乡里人、掠山虎、整十万、活地草、上天龙、混世王、独头虎、上天猴、一只虎、金狗儿、摇天动、抓地虎、东山虎、自来虎、点灯子、黑煞神、豹五、通天柱、九条龙、张胖子、飞山虎、托天王、十反王、整齐王、小秦王、新来虎、钻天哨、开山斧、改世王、爬山王、副塌天、一连鵒、张妙子、邢家米、大天王、镇天王、一条葱、九梁星、混十万、一座城、李老柴、一盏灯），不可胜数。

其所掠陷：在陕西则西安（咸阳、华州、合阳、白水、泾阳、三原、永嘉、同官、富平、邠州、盩厔、澄城、韩城、蒲城、洛南、商南、耀州、乾州）、汉中（凤县、宁羌、汉阴、石泉、略阳、平利、白河、紫阳）、平凉（灵台、固原、崇信、泾县、隆德）、巩昌（安定、宁远、清水、文昌、会宁、西和、两当、成县）、庆阳（宁州、合水）、延安（安塞、甘泉、安定、保安、延州、青涧、鄜州、路川、中部、宜君、绥德、米脂、葭州、府谷）、临洮（兰州）等处及宁夏等卫。三年，混

天王率其党数十股入山西；所掠陷：则太原（榆次、交城、文水、河曲、寿阳、东平、沂州、代州、岢岚）、平阳（蒲州、垣曲、霍州、隰州、永和）、潞安（长子、平顺）、汾州（临县、永宁州）、辽州（榆社、和顺）、泽州（沁水、阳城）等处。五年，陕贼蹶出，残畿南，则真定（南宫、宁晋）、广平（大召、开县）等处。在河南贼，自山右逸而南，则开封（尉氏、封丘、兰阳、陈州、许州、项城、襄城、偃城、长葛、禹州、新郑、荥阳、泛水）、归德（虞城、睢州）、彰德（汤阴、林县、武安、涉县）、卫辉（辉县）、怀庆（修武、武涉）、河南（巩县、陕州、灵宝、阌乡、卢氏）、南阳（邓州、内乡、淅川、新野、叶县）、汝宁（信阳、光州、固始、商城）、汝州（伊阳）等处。在湖广，土贼先起；六年，陕、豫诸贼流入，则襄阳（穀城、光化、均州、枣阳）、德安（应城、随州）、黄州（罗田、麻城、蕲水、黄梅）、荆州（彝陵州）、岳州（临湘、澧州）、长沙（湘潭、湘阴）、郢阳（房县、竹山、竹溪、上津、陨西、保康）等处。在江以北，七年诸贼流入，则应天（六合）、凤阳（怀远、寿州、霍丘、蒙城、泗州、宿州、天长、颍州、亳州、灵璧）、淮安（邳州、睢宁）、庐州（舒城、无为州、巢县、六安州、英山、霍山）、安庆（桐城、潜山、太湖、宿松）、太平（芜湖、和县、含山、滁县、全椒、滁州、萧县、丰县）等处。其在四川，十一年贼自汉中入，则保宁（广元、剑县、梓潼）、重庆（巴县）、夔州（奉节、巫山、大昌、云阳、开县、达州）等处。掠不一村，陷不留守。

其流营之制：营有精兵，兵一，许养子二十人，惟其所掠；十五以上、四十以下约精兵一万，则二十余万人矣。警候严，不能逸一；逸者谓之「落草」。精兵得合男女，生子弃之。人母囊一金，犯者死；令必行。虽拔城邑，列幕若穹庐。其甲缝紵绵数十重，轻而韧；当箭炮不入。三鼓尽，精兵飭。军中静，唯闻传呼声，鞞马以候。精兵三饭，其余再饭也。严冬掠茵荐，藉马足；或剖人腹为槽。饮马杂人血习，遇人悲鸣，思啖之。行兵倏忽，虽百万之众，惟主将马首东西；临阵反顾死。攻城以骑布围，步兵肉搏向城；或负攒基穴城，炮其下崩之。甚不甚，名「大、小放」；否则留土柱，离数百步，巨絙牵之。设铜牌四驰：『降不杀，越一、二日死十三、四，越五、六日屠』。聚屍为燎，名「打亮」。获马驴为上功，军仗次之，衣币又次之；珍宝无所用，金银或散弃之矣。所在攫食，无须市饱。总□管家主之。

其期会，率以狡悍势者为盟主。军止，辄出较骑射；及晡归。行则惟黄河阻轡；淮、泗、泾、渭，人皆蹠足踞马背。马所壅阨，水为不行；一流浅，步卒褰裳而涉。十余年间，未尝互吞并；穷则相依，叛伏不常。号令最一，亦事智谲。搏城人挟三砖，或冒雪僵死、矢石死，屍倚城下不仆。伪造抚檄、伪为官军衣饰、伪作米商、伪充试士，不一状。或败，残尽：令妇女荷戈前，官军割以当馘；或注婴儿於槃百千，悬火炙之，哀号为乐；或裸妇女冒城，愧沮死以压炮，倒埋之，植其跗。阴沟向城，炮为不的；主炮者立取圉脰，外向，复厌胜之。自犯安、庐之後，行诈益神；多购蕲、黄人为间，或携药囊、蓍蔡，或为医卜，或谈青乌、姑布星家言，或缁流、黄冠，或为乞丐、妓女、戏术，分布江、皖，乘间摧荡。诸人畏死且饮贿，刺

事较侦探更密。大率秦穷而走豫，豫穷而走楚，楚穷而复走秦、豫，走山西、畿南、江北、四川等处，势如转蓬，散而复聚、覆而复起。然官军多畏贼不前，前不战；穷乡僻集，馘良为贼。以是报级最多，而贼故无恙也。民畏兵甚於贼，咸愿从贼；盗源不清，与运俱长。

若土贼之遥应声势，杰起其乡者：开州，则袁时中。以众五万起，困陈、蔡之间；自成招为先锋，许配以女。令以二十万众南窥凤、泗，入蒙城，土矿诸贼附之。为巡抚朱大典所败，总兵刘良佐复大败之。贼穷，多自经林木间；二十万鸟兽散。时中以是忤自成，欲就款於巡按苏京；自成使扶沟诸生往说之，执生送京师。李贼怒，攻杀之，并其众。郟县，则李际遇。初众五万；既降，复通李贼攻汝州，城陷。河阴，则孟三起。封丘，则艾一、侯二。河南，则瓦罐子、一斗粟。山东，则李廷实等。廷实高唐州人，与其党李鼎铉等率众陷州治。贼李青山，亦间据东平。自是，兖州二十州县一时各啸聚响应；而东阿、汶上，蹂更甚。巡抚王国宾檄总兵刘泽清击复东平，鲁府左相俞起蛟与原任给事中范淑泰合捣诸贼，缚青山於梁山，献俘。时泰安贼十余万掠宁阳、曲阜、兖州等处，尝掠妇女，蒙以甲胄守其寨，而身四残；官兵逐之，南走邳州、犯徐州，火漕艘十有六，还走东平。又丰县贼十余万，围县治，徐州贼应之；已皆扑灭。湖广兴国贼万人，伪作香客，陷郢西及上津、镇安，鼓众流入江西太和、吉安等处。寿州贼数万，起旋灭。澧州贼陷城及常德、武冈，杀岷王。四川兴山贼入瞿塘，陷夔州一宿去；渡利州河，攻平阳、白水等关，走奉节：诸不胜纪。

盖先後文臣之奉令治贼者，自阁部督师杨嗣昌而外，总督则杨鹤、陈奇瑜、丁启睿、傅宗龙、孙传庭、洪承畴、卢象昇，总理则熊文灿，保督则杨文岳，江督则吕大器、高斗光，淮督朱大典、王家祯，宣大督张宗衡，巡抚陕西则刘广元、练国事、李乔、甘学阔、邵捷春、冯师孔，於河南则苗胙土、陈良训、常道立、李仙风，於山西则许鼎臣、宋统殷、戴君恩、吴甡，於平阳则宋祖舜、王鳌永、王永祚、袁继咸，於安庐则郑二阳、史可法，於湖广则宋一鹤、余应桂、方孔照，沅抚则陈睿谟、李乾德，於山东则王国宾，於四川则邵捷春、陈士奇，於甘肃则林日瑞；剿抚异尚，胜败殊势。而武臣之奉督抚檄而治贼者，总兵则杜文焕、贺虎臣、张福臻、邓玘、王承恩、刘成功、倪宠、王朴、尤世威、祖宽、孙兴祖、刘泽清、伍维藩、柳绍宗、俞冲霄、王继禹、王国梁、陈永福、张应元、秦翼明、李国奇、郑嘉栋、左良玉、刘良佐、方国安、高杰、陈洪范、汪云凤、黄得功、刘洪起、牛成虎、杜先春、孔希贵、尹先民、何一德、刘进忠、周遇吉、郭天声等，副将则贺人龙、左光先、曹文诏、张应昌、祖大乐、陈邦福、猛如虎、杨世恩、曹变蛟、秦凤仪、张应元、马士秀、余声桓等；初亦颇有斩获，久之强弱殊等、忠叛不一。

而官军战胜之可纪者：最初，商雒道刘应选，斩贼五百余级於汉南；巡抚刘广生，遣将斩贼三千级於韩城，降三百余人；总兵杜文焕，斩贼首苗登雾於安定；总兵贺虎臣，斩贼六百级於合水。三年，副总兵曹文诏，斩贼一千五百级於河西；游击伍

維藩，斬賊五百級於慶陽；總督楊鶴，遣將斬賊一千一百級於宜君；雒川都司曹變蛟，追斬賊一千四百級於唐毛山。四年，總督洪承疇，遣將敗賊於沁水之桑落鎮，擒賊點燈子（即趙四兒也）；曹文詔，斬首難賊王嘉胤於陽城；總兵王承恩，斬賊一千七百級於中都；賀虎臣，斬賊五百級於慶陽；承恩，復誘斬賊首譚雄等五人於安塞；安定總兵孫興祖，戰六捷於萬泉；虎臣、文詔，合斬賊一千餘級於慶陽之西澳；文詔，復斬賊首可天飛，俘賊首獨行狼、郝臨庵於襄樂。五年，文詔、承恩，連敗賊於甘泉、於安塞、於宜君，斬賊首霍惟端，降數千人；六年，巡撫陳奇瑜，遣將斬賊一千六百級於永寧，賊首鑽天哨、開山斧死，焚其巢；文詔，復斬賊一千五百級於忻、代之間，尋又斬賊千餘級於陽城，俘賊首滿天星；總兵張應昌，敗賊於沁水之平山，獲賊首一盞燈（即張有義也）；總兵祖寬，斬賊千餘級於龍門白沙。七年，總督奇瑜，合保撫盧象昇剿賊竹山、竹溪，前後合斬二千四百餘級；巡撫甘學閎，遣將斬賊一千二百級於華陽、東原。八年，總兵羅于莘，連敗賊於漢南，奪還子女二千人。九年，象昇追敗賊於陝州，斬賊首黑煞神、飛山虎等；副總兵祖大樂，斬賊首混天王於永城，復設伏斬賊一千四百級於開封之石家橋，又追敗之蘭陽；總督柳紹宗，遣將敗賊過天星於西寧，合總兵左光先復敗之於鹽池，賊過天星入營乞降；巡撫孫傳庭，遣將大破賊於整屋，擒賊首閩王高迎祥、劉哲等獻俘，王自用代迎祥部餘賊，稱紫金梁；祖寬，敗獻忠等七賊於滁州，追斬一千二百級；淮撫朱大典，遣副將楊世恩截之於定遠，復斬賊六百級。十年，川兵大敗賊混天王、蝎子塊於廣元，斬首千餘級；總兵良玉，大敗賊於舒城、六合，連戰三捷；總兵秦翼明，敗賊闖塌天於細石嶺，俘賊首一條葱、新來虎。十一年，良玉與總兵陳洪范，大敗賊於郟西，復邀擊革里眼、闖塌天等於雙溝大破之，老回回等東奔，追斬六千餘級，曹操等九營俱，會勤王師出潼關，疑來就撫，而賊獻忠亦就撫。明年復叛，官兵大敗李賊於梓潼，自成單身走依獻忠；良玉大破賊於許州，降賊首劉國能，復敗之於內鄉，又破射塌天、老回回、改世王於鎮城，射塌天降，斬賊二千七百級、降四千人。賊曹操等九營入蜀，川撫邵捷春及將軍左良玉、總兵鄭家棟、張應元、江云鳳、方國安、賀人龍、李國奇、羅于莘及石砮秦良玉、監軍萬元吉等大敗賊於鄭家寨、於郭家寨、於尖山寨、於馬家寨、於留馬壩，賊首東山虎伏誅；再斬賊二千一百級於營仙嶺，復斬一千二百級於馬溺河、俘六百餘人，又追斬五百餘級、俘賊首掠山虎、一杆槍、自來虎、托天王、鑒金錘、金狗兒、伍林等；旋又敗之於臨江、於窰山、於連州、於鳳烈鋪、於袁坝駟，共斬賊數千級，俘滾地狼、可天虎於高城，小秦王、金翅鵬、過天星、掃地王、李靖王、飛上天、關索、王光恩、楊光甫等降，曹操入川九營而殲其六。川兵大敗李賊於函谷，困之於漢南。十三年，巡撫卬睿復斬賊數千級於函谷，蝎子塊伏誅。總兵王繼禹，使游擊高廉敗土賊李际遇於郟縣，斬二千餘級，追至尉氏。總兵李建武等，復斬賊一千三百餘級於菜園。十四年，總兵陳永福，敗李賊於開封；良玉，敗賊獻忠於西山、於信陽、於郟陽；總督卬睿，復敗之於麻城，斬首一千二百餘級，又敗之於南陽，獻忠走依左、革，入霍山自保；參將李栩，大敗賊於壽州，斬首千餘級。十五年，督師傳廷，遣總兵牛成虎、高杰、董學元先後斬李賊千餘級於南陽；總兵黃得功、劉良佐，合敗獻賊於潛山，斬首萬餘級，焚賊首一堵牆於林中；良玉復敗之於安慶，奪馬驢五千。十

六年，方国安等斩献忠贼千余级於大谷，复黄州；监纪知县吴敏，合师复武昌及汉阳等县；副将马进忠与都司高山，复袁州，斩贼二千四百余级，夺马驴五百、弓矢数万，戮伪官孙仰寰，旋复岳州；副将马士秀，复临湘，追斩贼四千余级於长沙；江督吕大器，复吉安等处；总督传庭，遣牛成虎等败李贼於洛阳、於河岸、於朱仙镇之南，斩其众数千级；方国安，复承天，旋败之於彝陵，复汝宁，李贼入关；原任总兵尤世威等，大败之於榆林，追败之於宁夏，斩首数万。十七年，总兵周遇吉，大败李贼於宁武，亦斩贼万人。时有爬山虎败，被执；临刑，拟项羽乌江句，叹曰：『此天亡我，非战之罪也』！所降托天王（即常国安）、过天星（即惠登相）、翻山鹞（郎高杰）、紫金梁（即王国用）、显道神（即高家计），余不及详矣。通合零捷，不啻斩贼数千万；大率拾难民级为多，亦或馘良当□。至於贼驱难民当先，摧荡颇易，不必皆真贼也。

凡贼就款，无不旋踵叛之。而叛之最失事者，於延绥、河西则十余部，总督杨鹤各给免死牌去；又於固原，则设御座城楼之上，贼六十余部伏拜呼万岁，设誓竟去，留其□十人，以参将吴弘器领之，旋亦尽散。於汉中则数十部，□巴蜀之险，霖雨四十日，弓胶解，饥无食，总督陈奇瑜令传餐送之；越栈道辄叛，杀监护官五十余员，连陷州县。於湖广之均州，则曹操等九营就抚於总理，文灿宴之迎恩殿，供亿甚备，散处房、竹之间，文灿一切为羈縻；时张献忠全部亦走款於左良玉，栖穀城，密与呼应；明年复叛。

凡督、抚之因贼而死者：杨嗣昌以两亲王不保，自缢死；熊文灿以抚事不终，逮市死；傅宗龙困项城、汪乔年保襄城，咸不屈死；杨文岳溃汝宁，被执不屈死；王汉攻永城，机泄死；宋一鹤守承天，苦战不胜死；孙传庭退保关中，与冯师孔并战死；李仙凤被逮，不赴死；陈士奇守重庆，死；卢象昇战畿南，死；□□冯守宣府，死；林曰瑞守甘肃，死；卫景瑗守大同，死。□两司府州县之死於诸贼者，不胜纪（见诸传）。

其贼之既款，能杀贼而□□蒙恤、或不及蒙恤者，则扫地王张一三死於梓潼，射塌天李万庆死於襄城，伍林死於□□，翻山鹞高杰後死於北降之许定国（盖诸贼犯凤阳祖陵及荆王坟园而残□□藩王，则在自成、献忠两传）。

□十六年，群盗□□降略尽。惟曹操（即罗如才）、老回回（即马守应）、革里眼（即贺一龙）、左金王（即蔺养成）、争世王（即贺锦）、治世王（即刘希充）尽为自成所并，於是李、张二寇妄大中原矣。

论曰：自施耐庵作「水浒传」、罗贯中续成之笔，貽祸者三而未已也。一则万历末年，徐鸿儒以郅城人倡白莲教，巢於梁家楼，直欲亲见梁山泊故事。一则天启中，「点将录」以天罡星彷彿分署李三才等三十六人，以地煞星分署顾大章等七十二人；逆魏与崔，借以尽残善类。一则崇祯中，流贼初起，□为指名，亦辄如传中各立

诨号，如托天王、一丈青等□勇出相，作梁山泊好汉；其为数十倍於天罡、地煞不止。前七年，为水浒第一演义，而元气全泯；後十七年，为水浒第三演义，而国命随尽。至吴中金生圣叹批评此传为第六才子书，於文无害；而□别案无故见杀，耐庵、贯中之笔良可畏也。至今江南□□□□叶子，其谱本之冯子犹龙，杂坐必以此为乐。□□□□朋劫药投，人怀兵心，群为货御，骨肉而锱铢□□□□□统全乖。嗟此祸，何时或已！□犹龙之笔，岂□□□世所宜奖借哉！余及门陆董志，诸生；崇祯末召对，奉密命行间，无所就。国变，不出；尝作马蹄轩□□□□□□□□□□以百万为冲末，作洞仙歌□□□□□□□□□终难博。盼上金台途路错，访兰□□□□□□□□□只听连声阁阁。而今淘取出瓦片，□□□□□□□□调拨蓼儿注。百老千生，走来笔下，堪酬□□□□□用婆心做死马文章，把世人医活。志更名东陆，□□□□多着述。

——见原书「列传」卷之三十一

· 罗汝才

罗汝才，陕西延安人；贼中号为「曹操」，以其多智狡猾也。

崇祯初，隶贼首闯王高迎祥；後合献忠，最後合李自成，□□事自成。凡破城，自成取六、汝才取四。□汝才战□四、五万，马□□□□驹，厮养不下四、五十□。□兵长於攻、罗兵长於战，相倚为用。汝才老而猾，嗜杀□□房数百、女乐数部，所□□□歌舞。自成矜之：『曹操□□□也，何能为』！以山东人□□□〔谋〕主。初从陕诸寇□□□□□。

八年，乃以曹操□□□与闯□□□□□□□□□□□□□□□□□□□□□□
□□□□□□□□□□□□□□□□□□□□□□□□□□□□□□□□□□
□□兵。祖大乐□□□□□□□□□□□□□□□□□息郢、襄。及总理卢象昇
勤□□□□营共二十万，沿江长驱，烽火及於仪、扬。

十一年，□□□盟主，会群盗过天星、托天王、十反王、整齐王、小素〔王〕、□□王、整十万、革里眼等於陕州；而老回回另为部。时勤□□师出潼关，汝才误谓兵之；乞抚於总理熊文灿曰：『汝才愿佃房、竹自食』。与游击将军衔，不受；欲散其胁从，不可；简骁壮从征，复不可。文灿不得已，听诸屯错民而处。

明年，□□应张献忠，败左良玉於房县。於是阁部嗣昌以督师南讨，汝才略信阳、陷光州。五月，与过天星、小秦王、大天王、摇天柱、混世王、八连莺、关索等入蜀，独革里眼据江北，不与□。□陷文昌、犯夔门，石砭女将秦良玉与监军万元吉共扼夔门，贼鱼贯上，汝才为殿；官军震不敢逆，贼抄夔之後山，无所得；饥。四川抚邵捷春会左良玉壁城下，副将罗于〔莘〕□贼於郑家寨，走之。总兵郑嘉栋合

楚将张应元、汪□□、□国安、陕将贺人龙、李国奇共赴贼尖山寨，断贼为□□□陷泥淖不得驰。而川兵跳涧谷，■〈娄页〉猿猱；贼溃，擒□□□□七十余人，石砮兵复邀败之马家寨。□□马□战□□□□□□□□家坪，逼□□□□□□□跳，路险沓不可□□□□□□两。逐□□里，□□□□复败之营仙岭。秦兵奋，夺汝才大□管队副塌天，贼溃围□□□□□□□是後□□□斩贼数万人。汝才与过天星□□□□□瞿塘水涨，不得渡；而□师出云阳扼其前，元吉□□□□尖山截其後。夔山溪险隘，七贼连营数万，林樾□□□帐，炎歟毒人，马矢薰达数十里，蚊蚋嘖刺。时人马俱□，〔汝〕才走云阳尖山坝，过走云阳水碓口，期两会於开宁。〔秦、蜀〕师三道俱进，以所俘一杆枪、自来虎、伍林为军锋，反□□破其伏，复俘斩数千；掳贼渠掠山虎一十六人。汝才□籍，与诸营保其妇竖尚数万人，走大宁之小岭；诸将扼之於夔东。其过天星、关索走开县，闻汝才败，倍悸北走。总兵嘉栋击败之临江，张应元穷追至窠山，歼其骑五之一；余骑大呼释甲降（内托天王者，常国安也）。应元令降贼抓地虎往招过天星，天星以托天不亲至，疑，不果。时贼首高守达以二百骑来归，过天星西走，守达率其健追之；贼阵乱，马窜禾中泥，相腾践。官军僦而射之，追奔二十里，血流禾畦，畦为赤；刀甲生烟，斂兵风烈舖，共斩首千七百级，擒贼首鎏金锤、金狗儿等。过、关二贼以零骑奔连州，复败之袁坝駟；设伏沟涧中，夜火如星，出林间者尚二十□。□□□□搏遇□□安□□□□援，贼□□山涧，斩首九百级，擒滚地狼等□□□□，降其管□□□虎等四十人。於是嘉栋同副将〔罗于莘〕及降将杨旭、一只虎邀战□城，贼复大败。

□□□□□□营之保大宁也，监军元吉在夔，遣守备刘正国及降将伍林招之；汝才疑，不就。既而小秦王、金翅鹏相率降於嗣昌；汝才素与翅鹏隙，遂杀正国林，走巫山。会左良玉分屯兴、房、二竹间，张献忠保巫山相持；汝才既屡败，党部多来降，势益孤，乃走合献忠渡川西走。而过天星素与献忠隙，闻罗、张合，决计归命；及降过天星（即惠登相，清涧人也），嗣昌令良玉抚其众七千人，简精锐隶良玉军。以降将扫地王、李靖王隶元吉（扫地王，即张一川也），元吉令降丁飞上天招汝才，献忠止之曰：『闻阁部已俘过天星阙下矣，毋为登相续』！汝才遂不应。嗣昌屯巫山，关索败伏深箐，闻过天星降，益惧；与其党王光恩、杨光甫率众三千人就抚。降将张一川寻击献忠於梓潼，陷阵被擒，献忠齧割之；元吉请恤其妻子於彝陵。

十四年，张、罗自川入楚，惟摇天柱留川东；监军元吉留秦、蜀兵屯白帝、神女之间，绝其入楚之路。寻献忠战败南阳；汝才孤，趋邓、浙以合於自成。

十五年，李贼陷襄阳，自称老府；以汝才为代天抚民德威大将军。自成法严而汝才宽，诸将犹以长幼故体，先伏谒汝才稟事；自成忌。会革、左见杀，自成部众稍或侵汝才，往往以驽骀易其善马，积不平。汝才以自成命攻郧阳不下，有黄州陈生者被掳，多智计，意斗李、罗，从中内变；既恶自成於罗，而又劝罗自烙其马以异於李，分左、右、中、前、後各一营。甫烙一营，则又阴报自成：『罗营东通良玉，

其马已姓左矣』。自成侦之，果然；盛具邀贺一龙（即革里眼）及汝才，汝才病不赴；一龙被击，促以二十骑。晨即汝才帐中，取其头；令汝才军，军譁。谕五营二帅贺钦（即争世王）、刘希尧（即治世王）慰一龙部赵一元，使贴其众，且以大势压之。七日始定，并其众，益大。而汝才之将杨承恩、甥黄龙先後以其部入关，就款於秦督孙，亦间归左帅降将惠登相、王光恩二营，合守郧阳。时汝才主谋吉珪亦见杀，而陈生後亦事觉见杀。

论曰：吾於魏武，特有恕辞；以其「几人帝、几人王」之言，故是平论。使汉献无事时，昭烈即中山之後，不获奉命，辄起勤兵，亦岂人臣盛事！魏武可取而不即取，以人臣终；既不取而又制人使不能取，得皆以人臣终。虽劫迁之罪万莫追，而较各路诸长，诚有不可没其功者。乃「曹操」二字尚为万世所唾；汝才何人，顾欲貌之，幸戈获乎？使房、竹九营时受款效命，并有献忠、力制自成，亦足千古。而不出此，屈闯下，顾不乐归诚乎？

——见原书「列传」卷之三十一

· 李自成

李自成，生陕西延安府米脂县，为双泉堡马户守忠之子。守忠无嗣，祷於华山；神示之梦，曰：『吾令破军星子汝』。晚举自成，小名黄来儿。与从子李过并豪浪，亡其父赀，负邑绅艾氏子钱；令晏子清，尝械而游诸市。又窃人羝羊，为主者所挾，见血。妻韩，淫其里人，则尽杀淫者。偕过亡甘州，投参将王国为标兵。国奉调索饷金县，兵譁；自成手杀令及国，遂反。

崇祯二年，归府谷大盗王嘉胤；及安塞高迎祥自称「闯王」，自成附之称「闯将」，自为队（嘉胤、迎祥别有传）。於是合诸贼流毒州县。

七年，自成等诸贼为总督陈奇瑜所扼，困於汉中车箱峡；诡自缚乞降，奇瑜受之。出险复叛，众至十余万。攻陇州，守将贺人龙、张天礼力守；旋为总督洪承畴合剿。

八年，群盗散逐宛、雒，自成独匿终南山中。寻复与张献忠合，南陷凤阳；争陵监所教响手十二人，献忠毁器而归人。自成意左，复入秦，掠富平、宁州；副将艾万年拒之，烈死。挫总兵张全昌、贺人龙、曹文诏诸师，部将多阵亡；迎祥与自成兵益强。出关，为总兵祖大乐所败。合攻滁州，卢象昇、祖宽大破之朱龙桥；遂走登封、密县，复归秦。

九年，出犯巩昌，左光先、曹变蛟破之固原沐家营；走围绥德州及朝邑，秦抚孙传庭俘闯王高迎祥於黑水峪，磔之以殉。自成乃禅称「闯王」，犯阶徽、凤翔、泾阳

、三原，据阶成。

十年冬，协过天星九营由七盘关入蜀，陷宁羌等六县。

十一年，大败梓潼县，走白水。六月，官兵扼阳平关，曹变蛟渡河邀其去路，遂南遶西乡，突出汉中；越江而北，秦抚传庭协左光先遏江奔，斩千余级，降贼渠祁总管，自成食尽。复檄总督承畴大破贼潼关原，自成仅十八骑溃围走（十八人，为刘宗敏、田见秀、谷子成、张世杰、李弥昌、任继荣、任继光、王虎、刘文魁等），窜穀函山不出。及闻督师杨嗣昌与总理熊文灿受献忠、罗汝才之降，明年献忠以房、穀叛，自成复鼓众躡楚，依献忠。献忠意并之，自成有善驴日可六百里，骑疾脱，衣老回回於淅川，病卧。复聚众入陕，嗣昌驻彝陵招之，出谩语不至。已而函谷大败，其所部相继出降；余窜汉南。秦兵蹙之於北，良玉、人龙扼武关以南，食尽，自成自经者数四，养子李双喜慰止之。

刘宗敏者，蓝田鍛工也；自成偶偕宗敏及张鼐潜步丛祠，宗敏卜从乱吉，遂委事自成，杀两妻以从。李岩者，杞县乡荐；初名信，大司马精白子也。常出粟赈饥，得众。而里有以魏党故，毒其父精白者；思报之。遂请於督、抚，得领校卫其乡。仇者中以事，锢狱；岩党杀邑令出之，归自成，署制将军用事。牛金星者，亦卢氏乡荐；介贼医尚綱，得见自成。自成奇其辩，预谋议。时有妓车优及女阉，尝侍自成帐中；优逃归，泄金星通贼状。适金星潜携其妻子，宗人发之，捕官沦死；寻减死，谒自成，署伪弘文馆学士。李岩教自成，以虚誉来群望；伪为「均田免粮」之说相煽诱。而金星进所善卜者宋献策，身不满三尺；上讖记曰：『十八孩儿主神器』。自成大悦。有山西乡荐吉珪，亦就参谋议。自成乘隙怒突，遂自武关遁，息马郧阳深山中；饥民从之者数万，势复振。

十二年冬，奋屠永宁。初，永宁守坚，赖邑绅吏部郎张鼎延饷士力；城破，令武大烈死之，万安王采■〈金轻〉见害。连破四十八砦，土寇一斗粟等群响应；破宜阳，令唐启泰死之（有传）。疾破偃师，令徐日泰骂贼齑死。

十四年，河南总兵王绍禹懼贼，开门入贼。福王常洵闔宫被难，世子由松与王妃出奔。守道王胤昌被创，数日卒；通判白守文、训导张道脉与武职共九人见杀。诸绅死，为原尚书吕维祺、行人王明、同知杨萃、推官常克念、知县刘芳奕、韩金声、乙榜苟良翰（咸有传）。贼以掾吏邵时昌为总理，守河南；生员张旋吉、梅鼎盛，次第授官佐之。自成移攻汴。豫抚李仙风慰安福世子於孟县，俘叛将罗泰龙、尤有义，执邵时昌梟示之；以河南恢复闻。巡按御史高名冲与开封推官黄澍、祥符知县王燮守开封固，贼解去；屠密，登封靡。

时仙风落职，惧罪自杀；以张克俭代之。克俭殉襄难，旋以巡按名衡代之。会保督杨文岳遣其将虎大威、张德昌渡河击贼，大捷於鸣皋，自成负嵎山中。时平贼将军

左良玉自襄阳■〈扌互〉南阳，贺人龙、李国奇之师来会。秦抚丁启睿加尚书，代嗣昌督师；避李强，捷献忠光、固。上寻以丁裕心代启睿，复以汪乔年代裕心。五月，释尚书傅宗龙於狱，为秦督；专办自成。自成乘献忠麻城之败，其所部诸劲辄掩有之。而袁时中者，豫土寇，众二十万，据蒙阴之义门；窥凤翔、犯泗州，抚臣朱大典檄总兵刘良佐败之於龙德寺。会监臣卢九德禁旅夹击，时中渡河归自成。九月，督师宗龙、保督文岳会师新蔡，渡河击贼。

时罗汝才以其众投自成於邓州；汝才少与自成同里閭，自成齿逊，弟畜之。後以穀城之役，唇齿献忠。献忠好凌折等辈，浸不合。既兄事自成，乐为之用。自成闻官兵渡河，亦过河窥汝宁。官兵次孟宁庄，方解鞍休士，不为备。贼匿精锐林莽，前羸弱诱敌；日旰，精锐出，人龙部先奔，国奇乍接辄返，偕虎大威、陈监军逸沈丘。两督但以亲军与贼相搏，傅营西南、杨营东北。夜二鼓，保兵知不敌，挟文岳入项城；次日，奔陈州。宗龙慷慨，谓监军任甲等曰：『宗龙不任治贼，久当死；今陷绝地，诸君并志决命或生，勿走自毙』！乃令其所部坚壁五日。食尽，突围被执，骂贼死（有传）。贼残叶县，杀降将刘国能；遣张我翼围鄢城。秦抚乔年出驻襄城，自成释鄢、攻襄城，破之；乔年殉国（有传）。十一月，贼乘胜围南阳，守将猛如虎战死；唐藩被祸。豫抚名衡、按臣任瀚告急督师，启睿不应。自成陷鄢陵，知州刘振之死之。诸邑次第陷；知县事者，镇平鍾其硕、内乡龚新、舞阳潘弘通、许费令谋，咸死之（各有传）。

时禹州陷，徽王遇害。再围开封，攻具百进，巡抚名衡、总兵永福百拒之。十五年二月，城之圯者二十七；守城者因其「大小放」之冗，反炮之，土石飞障贼中，乘势戕贼骑数千；永福手射自成，中其左目。移陷陈州，道臣关永杰及知州侯君擢、邑绅崔泌之、李梦辰、乡荐王受爵，俱不屈见害（有传）。於是睢州、太原、宁陵、考城、西华、商水、仪封、杞、开、亳等城俱溃，乡绅巡抚张继世婴城殒。围归德七日夜，城陷，知商丘梁以樟力竭跳，家口四十余皆尽；乡荐徐作霖、吴伯裔、伯胤亦被害。鲁山知县杨呈秀、宝丰知县张人龙俱殉城，而郟县知县李贞佐死尤烈（以上咸有传）。三月，自成协汝才复全力围开封；令益严，卒苦，多逸者。已乃令围而勿攻。时督师传廷蒙赦，复统秦师御贼。奉命以总兵贺人龙兵溃再逃，弃宗龙不救，诱杀之；军中颇有惜人龙之才可仗者。上复释尚书侯恂於狱，仍为督师。拔中州干令苏京、王汉、王燮三人为御史，京监传庭秦师，汉监恂楚、蜀师，燮监杨怀东晋之师；与左帅良玉大会朱仙镇。战守议不合，临阵群望风溃，丧士马数万；总兵杨德政付西市。而开封外援绝、樵采断，人相食。总兵刘泽清提五千人南援，次朱家寨，去汴八里；计筑甬道饷城中，贼争之，壁垒未乾。九月之望夜，河决开封。先是，自成久欲决堤，恋汴梁佳丽绝，忍弗割。督师名衡与严云京意主决河可尽贼，而城不必当冲；方凿朱家口，则自成早觉，急移高阜，多设巨筏艨艟，驱所掠民夫数万，并凿高家口。两口一时并决，又天雨夹旬，水势益横，逼注汴城；从北门入，穿东、南门而出，流入涡水。城一百余万户尽漂，贼亦沉万人；周王及二妃、世子得总兵卜从善舟师、推官黄澍等护达堤口，士民从而济者不及二万人。

贼拔营西南去。名衡以疾归，澍以守汴劳，擢巡按御史。

十月，督师传庭兵至南阳，先锋高杰等破贼於塚头，追奔六十里。而後队右勦等疑而溃，丧材官、将校七十八人。传庭上书自劾，诏戴罪立功。自成收裕州土寇李好为助，连营五百余里；屠南阳、陷汝宁，保督杨文岳与佥事王世琮咸骂贼死，副将冯、王、赵三人咸自杀（并有传）。贼拔营走信阳、确山、泌阳，破襄阳。

先是，左良玉自朱仙镇兵溃，退屯襄阳；诸降贼附之，有众二十万。初不习令，多淫掠；治战舰樊城待发。贼大至樊，汉东之人恶左兵，焚香牛酒迎贼。十二月，贼趋白马渡，良玉扼之，贼死数千；良玉卒拔足南行。而抚治王永祚弃城走，襄阳陷。贼分兵破德安及襄陵、荆门州，襄属知县枣阳郭裕、宜城陈美、穀城周达中、光化万敬皆殉城死（附传）。偏沅巡抚陈睿谟奉惠王走湘潭，湘阴王俨■〈金尹〉全邸遇害。贼攻显陵，毁享殿。

十六年正月之二日，陷承天。楚抚宋一鹤烈死，总兵钱中选、都司沈寿崇见害；鍾祥知县萧汉誓守陵，贼欲降之，不屈自杀（以上咸有传）。钦天监博士从伪杨永裕劝自成发兴献王坟莹；地作巨雷，怖而止。潜江、京山、云梦俱陷，蹂景陵。逼襄阳，左良玉之师南下，设伪官於黄陂；郧抚徐起元协降将王光恩城守，郧阳不破。

贼既得襄阳，自称老府奉天倡义大将军，进大元帅；以罗汝才为代天抚民德威大将军。分其众曰标营，领兵百队，左、右、前、後各三十余队；左帜白、右绯、前黑、後黄。标营白帜黑纛，自成独白鬃大纛，置银浮图其上。五营以次直昼夜，他营即休。自成不好酒色，脱粟粗粝，与其下共之；得汝才，战攻相须如左右手。所陷河南五十余城，卤获自成居六、汝才四之。汝才虽兄事自成，而其下颇为自成部众所易，滋不平。尝自呼「曹操」，呼自成「老齐」尔汝之。自成渐有专制意，语如才：『吾而并入关，割土分王，良便』！汝才醉，张目曰：『王胡为，横行天下耳』！自成内忤。先是，贺一龙（即革里眼）、马守应（即老回回）者，蕲、黄贼帅；与兰养成（即左金王）、贺锦（即争世王）、刘希尧（即治世王）归自成於开封，寻与汝才善，欲请於李自为一军，自成疑之。及陷襄阳，令守应规取澧州、一龙规取黄州。一龙至黄陂阻水不前，仅得良玉原降兵八百以归；先过汝才，屏人耳语。自成衔之，不发；伪参谋吉珪私语汝才曰：『某观李帅非容人者。今与李颉颃，惟罗与革、左。将军顾自为计』！汝才意许，不答。会有黄州陈生之间，自成疑汝才微款良玉，猝起杀之；有其军。时牛金星教自成分等威、定职掌，颇自异於诸流。创为官名爵号，大加置设。自元帅以下，为权将军；次制将军，次果毅将军，次威武将军，都尉、掌旅、都总、哨总各以等第降杀。诸子锦、妻之弟高必正皆居帐中，号亲信。李岩为中营制将军，与其弟牟，颇能简束其下。田见秀者，持忠厚，以权将军提督诸军事。刘宗敏嗜杀，狡悍善战，为权将军之亚。贺锦归自蕲、黄，拔为制将军，在诸将之右。帅标正，威武将军张鼐，自成养子也，以为威武将军，党守素副之。帅标左，威武将军辛思忠，以果毅将军谷可成副之。帅标右，威武将

军李友。标前果毅将军任继荣，标后果毅将军吴汝义。此其中权亲军也。左营以下，制将军刘芳亮，左果毅将军马世耀，右威武将军刘汝魁。右营以下，制将军刘希尧，左果毅将〔军〕白鸣鹤，右果毅将军刘体仁。前营以下，制将军袁宗第，左果毅将军谢文友，右果毅将军白虎。後营以下，制将军李过，亦自成诸子也，左目眇，年少骁，敢战；左果毅将军张能，右果毅将军马重禧（又有骆应标者亦後营）。此五营二十二将者。凡进战，视中权所向，四营制将军各率其偏裨以从。其次，则分地以定卫。自成既渡汉江，长驱入荆，念天下莫予难者；谋先守荆、襄，次承天、德安，渐及汝宁等处，因增置卫帅十有三人。襄阳者，贼之腹心根本也；设襄阳卫。左右威武将军高一功、冯雄，各领三千人为久戍（又有杨彦昌亦守襄阳）。以荆州为襄阳上游，设通达卫；用任光荣为制将军，领六千人守荆州。以夷陵为楚、蜀之门户，分通达卫左右威武将军霍养成、牛万才兵千四百人，佐以都尉张礼水师六百人，共为防御。守荆门州者，都尉叶云林，本郟县诸生，所将止六百人；则以荆州有夷陵为之蔽也。马守应改为威武将军，王文耀配以荆州兵六千守澧州。承天特置扬武卫，以果毅将军白旺守安陆，而显陵为我师所必争，用左营都尉马世泰为分驻；又以威武将军谢应龙守汉川，防左帅之溯流上也。汝宁卫，威武将军韩华美守信阳，北扼孔道。均平卫，果毅将军周凤翔守禹、郑二州，西备关中诸镇。既以磐牙屯据，乃改襄阳曰襄京；葺故王宫殿居之。杨永佑劝以即真，牛金星不可而止。自成外寝永佑议，而心善之；颇采其言以定官职：置上相、左辅、右弼、六政府、侍郎、郎中、从事等官。於要地设防御使，府曰尹、州曰牧、县曰令。易印为信。

改明崇王申柜为襄阳伯、邵陵王在城为枣阳伯、保宁王甲为宣城伯、肃宁王术■〈木受〉为顺义伯；禹州曰均平府、承天府曰扬武州。其所授伪官，自牛金星而下，吏政府侍郎石首喻上猷、户政府侍郎江陵萧应坤、礼政府侍郎招远杨永裕、兵政府侍郎米脂李振声、刑政府侍郎江陵邓岩忠、工政府侍郎西安姚锡胤；郎中、从事之可考者二十余人：郎中则吏政府徐丘王家柱、从事则户政府阎泰定、郭附龙、游启运、杨四畏、礼政府刘清梦、杨辉烈、兵政府傅朝升、丘之陶、施洪翮、刑政府安民兴、工政府蒋芬之。尚有宣令司张翔、纪功司李定一。有绍兴徐佳者，知书数，不受职。在外，则荆州防御使洛阳孟长庚、府尹长葛张虞机，襄阳防御使郟县李之纲、府尹卢氏牛佺（佺，金星子也），南阳防御使锺祥吴大雍、府尹江陵刘苏，汝宁防御使江陵金有章、府尹江陵邓珪；又阳武州防御使陈荇、信阳州防御使江陵黄阁、均平府尹刘懋先。其府官有丞、有理刑，州有判，县有簿；州牧自荆州韩缵以下十八人，县令自襄阳杨士科以下六十七人。自成自号新顺王，以李双喜为养子；嗜杀更甚於自成。会造殿铸洪基钱不就，斩一谋士；卜诸紫姑神不吉，因立双喜为太子，更名洪基以厌之；铸复不就。於是会左辅以下官，议用兵所向。牛金星议先取河北，直走京师；杨永裕议顺流下金陵，断运道，则燕都自敝。兵政府从事顾君恩进曰：『两议恐非万全！金陵势居下流，虽能克济，失之缓；直取京师，万一不克，退无所归，其策失之急。莫若先定关中，为元帅桑梓，扼天下全势，建国立业；然後旁掠三边，奋其余勇，自晋入燕，乃立不拔』。自成然之。

时督师传庭奉诏速进，治火车，肆未善；八月出关，小捷龙门，走贼汝州。自成筑汝宁、邓、襄等七城，图内固；营宝丰，为犄角。已而宝丰下，掳伪守诛之，军声振。贼初流而勇，至是分守弱，屡为官兵所蹙；襄、洛豪杰并起，各保寨互逐贼。於是方国安以兵复承天，老回回屯彝陵战败；副总兵沈万登以乡勇万人复汝宁。万登，故汝宁大侠，自成伪授威武大将军，不受；至是，杀伪将军马尚忠等，坚壁应官军。会大雨泞道，转饷不续；即破郟无粟，军饥，乃譁。自成截饷道，官军大败，死者四万。传庭走阌乡，贼追至孟津。十月，攻潼关急，秦督传庭阵没；西安陷，巡抚师孔、按察使黄炯、长安知县吴从义、指挥使崔尔达咸死之，乡绅崔源溥、源清、祝万龄、王微、田时震、席增光、朱谊泉咸不屈见害。陷华州，屠商州，商雒道黄世清殉其职（以上皆有传）。贼入西安，放兵大掠，三日止。改西安府为长安，据秦王府为宫，收姬妾数百以充之。命所司一仿故李唐制度。即秦抚故署为吏政府、布政使为户政府、保安郡王邸为礼政府、都司为兵政府、按察使为刑政府、分守道为工政府。伪授秦王□□为权将军，世子妃刘氏恸哭求死，归其家。遣李过追高杰於延安，杰绝河津以守；田见秀追高汝利於汉中，汝利遁蜀，降於贺珍。刘宗敏等追白广恩於保原，广恩降。贼杨永裕阅兵於渭桥，大开驰道；自成亲阅校射，身披蓝布袍，覆以小黄盖，百姓望见辟易。诣米脂祭奠，筑土封之。访其宗人，赠金授爵以去。改延安为天保府、米脂为天保县；又改清涧县为天波府。独凤翔府设伏为降贼，杀贼三百余骑；卒城破，知府唐时明被害。自成初入关，自以为故乡，颇戢慰其众；至是，残毒甚。束丁男为奴，剽劫妇女。闭衣冠绅士空舍，加榜掠，索金；责渭南民饷一百六十万。乡绅南企仲、居业父子，兄居益，皆炮烙死；秦氏大失望。张国绅者，首先推戴，进文太仆之妻邓氏貌美，悦自成；自成斩国绅示公，善邓而归之。

时左光先亦降贼，令白广恩谕降永福；永福曰：『汴城之战，永福流矢不恭，恐不赦』。自成折箭誓相忘，无他；乃伏谒。诸边守将梁甫、马岱等多解甲降，独榆林拒守力。世胄王氏，一门八元戎；有世国、世臣者，兄弟也。尤世禄，阀阅亚於王，而威令为众所恃。李昌龄，故总兵，侨寓相乘城。兵道都任协刘、惠两副将，推尤世威为帅，合王、李阖门死御贼。李过徇榆林，谕降；不可，残贼数千人。力竭城破，犹巷战不屈；都任同刘、惠、二王、尤、李皆烈死。贼屠榆林；宁夏闻风，总兵官抚民开城降。攻庆阳，四日违限，屠之，执韩王；副使段复兴、宁州知州董琬、邑绅麻禧咸死之（以上俱有传）。贼过河入晋，破平阳；总兵陈尚智以城降，杀河西王家口三百人。

是时秦、陇全没，惟甘肃带河为固。贼陷兰州，甘抚林日瑞守峡口战败，及总兵马矿、中军哈维新、姚世儒皆死。副将郭天吉再战，与苑马寺监牧同知蓝台、州绅罗俊杰、赵宦及於难，杀居民四万七千人。於是肃州、山丹、永昌、镇番、庄浪皆陷，贼以陈之龙为西宁节度使。

於十七年正月，自成妄僭尊号於西安，伪建国曰「顺」，改元「永昌」；更其名曰

自晟。造伪甲申历。拜牛金星为天佑殿大学士，厘定六政府尚书，益置学士弘文馆、文誉院、谏议、直指、从政、统会、尚彝司、验马寺、知政使、书写房。以乾州宋企郊为吏政尚书、平湖陆之祺为户政尚书、真宁巩焞为礼政尚书（或云张学一）、王命申为兵政尚书（渭南人，张国绅初亦为兵政尚书），余官从自襄阳者，升赏有差。凡贼帅，给珠琲环宝人二升、银千两。权将军、制将军，封侯；果毅将军以下，封伯、封子男有差。如侯，封汝侯刘宗敏、泽侯田见秀、蕲侯顾英、亳侯李锦（亦眇一目）、磁侯刘芳亮、义侯张鼐、绵侯袁宗弟、岳侯□□、淮侯刘国昌、绛侯吴汝懿；伯七十二人，如光山伯刘体仁、太平伯吴从义、繁峙伯马世耀、桃源伯田广恩、鄢陵伯刘□、武阳伯李佐、文水伯陈永福，其可考者也。伯以下，封子三十人、男五十五人。其官制既遵李唐，以云纪官，服补按品，自一云以至九云，纱帽为软其翅。生员公服，鲤鱼为补。遂以伪檄驰远近：『君非甚闇，孤立而炀蔽为多；臣尽行私，比党而公忠绝少。狱囚累累，士无报礼之心；赋敛重重，民有偕亡之恨』。入册步兵四十万、马兵六十万。兵制：一马僇行列者，斩之；腾入苗隘者，斩之。兵死，令其妻即缢以从，无别配。铸永昌钱，大者直白金一两，次当十、当五不等。设科目取士，以甯绍先充考官，命题用「定鼎长安赋」；拔扶风举人张文熙为第一，受伪命草檄。弘文学士李化麟、台谏宋卫等伪颂功德、张形势，以指斥乘輿，胁污州郡。遂分兵五道：一从榆林、一大兴关、一汾阳、一河南、一潼关。知府张璘然以平阳降，再陷河津、稷山、荧河，山西望风送款；贼以一军上绛州，以一军上蒲。

二月，自成率其全师渡河，破汾州，殉河曲、静乐；攻太原，执晋王，晋抚蔡懋德殉节死。兵至忻州，攻代；五台迎降。独宁武关总兵周遇吉殊死战，贼大创；力竭死。犯大同，总兵姜镶降；巡抚卫景瑗死之。杀代藩宗室尽。破宣府，巡抚朱之冯自刭（以上皆有传）。贼从阳和柳沟以入，居庸、真保定、大名皆不守。

自成三月之十有三日至昌平，十七日抵京城。攻彰义门，坐晋、代两王於地仰观，防内炮；环围九门。上有旨：『每门科道二员，督视严守堞；堞三，军一人』。炮如雷，但空发，贼未至城下也。十八日，巡街犹大声呼警；午刻，彰义门开，城中喧传闯王以此日干支不利，择十九日辰刻入大城；此说不知何自起。夜炮彻晓，至於无弹，但作虚声；惟恐发，误伤贼者。果次日丁未辰刻，自成从顺城门入；齐化门亦大启，入众。帝殉社稷寿皇亭，亭即故内操处也。贼过承天门引射，默祷拟中「天」字，不及咫；牛金星曲解之曰：『当中分天下』。自成喜。悬购得帝宫中，殊爵。擅登皇殿，据黼座。牛金星叱伪官二十一人过堂，刘宗敏平立不拜；曰：『故兄弟，乃南面我乎』？已从众，姑伏地。太监杜天秩率诸内员导贼入宫，自成责以背主当斩；皇遽叩头曰：『识天命，故至此』。贼分宫嫔於所部，各三十人。镌九玺，不成。伪诏有云：『独夫授首，拟尧、舜而多武功；四海归心，比汤、武而无惭德』！卫皇太子西宫，封宋王；不屈。易帝后梓宫，更礼服：帝丹漆、后黝漆；帝翼善冠、袞玉、跨金靴，后袍亦如之。贼僭称行在，示在京朝臣各报职衔，後不赦；於是报名恐後。先是城破，文武竞焚其冠，买丐者服，服五、六金；至是色

喜，求故冠不得，从梨园中假之，一冠亦至五、六金。凡受伪京官职为杨枝起等三百余人，受外职为魏天赏等四百余人；辄於寓门大书「大顺钦授某衔」，拥从如故。时项煜以贼政府黎志陞为煜甲戌门人，冀得显秩；语人曰：『吾辈即未夷、齐，宁不得为管、魏乎』？已授光禄丞，大失望。时敏後至，吏政府门闭，伺门大呼：『我故兵垣某矣』！得补选。盖文武死难者三十八人，勳戚死难者一十四人，太监从死者二人（俱别有传）。贼意定都燕自大，刘宗敏居田弘遇故第、李岩居嘉定伯府，宗敏日事残毒；而岩示坦易，又尝大义脱懿安皇后於厄，得从容自尽；军中多称之。宋献策尝私於李岩曰：『「十八子」字，得无以兆公乎』？岩惧，不应。金星刺得之，颇侧目岩。时缚诸大臣拷赃，多至死。原阁臣陈演献银三万、金三千、珠斗，得免。魏藻德不胜刑，自勒死。方岳贡刑後，不能食死。

时吴三桂父襄，亦在拷中。三桂拟以关兵内援，贼乃胁襄作书招三桂，三桂不赴。而总兵唐通亦为贼致书三桂劝降，三桂不答。贼以兵六万拥太子、永王、定王及吴襄东出。三桂东乞师，身为前驱，战关门之一片石（或云采桃花淀）；贼大败，蹂践死者数万人。自成奔永平，使人议和；三桂曰：『归我太子、二王，速离京师再议』。旋蹴之永平，自成反走都城；於四月之晦，践伪祚於武英殿。是後每僭座，辄昏眩；或见长人白衣者当驾。有土工刘复兴者，突踞贼座骂，自刳。已闻东师入关急，且弃去，猝火诸城楼，出齐化门西走。三桂追击，败之真定，及固关而止。五月，又败於定州；果毅将军谷可成阵死，牛金星大创走。自成犹分兵戍山西诸隘，自定州一挫，鹿足、考城、柘城诸县伪令为明丁参将所诱执，俘南都。自成以河南多反正，内警；李岩自请兵二万往定之。金星曰：『此岩急自固，他日以其乡人相难猝难制，且二心已微见其端矣』。遂实以献策之言，必杀之。自成令金星曲款岩，礼接殷；酒酣，壁衣甲出，杀之，并杀其弟牟。献策私扼腕愤叹，颇欲自异。宗敏按剑不平，切齿曰：『吾见金星，必手摧之』！

时自成西奔，所过榆次、大谷、定襄，咸闭关拒守。自成尽破，屠之；忻、祁尤惨。留文水伯永福、府尹韩文铨守太原，永福杀晋藩宗室殆尽。贼过河，驻韩城为策应。怒尚书企郊私其乡故，絜其项；至西安释之。入西安之日，怪风作，丽樵象魏俱败。劫蒲州知名士韩霖为参谋，檄故太常卿张第元为兵政尚书、给事中耿始然为刑政尚书。时第元归韩城伏谒，自成曰：『卿家河北无恙乎』？第元仓猝，不知所对；局踣曰：『家苦被屠』。问何以？曰：『以尝投贼得官故，坐犯所最讳』。自成大怒，立诛之；始然惧，乃以多杀为尽职。过失入，以请；自成手其奏，怒形於色。始然知不可解，辄自经死。礼政巩焞所定仪式不称自成指，负杖几毙。

八月，自成立祖称庙，将以己之诞期行礼。初被山龙袞衣，适寒甚，股栗、指欲裂；盛火左右纷沓，不成礼。乃怒礼政焞所进袞衣，谓两山压肩，罪死；金星力救，乃免。自成性残，诡为好语惑人；至是复狼狽必遂。尝驻韩城二十五日，鞭撻刑剥无不至。於是兴作徭役并菱刍糗具，责民万端，人莫必其命。以户政侍郎李天笃迟慢，坐戍；复缢杀之，妻子财货没军。延安府尹贾我祺以赃，付西市；直指伍中愷

，谪为军。牧、守以下，凡受贿，用铜■〈金算〉毕其命；胥隶不敢下乡。民有盗人匹雏者，论死。自成自以不省诗书，集词臣日值；受讲「通监」诸书，亦习书法。

东师至潼关，伪伯马世耀败死；关破，六十万之众尽散走。自成犹欲返据延安，闻顾英、李过等亦溃，知西安必不能守，遂开府库，恣军士分取；凡仓廩，则焚之。自成於十三日出东门，至兰田；由商州龙驹寨走武关，以入襄阳。妇女细弱，冻死於七盘岭者甚众。宋企郊等道亡去。时左帅良玉已率众南下，思俛依献忠；而献忠已入蜀，武昌虚无人，自成偕其妻高氏、李锦、李过、妻之弟高必正（皆肺腑戚）、诸将田见秀、袁宗第、刘体纯、刘芳亮、张鼐、吴从义、牛万才等众尚数十万，分为四十八部，奄有荆州、襄阳、德安、承天四府守之。

北师南下，移居武昌；改江夏为瑞符县，设伪令。运铜炭铸永昌钱。初意夺舟，取宣、歙；临发，而暴雨烈风，阴霾四塞。乃於四月之二十有四日，改从金牛、保安，走延宁、蒲圻；过通城，命所部前行。通城有九宫山（一名罗公山），山有元帝庙；居民赛庙，合盟扞御勿後。自成时以二十骑为诸军殿，骑休山麓；自成单鞭，直蹑庙伏谒有所祷，不即起。诸赛疑非其乡之人，或为盗；奋荷锄，猝破其首。见腰下有悬玺，且重裘非凡，大骇疾走去。二十骑迹之，知状；兄子一只虎过，以袞冕葬山麓。众遂奉李过为首；他日款後，犹称自成为先帝。其自成後妻高氏，称太后。永历中，亦不甚过督也。

时其众半归闽督防何腾蛟。总制都御史堵胤锡使人招过，过遂同高必正以十营之众来归，赐名赤心，属胤锡所部；颇残，不用命。戊子，奉调促楚不前。永历中，西贼张献忠义子孙可望挟封秦王，必正大言『我等方洗贼名，无尺寸之效，安得遽尔崇封』？及可望入，赤心走楚，同卢、郝等二十八家拥韩王出没陨阳山中；称尊，改元自保。

论曰：岂非天哉！崇祯庚辰，筑拱极城於芦沟桥，南、北门额题有「顺治」、「永昌」字样；越四年所，辄见之。岂非天哉？孩儿兑坐、眼上一刀及丁戊等讖，或曰当由後人伪为之。按谷王穗时，妄冀非分，自以「我高皇第十八子」应讖十八孩儿云云；则讖实先有之，而误认不致真，非後饰为之也。永不永、昌不昌，讖又胡为哉！古射天及射日，皆不终；虽然红蛇丛死，得附白帝子之斩，亦厚幸矣。又按檀信，贵州人；工奕。闯尝与谋议，几得而复失，不算国手。初陷华州，金星典试，改八股体为议；命题「所过者化」三句。「同流」二字尚留西府作伴，不自隐其贼名，亦似有讖焉已。

——见原书「列传」卷之三十一

· 张献忠、孙可望

张献忠，陕肤施人；流贼之一支也，军中称西府八大王。多须，巨身；齿长逾咫，圆锐如椎。不识字。与李自成、罗汝才气势大过诸流。崇祯四年，尝就抚於总督洪承畴。明年复叛，同诸寇蹂躏秦、晋、楚、豫（事在王嘉胤传）。八年以後，始离自成，东掠庐、凤、滁、和诸处；与诸盗复入楚。

十一年，总兵左良玉、陈洪范大破之於郧西。初，献忠盗败良玉，洪范异其貌释之。以是怀旧恩，乞降於洪范；自言能令郧、襄、荆、承数百里外，无一贼。总理熊文灿承制许之，且曲徇其所请；益骄，屡檄从征不应。至求襄阳一郡屯其军；部议与饷二万，坚请十万，文灿逡巡不能应。旋请寄家口於穀城，入据守之。时汝才亦就抚均州。

明年五月，献忠先汝才叛。举人王秉贞为之谋主，杀穀城知县阮之钿。胁御史林鸣球上书，求封襄阳；鸣球不可，并杀之。与汝才合返击，良玉一军没。十三年，良玉击献忠等太平县之玛瑙山，大胜之；斩首万级。贼单，匿乱山。时阁部嗣昌以良玉颇跋扈，欲以贺人龙代之；良玉方内恨，遂不复深入求贼。已而官兵败绩於土地岭，人龙援不至；总兵张应元、汪云凤苦战得脱。云凤渴饮水斗余卧，血凝臆而卒。

献忠与汝才合破大昌，入巴西；陷剑州，趋广元，间道别出百丈山。将趋汉中，阻於官军，转走西川；战於绵州败，渡绵河。监军万元吉大飧土於保宁，立猛如虎为正总统，以一军逐贼，贼陷泸州、越成都，走汉川、德阳，复至绵河。十四年，入巴达，焚新开駟路，人烟断绝者七百里。时元吉欲从间道出梓潼，扼归路以待贼；而嗣昌但令急蹶贼。及之於开县，则人马乏。参将刘士杰急战，与游击郭关、猛先捷皆陷阵死（先捷，如虎子）；嗣昌悔不从元吉扼梓潼之计。

贼东走抵襄阳，以二十骑伪为檄称官兵。守者误信之，开门入骑；兵备道张克俭、推官郦曰广咸死之。献忠踞坐襄王宫，伏王堂下进卮酒；曰：『愿借王头杀嗣昌，请浮此一白』。意以督师失藩王，必伏法也。遂缚王杀之，投屍井中。会贼李自成亦陷河南，福王遇害。嗣昌以连丧亲藩，度不免，遂自缢死；果如献忠所算。贼遂破樊城，陷南阳、陕县及光州、新野，渐逼麻城。合汝才，陷随州；知州徐世淳见杀。攻南阳不克，良玉败之於西山。贼陷信阳，袭入泌阳，复陷郧西。会汝才与献忠郤，去走合自成；献忠乃独制众可数十万，屡胜而骄。良玉赀藏及降将之家皆在郧、襄，尽为所据，愤起击之；大败献忠於信阳，降众数万，夺马驴万。献忠负重创，易服宵遁。时穷追至郧阳，复大溃；弃马驴二千，所部止二千余人，日逃十六、七，仅以数百人北，因汝才奔自成军。

初，献忠之陷襄阳也，自以威名出自成右；至是来归，而自成众五十万强，欲竟屈下之，献忠傲不从。自成怒，计阴杀之。汝才密以五百骑纵献忠东下，合革、左军。於是入霍山，据险拒守；寻合六营复出。十五年，陷亳州及舒城；原任编修胡守

恒城守，死之。献忠屯舒城，势复振；称得胜州。攻霍山，陷六安，袭破庐州。先是，督学御史以较士至郡，献忠遣贼数百，携书卷伪为诸生，杂入郡城；而献忠以大师疾驰郡，伪书生夜举火应之，城陷，知县郑履祥自杀。退屯巢湖，陷庐江，合水陆五十六营集皖口。复陷六安州，民之不迎降者尽断其手。营潜山，步骑九十哨。总兵黄得功、刘良左夜劫之，贼惊失措，四溃；追奔六十里，斩首万级；焚贼殿一堵墙林中。阅月，良左再破之於安庆，夺马驴五千；贼走蕲水，还屠桐城，陷无为州及黄梅、太湖。十六年，以二百人夜陷蕲州；令绅士公服自东门入、出西门，尽斩之。毁城稍不力，辄见杀。署守道许文岐死之。屠蕲水，陷黄州，执副使樊维城欲降之；维城骂贼，洞胸死。献忠据府，以麻城诸生周文江迎降最早，伪授知州。

寻陷罗田，破汉阳。五月，窥武昌。巡抚王聚奎端议守城，参将崔文荣曰：『守城不如守江，守江不如守汉。磨盘、煤炭诸洲浅不过马腹，纵之飞渡；而婴城坐困，非策也』。议者不从，贼果从诸洲渡，逼城下。楚王所募兵为贼内应，开门贼入；文荣奋呼，徂杀贼三人，贼攒刺之，洞腋死。前大学士贺逢圣与文荣俱守武胜门，贼闻逢圣贤，使人护其家；逢圣潜水死。沉楚王於西湖，长史徐学颜从死；楚宗多从贼者。屠士民数万，沉之於江。尝纵数万人出城，以铁骑围之，俱令自溺；浮屍蔽江下，武昌鱼不可食。得断臂者以为幸；或愿去左以为狡，并去其右。军中晚上手多以为功。令义子孙可望等十人咸冒姓张，为折柬招诸乡达，率不应。僭号西王，铸「西王之宝」。据楚府居之，僭称武昌曰京城；伪设六部、五府及总兵以下官。开科取士，亲命题，以千文遐迩壹体二语，使众射上策；有最捷者，立授礼部尚书。殿试取三十人为进士，授郡县官。初，自成兵临汉阳不克，闻献忠取之，怒；榜示远近，有能擒献忠以献者，赏千金。及闻取武昌，使人贺曰：『老回回已降，曹、革、左皆死，行及汝矣』！献忠惧，谋去之，令各部上秘计。初，礼部尚书伏谒，请入蜀；献忠大喜曰：『非吾门生，安得此伟议』！诏以王扬基代聚奎。

左镇诸军并进击贼大冶，斩首千级；贼乃令四师共守武昌，而身率舟师向岳。总兵方国安等进兵黄州，斩伪知府。有监纪知县吴敏师者，联络蕲、黄四十八寨合数万人，会诸军，齐压武昌战贼；贼败西奔，并复汉阳属县。贼陷咸宁、蒲圻，沉抚李乾德、总兵孔希贵令军士卧戈，诈为岳州居民，开门迎贼；贼入伏发，摧其先锋。献忠怒，益兵来攻。乾德虚立营垒道旁，林中植旗帜，伏大炮故积薪其上；贼纵火攻，火沿炮发。贼惊，乘势击之，三战三捷；贼悉众二十万，百道攻城。力竭城陷，乾德、希贵走长沙。贼徇湘阴，分军为二：一下长沙、一上荆州。卜於洞庭湖神，谋北渡不吉；已果风覆其舟数百艘，溺死数千人。献忠乃尽杀所掠妇女，焚其舟；火光达湖涘四十里。陆走长沙，长沙陷；推官蔡道宪死之。总兵尹先民、何一德降贼，伪封伯爵世袭。复陷衡州，桂王与吉、惠二王跳；献忠拆桂王府殿材至长沙，构造官府。遣人追三王永州，湖南巡按御史刘熙祚使人护王入广西，而身督永师迎战；不克，城陷死之。未几，复岳州；伪官伏诛。献忠屯衡州，复分军为三：一往永州、一入广西全州、一犯江西袁州。献忠还长沙，开科取士。进兵萍乡，知县

弃城走。分兵徇攸县、分宜，陷万载；复遣别将趋连州。兵备副使王孙兰驻韶州，兵不满百；危，自经死。士民以袁州迎降贼，贼使伪将丘仰寰守之。都司高山援袁，奋击先登，斩首二千四百级，夺马六百；复袁州，仰寰伏诛。时官兵淫掠，杀良作俘；民屯聚以拒官军。贼益肆，破吉安；诸县同日陷。贼设伪官，改吉安为亲安府、庐陵为顺民县；复入袁州。献忠在长沙，增兵为九营；其五营皆新附，下临湘，取米及釜。

时良玉遣王世泰、杨文富下岳州，贼伏轻舟■〈彡义〉港，以巨舰载货重啖官军；官军争利攫之，而■〈彡义〉港轻舟出夹击，官军大败，溺死无算，岳州复陷。良玉遣副将马士秀趋长沙，复临湘。贼奔岳州，士秀追之。贼将混天龙营南岸，以轻舟顺流突官军；士秀命殿军交射南岸贼误之，而轻舟乘风绕出贼後，大败之。岸贼入城保，则急乘城；贼走长沙，斩首四千余级，遂复岳州。时江督吕大器复吉安，而马进忠以良玉檄进兵分宜，走贼袁州，尽诛贼伪官，斩首三千级，夺马五百、弓矢数万。献忠复陷建昌、抚州、南丰。

时李贼已入陕，老回回为自成守荆州矣。献忠使人通好。十七年春，弃长沙。造浮桥於三江口，渡师过荆州；尽弃舟楫，步骑数十万犯夔州，连陷涪、泸，围重庆。四日城破，瑞王闔宫被难；奋抚臣陈士奇死之。屠重庆，取丁壮万余刳耳鼻、断一手，驱徇各州县。提兵过剑州，偶憩梓潼庙，见柱联杂有「献忠」字样，问何神？左右以张仲对；献忠喜，自以为张仲之後。时有将军方甲以兵勒战，献忠祝曰：『吾战胜而大张仲字』！已战果胜。陷成都，蜀主闔宫被难；巡抚龙文光暨道府各官皆死之。檄诸绅於成都，皆见杀。悬榜试士，士争趋乞生；复以兵围之，数千人咸振笔挟策以死。献忠乃自称皇帝，国号「大西」，改元「大顺」。於是发银五万两、夫数千，重立梓潼庙，金碧极丽；伪敕为「天圣神祠」，立大石，献忠亲作诗书其上，以答神贶（诗曰：『一线羊肠游天堂，此处万世永无忧；神是仙来仙是神，世世流传与天休』）。遂有伪学士癸未进士刘成吉、丁丑进士严锡命等咸和前诗原韵，并立碑以为荣。

丙戌，北师以兵取蜀，献忠使伪总兵刘进忠拒於广元。进忠导蓝旗固山反攻献忠，直抵西充县。献忠方巾被一枝梅直掇，猝骑，遇敌凤凰山，举弓睨北师左部。北师右部将亦睨射献忠，则献忠与右部将并倒，为丁亥十月之十一也。献忠义子孙可望等四人力援，北师解去。可望自称为平东将军，以李定国为安西将军、刘文秀为抚南将军、艾能奇为定北将军，都督白文选、冯双鲤、王尚礼、王复臣等协守。上献忠为谥，称「大梁太祖」云。

可望颇专制，命文秀守蜀，而身从贵州窥云南。文秀遂与平西三桂三战，皆大捷。三桂屯汉中相拒，已势促连败。可望渡重庆，由遵义取贵州。时土司沙定洲间据云南，走黔国公天波於楚雄，可望伪援之。戊子三月，屠交水、曲靖，袭有云南。沙逆走阿迷州，战败蛇花口，遁俱革竜，追灭之。可望遂自称平东王，建宫殿。擅制

，铸印，设六部科道官。明原任御史任僎尊可望为国王，授僎礼、兵二部尚书。唯安西将军李定国不肯奉命，缚笞较场，众志不帖。随袭楚雄，洱海道杨畏知战禄丰之启明桥，败见执，天波走永昌。可望兵至大理，天波遣子入质；可望阳受之，辄踞沧江、夺铁索桥，执天波。畏知劝可望归命桂主以收人心，可望遣焦光启、定国另遣其标潘世荣，随畏知、龚彝诣潯州请封。时武康伯胡执恭以桂命屯泗城州，西防黔。潯庆国公陈邦辅用事，欲徇其请，廷臣不可；执恭辄擅制，矫作册命，封可望为秦王。册中有云：『秦王总统天下兵马钱粮，节制诸文武，以监国亲王体统行事；朕尊礼如古仲父，仍铸秦王印以给之』。乃密疏以请。可望迎受，亦颇知非真，故令礼部誉黄，始用永历年号。自称监国秦王臣表谢、修贡，复布告云、贵、楚、粤诸勳贵。畏知意善用可望，母内自树敌；度情势不能，不如前封。廷臣袁彭年、金堡等执不可，督师堵胤锡更苦口，遂改封可望为平辽王，赐名朝宗；定国、文秀等皆公爵。可望耻再命降封，不受；并挟定国等不得受公爵。廷议逮执恭，坐以擅制之罪；执恭沮泗城不至。时定北能奇死，可望并有其军，势益张。

庚寅冬，可望取贵筑、绥阳，败匡国公皮熊；执忠国公王祥，北陷遵义，复据贵州。督师何腾蛟、瞿式耜、堵胤锡诸兵屡蹶，主奔南宁；可望遣其部贺九义、张明志赴南宁护驾，必胁秦封。阁臣严起恒、督臣杨鼎和、科臣刘尧■〈王尔〉、吴森、张载志等抗疏不许，九义使盗杀鼎和、私击起恒水死并杀尧■〈王尔〉等；主不得已，乃真封可望为秦王。畏知廷论九义擅贼杀大臣，方办事东阁；可望更使指挥郑国袭畏知至黔中，杀之。

壬辰，定国以所部五万人出靖州，可望阳遣都督冯双鲤协力，实图定国；定国以义感之，双鲤矢共事。随遣郑国迁主安龙府，兵马钱粮咸簿主之。会定国连破靖、沅、武冈诸州，引为己功，请封定国西宁王；定国以可望请，不受。召之，亦不至。遂使双鲤猝击定国，败见执，释之；因善护定国家口於云南。

时北师平西王三桂尽收川南郡县，南安王文秀同都督文选攻复之；三桂退壁保宁。壬辰再战，复大败；都督王复礼被执死。可望以失事，夺文秀王爵，使就间。可望出沅，取辰州；檄定国北追，不听。复伐北师花街子，不利；退守贵州。乃令文秀以南安王挂招讨印，攻北常德，不利；归镇云南。

主君安龙，密敕入定国扈驾，加封；以文安侯马吉翔故与可望昵，出之南宁祭陵。吉翔微知迎驾事，驰报可望；可望怒，令郑国佯缚吉翔就安龙讯，勇索建议首事。主讳之，曰：『内诸臣必不敢，或外伪为之』。国擅械系贞毓，以兵入宫，执二监张福祿、全为国，酷拷。贞毓声数可望不臣：『吾身秉衡，走约定国讨逆是实；他何知』。国令□党冷孟鉞冒主，极不恭；主悲愤，退。遂罗织十八人□□□决，於是二监与科臣张镌坐凌迟，词臣蒋乾昌、李元开、台臣李欣、胡士瑞、部臣徐极、杨忠、赵赓禹、蔡■〈糸宙〉、郑允元、周允吉、朱议咏、朱东旦、任斗墟、易士□咸弃市；贞毓以大臣赐帛，并慷慨赋诗尽。

定国以兵下粤东，不利，还。可望遣文选率叶应桢等侦安龙，逼驾移滇；合宫痛哭，不行。文选亦为雪涕，誓死国报定国无他间。以主西行，可望使人伺曲靖夺驾不得；至滇，守滇南安文秀协都督王尚礼、王自奇、贺九义等迎驾至云南，封定国为晋王、文秀为蜀王，余爵有差。随令文选即黔中迎可望，不至；复令可望部东昌侯张虎归可望妻孥於黔。虎行，主脱金簪赐之；曰：『惟卿善开导』！虎至，出簪，诡称主令虎微行刺；可望怒，夺文选巩国公敕印，攻滇。可望用事马宝、马惟兴，百口文选无异志；辄封文选征逆招讨郡王，总统兵马从可望。兵次交水，而令冯双鲤守贵州。文选密表内附，封巩昌王；令马吉翔□□□□师。丁酉九月，遇交水；可望心战欲退，宝、惟兴给可望，请令临潼侯武大定、汉川侯张胜等劲旅间道由寻甸攻滇，以掩不备；而身索战交水，诡败来攻。可望猝反走，遂北款洪督师。戊戌春，以兵三千人捣武冈，为部将刘甲反攻，歼殆尽。四月後，请北固山满兵五万，身为导，入贵州，走定国。可望遂同陈总兵北降，得封义王。

论曰：李之失，病於躁；张之失，病於不知所自固。躁则轻进，而退无所据；不知所为固则防疏，而後无余地可凭。夫有其众，至不能持戟引弩，而徒恃摧敝以起，果欲任剧残巩西川门户乎？至今川中人，率左手引匕。诸生至束管於右腕，或习左书应试；偶得雋，而往往袖手对簿。临其民尚右者，古之道；而明尚左，至此而极。若夫可望之□□股肱，则又左右皆废；「春秋」所以失其位而不复。

——见原书「列传」卷之三十一

· 列朝诸臣逸传 ·

管绍宁（杨兆升）

阮大铖

黄斌卿

· 管绍宁（杨兆升）

管绍宁，号诚斋；南直武进人。生负病，貌寝；少极贫，被大布若隶人儿。常诣城隍祠，倚柱而叹。祠有道士，一见惊，揖上座；绍宁曰：『余往来稠市，无低眉视者。即不唾，乃烦异数我』！道士曰：『夜神梦我，明日有布衣即吾祠；毋以其貌，急收饭之』！绍宁遂饭道士寒暑。用自负神许我，为文益工。盖道士亦极祷绍宁之得如梦中一日也。天启丁卯秋闱，道士为具行李，联捷。廷对策，策上呈，策中偶书「诚」字欠一「?」、一「、」，上援笔为补之。阁臣疑上所加意；拟最，赐一甲第三名，授编修。绍宁乃厚遇道士曰：『若不信所梦，绍宁老无赖矣』。

崇禎之季，历南京司业。福藩立南都，以少詹拜礼部尚书；自监国及登极诸仪礼，俱出其手订。疏请上建文帝尊号纪年，并落逊国诸臣方孝孺等教坊司旧籍名；奉俞旨。无何，议大婚，诏苏、杭竞上殊丽；官宦各以望幸，举辄不称，骚数月。绍宁请告去。

乙酉五月，南都不守，常州亦从降。有湖健者起，一呼数千；投书昆陵绅衿，函中自称义士。所致亦无定名，独外签题云：「上常郡乡绅管诸位爷」；以绍宁位尊，屈第一指也。健者环攻四门，城破，入斩府署；久之不能守，事败死。知府姜开先，初匿去；既出，借书函踪迹诸绅，责醵。尝面质绍宁及杨兆升，答词稍失，措气径直，无所割为寿。他日复警，开先檄诸绅共巡城，绍宁与。时得一冠发胁从者，绍宁作柔语，义而纵之。已矣，开先辄指为叛，立缚之，与兆升并肆市；长子□（贤书）、次子□（贡生）及妻媳无存者。遗孙甫十一龄，先一日偶至其妇翁陈震生家，不肯归；若预知有次日难者，幸不死。

兆升，字升芝。万历壬戌进士，擢南礼科给事中。开先责醵不遂，使私人狙击之，血流被面；牵出东门，无敢冤之者。

论曰：南都乙酉，开先百营馆员，亦丐吏曹。及台省，须诚斋润色一语；诚斋以其素，不应；开先衔之。久，时在治旧开封，薛采亦颇有不容於姜者。姜曰：『薛无用，不足虑；则足虑在诚斋矣』。管、杨志节无所着，而以其家殉，然则名之为叛所乐矣；而湖健卒不得其名，顾名之为叛不得也。湖健被执，昂首就讯；讯者曰：『若何弄兵』？大言『兵汝』。且讯及其党；曰：『我义士，从我皆义士；死何惧』。与其党皆谈笑尽。

——见原书「列传」卷之三十二

· 阮大铖

丙戌鲁败，阮大铖北归，从征八闽至至衢。有黑内院者，事戎马而好声哦，大率所谓边关调也；大铖以所制剧本「春灯谜」等上之。过自诩，以阿黑能词令；黑悦，思急显大铖而颇老之。大铖自夸克壮。至仙霞岭，军中率骑上，大铖为牵马步行，示矍铄状，百谕不从；至顶，肠断坐石，辄气绝。

按大铖在越以与马比，摈不录。自分马、阮同呼，即北归无幸；苦无活地，偷息浙东。余尝缉巡江口，得其家报劝归里，大铖不顾；非真自爱其发，愿作逋亡也。或云士英死，百计乞怜；扬鞭而白日有见，堕崖死。

论曰：杨维垣之引帛不是杀身，乃是无处可活不如死，犹欲以死欺人。阮大铖之渡江不是扈驾，乃是无处做官不如走，又复以走谋官。究竟欺不成、谋不成，徒死何

益？曰：自屠较捷於法司耳。

——见原书「列传」卷之三十二

· 黄斌卿

黄斌卿，字虎痴；福建莆田人。崇祯中，为舟山参将，属蛟关总兵王之仁部下。弘光初，谋代之仁镇蛟关，不得；遂与之仁隙。寻移镇九江，以征蛮将军西拒左师，有功。

南都败，唐王起八闽，鲁王监国绍兴；之仁入严兵鲁西兴渡，斌卿乃走闽。以定策勳，封肃鹵伯；郑氏忌之。斌卿仪表丰伟，两目红丝贯睛，吐音动听；力任北征事宜，唐王心膂仗之。遂请离郑，以数百人屯舟山观变。南京监军荆本彻败崇明，海走；斌卿乘危并其军，本彻见杀。而宁国之仁奉鲁命，分师舟山为犄角。斌卿以□故，禁不得入。及丙戌鲁败走台州，之仁退入海，欲依斌卿；则伪请共击叛将张国柱，忽反兵内劫之仁，尽沉其眷属，之仁死国。嗣监国自台州往憩舟山，斌卿又不纳。唐事坏，永胜伯郑彩奉监国入其营，屯上螺州；乘王祈建宁之胜，破兴化、攻福州，略外县几尽。戊子三月，建宁败，监国势不竞；会彩擅杀鲁义兴及熊阁都，监国弃闽，遂保南田岛。

张名振者，故石浦游击；监国中，扈蹕海上，挂定西将军印。常以水师战崇明败绩，欲退休舟山，斌卿意沮；还保监国南田，合力破健跳所。鲁进封定西侯，遂勉与斌卿共事。松江内镇吴胜兆北反，潜约舟山合应，斌卿不预盟；及名振舟胶误期，胜兆被杀，名振得鲁都御史沈廷扬者代死计脱，复命南田。而名振有故部阮进者，初海盗也；久，不善斌卿。名振每语激进，待衅曲算舟山。又王朝先，四川苗舍人；归朝，授千总，为诸流所裹去。斌卿□以武职，□四川□部之；寻守邳州。国变後，从之仁子鸣谦守蛟关。斌卿以父故部，请於鸣谦，鸣谦未可；偶以鸣谦命，扁舟至舟山被击，朝先堕水。及缚见，斌卿佯惊吐舌；亲解其缚，礼以上客。顾朝先性疏率，而斌卿以沉挚固防之。朝先郁郁不得志，请移镇鹿颈头；此海中里许山也，去宁波最近。内地剃发者率归之，众至三千余人，走糗常百里。朝先有义侄黄大震者，为斌卿部镇南将军；得罪斌卿，顾无意即杀之。而震惧，微服即鹿颈求救；朝先遂欲仗以报复，以水师不足，遂驰书南田，邀阮进共事。名振许之，助以大舰四十号至鹿颈歃盟，奉鲁监国直抵舟山。斌卿以无复唐命，不能逆拒；轻身上监国之舟，将以地狭粮寡为辞。监国温谕，斌卿伏听；朝先令大振伪报军机突入，猝刃陷斌卿左胁死。名振乃大言：『监国之来，代唐恢复；肃鹵原部，自应协力』。众帖。复以监国之命，哭祭斌卿，葬之以礼，优养其妻孥；部下陞赏，无分彼此。是役也，名振实忠诚，苦欲安监国为此密计。久，肃鹵故部五、六千人稍稍疑之，或走款内地。

朝先意杀肃鹵可自大，而束以监国之命，权归名振，中恚；遂欲大露名振初主使状。名振恐丛众怒，遂明指朝先擅杀斌卿忘谊，不赦；嘱阮进粹以健士晨即朝先帐中。朝先未衣，奋夺刀杀进数人；势不敌，走阁部张肯堂邸。肯堂请避入内室，朝先顾身裸，不肯入；反与进对仗庭中，□骨倒地，中鏢死。朝先部前锋挂印总兵张跨子济明与吕廷纪踰墙坠城，劫进舰舵工，舣宁波内地，就款於北镇张杰军，愿以身导入舟山。济明曰：『陆师万不宜水战，唯顺风直■〈扌互〉舟山之麓；身首裹牛皮、绵絮，可以当铙炮无患』。然进集巨舫当要路，严守。辛卯，北师每出不利。十月，督师陈誓师必进无阻，误更三鼓为五鼓，早发；会大雾，对面不见人。南风顺发，已过进所汛，不觉也。已登岸，进死，舟山堕；其□内迁。

论曰：肃鹵之狡而忌，无大志；荆监军、王宁国之被残，颇为神人所唾。而或犹以怒涛三日为肃鹵而生哀，岂犹不忘唐隆武之所遣欤！

——见原书「列传」卷之三十二

· 外藩列传 ·

台湾（附舟山及海上诸屯）

· 台湾（附舟山及海上诸屯）

台湾者，系和兰国入贡泊舟候命处。地接爪哇、大泥，与佛郎机更密迩。万历中，忽请通贡，叩闽；闽人李锦劝其酋麻韦郎垒澎湖屿逼漳，赂税监高采可得志。於是伐木驾厂，锦导彝入；采竟与盟，且许开贡。会材官沈有容奉语声走之，其国始习战；所云红彝铙，较佛郎机更利。已而，竟使通贡泊舟澎湖候命下；许从彝几何、贡物几何，然後可。久之，从澎湖深入，筑城；分红彝守之，名为台湾；去澎湖六程耳。所云湾者，西洋货船通东彝必湾此；为两洋扼要。所以中溜既急，拥为水槛，高傍溜数丈。自漳州发舟，必横跨水槛，然後至澎湖，最险。而澎湖之通台湾水道多礁，隐见不一，舟冒之必碎。又列炮两当的中，易守。其地阔二千里，袤倍之。气常春，多露可以当雨；所植久旱不枯，食物饶於内地。多野马，差小；可乘。亦多苗峒不化，多土目，不通语言。

初，郑芝龙大海中，常於澎湖外设市，税诸洋之货，以是富甲诸倣。及归款，诸洋犹警伏也。芝龙纳款，子国姓成功壬寅以部将曹文龙、马信之谋，会海水大溢，自厦门舟师前，拂礁而进；红彝之守不固，遂有其城，而令其子经守厦门原汛。已而红彝王子内朝，以失其故城，愿合力攻厦门，厦门不支。会延平王成功薨，长子经嗣立。台湾初称东都，改明京，以候桂王之辟；已不克至，乃改东宁国。复筑奉天城於对渡，以居宦东宁者。嗣王不敢称藩，乃其臣无不藩前者；所奉正朔，犹以永历行。时诸峒岁有常贡，不过獐、鹿、虎、豹之类，舁委界口；不知所为礼也。披

皮掩下体，界口中国人有店，以嬉戏小具悬壁，听峒人来观，峒人把弄移时，以形语上值，辄取去；必委所有於界口，任取之，不失信也。

按舟山，古昌国县。洪武中，设参将一、巡检二，属定海县。旧出一状元，名张信；城中有状元桥，信子孙犹有在也。与金塘两处，人物颇繁殖。太祖虑积奸，议迁其人入内地；有王姓者疏请免迁，诏狱踰年。或言王□□，得召见；哀祈，竟获允，释王还□。

厦门，联闽界；郑氏□□□迹处也。鲁监国十年，国姓成功尝驻师於此，改称思明州。地仅三十余里，宿兵数十万；大约后处海舰，得洋税以食，闽师不能难。时□四屯为呼应：张煌言驻临门、陈文达驻玉环山、阮春雷驻楚山，而牛头门亦宿劲旅。後思明失守，四屯顺逆不一；惟煌言隐临门之范澳，死难最烈。

鹭门，亦闽界。鲁监国元年，尝就永胜伯郑彩保此。四年，乃间走壶江、琅琦山等处。阁部钱肃乐卒，葬琅琦，骸骨不归。鹿颈头，煌言尝治兵其处。而金门，则鲁王监国之十年，始保踣於此；至壬寅，薨其地。……

……又按中原一大块，得台为外障，故文物与边徼不同，盖包络完也。或云：自金门一夜至明辰、已可到澎湖，为一千六百里；澎湖至台湾，□□之。台湾峒人，上贡时亦知稍披衣缕；退则□□□□□□□□□□□□釜甑。□□筒二节实□□□□□□□□□□实□□□□覆草为庐，其聚□□□□土官。俗捕鹿，鹿舌以供□□□□啖之；私其舌有罪。男女皆披发。曾杀人，则绣其身，□□□众以为豪惧豪。以红布为宝，治石室中藏之。生女出红布聘偕，视为後嗣，倚衣食以老。偕生男而不女，则以为绝嗣，无靠。女复生女，若曰此世家云。

——见原书「列传」卷之三十三

· 外国列传 ·

日本国

琉球国（毘舍耶）

和兰国

· 日本国

日本，古倭奴国。绾波诸彝，倭奴最大；东高西下，势若蜻蜓，古亦曰蜻蜓国也。国主世以王为姓，群臣亦世官。地分五畿、七道、三岛；又有附庸国百余，拘邪韩

最大。其俗：男子魁头断发、黥面文身，妇人被发屈珓；皆跣足，间用履。倭王最雄长者，居邪马台，即邪摩维；历汉、魏、晋、宋、隋皆朝贡，稍习华音。唐咸亨初，恶倭名，更号日本。萨摩之鹦哥里，其民备礼，重为邪；独伊纪之头陀僧三千八百房，颇羯荼嗜杀，而萨摩、肥後、长门三州之人最喜入寇。诸州郡统於山口、丰後、出云三军门；三军门相掎剽，国分为三，而总属山城君。以後丰後独强，国人服之，愈於山城君。

元世祖时，以其不服，将兵十万征之；风覆鯨海，终元世不相通也。

高皇即位，方国珍、张士诚既诛，诸豪亡命，往往纠彝入寇。洪武二年，使行人杨载谕其国王良怀，赐之玺书；且曰：『诏书到日，臣则奉表来庭，不则修兵自固，惟王图之』！王不省，复寇边海如故。上复使莱州同知赵秩责让之，良怀语秩曰：『昔蒙古辄小国我，使赵良弼忧我好语；语未既而兵至也。赖天之灵，波涛覆没；使者亦赵姓其後耶』？秩为言『中国大明天子，乃扫清蒙古者；秩亦非良弼後』。王气沮，礼秩；遣僧仲猷等八人随秩奉表称臣，而掠如故。

明年，上遣僧祖阐、无逸开谕之，王复入贡，而掠如故；乃令德庆疾廖永忠造海船御之。时日本国中，有持明者与良怀争立，不定。

七年，来贡，无表文；其臣号征夷将军者，有私贡。上并却之，移文责王。

九年，贡有表文，语谩；复责王。

十二年，来贡，又无表文；乃安置使僧於陕西番寺。

十四年，王良怀入贡，乞还安置诸僧使；许之。

明年，复来贡。於时有林贤之狱，曰故丞相胡惟庸通日本云。林贤者，以金吾卫指挥备倭明州，惟庸阴使人谕贤送日本使出境；则诬指为盗，获以为功。事觉，惟庸不得已，佯奏贤失远人心，上谪居之倭中。既而，惟庸请宥贤复职；上从之。遂谓惟庸以密书奉日本王，借精锐人为用。王遣僧如瑶等四百人来；又云『烛中藏火药、兵器，四百人者皆精锐也』。时惟庸死三年矣；上乃发四百人者云南守御，而遣使责王良怀不恭。王答书谩；有云：『岂谓中华之有主，焉知彝翟之无君』！而终以「人发杀机，天地反覆」数成语。上怒，复安置其使僧番寺，却其贡；而令礼部尚书责问其国王，略曰：『大明礼部尚书致意日本国王：王居沧海之中，不奉上帝之命，肆侮邻邦，纵民为盗。上帝将假手於人，祸有日矣。王之国，始号曰倭；後恶其名，改为日本。自汉、魏迄唐、宋，皆遣使奉贡，每得封爵。若叛服不常，构隙中国，则必受祸；如吴大帝、晋慕容隗、元世祖皆遣兵征伐，俘护男女以归：千数百年往事可监也。王其审之』！盖未尝一及密书事。又令礼部与书其征彝将军，

但云『如瑶陈情饰罪，至尊优宥』；且云：『足下畜无徒沙门，忘中国之宽大，构是非於两端』。竟未常一及烛藏火器事。自是，着祖训绝之，仍名之曰倭；而令信国公汤和筑登、莱至浙沿海五十九城，民丁四调一以戍。

二十年，置东西防倭卫所。随遣江夏侯周德兴筑福建海上十六城，设卫所垛，福建漳、泉人为兵戍之，历遣公侯练兵海防。

永乐初，诏太监郑和等率舟师三万下西洋。日本国王源道义者，遣人来贡，并缚献犯边二十余人。上即令其使人治之，置甑中蒸死。明年，赐王冠服、文绮、金银、古器、书画；又给勘合百道，令十年一贡，毋过二百人。寻命都御史俞士吉赐王印诰，册封道义为日本国王；并封其国之山曰寿安镇国山，亲制文勒石以志。道义卒，子源义持立；然亦时来寇边，王不知也。

十五年，遣礼部员外郎吕渊谕王还所掠，王使人谢罪。

十七年，倭以数千人分乘二十舟，直抵马雄岛，进围望海埭。都督刘荣发伏出战，断其归路，贼奔入樱桃园；荣合兵捣之，斩首七百四十二、捕生八百五十七。召荣至京，封广宁伯。时指挥同知侯端者，破贼于金山。端负殊力，能一手挽石，猁猁行十余步；策马坊门，交手拥楣，以足挟马悬之。贼入金山，与巷战；偶一剑堕地，所乘马口噉授端。贼惊走，潮退，胶贼十余艘；大破之。

宣德初，来贡，与约舟毋过三、人无过三百、刀剑毋过三十。

八年，源义持卒，赐吊祭。

十年，王遣使贡谢。倭自得我勘合，方物、戎器备载而来。遇官兵，矫云入贡；贡即不如约。守臣幸无事，辄请俯顺彝情，主官者为画可；条奏辄云：後不为例。後至，亦复如之。我无备，即肆出杀掠，饱扬去。

宣德末年，海备严，贡稍如约。

正统四年，寇大嵩，入桃渚。官庾、民舍，并见焚灼；驱掠少壮，发掘坟墓。束婴孩竿柱，沃之沸汤，视其啼号为笑乐；捕孕妇忖男女，剖视之，以中否为胜负。城野萧条，过者陨涕。诏以重师守要地，寇稍息。

七年，来贡；复寇如故。

成化初，寇宁波；知我有备，矫称进贡，守兵御之。倭立篙沙中，悬灯其上；朝赴之，则已乘潮去矣。

成化四年，其通事林从杰等三人随使臣入贡；奏系宁波冲人，幼被掠，为通事，乞便道省祭。从之。

成化五年，来贡；通事阎宗达教诱诡称遭风，丧失方物，乞给价回国。诏许究主使（宗达奉化人）曰：『若再反覆，族其原籍』。是年，使臣清启凌轹馆仆，残杀市人。

弘治八年，使寿莫来贡。

正德六年，使宋素卿等来贡，求祀孔子仪注；不许。素卿音，故鄞人朱缙；变姓名亡入日本，国王源义澄悦之。至是，与族人朱澄耳目为奸利，厚赂阉瑾，得赐飞鱼服以归。居久之，国王为源义植，孱不能制诸岛；诸岛竞利则先贡，益无专制。

嘉靖二年，其西海道大内谊兴国遣僧宗设入贡。居数日，素卿设为南海道海川高国所遣，与僧瑞佐同来。故事：番使至宁波有宴，先至者居上坐；素卿后至，贿市舶太监先阅其货，坐上坐。宗设等不平，攻瑞佐，杀之；追逐素卿，窜慈溪，纵火大掠。指挥刘锦与战死；宗设夺舟掳指挥璉去。久之，镇巡官乃捕得素卿；而宗设党中林望古、多罗等漂入朝鲜国，朝鲜王擒之以献：俱论死系狱。

四年，琉球贡使归，使转谕日本国王，捕送宗设及佐谋倡乱者。会琉球使溺水，而国王源义晴反附琉球来使，为素卿乞宥；并请复修贡献。诏并释之。

给事中夏言乃上言『祸起於市舶』；礼部请罢市舶者数年。而私舶岁至，不即售，辄赙奸商。久之，奸商欺负，不啻千万；索极，则投贵官家。彝人候久不得，颇构难，有所贼杀；贵官家辄出危言撼当事者，兵之使去。彝人大恨，盘据岛中；并海不逞之民，若生计困迫者辄归之，时时寇沿海诸郡矣。至有衣冠失职诸生，颇为向导；於是王忬、徐必欺、毛醢之徒皆我华人，金冠、龙袞称王海岛。二十五年，诏以都御史朱纨兼巡浙、福。纨严匀连主藏禁，犯者戮不赦；上书镌暴二、三贵官家。於是声势相倚者大譁，切齿纨；噤言官诋诬纨狱。纨愤，仰药死。而有功海道柯乔、都指挥卢镗，皆论死系狱；盗益肆。

先是，歙人王直者，少任侠，好出禁物西洋，致富不貲；彝人信服之，货至一主直，为侖。纨禁既严，诸奸商藉是益负侖，竞责直；直无所出，招亡命千人逃入海，推许二者为帅，引倭结巢衢之双峙港，侵淫蚕食。纨与镗既连捣败之，许二逸去；直收合其余众，更泊他峙。而广东有海贼陈四盼者，自为一党；直计杀之，叩关献捷，以求开市。官司弗许，赐米百石而已。直大诟，泛米海中，益入盗。三十一年，直主倭人，以万人突入定海关；寇温，破黄岩，劫余姚、山阴等处。诏提督王忬巡视福、浙，以参将俞大猷、汤克宽为分守。明年，破其寇温倭，火贼烈港。自是，浙东西及苏松、淮北诸郡，无不骚害。直更造巨舰，伪称徽王；部署叶宗满、徐

惟学、陈东等为将领，汪汝贤、王澈为腹心，而三十六岛之夷皆听指使。寻攻破昌国卫，犯太仓，反击官军；其有失舟者四十人，突至浙江乍浦所，往来平湖、海宁境上，杀把总一、指挥四、千户百户七、县丞一，所伤官兵则数百不止。倭性勇而戇，每战赤体舞刀前，不复别生死；闽、浙亡人助之者十六、七，大率皆狡悍、善设伏，能以寡击众。而内地久宁，目不见寇；遇辄靡溃。沿海诸郡，仅仅保孤城；贼往来聚散，如入无人。吴越中，村落市井故称殷富者，半为丘墟。而柘林、川沙洼二处，陈东寝处之矣。於是改忬为巡抚，出卢鏜以都指挥备倭福建；而克宽以副总兵总督金山。时倭留内地三月，鲍去。而倭酋萧显者，失风漂崇明之南沙；方攻围之，而众益至，克宽捷漂缺，斩首七十三级、生擒十四，竟坐南沙败，革职立功。久之，萧显逸。又明年，忬与克宽等连败贼於上海之习家坟、大门墩、采陶港等处，斩首百余。贼乃北犯通、泰，且有漂入青、徐之界者；山东、辽东大震。已而陷嘉善、犯海宁、袭崇明，掠苏州、松江及崇德。诏以尚书张经总督浙、直、山东、两广、福建六省，而以李天龙代忬。时参将俞大猷等败贼吴淞及新泾桥、罗店，而参将许国陷伏采陶港溃，溺死者千人。诏逮故应天巡抚屠大山，黜为民；国与参将李逢时，皆论死。已而贼犯乐清、黄岩、东阳、永康，分犯松江、嘉兴、秀水及湖州。屠嘉善，县官弃城走，百户赖荣华死之。三十四年，复犯乍浦、海宁，陷崇德、攻德清，杀把总、指挥八人。上切责经，而令工部侍郎赵文华出祭海，视师。适田州土官岑猛妻瓦氏、东兰等州土官韦世用等狼兵至，稍有斩获；文华遂以贼易办，促战连败，乃劾经，而荐所善御史胡宗宪能。是时徐惟学死，其子海，益以倭合陈东之众至数万。宗宪行兵颇能济以权术，贼至嘉兴，则使人载酒，见贼佯弃去；亦皆下鸩卖酒家，贼往往醉不起。

总督经连败之於川沙洼、石塘湾、王江泾，擒斩首千九百八十有奇。自倭难以来，为第一捷。然劾经疏已行，而文华引为己捷，经竟坐死西市；诏以应天巡抚周琬代经。则倭犯常熟、上虞、会稽，西历杭之於潜、昌化，至於杀县令及乡宦极惨。文华无以自解，复阴言琬病，天宠涵酒坐为民；诏以杨宣代琬、宗应代天宠。贼有从绍兴高阜奔突至，窜歙流劫绩溪径南陵无阻者。贼中有能以手接箭，掷地无害，逼太平官兵败之。趋南京贼酋红衣黄盖者，骑而犯太安德门；越秣陵关，信宿溧水县，趋宜兴、武进，一日夜抵无锡；苏松巡抚曹邦辅大捷杨桥，歼之。盖高埠贼始六十七人而已，而行数千里、流劫数郡，入二县，杀一御史、一县丞、二指挥、二把总，被戮四、五千人，历八十余日始灭。於是宗宪合邦辅浙、直兵七道会剿陶宅，倭大败，失千二百人；而邦辅别捷浒墅。文华乃忌邦辅论劾，谓避难而就易；诏戴罪自劾。时指挥王沛捷礞门，参将卢鏜生得真倭八十余人，斩首三十八。而倭益至，且犯福建之莆田镇海、镇东等卫，千户丘环、指挥童乾震死之。久之，贼有焚巢出海者，追击之；甫胜老鹳嘴，复大败之於嘉定高桥。时文华谩语归朝矣。盖贼先後至，皆王直所遣，将兵者初不知之也。宗宪独收直母妻及子寄狱，至是出而善待之；谕生员蒋洲、陈可愿，名为移谕国王者，出伺直计招之。至是，见直於五岛；直骑从挥霍也，曲诱直，直颇以待其家人厚，欲降，而阻於其下叶宗满等。直有姬少华者，金陵倡也；故与善歌少年沈郎昵。时沈郎亦窜岛中，闻少华歌，窃听之；

少华见沈郎，相目浹睫，阴幸直败，冀与沈郎归也。间语直：『君谓海中王沉沉可百年哉』？直心动。遂留洲为质，而令宗满及义子王激等随可愿入报，计杀贼自赎，求开市通贡。诏许之。而徐海方拥萨州彝来也，一由定海入、一由松江入、一由海门入，各数千人；而身拥万人逼乍浦。时宗宪已代杨宣，而邦辅被逮。倭陷慈谿、劫金山，杀千户二人於江中；将军宗礼败贼崇德之三里桥，斩首九百。会桥陷，礼与镇抚何卫死之。时直部毛列果反向击海，宗宪纵金，使烈招海；海解桐乡之围。海转说东，东疑未决；会吴淞贼万余西蹂，宗宪啗海金帛，共击吴淞胜之。俞大猷遮击，斩首千五百级。海心果附，独其书记叶麻心异；宗宪又使间海，缚麻以归，而东终未下也。海有两侍女翠翘、缘珠，最昵；宗宪阴使持簪珥翠悦之，日夜说海缚东。又令叶麻伪书与东，使反兵杀海；而故泄之海，海益感宗宪切。东者，萨摩王弟帐下书记也；部最强。会文华复以总督尚书出视师，则佯欲击海者；宗宪为力解之，使缚东以献。於是宗宪劝海，厚贿萨摩王弟，乞东代为书记。东果之海所，海以上之军门，复以其众击诸倭有功。然海意尚犹豫，未即至；请於宗宪，得自舍便地。宗宪使海居沈家东庄，而以西庄居东余党；中绾河为堑。於是诈为书遗东余党曰：『海将尽汝等以悦官兵』。东党怒，伏逻卒伺海；海疑，挟两侍女将间道投诣军门，而为东党所截。海中槩，众乱；而宗宪所密召永顺诸兵亦至，烈焰焚东庄，斩首千余级，卤面黑自死者三百余。盖宗宪所遗海浆米有毒，为所中也。得两侍女，问海所在？女指河况处，遂起海斩其首以归；则饮至辕门，令翠翘行酒，翠翘歌宛转悲怨，诸将吏皆怜之。宗宪曰：『是说海二东者哉』！令再嫁一酋。翠翘悲曰：『去一酋，又事一酋；妾不能为』！投钱塘江死。而先时寇自黄浦七丫出海者，俞大猷败之；自仙游趋彭溪镇者，卢镗败之；分掠海门者，把总张成败之；流入常镇者，总兵徐珏败之。惟定海舟山倭据险结巢最坚，宗宪合大猷率川、贵兵九百人乘雪焚破之：江南倭尽矣；诏加文华少保、宗宪右都御史。三十六年，倭犯江北诸州县者，副使于德昌、参将刘显大败之，贼尽驾舟投洋去。时蒋洲留王直者久，得遍谕诸岛。倭首德阳附舟表贡，而宗满、激等入报宗宪者，宗宪待之如布衣交；则阴语直曰：『胡公忠信可托也』！直乃与洲来，尚严卫岑港，不即入；宗宪纵激归。直令激再至，宗宪与连寝，饮大醉齁齁寐。凡诸前後请战书十余通，悉置之几上；夜作寐语曰：『吾欲生若，若故不就，奈何』！激闻寐，官吏军民战及俘死不下数十万，转漕军食、横赏赐，乾没入橐中者费以巨万。而福建巡抚都御史阮鄂至以库银数万、绢数百，遣舟六，买之去。而毛烈竟移众南澳山造屋而居，无所不侵突；至流劫湖州，大率掠行人索赎。至四十二年，副总兵戚继光与总兵刘显、俞大猷来攻闽中倭，大破之平海卫；斩首二千二百余级，堕崖溺水死者亡算，纵所掠男女二千余人。继光复追斩贼千余级，报效副总兵汤克宽复擒斩二千余级。至四十四年，连败之通州及三沙，倭寇绝。

及至万历二十年，关白平秀吉起人奴，雄六十六州，窥朝鲜。釜山，与日本马岛对峙；往来互市，通婚媾。猝遣巨酋行长请，而义智与佞僧苏玄、宗逸等疾渡，破庆尚道，掠开城，分陷丰德；执王太，逼釜山，复据平定，走王李昫於义州，八道几尽没。诏以侍郎宋应昌为辽东经略，而李松为征东提督。枢臣石星募得游客沈惟敬

，与游击銜，入倭行间；归云行长愿退平壤以西，画大同江为界。提督松不听，进师平壤大捷；倭酋宗逸、平秀忠、平镇信死於火。参将查大受等复捷江南，李如柏夺开城，前後得级一千八百。四道复，王叟归平壤。提督松轻进逼王京，败绩碧蹄馆，退保开城。诏刘綎、陈璘水陆济师，助援参将大受复尽焚倭龙山仓，倭乏食。监军职方司袁黄请用惟敬议款，而封贡之说起。令游击周弘谟同惟敬往谕倭，果弃王京遁；筑屯釜山，为长久计。王叟还王京，益多防戍。於是沈惟敬以倭酋小西飞入朝就款。而倭复犯咸安、晋州，逼全罗；提督乃令扼南原咽喉，而分守南阳、陕州。科臣张辅言：『倭无故请款，勿堕其计！宜专剿局』。辽镇都御史赵燿亦言款贡不可轻许。已而倭从釜山移营西生浦，送还王子、陪臣。於是枢臣星一意主款，许封、不许贡。二十二年，惟敬复入倭议。惟敬在倭云「和亲」，入朝则云「和好亲密」。言官何乔远、林材、唐一鹏等忿，请罢封。会朝鲜疏请许贡保国，上以初言官为阻挠封贡，诏小西飞入朝面决：一、倭尽归巢；一、既封不与贡；一、勿犯朝鲜，永无异意。以勳裔李宗城充正使，副以指挥杨方亨同惟敬往。明年，礼臣议：『日本原有王，未审存没；关白宜另拟二字，或即以所居岛封之』。不听；上竟许平秀吉为日本国王，给金印，而行长准都督僉事等官。时传日本王现入山城，有文禄三年之历；而小西飞云『王为信所弑』。都御史李化龙遂有六可疑、三可虑之疏；报闻。二十四年，封使方抵釜山；而惟敬先往，私奉秀吉蟒玉、翼善冠及地图、武经，又驱壮马三百、南戈崖骑从献秀吉，私娶阿里马女。正使宗城诣马岛，或言倭情不善；宗城惧，夜弃印敕遁。诏逮就讯，改方亨正使，而惟敬副之。二十五年，惟敬所携谢表不恭，而釜山之倭尚逼王京；於是复议东征。经略邓玠知惟敬为倭向导，缚之；而大发卒困倭梟山，已败绩。明年，檄水陆各师四路相机进剿，复不利。会倭秀吉死，倭意解，逐北屡捷。秀吉且死，令原家康领东北三十三州、辉元领西南三十三州，协辅七岁秀赖。时酋景胜乱，家康起兵诛之；并败辉元，专国政，而以孙女妻秀赖。家康死，语，又窃见诸战书皆不行，则深喜；使其子澄啮指血寓书於直而决之。直乃归宗宪。少华者，私出宝玉赂客效直书，散其帐下诸健儿；遂与沈郎亡去。宗宪益好慰直，令系狱待命。时江南汹汹，言宗宪大得彝金，且活直；宗宪惧，遂易疏唯上裁。诏梟示直，宗满、汝贤发戍边；加宗宪太子太保、叙子锦衣千户，余迁赏有差。而毛烈者，闻直不果赦，怒；与诸彝奋杀夏正，焚舟山观。以德阳去，窜入闽，首尾巢闽中者七、八岁；连犯吴越，所破灭城十余，掠子女、财帛不可胜计传位其子秀忠，称新关白；移秀赖於大板，止给廩食。

及明末，唐藩立八闽，以郑芝龙妻为日本所自出，使人乞兵日本，且许诺；继闻芝龙反唐，怒曰：『几为郑一老所卖』！鲁藩保舟山，命周藩安昌王賁牛、驴等控日本，抵长吉岛，通源将军；将军以扈王诸卿非两榜，轻不信。既而诸生凌士弘，冯京第复奉威卤侯黄斌卿血书以往，适西洋失□三舟抵日本，煞司马者以为敌至，提兵御之；见所为血书，曰：『待捷西洋，可赴汝』。士弘等既归，久之复往；源将军不为发兵，而以诸军需助舟山，又得从诸商分税数万金益饷。

舟山败，北兵欲款芝龙子成功，而希功者请战。成功母死，常以金铸母像，日朝之

；希功者潜袭其寨，攫金母及真珠帘去。成功怒，乃连年发兵扰海上不息。

论曰：蜻蜓自愧其为倭；以倭绝之，可以无後扰边之患。盖自元世祖时，丧师驼海，彼乃启志；既以罢市，而私舶犹通。世庙时，数十年扬波不休，职此之由。然则神庙中困一关白，徒多事；使非其国内乱，且移祸也。六可疑、三可虑，胡充耳不闻哉！

—见原书「列传」卷之三十六

· 琉球国（毘舍耶）

琉球（一曰瑠球，又曰流虬）所辖，古来、太平、玛瑙、七岛。自福建梅花所，利舶七昼夜可至。唐、宋以前，不通中国；隋、元常以兵虏其男女归，卒不至。呼其王为「可老羊」、妻曰「多拔茶」，所居曰「波罗檀洞」。隋兵再虏其男女五千人；元招谕，不从。元贞中，平章高兴檄别将鹵其民百三十。国分三王：中山王察度、山南王承察度、山北王怕克芝（一曰尼芝）。立朝命名，皆以汉字；盖其地初亦就教中国，习知之。

洪武初，使行人杨载诏其国，赐三王印与皮弁冠。已而，三王互相攻，诏为平之；历朝贡。二十一年，以所获元主次子地宝奴居其地。中山王遣世子及国相子来就国学，又有女师生姑、鲁妹二人者亦来就学；上赐赆视中国儒生有加。已而，世子、国相子与云南生非议诏书；上怒，皆治罪死。寻赐闽舟工三十六户，便来往。察度三传，至尚巴志。而承察渡卒，无子；永乐中，封其从弟汪应祖摄山南王事。九年，来贡。长史程复乞升同官王茂国相兼长史，而自言故中国饶州人，今八十一老，乞致仕还乡；许之。其後，山北、山南皆为中山臣尚思达所并。巴志卒，尚忠嗣。正统中，商舶漂广东；巡戍欲戮之以冒功，海道章格不许，奏还其赆。再传金福，卒。景泰中，弟布里与子志鲁争立，失其印。次弟泰久驰奏，诏给泰久印，嗣王。又再传尚圆。成化十一年，贡使还至闽，恣杀掠；诏间岁一贡，贡无过百五十人。传子尚真，以陪臣子蔡宾等五人肄业南雍，处以观光馆；历五年乞归省，报可。嘉靖二年，使往暹罗失风闽界，为我所获；会日本使扰宁、绍，上恐互相间，命转发浙江会勘。寻复令其使正议大夫郑绳賫敕书，转谕日本捕治逋诛宗设等。真卒，子清嗣王；乞留诏敕镇国如安南，许之。十九年，长史梁梓来朝贡。请续造海船四号；诏无违例。二十一年，漳人陈贵与潮阳海舶争利譁琉球，琉球械送贵福建，诬以为寇；上治以通番律，谕王无轻与中国人互市。明年，复令官生梁炫等四人学南雍。初，闽人蔡璟拨赐琉球；其孙廷会充贡使至，与给事中黄宗概亲旧，通馈谒。事觉，下诏狱；上念贡使，姑革赏行勘。会倭寇浙、直败还，世子元发兵邀击，得金坤等六人献捷；上嘉其忠，赆金币。三传宁，为萨摩州倭所鹵；已而得反。时贡物杂倭产，礼部侍郎翁正春以为宜示不绝之绝，准本国所产收解，余携归。四十四年，通事蔡廔报倭战船五百号胁取其东番急，求救；不果。万历中，议琉球奉使，礼

部侍郎李廷机以为夷官请命於京师，使臣即海上可以集事，不必冒死荣外夷；论者谓得大体云。

其地海气蒸溽，鲜霜雪，多飓风、暴雨。国人深目、长鼻。结髻顶右；其有职者，横一金簪。三十六姓後，髻结顶。纤啬好洁，并用色布缠首；黄最贵，红次之，青、绿又次之，白斯下矣；王兼用五色。广袖宽博，制如道服；腰大带布，亦如缠首布之色，分贵贱。以五色陶珠为帘，亦以为盖。大团扇，集鸟羽为之。其民人并缟素，无木棉。屋多茅覆，间以陶。无贵贱，皆草履，脱入室；肃使客，则具冠履。妇人以墨黔手、刺面，为花卉、鸟兽状。髻肖童子总角，不施簪珥、粉黛。工麻缕，富室上衣之外，更用幅如帷，蒙之背上；见人，则以手下之，而蔽其面。下裳如裙，倍其幅，多褶；长覆其足。凡有出入，戴箬笠坐马；女仆三、四从之。地不产铁，爨用螺壳；亦无农器，削木为之。得异味，先荐尊者。居丧数月不肉食，以中元前後日浴尸溪水去腐，附草缠以帛，埋土中；王及诸臣家，匣骨山穴。赋法稍仿古井田，有事始均税；事已，即罢。刑甚峻，犯盗窃，刳腹剜荆。职官尊者三法司即国相，率王母舅、妻父任之。其次有察度官，司刑名；有耳目官，资顾问；有遏闷哪■〈口霸〉官，理钱穀：皆武职大夫，以上世及所辖地为姓名。长史主封贡，不与政事；及通事为文官，以通中国书：乃闽三十六姓之後为之，今仅存七姓矣。七姓男不为国僭、女不为王妃；言语、衣服无别，别以椎结：居中者七姓、居右者本彝也。王日三朝，搓手膜拜。俗称王曰「敖那」、妃曰「扎喇」。王宫建山之巔，国门榜以「欢会」、府榜「漏刻」、殿榜「奉神」。永乐间，常命使为盖宫殿，颇闳敞；然以板代瓦，尚朴素，不致雕镂。亦信堪輿家言，旧南向，後改西向。册封，锡以皮弁玉圭、麟袍、犀带，视二品秩。东去三百里为叶碧山，又东即日本。贩鬻率女倭。市初用海巴，後用日本钱，十当一，如宋季鹅眼綖环。信鬼巫，不知医药。以妇人不二夫者为神尸，率三、五百人白日呼啸，音节凄惨；其魁号女君。王宫藏佛经千卷，儒书有「四书」、无「五经」，以杜律、虞注为经。文弱多学诗、参禅乘。土田砂砾，树艺卤莽。王与臣民分土为禄食，不交徵。山无虎。宴会亦有歌舞。谙汉字，奉正朔。酒以米渍水越宿，妇人口嚼、手槎以取汁，曰「米奇」；间来自暹罗，易醉。凡杀牲不血刃，以水洒而火其毛。武宗常赐玉杯，每出为寿。除陪臣子及俊秀，凡学书及习武以日本为师。进退节以金鼓，甲用皮革。弓梢长，如掘担；射则树地，以两手弯之，可二百步。好斗杀人；度不免，自屠。

从长乐广石出海，望小山浮空，为小琉球。南为东番，盛聚落而无君长。又东隅有彝，鸟语鬼形，袒裸盱眙；或云即毘舍那国。

论曰：国初来就国学，宪庙以後，每肄业南雍，颇奉儒、禅，与朝鲜略彷彿；乃以日本为师则何也？若夫生姑、鲁妹以女师而迄观光大成，至於不二其夫称女君，较中国内政益修矣。

· 和兰国

和兰国，即红彝；俗称红毛番。与佛郎机接壤，时横行爪哇、大泥间。及闻佛郎机据吕宋，互市濠镜，心艳之。万历中，忽驾船称和兰欲通贡，澳彝共拒之；移叩闽。闽人李锦久客大泥，与和兰习；说其酋麻韦郎曰：『请垒澎湖屿而守之；逼漳，赂璫高采，可得志』。於是於澎湖伐木驾厂。而锦先入漳为导，当事系锦，令谕彝还自赎；而璫采竟与彝盟。会材官沈有容出谕夷语中窾，且疏请声剿；彝逡巡去。诏大泥国移檄和兰，无为细人所误。

其人深目、碧瞳，长鼻、赤发。舟长三十丈，五桅，凡三层；四置铜铙，大者长二丈余，一发可洞石城。舵後置铜盘径数尺，称炤海镜；往来不迷。奉天主教。役使乌鬼行巨浪中，如坦道。不习战；已因中国驱逐，始募日本人为先锋。其炮用法过於佛郎机。万历中，宦闽、广者进红彝炮为式，比旧制绝殊；中国遂恃此为战具而不尚弓矢。

崇祯初，刘香寇闽海，红彝挟大艘助香，突入中左，焚我战船，官兵多死者。巡抚邹维琯力拒，却之。

明季，国姓郑成功以舟师入据台湾。台湾者，自澎湖深入，和兰曾筑一城，以其人守之。凡通贡，驻此候命。成功既入，称为东京；又称明京，以候桂躋。桂主不禄，改名东宁（别有传）。

论曰：以和兰之属地存桂年，故复传之在荒服。

——见原书「列传」卷之三十六

罪惟录选辑附录

罪惟录选辑附录

原书卷目

原书编印例言

原书跋一（刘跋）

原书跋二（张跋）

原书跋三（张跋）

· 原书卷目

纪二十二卷

卷一太祖纪

卷二惠宗纪

卷三太宗纪

卷四仁宗纪

卷五宣宗纪

卷六英宗纪

卷七代宗纪

卷八英宗後纪

卷九宪宗纪

卷十孝宗纪

卷十一武宗纪

卷十二世宗纪

卷十三穆宗纪

卷十四神宗纪

卷十五光宗纪

卷十六熹宗纪

卷十七毅宗纪

卷十八安宗纪

卷十九鲁王

卷二十唐主

卷二十一桂主

卷二十二韩主

志三十二卷

卷一天文志

卷二历志

卷三五行志

卷四冠服志

卷五艺文志

卷六地里志

卷七礼志

卷八乐志

卷九土田志

卷十贡赋志

卷十一屯田志

卷十二九边志

卷十三河渠志

卷十四漕志

卷十五班爵志

卷十六陵志

卷十七经筵志

卷十八科举志

卷十九直阁志

卷二十兵志

卷二十一刑法志

卷二十二典牧志

卷二十三茶法志

卷二十四锦衣志

卷二十五宗藩志

卷二十六学校志

卷二十七职官志

卷二十八将作志

卷二十九盐法志

卷三十钱法志

卷三十一数志

卷三十二（上）外志

卷三十二（中）外志

卷三十二（下）外志

传三十六卷

卷一皇祖祢列传

卷二皇后列传

卷三皇太子列传

卷四诸王列传

卷五翼运王国列传

卷六衡运诸国列传

卷七逸运外臣列传

卷八（上）启运诸臣列传

卷八（中）启运诸臣列传

卷八（下）启运诸臣列传

卷九（上）抗运诸臣列传

卷九（下）抗运诸臣列传

卷十理学诸臣列传

卷十一（上）经济诸臣列传

卷十一（中）经济诸臣列传

卷十一（下）经济诸臣列传

卷十二（上）致命诸臣列传

卷十二（中）致命诸臣列传

卷十二（下）致命诸臣列传

卷十三（上）谏议诸臣列传

卷十三（中）谏议诸臣列传

卷十三（下）谏议诸臣列传

卷十四讽谕诸臣列传

卷十五（上）清介诸臣列传

卷十五（下）清介诸臣列传

卷十六乘时诸臣列传

卷十七循谨诸臣列传

卷十八文史诸臣列传

卷十九武略诸臣列传

卷二十荒节诸臣列传

卷二十一播匿诸臣列传

卷二十二隐逸列传

卷二十三侠烈列传

卷二十四独行列传

卷二十五庸误诸臣列传

卷二十六方外列传

卷二十七艺术列传

卷二十八闺懿列传

卷二十九宦寺列传

卷三十奸壬列传

卷三十一叛逆列传

卷三十二列朝诸臣逸传

卷三十三外藩列传

卷三十四蛮苗列传

卷三十五胜国列传

卷三十六外国列传

· 原书编印例言

一、原书「本纪」二十二卷、「志」三十二卷、「列传」三十五卷；其中「启运」、「经济」诸臣传各分上、中、下，「抗运」、「清介」诸臣传各分上、下，实有九十七卷。今依张闾声、何柏丞二氏重订卷次，并计子目，共成一百有二卷。

二、原书前无目录，不编叶号；每卷除首叶外，亦不记卷数。今悉依张、何二氏校订，一一增补。

三、原书水溢火焦、泥涂鼠啮、零落破损、整飭补修之状，具详「东山自叙」。阅今三百年，禁本沈霾不见天日，脱落浆补，视昔加甚；阙文残字，补正良艰。凡经张氏校补者，均作细书侧注，以示区别；偶有疑义，已据「明史」及其他有关系之书谨为订正。

四、原书字有残阙，未经张氏校补而形迹可辨者，均为补完。其成行累字之阙文、蠹损误黏之错失，亦据前条所举各书，略为订补。

五、原书记载「建鹵边防」及「东师入关」，多经涂抹；「建州」、「北师」、「东师」、「满兵」字样，多改「大清」；「安宗本纪」、「鲁王」、「唐主」、「桂主」、「韩主」四附纪及「弘光」、「永历」年号之上，各加伪字。印本悉复原文。其有涂抹过重、点画难辨，无法复原者，仍留原状，以俟读者考辨。

六、原书间有眉批密行细字，似出东山手笔；今仍存留。其为後人点窜，无关宏旨者，一律削除，以清眉目。

七、原书通体圈点，句读间有舛讹；校印之时，详加厘辨。遇有句读难通，咸为纠正；间有失检，读者监之！

八、原书前叶文义未完、後叶又别接他文者，自系脱佚无疑；兹皆补入白叶，以免徒费考索。

九、原书名号、爵里、时地、数量等字，间多留出空格；其他阙文，偶亦有之。今亦一仍原状，以存其真。

· 原书跋一（刘跋）

按「海昌备志」：『「罪惟录」，一百二十卷，查继佐撰』。继佐字伊璜，号与斋；又号左尹，自号东山钓史。崇祯癸酉举人，浙东授职方主事；後不复出。晚辟敬修堂於杭之铁冶岭，着书其中，学者称敬修先生。今作左尹、字非人，实名与字之廋词也。是为本先生手稿，凡本纪二十二卷、志三十二卷（「附录」不分卷）、列传三十五卷；内子卷六，又卷二十一数复，实九十六卷。「致命诸臣」仅标「卷十四上」，裒集至数钜册；且各目间有缺总论者，盖多脱简。然益以「附录」，去一百二十之数相差无几矣。

是书纂述之勤及宗旨之所在，具详「自序」中。先生当时几罹庄氏史狱，故是书存留之日，无一时不櫛膏鑽之惧；乃垂三百年巨帙沈而复见，詎非九原灵爽所式凭欤！惟分目邻於杜撰，诸志繁简失宜，叙事强效欧公，文义转致缺误。又前後重见：如杨循吉分见於卷十三、卷二十，邵宝分见於卷十、卷十六，「方外」内纪来复因「殊域」字被诛，而「回误」内复有「复见心」一条，「闺懿」「女贞」内记武昌女子，而「妇死寇烈」内复出何淑女（即武昌女子），此类不可枚举。又夏言之死等於椒山，不为列传；刘宗周、祁彪佳俱理学名臣、身殉国难，列诸「武略」；以及教匪流贼，杂厕「奸壬」：均於义未安。又史以褒贬为主，究异琬琰之编；如温体仁、周延儒位至宰辅，尤为时论所特注，不为立传，未详何义？又列传後之「列

朝逸传」，亦即「附录」之意，祇限於其人之一节；传中如袁崇焕、阮大铖关系时事至钜，他卷既无专传，实嫌疏略。以上诸端，俱未可以史例绳之也。窃谓列朝史册，典午以後率由官撰，类取文饰。有明一代，前有靖难、後有复辟；此主彼奴，真实湮汨。而名流著作，凡关涉辽事或建州者，大半斥入禁目。「明史」一书，全据横云旧稿；惩国初文字诸狱，趋避无可讳言。是编遗文逸事，足以补正「明史」者实多。虽小有疵类，无伤也。

「备志」引「拜经楼题跋记」谓：『万季野史稿，即系此书』；且引周松霭语，有朱康流、张待轩传及海昌俞子久事以资证佐。今检此书，仅诸王传海宁诸生俞子久匿宗室李兰皋坐诛一事，余均无之；殆系偶同。近沪估有持「石渠书」求售者，谓即季野史稿；以索价过钜，即时持去。惜未稍留互勘，一析其疑也！

乙丑清明节，吴兴刘承干跋。

· 原书跋二（张跋）

右「罪惟录」一百又二卷，海宁查伊璜先生（继佐）撰。左尹之名，「自叙」中已明言其伪托。「清介列传」查应兆传论曰：『盖吾氏有两闽藩，其一毖斋约，亦以清介闻云云；「播匿列传」黑子僧传曰：而听月为余族弟，得临济之传者』云云；其他散见各传，若监军江上诸事：皆可证明是书为先生所撰。惟「自叙」云：『始於甲申，成於壬子』。沈仲方所撰先生「年谱」则云：乙未，先生五十五岁。始着「罪惟录」；历二十年乙卯乃成，年已七十五矣。所序着书年月，略有参差；要当以「自序」为据。序中所云别号东山者，时先生隐居硖石东山万石窝，故云然也。此书「自序」仅言改名「罪惟」，不知原名是否「明书」？

费景韩（姑夫）着「敬修堂历着书目考」，载管芷湘先生所见「罪惟录」残稿，以较此稿少「帝纪」二十二卷、「数志」一卷、「祖祢」至「衡运列传」、「外蕃列传」七卷及「外志」「逸传」等，多「荒节诸臣」、「回回」、「荒服」三传及「谥法後论」一卷。然管先生所见凡两种：一则售於金陵，被装潢割裂者；一则藏於吾乡，佚前二册，或有传无论、或有论无传者：皆非全书。今是书不独「自叙」、「志叙」二篇为伊璜先生手写，即书中诸稿凡行书者，皆手笔也。而又「纪」、「传」皆备，首尾完整；似较芷湘先生所见之本为善矣。

此书虽未标「荒节」之名，然诸臣之传皆在「回回」各传，「外蕃」中亦详载之。「荒服」至「王会」诸国而极矣，今皆在外国传中；则所短者仅「谥法後论」一卷而已。所惜芷湘先生所见二书及是书皆无原目，不能印证；究竟「回回」、「荒服」二传是否分列，抑系後人割裂卷帙强为之名也？

全书「海昌备志」引「金志」云：『一百二十卷』；「书目考」连「自叙」作九十

卷。今按原书「致命列传」仅标「十四上」，而中、下两卷未分；「外志」标为「三十二卷上」，亦未分中、下：是原未定卷，一百二十之数殆武断也。今遵「管目」，增「荒节」一传；「致命」、「外志」承原标之意，皆分为三：共计子卷，序目为一百又三卷，可以复先生之旧矣。「外志」原书附在「志」後，体例不符；今移在「列传」之後。

此书「翼运」、「衡运」二传，即敬修堂「说外」二卷也。据「年谱」，「说外」刊成於顺治辛卯；则「自序」始於甲申之证也。中经庄氏史狱，康熙壬辰（辰疑寅误）系狱几二百日，後更游粤。自粤归隐，始成全书；则成於壬子之证也。在史狱之前，先生已有「说外」、「说造」诸作，则庄氏之史，先生所乐与共事可知矣。史狱之後，庄氏之书毁而不传，先哲亦无敢载笔述其书之情状；然吾意，先生是书必大半以庄氏之书为蓝本而加以笔削者也。惜无确证；所得者，仅「文史列传」焦竑传论中引『庄鑪曰：「致身录」一书，童子皆知其伪，而弱侯宝之』数语耳。然即此，亦可证取材「庄史」矣。

先生是书，最注意者靖难、夺门、议礼、鼎革数事；河西佣、补锅匠等皆为列传，顾佐等皆入「乘时」，则宜乎三杨、金蹇之为「荒节」也。凡「乘时」一传，几皆为靖难、夺门、议礼三事而设。「桂主」之後附以「韩主」、「郑成功」及「台湾」二传，又慨乎言之，则惓惓故国之心可见矣！

是书「谏议」传无杨涟等、「隐逸」传仅至孙一元、「奸壬」传无马士英等，阙帙至多。盖原书每传不连写，又经後人任意装订，先後倒置，无目录可查；故虽阙而不知也。今日既据书补录，不揣荒陋，他日当为之补传以成全书。

袁崇焕、黄斌卿入「逸传」，岂以是非难定耶？阮大铖不入「奸壬」传，则所不解矣！

昔年钞得谈孺木先生「国榷」八十余册；谈先生虽海盐人，国变之後寄寓西山之下，以成此书。今复钞得是书。硖一小镇，东西二山培塿耳；乃二先生隐此着二巨书，幸哉！整理之责，後人所当任矣。

原书向藏仁和吴氏清来堂，今归吴兴刘氏嘉业堂。承翰怡兄借钞，凡六阅月而毕。因记之如此。

辛未六月大暑後三日，张宗祥记。

· 原书跋三（张跋）

海宁张君闾声传录其乡贤查东山先生「罪惟录」既成，卑余数十巨册；曰：『是不

可以不传』！余受而读之，复句刘君翰怡所藏东山手稿互校，知二本文无增损、卷目微异；则闾声所变更也。按原书本纪二十二卷、志三十二卷、列传三十五卷；增子目又八卷，综九十七卷。全书无总目、无分目，「纪」、「志」井然。独「列传」或有总论、或无总论，有总论者亦略不及本传姓名，仅首列一人，前题某某传，余均各为起迄，复不记卷次、叶号。故隶甲类者，往往可移之乙，乃至於丙、丁。闾声以其阔略疏误，重加厘次：有并合者，如「传」卷十二、十三漏载总论，传目无统可系，则以分隶於「经济」、「谏议」二传；有分析者，「武略」、「播匿」原均列卷二十一，则区之为二；有增益者，如参照他本，补「荒节」、「叛逆」二传；又析「传」卷十四、「志」卷三十二为三子卷，以弭其有「上」、无「中」「下」之失；有削除者，如删原不列卷，且仅存一人之「回谏」而纳之於「荒节」中。其他各依其性质，互为移徙者有之；详辨其文义，厘正错简者有之。余恐其犹有未尽，以授何君柏丞。柏丞复举所见，与闾声商榷，更定次第；一如今本，共成一百有二卷。

余惟东山之着书，始於崇祯甲申、终於康熙壬子。原名「明书」，经庄氏史案改易今名；深自晦匿，幸逃禁网。至乾隆时，文字之狱又起；藏者惧罪，不忍投诸水火，取「建鹵」、「满兵」、「北师」、「东人」等字而涂易之，冀免於祸。今笔痕墨影之中，犹可徐返其朔。阅时既久，虫鼠为虐，大者或连篇累叶，首尾不完；小者亦零段散片，破碎华离。装工无识，妄相凑合；文义乖舛，不可卒读。反覆追寻，棼丝稍治。此不可谓非艺林幸事。且名贤遗墨，实为瑰宝；修饰点窜，尤具苦心。翰怡怱怱以原稿印行。顾卷叶淆乱，既经检理；文字残逸，闾声亦多有校补。既取原稿付印，更须摹补校文，姜君佐禹以二本雠对，历时半载始克藏事。佐禹语余：『此盖东山重订未完之书。出狱以还，深惧覆辙，埋首数年，匆匆卒业。「自叙」暨他人分写之本，殆成於此时。其全文中脱数行、合传缺一二人者，或当时未就之稿。有传为清本、而论为手写或全篇手写者，必续访新得，或芟除重撰之作；书尚徐待编排，故各自为篇、篇不记叶。观於「某卷颠倒错乱当重为排定」之言、眉端「入某某目」之注，可以概见。其「纪逸」、「志逸」、「传逸」诸篇，揆之史例，殊多未合；意必当日笔削余材，不忍舍弃，强立名目，附以流传』。要之，东山冒死成书，为有明留三百年之信史，历劫无算，终免沉沦；正不必以其有所疏漏而过为吹求！况张氏拾补，所以弥其缺憾者，尤非鲜也。余尝读「蓺风堂文漫存记」，其所见一本，「志」仅二十七卷；颇疑其何以不符。证以佐禹之言，乃知为初修之稿，而非手定之本；则此洵为最後而可信者矣。

民国三十五年（丙子）六月，海盐张元济。

东山自言：『「罪惟录」得复原题之日，即左尹得复原姓名之日』。今虽仍题所易之名，而原名实已尽人皆喻；九原有知，其亦可以稍慰也乎！